

ა ლ ე ქ ს ა ნ დ რ ე ფ რ თ ნ ე ლ ი.

9(479.22)

# რიჩებული გესეოტი


3/3

იასონ ვირესელიძის გამოცემა.

063 6158.  
03. 1926  
ს უ 6.

რიჩებული გესეოტი

753



ქ. გ მ ხ ი.

ელექტრო-მძეჭდავი სტამბა „ქართლი“.

1914

ორმა გარემოებამ გაგვაძედვინა ამ კრებულის და-  
ბეჭდა.

პირველი ისაა, რომ ქართულმა ყოველდღიურმა  
პრესამ სამართლიანად დიდი ყურადღება მიაპყრო მეს-  
ხეთს, ესე იგი სამხრეთ საქართველოს. ამ მშვენიერ კუთ-  
ხეს უპირობენ მოკვეთას, მოწყვეტას. ჯერ-ჯერობით და-  
ნამდვილებით ვერ გაიგებს ადამიანი, ვინაა ამ ქირურ-  
გიულ აპერაციის მომხრე: მტერი, თუ მოკვეთე.

ასეა თუ ისე, სამხრეთი საქართველო, ანუ მესხე-  
თი, მოწყვეტილი საქართველოს, მეჩვიდმეტე საუკუნის  
დასაწყისში, შემოერთებული კვლავ მეტრამეტე საუკუ-  
ნეს, საღლეისო საჭირ-ბოროტო საგნად შეიქმნა.

მეორე გარემოება ისაა, რომ გამაჰმადიანებული  
ქართველი თვის ისტორიულ „სახეს“ პლატონბს და სა-  
ჯაროდ აცხადებს, რომ მიუხედავად რჯულისა მეც იგივე  
ქართველი ვარ, როგორიცაა ლვიძლი ქართველი ქრის-  
ტიანიო.

ამ კრებულის გამოცემით, რომელშიაც გადმოვცეკ-  
დეთ სამი წერილი: დიდებული მესხეთი, ნახული და გა-  
გონილი და სამშობლო ქვეყანა, გვსურს ინტერესი გა-  
ვულვიძოთ საზოგადოებას. მესხეთისადმი. იგი გაიგებს, რა  
ნატევრის თვალს და ობოლ მარგალიტს დაჲკარგავს, თუ  
ვინიცობაა გაიმარჯვა მტერმა და დუშმანმა და ეშმაკეუ-  
ლი განძრახვა აისრულა. ჩახვდება იმასაც, თუ რა ხიფა-  
თი მოელის იმ ეროვნულ გამოფხიზლება-გალვიძებას.

რომლის ნიშანიც, ჩვენდა საბედნიეროდ, ასე თვალსაჩინო შეიქმნა.


თუმცა გამაპმიდიანებული ქართველი პირს იბრუნებს სამშობლოსაკენ, მაგრამ პირადად ჩვენ მესხეთის დღევანდელი ვითარება ძველებურად გულს გვიშულებს. დიდი, ფრიდად დიდი ეროვნულ-კულტურული მუშაობაა საჭირო, თუ გვინდა, რომ სამშობლო შოთა რუსთველისა ხელიდან არ წაგვივიდეს.

ერთად ერთი საბაბი და მიზეზი ამ კრებულის დაბეჭდვისა სწორედ ისაა, რომ მოაგონოს ქართველს — დროა ვიფრექროთ და ვიზრუნოთ სამშობლოს იმ კუთხეზე, რომელმაც გვაჩუქა კანონმდებელნი: ბეჭა და აღბუღა, შეუდარებელი შოთა, ღვთისმეტყველნი: ექვთიმე დი გიორგი და ნეტარი მამა გრიგოლ ხანძთელი, ეს საკვირველი მნათობი ქართულ სინასი.

### ავტორი.

1 მაისი 1914 წ.

ქ. ტფილისი.



# დიდებული მესხეთი

Sie transit gloria mundi.  
ლათინური ანდაზა.

## I

ვინ გაკაღნიერდება და იტყვდს, რომ მესხეთი ძველად დიდებული არ იყო? ისტორიაში ჩახედული ამას არ იტყვის, ხოლო უვიცი და რეგვენი, ან განძრას თვალებ აბმული ამას არ შეიწყნარებს და არა მკითხე მოამბესავით ბევრს უკადრის შეჰქადრებს რუსთველის სამშობლოს, მაგრამ რეგვენთა და ბრძათათვის არა ვსწერთ ამ წერილს. ჩვენ კარგად გვახსოვს სიბრძნე ანდაზისა: მგლის თავზე სახარების კითხვა ცუდა შრომააო.

ისტორია, გეოგრაფია, არქეოლოგია და საეკლესიო არქიტექტურა ცხადადა ჰყოფს მესხეთის დიდებას<sup>1)</sup>). აწყურიდან მოყოლებული მესხეთის კალთა შავ ზღვასა

<sup>1)</sup>) ისტორიულ მესხეთის ნაწილებია: ახალციხე, ჯავახეთი, აჭარა, ქობულეთი, შავშეთი, ერუშეთი, ლივანა, ჭანეთი. ანუ ლაზისტანი, ტაო, კლარჯეთი და კოლა. ცოტაოდენი ქართველობა საქრისტიანო სარწმუნოებისა შერჩა მხოლოდ ახალციხესა და ჯავახეთს. დანარჩენი ერი გამაპმადიანებულია.

სცემდა, ფრთანი კი აზრუშსა, ტრაპიზონსა და იმერეთს-ზუკარიდან იმერეთს ისე დაინახავდა მესხი, თითქოს ეს ტურფა ბუნებიანი ქვეყანა ხელის გულზე აქვს გადაშლილი.

ასე მოხაზული და მოფარგლული მესხეთი ისტორიულ ქართლ-კახეთის სივრცეს სკარბობდა. წარსულში ამ ღონიერ მანძილზე სიცოცხლე . სდულდა და გადმოდიოდა. პოლიტიკური ცხოვრება იმ ზომამდე განვითარდა, რომ პირველად იურისპრუდენციამ მესხეთში იჩინათვი. ბექა და ოლბულას კანონები მესხეთის ნიადაგზე აღმოცენდა; გაბრწყინდა და მიეცა ერს სახმარად და სასარგებლოდ<sup>2</sup>). საქართველოს ისტორიის მშვენება, მზე და მთვარე ქართველის ერისა, მეფე თამარ, აქ, მესხეთის ნიადაგზე ხშირად ატარებდა დროსა, ვარძიის მონასტრის გამოქვაბულ კლდეთა შორის ბჭობდა სახელმწიფო კაცთან ერთად, ვინ იცის, ეგებ ისეთ დიდებულ საქმეზედაც, როგორიც იყო საქმე ტრაპიზონის იმპერიის დაარსებისა და იქ საქართველოს ერთგულის კაცის გამეფებისა. აქ, მესხეთში, ლვთისმეტყველება ისე აყვავდა და გაძლიერდა, რომ თითქმის გაუთანასწორდა მაშინდელ დასავლეთ ევროპას, ანუ ბიზანტიის ლვთის-მეტყველებას. მარტო ხახულისა და ფარხალის მონასტერთა ხსენებაც საკმარისია ამ აზრის შესაწყინარებლოდ. წმინდა ექვთიმე და გიორგი მთაწმინდელნი, ეს უდიდესი ლვთისმეტყველენი საშუალო საუკუნოთა, ამ ქვეყნის ლვიძლი შეილნი არიან. მაგრამ ყველა ეს მკრთალი ნა-

<sup>2</sup>) ბექასა და ოლბულას კანონებამდე დაიწერა „ძეგლის-წერა“ და „ძეგლის-დება“. პირველი სასულიერო კანონმდებლობაა და ბეორე მხოლოდ მთიულთათვისაა დადგენილი. მაშასადამე ორთავეს ვანაკუთრებული ხასიათი ჰქონდა.

თელია იმ სავსე მთვარისა, რომელიც გამოსცა მესხეთშა პოეზიის სახით. ბედმა მესხეთს არგუნა წილად ერთი უდიდებულესთაგანი მსოფლიო პოეტთა შორის, შეუდარებელი და სხიოსანი, შოთა რუსთაველი, რომლის წყალობით ქართული პოეზია აყვავდა და გაიფურჩქნა ვით მაისის ვარდი, რომლის მეოხებით ქართული პოეზია ვაბრწყინდა ვით ვარსკვლავი და რომლის პოეზიამ „დილის ნავსავით“ დაჰბერა ქართულ ტლანქს და უგემურს შიორ-ლექსობას.

ერიც პურადი, მხნე, გულადი და დარბაისელი ჰყავდა მესხეთს. ვის არ გაუგონია მშვენიერი თქმულება ხალხისა: „პირველ თქმულია ძველთაგან სიდარბაისელე მესხისაოც.

დღეს მესხეთს ვეღარ იცნობთ, აჩრდილი და ნატა-მალია წარსულისა. ჩონჩხი რა არის, ჩონჩხისთვისაც კი ვერ შეგვიდარებია რუსთველის, ბეჭასი და ალბულას სამშობლო, ისე დაკინდა ეს მშვენიერი და სიცოცხლით სავსე მხარე ძველის ერთიანის საქართველოსი. დღევანდელი მესხეთი ერთი რაღაც შემზარავი, თვალ-გადუწვდენელი და უსამზღვრო სასაფლავოა. ქართველი მოგზაური, ქართულის ისტორიის ცოდნით შეიარაღებული, სწორედ დასწეულდება აუარებელ ნანგრევების ხილვით. დღევანდელ თითოეულ სოფელს სამი-ოთხი ნასოფლარის ადგილ-მამული უჭირავს. ნასოფლარს რუსები „ყისთოშა“-ს ეძახიან. ყურთა . სმენა წაილო სწორედ ამ „პუსტო შმა“, რომელიც მხოლოდ, ძალა-უნებურად, სიკვდილსა და უბედურობას მოგავონებს. მერე ნეტა თითო-ოროლას ლამაზი სახელი მაინც არ ერქვას! მაგალითად: ვარდის-უბანი, თივთიკა, მეშურნეთი, ტბა-საწოლი და სხვა. აფსუსია ასეთი სოფლების გაქრობა და

დედა-მიწის პირიდგან აგვა-აწმენდა. ზოგ ნასოფლარის, ანუ ვერანას სახელი ისეა გადამახინჯებული, რომ დიდი შეცადინეობა დაგჭირდება, ვიდრე მიხვდები პირვანდელ სახელწოდებას. აი ორიოდე მაგალითი: ირმის-ჭალა ასე მოუნათლავთ: „კრიჩალა“; საწერეთლო, „საცერეტ“; ბრალი, „ბრალა“; ყანის-უბანი, „კანუბალ“. ერთის სიტყვით, მოგზაური აქ თვალს წყალს ვერ დაალევინებს. მწარე მოგონება გულსა ჰშხამავს და ცეცხლს უკიდებს.

ბორჯომის ხეობას გამოსცდები თუ არა, თვალწინა აგეყუდება ოდესმე ძლიერი აწყურის ციხე, რომელიც საუკუნოებით დარაჯობდა ვიწრო ხეობას. ციხის გვერდით, შიგ შუაგულ გამაჭმადიანებულ ქართულ სოფელში, კიდევა სდგას უზარ-მაზარი ტაძარი, ხოლო სახურავ გადახდილი და ალაგ-ალაგ კედლებ ჩამოქცეული. ახალ-ციხეს რომ უახლოვდები, ასე შეიდი-რვა ვერსიდგან, ს. წნისიდგან, დაინახავ საფარის მონასტერს, სადაც კაი ხანია რუსის ბერები დაბინავდნენ, რადგან ქართველებმა მოვლა-პატრიონობა კელარ შესძლეს სიღარაკის გამო. მონასტრის ზღუდეთა შორის მოსჩანს ერთად-ერთი კედელი, თლილის ქვით ნაშენი, ათაბაგების სამთავრო საზაფხულო სრა-პალატისა. ვინ იცის, იქნება ამ ხავს-მოკიდებულ და დაბზარულ კედლის სიახლოვეს იწერებოდა ბექასა და აღბუღას მიერ სამცხე-საათაბაქოს უკვდავი კანონები! ევროპაში დიდებულ კაცთა ფეხსაცმელსაც მოწიწებით ინახავენ მუზეუმებში, მტკერი რა არის, იმასაც არ აკარებენ, ჩვენ კი ჩვენი კანონმდებლების მიერ აგებული პალატნი მინგრეულ-მონგრეული გვაქვს და, საუბედუროდ, ძალაც აღარ შეგვწევს პატრიონობა გაუწიოთ. ბექასა და აღბუღას სურათიც ვერ შევინახეთ. ჯერ იყო და ახალ-ციხის ბიჭ-ბუქებმა თვალები ამოსჩიჩქნეს და შემდეგ

უვიცმა რუსის ბერებმა კირით გელესეს ვითომდა „ბლა-ლოლეპის“ გულისფვის.

საფარისა და ათაბაგთა პალატის ნანგრევთა ხილვით გულნატკენი მგზავრი დარდის გადაყრას ვერ მოასწრობს, რომ უფრო სამწუხარო, გულ-სატკენს და სამგლოვიარო სურათსა ჰნახავს. ესაა სოფელი რუსთავი. ერი ამბობს, რომ აქ დაიბადა შოთა რუსთაველი, ესაა მისი სამშობლო სოფელიო. გული ნალვლით აგვესება, როდესაც წარმოიდგენ, რომ პარნასის ლმერთთა სწორის, გენიოსი პოეტის სამშობლო არე-მარე ასეთ, ენით გამოუთქმელ, სიბინძურეს შეუპყრია. დღევანდელი რუსთავი ერთი უხეირო, ოთხ-ხუთ კომლიანი სოფელია, რომელსაც აძ-შვენებს მხოლოდ სასუქის უშველებელი ზვინები. რუს-თავში ბინადრობენ ქურთნი, თუ თარაქამანი, ადამიანი ვერას გაიგებს მათსას. მიწური სახლები ამ ყოველ კულ-ტურას მოკლებულ ველურ ტომისა სულ მთლად ასა-ხიჩრებს სოფლის სურათს. ქალნი და კაცნიც სოფლის შესაფერისნი არიან. იმდენი ჭუჭყი დასდებიათ პირსა და სახეზე, რომ თითქოს დაწყი-დაბადებიდგან იქვე ახლოს მოდუდუნე მტკვრის წყალი მათ არ მიჰკარებიათო. ასე-თიც მათი სამოსელიც, დასტამალად ქცეული. დღეს შოთა რუსთაველის მომხსენებელნი ეს ჭუჭყიანი და პირ-უბანელი თარაქამა, თუ ქურთინები არიან!.. უბედუ-რნი! სიზმრადაც არ მოელანდებათ, თუ რა კაცის ნა-სახლარზე ბინადრობენ...

რუსთავი ტიტველა, ხრიოკ მთის კალთაზეა შეფე-ნილი. წინ მშვენიერი პოხიერი ველია დაცუმული. პა-ტარაა, მაგრამ ლამაზი და ტურფა. ორი არ მეგულება ამისთანა მომცემი და ნაყოფიანი ველი მთელს ამ შხა-

რეს. მახსოვს, ერთხელ როგორდაც ქრისტიან მუსეუ-  
ლებს გამოველაპარაკე რუსთავის ველის შესახებ <sup>3)</sup>).

— კაცო, რა ღმერთი გაგიწყრათ, ძილი რომ ღმერთს  
გაუჩენია, განა მარტო ქართველებისთვის? რატომ თა-  
ვისს დროზე თვალი არ გაახილეთ და ეს ნაღებივით  
შეუქანი ველი არ დაიკირეთ? რუსთავის ველზე არ გერ-  
ჩივნათ დასახლება, ვიდრე აქ, მთასა და ჰლაფეზე! განა  
რა ნახეთ სახარბიელო, რომ ცხვრის ფარასავით შეფე-  
ნილხართ მწირსა და გატრუსულ გოხებსა და ხრიაკებ-  
ზედ?

— ბატონი, ბარემ თვალი ჩვენც გვეჭირა რუსთა-  
ვის ველზედ, მაგრამ ვინ გვალირსა! ჩვენი თავგადასავა-  
ლი რომ იცოდეთ, მაგ საყვედურს აღარა ბრძანებთ. წი-  
ნად, თათარი რომ გვეძალებოდა, თხუნელასავით სო-  
როებში ვძერებოდით, მზეზე გამოსვლა უბედურებას გვა-  
უნებდა. ცოლშვილს ისე გვტაცებდნენ, როგორც ქორი  
წიწილებსა. იმ უბედურ დროს ქრისტიან ქართველს  
მხოლოდ კლდესა და ღრეუში თუ შეეძლო სულის მობ-  
რუნება, თორემ შარა გზის პირას როგორ გაბედავდა  
ბინა გაეჩინა. რუსობა რომ შემოვიდა აშკარად ქრის-  
ტიანობა დავიწყეთ, ვითხოვეთ რუსთავის ველი, მაგრამ  
ჩინოვნიკებმა უარი გვითხრეს.

რუსთავის პატარა ველზე ერთად-ერთი პატარა გო-  
რაკია, თითქოს განგებ აქ ვიღასაც მიწა დაუყრიაო. სი-  
მაღლით ორი-სამი საექნია, სიგანეც სულ ათიოდე სა-  
უნი ექმნება. სწორედ ზედ გამოჭრილი ბექია ძეგლისა-

<sup>3)</sup>) თუმცა კარგა ზანია, რაც ს. ბუსხში სკოლა არსებობს,  
მაგრამ არც მუსხელებში იციან, ვან იყო რუსთაველი. რა რუსი,  
განა სხვა ქართველმა სოფელმა კი იცის, ვინც იყო შოთა!..

თვის. აქ რომ შოთა რუსთაველს ძეგლი, ან ობელისკი დაედგას, მშვენიერება იქნება. ბეჭი მტკვარს ზედ თავზედ დასკერის, იქვე შარა გზაა, შოსსე, გამვლელ-გამოვლელი თვალს ვერ აარიდებს ძეგლსა, ისიამოვნებს იმ ფიქრით, რომ შვილნი უმაღურად არ მოჰქცევინ სახელოვანს მამას და იმასაც ხომ გაივლებს გულში, რომ გავერანებული მესხეთი ოდესმე ბედნიერი ყოფილაო.

ნუ თუ დღევანდელი ქართველი ისე დაკინდა, ისე დაძაბუნდა, რომ მცირედი ფასის ძეგლიც ვერ მოუხერხებია შესანიშნავი პოეტისათვის? ერთმანერთის ძიგნამ და ჭორიკანობამ სული ამოგვართვა და განა დრო არ დადგა ერთსულად მოქმედებისათვის? იცოცხლეთ რომ დროა ზურგი შევაქციოთ ჩვენს დამღუპველს საეროვნო სენს, მაგრამ სადაა!..

ბოროტი დედი-ნაცვალივით ისტორიამ დიდად გვაწამა, მაგრამ რა უყოთ! ამბობენ, მშობელ დედას ცველაზე ძრიელ შვილებში მახინჯი და საზოგადოდ ჭირსა, წვალება და ტანჯვას გამოვლილი შვილი უყვარსო. ბრძენთა ნათქვამი მოვამბრუნოთ, ჩვენ დედად გადავიქცეთ და შევიყვაროთ ისტორია, როგორც მახინჯი შვილი. სიყვარული კიდევ როგორიც უნდა იყეს, მსხვერპლს მოითხოვს. უამისოდ სიყვარულს სიყვარული არ ეთქმის. მაშ შევსწიროთ ისტორიის სიყვარულს მცირედი მსხვერპლი და აუგოთ შოთას რუსთავის ლაშაზ ველზე პატარა ობელისკი მაინც!

რუსთავიდან ჯავახეთის შარა-გზას რომ გაჰყვებით, ხერთვისს ახვალთ. ხერთვისიდან ასე 18—20 ვერსის მანძილზე ვარძიაა. ამ დიდებულ მონასტერს წარსულისა ნასახიც აღარ ეტყობა. კლდეებში გამოქვაბულ მღვიმე-მაღაროებს დღეს სამი, თუ ოთხი ქართველი ბერ-მონა-

ზონი შექხიზვნია და შიმშილით იხოცებიან. ესეც საკმარისია იმის სათქმელად, თუ რა შევიწროებაშია და რა გაკირვებაშია ვარძის მონასტერი. ასე გაშინჯეთ მტკვარზე ხილიც ვერ გაუდვიათ<sup>4)</sup>), რომ მლოცველი და მომხილველი მონასტრისა უვნებლად წყალში გავიდეს, ნახოს ვარძია და ორიოდე გროში გაიღოს თვისის სიუხვიდგან მონასტრის სასარგებლოდ „სულის საოხად და მოსახსენებლად..”.

ან კი ვინ უნდა მოვიდეს ვარძიას, როდესაც გარს ქართველი სალტასავით არ არტყია, ვინ უნდა ჩაჰბეროს მონასტრის გაყინულ კედლებს მხურვალე ლოცვასთან ერთად ცეცხლსავით. აღგზნებული სული, ვინ მოიტანს სანთელს-საკმელს და საწირავს, რომ გავერანებულ მონასტერში ძველებურად სიცოცხლე აღუღდეს? ორ-სამს დააჩაგრულ ქართველთა სოფელს გარდა მონასტერს გარს შემორტყმია: თათარი, გამაპმალიანებული და გაფანატიკებული ქართველი, აზრუმელი სომეხი, ქურთი, თარაქმა, ბოშა, ეზიდი, ანუ ეშმაკის თაყვანისმცემელი და სხვა ათასი მილეთის ხალხი. ამბობენ, სამარიამობოდ, შორიდან ბერძნები რომ არ მოდიოდნენ სალოცავად, მონასტერს კარები გამოეკეტებათ.

1) მახსოვს, ამ ათიოდე წლის წინად ტფილისის განვენებულმა ვაკარმა მიქელაძემ ხუთასი მანეთი უანდერძა ვარძიას ხილის გასაკეთებლად. მაშინდელი ტელილის ინტელიგენცია გაოცდა ამ შეწირულობით. ვვონებთ, ეს პირველი მაგალითი იყო, რომ ქართველმა ნაწილი თვისის ქონებისა საერთო, საზოგადო საქმეს შექმნირა და არა თავისს ნათეავებს, რომელნიც, ჩვეულებრივ, ნაანდერძევს ორ-სამ წელიწადს მტვრად აქცევენ ხოლმე. მაშინ გვევონა, ახლა კი ღმერთმა მოგვხედა და სომხებისაგან ჰკუა ვისწავლეთო... ნეტა სადა განსვენებულ მიქელაძის 500 მანათი?

გავკადნიერდებით და გიამბობთ ერთს შინაურს ამ-  
ბავს. შარშან, შემოდგომის პირზე, რუსეთიდან ორი გა-  
ნათლებული მოგზაური: უუკოვსკი და მარკევიჩი ეწვია  
მესხეთს. ბარათი მომიტანეს ტფილისიდან თ. დ. ზ. მე-  
ლიქიშვილისა, რომელიც მწერდა, — უუკოვსკი ჩემი კარ-  
გი მეგობარია და გთხოვ არ დაიზარო და მესხეთი აჩვე-  
ნეო. დიდ მწუხარებაში ჩამაგდო ამ თხოვნამ. რა უნდა  
ვაჩვენო-მეთქი, ვფიქრობდი. რაც დარჩა მესხეთში, ან  
ჩვენი ალარაა, ან თუა ჩვენი, სულ მინგრეულ-მონკრეუ-  
ლია. ერი მაინც რომ დარჩენილიყო ჩვენი, კიდევ ჰო, მაგ-  
რამ, საუბედუროდ, ქართველობაც ალარაა. გზაში, რა-  
საკვირველია, შეგვხვდებოდნენ ჩალმოსანნი მაჭმადიანნი,  
ან ზოხოხ-ქუდიანი თარაქამები. ხომ ვერ ვეტყოდი ცნო-  
ბის მოყვარე ტურისტებს, (მერე რა ულმერთონი არიან!  
ყველაფერს გაფაციცებით ადევნებენ თვალსა, ყველაფრის  
კვლევა-ძიებაში არიან, ყველაფრის გაგება და შეტყობა  
ჰსურთ ხოლმე!) — აი ესენი არიან თქვენი კარგი ნაცნო-  
ბის, ტფილისის მარშლის, თავად მელიქიშვილის, თანა-  
მემამულენი-მეთქი!

ტურისტებმა მთხოვეს, ვარძიაში წაგვიყვანე, ბევრი  
რამ გაგვიგონია ამ შესანიშნავ გამოქვაბულ მონასტრისა  
და იმის ნახვა გვსურსო. გვიბრალა ღმერთმა და კოკის  
პირული წვიმა წამოვიდა, ორ დღეს ალარ გადაიღო.  
ვარძიას ვერ წავალთ, გადაჭრით გამოვუცხადე დალონე-  
ბულ ტურისტებს, მტკვარზე ხიდი არაა, წვიმისაგან  
მტკვარი აღიდებულია და ფონშიაც ვერ მოვახერხებთ  
გასვლას. დაკმაყოფილდნენ ამ პასუხით, საფარა მოია-  
რეს და ტფილისს დაბრუნდნენ. რომ მიმეუვანა ვარძია-  
ში, სწორედ სირცხვილით დავიწვოდი, — ისეთს სილა-  
რიბესა, სილატაკესა და აოხრებასა ჰნახავდნენ მოგზაურ-

ნი. მე კი ამგვარად გადავრჩი ეროვნულ მწვავე სირცე-ხვილსა და თუ, მაინცა და მაინც, თავიდან ვერ ავიტოლებთ ჩვენი სიბერიას და აოხრების გამოაშეარავებას, დევ სხვამ, ჩემზე ბედნიერმა, და, შეიძლება, ნაკლების ეროვნულის გრძნობით გამსჭვალულმა ქართველმა იყისროს სამწუხარო მოვალეობა და უამბოს უკხო ტომის კაცს—თუ რანი ვიყავით გუშინ და რანილა ვართ ამ უამად.

ჯერ-ჯერობით მესხეთის დანარჩენ ნანგრევებს თავი დავანებოთ და სხვა საგანზე ვიბაასოთ.

## II

ვინც კი ღრმად ჩაუკვირდება ირაკლი მეორის ცხოვრებასა და მეფობას, უეჭველია, შეამჩნევს, რომ სახელოვანი მეფე დაადგა დაფლეთილ და დაწიწუნილ საქართველოს შეკრებასა და შეერთებას სწორედ იმ სახით, რა სახითაც მოქმედობდნენ რუსეთის დიდნი მთავარნი, ესრედ წოდებულნი „რუსეთის შემკრებელნი... განსხვავება მხოლოდ ხერხსა და სახსარშია. დიდნი მთავარნი მოქმედობდნენ თავისის ძალ-ლონით, ნელ-ნელა, მაგრამ მედგრად მიდიოდნენ წინ და გზას არ უხვევდნენ. ირაკლის კი ჰსურდა სხვისი დახმარებით გაეკეთებინა ერთბაშად ისა, რაც საკუთარის ძალ-ლონით უნდა გაკეთებულიყო ნელა-ნელა და აუჩქარებლივ.

ამგვარად პოლიტიკური იდეალი ირაკლისა საქართველოს შეკრება იყო. მისი მეფობა მალე ქართლ-კახეთის შეერთებით გაბრწყინდა, მაგრამ ქართლ-კახეთს ჯერ კიდევ ბევრი აკლდა. კახეთს მტერმა გოსწყვიტა კახი, საინგილო, ქართლს კიდევ მთელი მესხეთი. ეგები

ქართლ-კახეთს ეს ვარამი დროებით მოენელებინა და აეტანა, მაგრამ არა ხერხდებოდა, რაღვან, საუბედუროდ, მტერი სწორედ ამ ორი კუთხიდან ასმევდა საქართველოს სამსალას და შხამსა. ამისათვის ირაკლის მუდმივი ფიქრი და საზრუნავი ამ, მტრისაგან გატაცულ, საქართველოს სამკვიდროს დაბრუნება შეიქმნა. სამწუხაროდ, ირაკლის პოლიტიკური იდეალი ლიხის ქედს ვერ გადასცდა და კორტოხზე გაჩერდა. მისი ფიქრი ვერ შესწოდა დავით ალმაშენებელის დროის გაერთიანებულ საქართველოს და როცა მარჯვე დრო მიეცა — იმერეთიც შემოეერთებინა და მთელი მაშინდელი საქართველო ოვის სკიპტრას ქვეშ შეეკრიბა, ყოყმანი დაიწყო და უკან დაიხია. ამნაირად ირაკლის დარჩა მხოლოდ მცირედი პოლიტიკური იდეალი — გაერთიანება აღმოსავლეთის საქართველოსი და არა სრულიად საქართველოისა. რაც დღე და ღამ განუყრელ პოლიტიკურ ფიქრად და მისწრაფებად უნდა ყოფილიყო მაშინდელ საქართველოს გვირგვინოსნისათვის <sup>۳)</sup>.

რაյი ირაკლიმ ვერ მიაღწია თვისი ძალ-ლონით ვიწროდ შემოფარგლულ პოლიტიკურ იდეალის განხორციელებას, ჩრდილოეთის ბუმბერაზს დაუწყო ცქერა. რუსეთის დამარებით ჰყიქრობდა იტაკლი განხორციელებინა თვისი ვიწრო, მაგრამ მაინც საქართველოს-თვინ სახეირო იდეალი. ესაა უმთავრესი საგანი და დედა აზრი 1783 წელს დადებულის ტრაქტატისა, ესაა მიზეზი, რის გულისთვისაც ირაკლიმ ნებაყოფლობით ხელი

<sup>۳)</sup> Въ словахъ Ираклія. ამბობს ზურაბ ავალიშვილი, ახალციხის დაბრუნების გამო, звучить надежда на исполнение завѣтной национальной идеи. იხ. Присоединение Грузии... გვ. 123.

აილო მრავალ სამეფო უფლება-პრეტოგატივაზე და ვას-  
სალად გაუხდა რუსეთის თვითმშეცვრობელთ. პროფესიონალ  
აჯექსანდრე ცაგარლის მიერ დაბეჭდილი რუსულ-ქარ-  
თული დოკუმენტები მზესივით ნათელსა ჰყენს ამ მო-  
საზრებას. ჯერ ისევ 30 დეკემბერს 1771 წელს ირაკლი  
ატყობინებს იმპერატრიცა ეკატერინე მეორეს—თუ რა  
პირობითა ჰესტრს მიიღოს რუსეთის მფარველობა. აქ,  
სხვათა შორის, აი რა სწერია: „კვალად ვედრებით მო-  
ვახსენებ თქვენს კავკაციულ გენერალებასა, რათა ამავე გა-  
ზაფხულსა არ უტევონ დაუბყრობელად ქვეყანა **ახალ-  
ციხისა** და უკეთუ შერიგება მოხდეს სულთანისა, მაში-  
ნაც გარეთ არ დარჩეს ქვეყანა ახალციხისა, ვინაიდგან  
საქართველოსა შინა არის და ქართული ენა აქვსთ და  
მრავალნი ქრისტიანენი არიან იმათში და სხვანიც ახალ-  
ციხის გარდა ქცეულნი არიან მაჰმადიანობაზედ“ <sup>6)</sup>). 

1772 წლის გაზაფხულ<sup>7)</sup> ჰაფიქრობდა ირაკლი ახალ-  
ციხის დაბყრობას რუსების დახმარებით, მაგრამ იმედი  
გაუცრუვდა. დამთხვეულ და ბოროტ გრაფ ტოტლებე-  
ნის და უნიკო გენერალ სუხოტინის წყალობით საქართ-  
ველოში მყოფმა რუსის მხედრობამ ვერა გაარიგა-რა.  
საქმე ისე წაიყვანა ამ ორმა გენერალმა, რომ რუსები  
კი არ ეხმარებოდნენ ქართველებს სამალების გასაღევ-  
ნად, თვით რუსები საკიროებდნენ ქართველების შეწევნა-  
დახმარებას. ჯარი რომ სრულიად არ გაწყვეტილიყო,  
მთავრობამ იგი ლინიაზედ დაიბარა. გაზაფხულის პირს  
რუსის კორპუსი დაიძრა იმერეთიდგან და 1772 წ. იგ-  
ვისცოს თვეს უკვე მოზღოვს მივიდა.

<sup>6)</sup> იხ. Грамоты и другие исторические документы, относящиеся до Грузии, т. II, выпуск I, გვ. 83—84.

ერთხელ, ორჯელ, თუნდ სამჯერაც არაფერია იმე-  
დის გაცრუება იმისთანა კაცისათვის, რომელიც გატა-  
ცებულია რომელიმე დიადი საგნით. ასეთი ადამიანი,  
ფანატიკად გადაქცეული, ვერ მოისვენებს სიცოცხლის  
დასასრულამდე და სულ იმის ფიქრსა და ზრუნვაში იქ-  
ნება, თუ როდის მიაღწევს საყვარელ აზრის განხორციე-  
ლებას. ასე დაემართა ირაკლისაც, რომელსაც მესხეოს  
დაბრუნება, ანუ მისი ერთი ნაწილისა, სახელდობრ ახალ-  
ციხისა, იდეა—ფიქრად გადაექცა.

სხდას ვერავის ანდო და „პირობანი“ ირაკლიმ გა-  
უგზავნა იმპერატრიცას ბატონიშვილ ლევანის და კათა-  
ლიკოზ ანტონის ხელითა<sup>7</sup>). ეს საპატიო ელჩები დიდ-  
ანს გააჩერეს აქ, ამტრახანში, არც პეტერბურგში წასვ-  
ლის ნებას აძლევდნენ და არც მიზეზს ეუბნებოდნენ,  
რომ არ უხსნიან პეტერბურგის გზას. უფრო დიდ  
გაკირვებაში იყო ირაკლი. შვილისა და ძმისაგან არაფე-  
ხი დამბუზი მოსდიოდა, არც არაფერს მთავრობა სწერდა  
პირველის. კარზე მყოფ მინისტრ-პრეზიდენტს ი. ლ.  
ლოვოვს. მეფეს მოთმინება გამოელია და 16 მარტს 1773  
წელს წერილი მისწერა გარეშე საქმეთა მინისტრს გრაფ  
ნ. ი. პანინს. წერილი ფრიად საინტერესო და საყუ-  
რადლებოა. უმეტესმა მწუხარებაშ გამაპედვინა ოქცენტ

<sup>7)</sup> უდროოდ გარდაცვალებული ბატონიშვილი კლეინი მუხლის ნება იყო ირაკლის ოჯახისა. დიდი იმედი ჰქონდა უძვირის, ლუ-ვანისა და მისმა უდროოდ გარდაცვალებამ მეტი-მეტად მოუკლა-გული ათას ჭირსა და ვარამში მყოფს მეჭვეკა. ~~საქართველოს~~ მზე ეხლა დაუბნელდათ, ამბობდნენ მახლობელნი მეტისა ლევანის გარ-დაცვალების გამო. კათალიკოსი ანტონი I, მმა ირაკლისა, შესა-ნიშნავი ლვისმეტყველი და ფილისოფოსი იყო.

შეწუხებათ, ბოდიშს იხდის ირაკლი პანინის წინაშე. ამოდენა ხანია ვაახელ იმპერატრიცას ძმა, კათალიკოსი ანტონი და ძე ჩემი, ბატონიშვილი ლევან და უაქამომ-ლესაც ვერ მივემთხვივე მოწყალების რეზოლუციისათვის. ამის გამო ეველტება პანინს, დახმარება გავიწიე, რომ საქმე კეთილად დაგვირგვინდესო. ირაკლი იმასაც ატყო-ბინებს პანინს, შვილისა და ძმის ამბავი არაფერი ვიცი, რადგან ასტრახანიდგან გამოგზავნილი ლევანისა და ან-ტონის მიერ კაცი დაეჭირათ ახალციხიდგან დალესტანს მიმავალ „ქურდ ლევებს..“.

საქმის დასაჩქარებლად ასეთ ამბავსაც ატყობინებს ირაკლი პანინს: „ვგონებო, არა უმეცნიერნი იქმნებით, ვითარ ჟამითი-ჟამათ გვემატებიან ბარბაროსთა თესლთა-განი, ქრისტიანობის ნათესაობის მტერნი და მარადის გვაყველრებენ უგუნურობითა თვისითა წარმართნი, მე-ზობელნი ჩვენნი, რომ დაგდებული ვიქმნებით, რომელ ანათებს ყოველსა ქვეყანასა, რუსეთის ტახტისაგან, და წარმოგზავნილნი ჩემგან ძმა და ძე ჩემი იმყოფება აქა-მომდე ასტრახანს და შეწყნარებულიცა არ იქმნებიანო--ეთბამად ხედვენ ვითომ ეგ იყოს მის ნიშანი“ \*).

ეტყობა, მეზობელ მაჰმადიანთა ხანები ნიშნს უგებ-დნენ ირაკლის, რომ რუსეთმა ჯერ ჩაითრია საქართვე-ლო თვის პოლიტიკის სფერაში და რაკი-ლა უკან დახე-ვა აგრე ადვილი აღარ იყო, საქმეს აჭიანურებდა და ელჩებს განზრახ ასტრახანში აჩერებდა. ასეთი მითქმა-მოთქმა მეზობელ ხანებისა, რომელთაც აგრე რიგად არ ეპიტნავებოდათ რუსების გაბატონება საქართველოში, დიდად აშფოთებდა ირაკლის და სწორედ ამ მწუხარები-

სა და შიშის გამომხატველია წერილის უკანასკნელი სიტყვები, დიპლომატიის პილპილით შეზავებული.

ბოლოს, როგორც იყო, ელჩებმა მიაღწიეს „უმალ-ლეს კარსა“. 27 აპრილს 1773 წელს მიართვეს პანინს შოხსენება, თუ რა პირობითა პსურს საქართველოს რუ-სეთის მფარველობა (Покровительство). დედანში ამ სიტყვებითაა გამოხატული ირაკლის ოცნება-იდეალი მეს-ხეთისა და საინგილოს დაბრუნებისა: „თუ კახეთის მა-მულები (ესე იგი საინგილო. ა. ფრ.), რომელიცა წართ-მეული აქვს, დაიპყრობს, იმათგანაც თვითოს გლეხის სახლითგან ათოთხმეტი შაური სახელმწიფოდ მიერთმეო-დეს ყოველს წელიწადს და კვალად ირასი ფუთი აბრე-შუმი... დიდის უქვემოესის ვედრებით ითხოვს (ირაკ-ლი), რომ არ დაშთეს ამის უფრო გრძლად დაუკურთ-ბელად ქვეყანაი ახალციხისა, რომელიც ჩენი ადგი-ლი იყო, და თუ შერიგება იქნება, (ამ დროს რუსეთს სამალეთთან ომი ჰქონდა), მაშინაც თურქის სახელმწი-ფოდ არ დაშთეს, არამედ გამოერთვას, რადგან საქართ-ველოს მიწა არის და მრავალნი ქრისტიანენი არიან მას შინა, და ყოველს წელიწადს მძლავრებით მაჰმადიანად მრავალს გარდააქცევენ“.

ეს მუხლი „პირობისა“ ნათლად გვიჩვენებს, რა სა-ნატრელ საგნად გადაქცეოდა ირაკლის ახალციხის დაბ-რუნება.

ან კი ვინ დაუწუნებს ირაკლის ამ ოცნებას? რო-მელ ქართველს არ აუკვნესდება გული ირაკლისავით დღესაც? ხუმრობა ხომ არ არის, ჰედავდე, თუ რო-გორ. „ყოველს წელიწადს მძლავრობით მაჰმადიანად მრა-ვალს გარდააქცევენ“ და შველა კი არ შეეძლოს? ჯერ შაგალითი არა ყოფილა, რომ ლვიძლის შვილის მოკვეთა

ადეილი ასატანი ყოფილიყვეს ომელიმე დედისათვის. ირაკლის კი დედაზე მეტად უყვარდა თვისი პატარა საქართველო. ვისაც გამამაღიანებულ საქართველოში არ უცხოვრია, ის ვერ წარმოიდგენს იმ სევდასა და გულის კვნესას, რასაც ახლად, შუაგულ საქართველოდან მოსული ჰვერძნობს მაჭმაღიან ქართველის მაყურებელი. პანტა რა ხილია, მაგრამ მისი მოჭრაც და წახდენაც სევდასა ჰვერძის ბუნების მოყვარე კაცია და აქ კი მთელი მესხეთი, საქართველოს საუკეთესო ნახევარი, მაჭმაღიანი სამუდამოდ მოჰკვეთა და მოსწყვიტა სამშობლოს. სარწმუნოებასთან ერთად მაჭმაღიანობამ სული და გულიც ისე შეუცავლა ქართველს, რომ დღევანდელ მაჭმაღიან ქართველს ვძულვართ ჩვენ, მისი სისხლ-ხორცი და სულ იმის ნატვრაშია, როდის იქნება მოგვშორდეს, გაგვეცალოს და გადიხვეწოს შორს, ოსმალეთს, სადაც მხოლოდ ცივ სამარესა ვჰოულობს, მაგრამ მაინც სამოთხედ მიაჩნია ერთმორჩმუნე თასმალეთი. ირაკლის ღროს მრავლად მაჭმაღიანდებოდნენ ქართველნი. სულ რაღაც ასმა წელიწადმა გაიარა მას შემდეგ. მაჭმაღიანდებოდნენ მესხნი მეცხრამეტე საუკუნის დასაწყისშიაც. თითო-ოროლას შერჩათ ნიშანი ქართველობისა—ენა. ამასაც ჰკარგავენ ჩვენ თვალ-წინ. მოხუცებულებს თუ ახსოვთ რამე კიდევ ქართულისა, თორემ ყმაწვილ-კაცობამ სიტყვა აღარ იცის. მიუწდომელი სიმძლავრე გამოიჩინა ჩვენზე უკხო რელიგიამ, ამ, მასხარად აგდებულმა თანამედროვე მწერალიაგან ისტორიულმა ფაკტორმა.

ჰუნგართა ცხოვრებაში იყო ერთი ხანა, როდესაც კაცის მკვლელს სიკვდილით არა სჯიდნენ, თუმცა ასეთი სასჯელი იყო დაწესებული,—საეროვნო ბრძოლაში ავაზაკიც გამოგვადგებაო, ამბობდნენ ჰუნგარნი, რიცხვით

კოტანი ვართ და ყოველი მარჯვენა, თუნდ შებლალუ-  
ლი კაცის მკვლელობით, ჩვენთვის საჭირო იქნება გან-  
საცდელის დღესაც. თუ პუნგარნი ასე უფროთხილდებო-  
დნენ ავაზაკაც კი, ირაკლის როგორ აეტანა და მოეთ-  
მინა მაშინდელ ქართლ-კახეთის ოდენა საქართველოს  
გამაჰმადიანება და სამუდამოდ დაკარგვა მესხეთისა? ეს  
ხომ კიდევ იმის მომასწავებელი იყო, რომ საქართველო  
თავის დღეში პოლიტიკურად ვერ მოღინიერდებოდა და  
სხვის ხელში. ბურთივით სათამაშო უნდა ყოფილიყო.  
მშრალ და უგემურის ენით დაწერილ დოკუმენტებიდგან  
ნათლად იხატება მწვავი ფიქრი და აზრი ირაკლისა მეს-  
ხეთის შესახებ. ეგ სულის ვითარებაა სწორედ მიზეზი, რომ  
ირაკლი დაუინებით თხოულობდა — შეეტანათ უსათუოდ  
ტრაქტატში პირობა მესხეთის დაბრუნებისა.

ზურაბ ავალიშვილი საყვედურით ავსებს ირაკლისა  
და რუსეთსაც, — დიდი პოლიტიკური შეცდომა ჩაიდი-  
ნეს, რომ მოკავშირეთ ეს მუხლი ტრაქტატისა საქვეუ-  
ნოდ გამოაცხადეს, რადგან ამის შემდეგ საყიზილბაშო  
და საოსმალო აშკარად გადაეკიდა ირაკლისაც<sup>1)</sup>). მარ-  
თალია, გამოკხადებით არ უნდა გამოეცხადებინათ მო-  
კავშირეთ დასახელებული მუხლი ხელშეკრულობისა, მაგ-  
რამ ჩაწერით კი უსათუოდ უნდა ჩაეწერათ მფარველო-  
ბის პირობაში. უამისოდ რა ბედენა იყო ირაკლისთვის  
1783 წლის ტრაქტატი? ტოტლებენის მოსვლამდე ირაკ-  
ლი მშვიდობიანად სცხოვრობდა სპარსეთთან და ოსმა-

<sup>1)</sup> ი. ბ. ავალიშვილი. Присоединение Грузии къ Рос-  
сии. стр. 147. „Объявлять о такихъ замыслахъ предъ ли-  
цомъ всего свѣта было грубой ошибкой со стороны зак-  
лючавшихъ трактать“.

ლეთან. აღა-მაჭადის დროს სპარსეთი კოტა მოკოცხლდა, ნაპერწერალსავით იფეთქა, მაგრავ ეს აფეთქება წუ-  
თიერი იყო. როგორც ბურბუშელასავით აპრიალზა, ისევე მალე ჩანელდებოდა. სუსტდებოდა აგრედვე ისმა-  
ლეთი. როგორც თავდალმართზე დაგორებული ქვა, ისე  
მიღიოდა უკან-უკან ოსმალეთი მას შემდეგ, რაც რუ-  
სეთმა ომიანობა დაუწყო. მაშასადამე, ირაკლი ავად თუ  
კარგად, ორთავე მეზობელ მაჭადიანთა სახელმწიფოს-  
თავისი ძალლონით გაუძლებდა და თუ მაინცა და მაინც  
რუსეთს ხელშეკრულობით შეეჯრა, მხოლოდ იმისთვის,  
რომ მტრისგან მოწყვეტილის საქართველოს მამულ-  
დედული დაებრუნებინა.

„უმთავრესი აზრი 1783 ტრაქტატისა ისაა, —ამ-  
ობს ზ. ავალიშვილი, რომ საქართველოს მოეპოვებინა  
საშუალება და სალსარი სპარსეთის მოსალოდნელ შემო-  
სუვის წინააღმდეგ, შემოსევისა, რომელიც უსათუოდ  
მოხდებოდა, რაყი სპარსეთი სულს მოითქვამდა და იშო-  
ვიდა იმისთანა ბატონსა და მბრძანებელს, ვისაც ძალა  
შესწედებოდა აღედგინა სიძლიერე ირანისა და განევრ-  
ცელებინა სფერა წარსულის გავლენისა“. ეს აზრი პა-  
ტივცემულ ავტორისა არ ეწინააღმდეგება ჩვენ მიერ ზე-  
მად აღნიშნულ მოსაზრებას, რომ ირაკლის ტრაქტატი-  
სა და რუსების შემწეობით პსურდა დაებრუნებინა სა-  
ქართველოსთვინ მისი სამკიდრო. ირაკლის თვისი იდეა-  
ლი რომ განეხორციელებინა, ასპარსეთის მოსალოდნე-  
ლი შემოსევაა კი არა, თვით ნამდვილი თავდასხმაც არ  
შეაძრწუნებდა. შეკრეფილ საქართველოს ძალ-ლონით  
ირაკლი ადვილად მოიგერიებდა მოსეულ მტერს და ეჭვს  
გარეშეა, რომ მეფე-მეომარი არეზამდისინაც მივიღოდა.  
საქმე სანახევროდ გაკეთებული იყო, ერევანი და განჯა

ხარჯს აძლევდა საქართველოს და საქმეს მხოლოდ დაგვირვენება აკლდა, მაგრამ ჩარხი სხვანაირად დატრალდა.

ათ წელიწადზე მეტმა გაიარა „პირობათა“ დაწერის შემდეგ და მხოლოდ 24 ივნის 1783 წ. დადებულ ტრაქტატში ამ სახით აღიბეჭდა სურვილი მეფე ირაკლისა: „არტიკული მეოთხე სეპარატისა. დიდებულება იმპერატორებისა მისისა აღწსთქვამს, რათა დროსა ბრძოლისასა იხმარომსცა ყოველი შემძლებლობად შეცადინეობისა ღონით საკურუპლისათა, ხოლო დროსა მშვიდობისასა დაზავებისა მიერ უკმოქცევისათვის ქუპანისა და ადგილითა მტერთაგან ქონებულთა და ძუპლადვე სამეფოსა მიმართ ქართლისა და კახეთისა შერაცხილთა ესენი უკუც დაჭმებიან სამფლობელოდ მუნებურთა მეფეთა საფუძულსა ზედა ოქმულთა ჰაზრთასა, რომელნიცა ითქუნენ მფარულობისათვს და უზენაესისა ხელმწიფებისა ყოვლისა რუსეთის იმპერატორთა“<sup>10</sup>).

აზრი ამ უცნაურის ენით დაწერილ არტიკულის (მუხლი) მეოთხე სეპარატისა (კერძო) ისაა, რაზედაც ზემოდა გვქონდა საუბარი. რუსეთის თვითმკრობელი აღთქმასა სდებს, რომ ბრძოლის დროს ყოველ ლონესა

---

<sup>10)</sup> იბ. გრამოთი... თ. II, ვ. I, გვ. 109.

11) 1783 წლის 24 ივნის ტრაქტატში იჩაკლის ტიტული ასეა მოყვანილი: „ძევებულებულები სამკურნალო სამკურნალო მეორე წყალობითა ლვონისათა და თეჭჭის იმპერატორების დიდებულების კეთილ-ნებობითა მეფე ქართლისა, კახეთისა, შემკვიდრე მფლობელი სამკერ-საათა ბაგოსი, მთავარი ყაზახისა, მთავარი ბორჩალოსი, მთავარი შაშალილისა, მთავარი კაკისა, მთავარი შაქისა და მთავარი შირვანისა, მფლობელი და გმრძანებელი განჯისა და ერევნისა. ibid. გვ. 100.

და მეტადინეობას იხმარს იარაღის შემწეობით დაუბრუნოს საქართველოს მისივე სამკვიდრონი, ე. ი. სამცხე-საათაბაგო და სხვანი. მშვიდობის და ზავის შეკვრის დროს კიდევ მოვალეა დიდად ეცადოს და დაუბრუნოს საქართველოს მტრისგან მოტაცებული ქვეყნები<sup>14</sup>).

ანკარა წყაროსავით სუფთა ქართული ენა შოთასი და ვისრამიანისა, მეთვრამეტე საუკუნეში, სქოლასტიკის წყალობით ისე აირ-დაირია, რომ ყოველი ლაზათი და სიკეთე დაჰკარგა. ტრაქტატის ენა იმდენად ტლანქი და ბუნდოვანია, რომ უბრალო მომაკვდავი ვერას გაიგებს, ძალიანაც რომ უნდოდეს მისი გაგება. კათალიკოზ ან-ტონ პირველმა საქართველოს თავზე მოახვია რუსეთში გაბატონებული სქოლასტიკა და ამით მეტის-მეტად გააუგემურა ტებილი, მოხდენილი, ძალოვანი და თასმასავით მოქნილი ქართული სამწიგნობრო ენა. ნიმუში გადამახინჯებულ და შებღალულ ქართულ ენისა ზემოდ მოყვანილ ტრაქტატის ნაწყვეტია. პროფესორი ა. ლაგარელი პფიქრობს, რომ ტექსტი ტრაქტატისა დაწერილია რუსულად და შემდეგ ნათარგმნი ქართულად.

### III

ირაკლის ჩატვრა აღსრულდა. ტრაქტატში ჩაწერეს — რუსეთი პირობასა სდებს, რომ საქართველოს და-კარგულ ქვეყნებს დაუბრუნებს, მაგრამ ქალალდზე აღნიშვნა საქმისა სხვაა და მისი განხორციელება კიდევ სხვა — შეუა უზის დიდი ზღვარი. ზურაბ ავალიშვილს რომ ჰკითხოთ, 1783 ტრაქტატი დაწვრილებითი განხილვის ლიტეიც არ არის, რადგან უმთავრესის თვისის ნაწილებით ტრაქტატი ცარიელ სურვილთა და სიტყვათა რახა-

რუხი აღმოჩნდა, რომელთაც განხორციელება არ ეღირ-  
სათო <sup>12)</sup>). ირაკლი სიცოცხლეში ტფილისის აოხრებას კი  
გოესწრო, მაგრამ მტრისგან მოწყვეტილ საქართველოს  
მამულის დაბრუნებას ვეღარა. მისი ნატვრა ასრულდა  
სიკედილის შემდეგ, როდესაც საქართველომ თვისი და-  
მოუკიდებელი პოლიტიკური არსებობა დაასრულა და  
რუსეთს შეუერთდა.

ირაკლის დაღადისი და გოდება, რომ ახალციხის  
ქრისტიანებს ყოველს წელიწადს „მძლავრებით მაჰმადია-  
ნად მრავლად გარდააქცევენო“, სრული კეშმარიტება  
იყო. მეცხრამეტე საუკუნის დასაწყისს სამცხე-საათაბა-  
გოში ქრისტიანი მართლმადიდებელნი ხილულად და აშ-  
კარად აღარ მოიპოვებოდნენ. აქა-იქ ძლივს-და კივკი-  
ვობდა თითო-ორთოლა მართლ-მადიდებელი, რომელნიც  
მალულად წმინდა საიდუმლოებას ღამ-ღამობით მიიღებ-  
დნენ ერის კაცის ტანისამოსში გამოწყობილ მღვდელთა-  
გან, ან კიდევ ქრისტეს შობას დღესასწაულობდნენ ღო-  
რის ხორცის ნაკრის მიღებით, რომელიც იმავე ერის  
ტანისამოსიან მღვდლებს სოფლიდან სოფლად ხურჯინე-  
ბით დაჭქნდათ თავიანთ მრევლისთვის. ვინ მოიფიქ-  
რებს, რომ ასეთი დაჩაგვრა ქართველისა სულ რაღაც  
სამოცდა ათის წლის წინად ხდებოდა! ბევრს სიზრად,  
ზღაპრად მოეჩვენება, მაგრამ სრული კეშმარიტება და  
სინამდვილე კია.

ლხენასა და ფუფუნებაში არც ქართველი კათოლი-

<sup>12)</sup> რუსულად: „... более подробного разностороння трактать этот не заслуживаетъ. такъ какъ, въ самыхъ главныхъ своихъ частяхъ оказался сочетаниемъ словъ и желаний, не увидѣвшихъ своего осуществленія“. იხ. Присоединеніе... ვ. 139.

კენი ბრძანდებოდნენ. მეთვრამეტე საუკუნეში ამათ წირვა-ლათინურად ჰქონდათ, რომის ეკლესიის წესსა და რიგს მისდევდნენ. კუკიანი და განათლებული რომის მისიონერნი და პატრები თავის დროზე შეეცადნენ და ქართველ მრევლისთვის ნება-რთვა აიღეს ჯერ ისევ 1757 წელს წმინდა კონგრეგაციისაგან, რომ სახარება და სამოკიქულო წაეკითხათ „სამშობლო ქართულ ენაზედაც“. რაღა თქმა უნდა, რომ შორს გამჭვრეტყელმა კონგრეგაციამ კაპუცინის ორდენის მისიონერებს ხელი არ შეუზალა ამ სასარგებლო სურვილის განსახორციელებლად. სახარებისა და სამოკიქულოს გარდა ეკლესიაში ჰსუფევდა აგრესუე ქართული გალობა. ოსმალოს მთავრობა მტრის თვალით უყურებდა ლათინურსა და ქართულს წირვა-ლოცვას. ლათინური ეკროპას აგონებდა, იმ ევროპას, რომელმაც არა ერთხელ წელში მოზიქა ოდესმე ქედ-მაღალი ოსმალეთი, ქართული კიდევ შეუპოვარ ვურჯისტანს, რომლის სრულიად დამხობა შეადგენდა მაჭვალიან ოსმალეთის პოლიტიკის და დიპლომატიის ანაბანას. ამისათვის გააფთრებულმა და გააღმასებულმა ოსმალეთმა სასტიკად დაუწყო დევნა ლათინურ და ქართულ ენაზე წირვა-ლოცვას და ღვთის მსახურებას. სომხური ენა კი მიჩნეული ჰქონდათ მაშინდელ ოსმალებს, სომხებისა არ ერიდებოდათ და დიდის თავაზიანობით ეკიდებოდნენ თვით სომხეთის ერსა<sup>\*)</sup>). წყვეტა, ელეტა და აოხრება სომხეთის ერისა დაიწყო მხოლოდ მეცხრა-მეტე საუკუნის მოერე ნახევრიდგან, როდესაც სომხო-

<sup>\*)</sup> 1) მწარე დღეი სომხებს წანადაც ბევრი უნახავთ, მაგრამ ეს ძებოდა ხანდახანობით და არა სისტემატიურად, როგორც მე-XIX საუკუნეში.

ბამ გამოიღვიძა, მოითხოვა ეროვნული უფლებანი და ევროპას შეატყობინა — დიდ გაჭირვებაში ვართ და პატ-რონობა გაგვიწიეთ. ოსმალეთმა თვალები გააკეთა, — ეს რა დაუძინებელი მტერი მყოლია შინაო. ევროპას პირობა მისუა — რეფორმებს შემოვიდებ სომხეთშით და აჩავე დროს თავისებურად დაიწყო პოლიტიკურ საგნის გადაწყვეტა. „თავისებურობა“ ოსმალეთისა ყველას მო-ეხსენება, რაშიაც მდგომარეობს. ოსმალეთმა სომხებს გააგებინა, აუტკივარ თავს არ ავიტკივებ, ან მაჰმადია-ნობა მიიღეთ, ან დედა-ბუდიანად გაგაქრობო, ესე იგი ფიზიურად არსებობას მოგისპობო. შოგეპყრობი სწორედ ისე, როგორც ვეპყრობოდი ქართველობას მესხეთშით. სომხობაშ ზოგმა მიიღო მაჰმადიანობა, მაგრამ უფრო ბევრმა არ ულალატა მამა-პაპურ სარწმუნოებას. უარის თქმას ენით გამოუთქმელი ამბები მოჰყვა. ანატოლიის სომხობა წიწილებივით ისრისება, ვინც მახვილს გადურ-ჩა, გულგახეთქილი სამშობლოდგან სხვაგან გარბის. ამ უამად ანატოლიაში ისე მცირეა სომხეთა რიცხვი, რომ მათი ბედის საქმე პოლიტიკის საგნად იქნება ველარც კი გახდეს. ისტორიული სომხეთი დღეს თითქმის გეოგრა-ფიულ ტერმინად გარდაიქცა. ბედის სიმუხთლე და ცვა-ლებადობა სომხებმაც გამოსცადეს.

ასე არ იყო მეთვრამეტე საუკუნეში. მესხეთში რომ კოკის-პირულად ქართველთა სისხლი იღვრებოდა და ქართველთა მარტო სახელიც კი ზიზღა და ბოროტებას უსახავდა გულში ოსმალოს, სომხობა განცხრომითა სკხოვრობდა და მოქალაქობდა. პატივს არც მესხეთში უვნენ მოკლებულნი სომხები. თავისუფლად სწირავდნენ და ლოცულობდნენ სამშობლო ენაზე. დამშლელი არა-ვინა ჰყავდათ.

ოსმალოს თვალის ასაბმელად და ქრისტიანობის და-  
საცველად ქართველ-კათოლიკეთ განიძრახეს შემოელოთ  
წირვა-ლოცვა სომხურ ენაზე. სომხურად მლოცველი  
ქართველი-კათოლიკე თამამად ეტყოდა გამძვინვარებულ  
ოსმალოს, რა გინდა, დაწყნარდი, ხომ პხედავ, აღარც  
ლათინი ვარ და აღარ კ ქართველიო. მართლაც ამ დიპ-  
ლომატიურმა ხერხმა გასჭრა, ქართველ კათოლიკეთ შე-  
ინარჩუნეს ქრისტიანობა, მაგრამ დღეს ლამის ეროვნობა  
და ქართული ხალხოსნობა დაჰკარგონ. თუ სკოლო-  
დათ მაშინ, რომ გულუბრყვილო დიპლომატიური ხერხი  
მატლად გადაექცეოდათ, რომ პავლე და იაკოფი პოლო-  
სად და აკოფად გადინათლებოდა, შესაძლებელია, რომ  
მაჰმადიანობაზე უარი არ ეთქვათ და სახიფათო, კისერ-  
მოსატეხ დიპლომატიისთვის არ მიემართნათ. ერთმა არ-  
ლელმა, ესე იგი ს. არლიდან, ქართველ-კათოლიკე „ტე-  
ტია“ მალვენ თათეოზოვმა (იგივე თომაშვილი) ასეთის მა-  
რილიანი ქართულით დაასურაშა ზემოდ მოხსენებული  
ისტორიული მომენტი: „თათარი სომებს არ ერჩოდა“,  
და ჩვენ მამა-პაპათ იმისათვის მიიღეს სომებ-კათოლიკეთა  
აღსარებაო.

მექტრამეტე საუკუნის დასაწყისს, როდესაც რუსის  
მთავრობა დამკვიდრდა ქართლ-კახეთს, მესხეთს ქართვე-  
ლობისა აღარა ეტყობოდა-რა. მაჰმადიანობამ სავსებით  
თვისი სუდარა გადააფარა დიდებულ მესხეთს, მამა-კაცს  
ქუდი ჩაღმით შეუცვალა და დედა-კაცი ბოსლებში ცხრა-  
კლიტით დაჰკეტა, ქალაქი ახალციხე კიდევ მხევალთა  
და მონათა უმთავრეს ბაზრად გახადა. იგივე მექტრამეტე  
საუკუნე ცუდ ვარსკვლავზე დაებადათ ოსმალებს. წინად  
თუ ევროპელნი დასავლეთიდგან ნაფლეთ-ნაფლეთად  
სტაციებდნენ ოსმალებს დიდების დროს დაპყრობილ ქვეყ-

ნებს, ამ საუკუნის დასაწყისში რუსეთში აღმოსავლეთით მიჰყო ხელი და ხანდახანბით ლუქმა-ლუქმა სტაცებს ჯერ ძველ საქართველოს ნაწილებს და შემდეგ ვინ იცის რომელ ისტორიულ ერის სამკვიდროს დაიპყრობს. ეს პროცესი ოსმალეთის დაგლეჯა-დაფლეთისა ჯერაც არ შეჩერებულა და არ დასრულებულა.

15 აგვისტოს 1828 წელს გრაფმა პასკევიჩმა შემუსრა ოსმალოს ჯარი ახალციხისა და სოფელ კლდეს ჭუა. ლორის ხორცის ჭამია რუსების გაბატონება არ ეპრიანათ ოსმალოს მოხელეებს და გამაპმადრანებულ ქართველობას მოლების, ამ ყოვლად უვიცი და განუვითარებელი სამღვდელოების პირით, შეუთვალეს: ავიყარნეთ და ფადიშაპის სამფლობელოში გადავსახლდეთო. ორი წლის განმავლობაში მრავალი გამაპმადიადებული ქართველი გადიხვეწა მცირე აზიაში. ეხლანდელი ჯავახეთი და ახალციხის მაზრა მთლად გატიალდა და გავერანდა. უგლეხ-კაცოდ დარჩენილ ქვეყანას გრაფმა პასკევიჩმა მალე უშოვნა მუშაკნი. აზრუმიდგან 100,000 სომეხი (გრიგორიანი და კათოლიკე) გადმოასახლა კარაზეტა ეპისკოპოზის წინამძღოლობით. სახლეარის მოსაწყობად და ბინის მოსაკიდებლად პასკევიჩმა იმპერატორ ნიკოლოზს ერთი მილიონი მანათი გამოსთხოვა გადმოსახლებულთა შესაწევად <sup>13)</sup>). გამაპმადიანებულ ქართველთაგანი, ჯერ ისევ წმინდად ქართულად მოლაპარაკენი და მობაასენი, ვინც დარჩა სამშობლოში, ისინიც

<sup>13)</sup> იხ. Е. Г. Эзовъ. Сношения Петра Великаго съ Армянскимъ народомъ, გვ. CXXXVIII და CXXXIX. 1828—1830 წლებში გადმოსახლდა 14.000 სახლობა, სადაც ითვლებოდა 90,000 სული და ორი სომხის არქელი. დამკვიდრდნენ იკინი ჯავახეთსა, გუმბრსა და ახალციხის მაზრაში.

მთავრობამ შეცდომით „თათრებად“ აღიარა<sup>14</sup>). ასე ნელ-ნელა და სისტემატიურად ისპობოდა დიდებულ მესხეთში ქართველის სახსენებელი.

ყირიმის ომის დროს (1853—1854 წ.) ოსმალეთმა ერთხელ კიდევ სუადა ბედი და მოადგა ახალციხეს, მაგრამ თავად ანდრონიკაშვილმა სასტიკად დაამარცხა ოსმალოს ჯარი სოფელ სხვილისთან (ეხლა დამახინჯებულია სახელი ამ სოფლისა და ეძახიან სუფლისს). ამის შემდეგ, ვგონებთ, სამუდამოდ დაეკარგა ოსმალეთი იმედი ახალციხის დაბრუნებისა. სამწუხაროდ, მცირედად დარჩენილ გამაპმადიანებულ ქართველებმაც (ახალციხის მაზრაში მაინც იგინი სკარბობენ სხვებს) სამუდამოდ ამორჩეცეს გულადგან სამშობლოს სიყვარული და ბაწარალებით გარბიან ოსმალეთისკენ.

ოსმალეთის ორის საუკუნის ბატონობამ (1626 წლიდან 1828 წლამდე) წარუხოცველი დალი და ბეჭედი დაასვა მესხეთს. მკვიდრთაგანი ვინც კი დარჩენილა, ისე დაბექავებულა, რომ მომეტებული სიბერივე ისტორიულის ერისა ძნელი წარმოსადგენი-ლა იყო. სად აჭარელი, თამამი, გამბედავი, მკვირცხლი, როგორც გურული და სად აქაური, დაფლეთილ-დაბრანძული სამცხე-საათაბაგოელი მკვიდრი<sup>15</sup>!). როგორც მესხმა ოსმალოს გავლენის წყალობით ფერი და იერი იცვალა, ისევე შეიცვალა გარეგანი სახე ქვეყნისა. სანაქებო ვენახები სულ

<sup>14)</sup> იხ. Г. А. Вейденбаумъ. Кавказские Этюды. I, 83. 121.

<sup>15)</sup> აჭარა შინაურ გამგეობაში თითქმის დამოუკიდებელი იყო. მამაკა აჭარელი ქედს არ იხრიდა ოსმალოს წინაშე და იარალით იცავდა თავისუფლებას. ესაა მიზეზი, რომ ენაც წმინდად შეინახა და ქართული ზნე-ჩვეულებაცა, დაჰკარგა მხოლოდ სარწმუნოება.

ამოვარდნილა და გადაშენებულა. მიწაში ჩაფლული ქვევ-  
რები და ქვიტკირის საწნახელნი-ლა ჰმოწმობენ, რომ  
აქაურ ქართველობასაც ძველად დანარჩენ ქართველებ-  
სავით კამკამა „ნუნუათი“ ჰყვარებიათ ყელის ჩასველება  
და გულის გაგრილება. ძველი ჯავახეთი ტყით ყოფილა  
დაბურული, დღეს კი ისეა მოტრუსული, რომ ჩირგვი.  
ან ფშატი რა არას, ისიც კი არსად მოიპოვება, რომ  
ზაფხულის სიცხე-პაპანაქებაში კაცმა თავი შეაფაროს და  
მოიჩრდილოს. ძველად ტყე ისეთი ხშირი ყოფილა, რომ  
მაღალი ტანის ეკლესიებს პფარიავდათ, რასაც ჰმოწმობს  
სამსარის გადმობრუნებულ ქვის წარწერა <sup>16)</sup>). ჯავახეთის  
დაბურული ტყეები აზრუმიდგან მოსულ სომხებს გაუკა-  
ფავთ. აზრუმში შეშას დახამებულნი ონავარ ფუტკარსა-  
ვით მისევიან ტყეს და მცირეს ხანს სულ ძირს დაუ-  
კიათ და როცა სულ გაანადგურეს, პურის გამოსაცხო-  
ბად და საჭმლის მოსახარშად ისევ მამა-პაპეულ ჩვეულე-  
ბას მიჰმართეს, ესე იგი წივას.

მესხეთს დაძაბუნება ჯერ ისევ ირაკლის დროს შე-  
მჩნევია. მეფე ერეკლეს ბრძანებით აუწერიათ მოკლედ  
14 ივნისს 1796 წელს ქვეყნები, რომელიც ქართლ-  
კახეთს გარს ეკრა. ალბად ეს აღწერილობა რუსის, მთავ-  
რობას თუ მიართვეს. აღწერილობაში ახალციხე ასეა  
დახატული: „ახალციხის ქვეყანა, რომელიც არის ქართ-  
ლის ერთი ნაწილი, უჭირავს ახლა ხვანთქარსა ძალითა  
და არიან გამაჰმადიანებულნი და ადგილ-ადგილ მცი-  
რედნი ქრისტიანენიც იპოვებიან, და ჰქვიან ადგილსა  
ამას საათაბაგო; აქა ზის ვეზირი სამ თულიანი და არს  
შემძლებელ თავისავე ადგილში ხუთის ათასის მეომრის

კაცის გამოყვანისა, მაგრამ ჯაბანი და შეუბედავნი არიან ომსა „შინა“<sup>17)</sup>). ეტყობა რეთვრამეტე საუკუნეშივე გამქრალა ძველებური ვაჟკაცობა და სიღარბაისლე მესხისა. ოსიალეთის სტიქონონურმა ძალმომრეობამ მოსპო და გაანადგურა ერთიცა და მეორეც. პოლიტიკურ თავისუფლებას მოკლებული მესხი და ბოროტის ბატონის ხელშემაცერალი დაბეჩავდა, დაგლახავდა, ზოგი არსებობისათვის ბრძოლაში გაწყდა და ვინც გადარჩა, გახდა მონა მზაკვარიც, როგორც იჭიყოდა ხოლმე ნეტარ ხსენებული „ვიცე-კანცლერი“ საქართველოს მეფეთა: ირაკლისა და სოლომონისა სოლომონ ლეონიძე.

დიდებულ მესხეთის ნასუფრალს რომ თავი ერთად მოუყაროთ, ხელს ეს-ლა შეგვრჩება. ეხლანდელ ჯავახეთსა და ახალციხის მაზრაში სულ ქართველ-კათოლიკეთა რიცხვი 1901 წელს იყო 6408 სული ორთავე საქეთისა. ქართველ-კათოლიკენი, რაღა თქმა უნდა, წმინდა ქართულის ენით ლაპარაკობენ, მხოლოდ საშინლად შეუბლალავთ წმინდა ქართული სახელები და გვარები სომეხ-კათოლიკეთა ეკლესიის აღსარების ზედგავლენით.

ზოგ ქართველ-კათოლიკეთა სამრევლოს მოძღვარი ჰყავს მკვიდრი სომეხი, რომელთაც ჩიქორთული ქართული მრევლში შეუსწავლიათ. წირვა-ლოცვა და დანარჩენი ლვთის-მსახურება სომხურადაა. ოფიციალურად და სხვა საბუთის ქალალდებში იწერებიან ასე: სომეხ-კათოლიკე. ეს ოფიციალური ტერმინი აღმნიშვნელია ქართ-

<sup>17)</sup> იხ. გრაмотა... A. წაგარელი, თ. II, ვ. I, გვ. 8. ეს საყურადღებო მოკლე აღწერა საქართველოს მეზობელ ქვეყნებისა ქართულადაცაა და რუსულადაც. რუსული ტექსტი გრამატების პირველ ტომშია დაბეჭდილი.

კელ-კათოლიკეთა სარწმუნოებისა, ანუ აღსარებისა, მაგრამ, სამწუხაროდ, სარწმუნოების აღმნიშვნელი ტერმინი ეროვნობისა და ხალხოსნობის აღმნიშვნელად გარდაიქმნა. მდაბიო ქართველ-კათოლიკ რომ ჰყითხავ, ვინა ხარო? გიპასუხებთ — სომებ-კათოლიკეო. თუ წყრომისა, ან გაჯავრების კილოთი ჰყითხე, რას მიედ-მოედები, მამა-პაპით ქართველი იყავ და სომხად როგორ გადაკეთდიო, მორცხვი პატარძალივით თავს ჩაღუნავს და მოკრძალებით გიპასუხებს: დიალ, ამბობენ, რომ წინად ჩვენი მამა-პაპანი ქართველები ყოფილანო. ქართველ-კათოლიკეთა მოძღვართა სახელებს წინ უძღვის სიტყვა „ტერ“ და მათი სახელები ასე გამოითქმის: ტერ-პოლოსი, ტერ-პეტ-როსი და სხვა.

ქართველ-კათოლიკენი დასახლებულნი არიან შემდეგ ადგილებში: ქ. ახალციხის ძველ ნაწილში, რომელსაც ძველადგანვე „რაბათს“ ეძახიან. რაბათის ზემო ეკლესიის მრევლი 529 სულია, რაბათისავე ქვემო ეკლესიისა — 665, ივლიტისა — 306. არის კიდევ რაბათის რომის კათოლიკეთა ეკლესია, რომელსაც განაგებდნენ პატრები და დღესაც ამ ეკლესიას განაგებს ქართველი პატრი, მამა ლაზარე გოზალაშვილი<sup>18)</sup>.

<sup>18)</sup> ქართველ-კათოლიკეთა რაოდენობის ცნობა გადმოვცა მამა ლაზარე გოზალაშვილმა. ახალციხისა და ახალქალაქის მაზრებში არიან კიდევ კათოლიკენი, ზოგი ტომით სომეხი, ზოგი კიდევ ქართველი ჩამომავლობისა. უკანასკნელთ (ველელებს) არც სომხური იყიან, არც ქართული, ლაპაოაკობენ ოსმალურად. იგინი გადმოსახლდნენ ს. ველიდან, არდაგანის ოლქიდან. სოფელნი: ხულგუმი, ტურცხი, კულიკამი და კართიკამი ამ ველელებითაა დასახლებული.

მრევლი მცირე ჰყავს პატრების ეკლესიას. ახალცი-  
ხის მაზრის შემდეგ სოფლებში ბინადრობენ ქართველი  
კათოლიკენი: 1) ვალე—750 სული. აქავე სცხოვრობენ,  
აგრედვე მართლ-მაღიდებელნი ქართველნი და ქართვე-  
ლი-მაჭმადიანნი. 2) უდე—1562 სული. აქაც სცხოვრო-  
ბენ ქართველი-მაჭმადიანნი. ქართველ-კათოლიკეთა მოძ-  
ლვარი და ქართველ-მაჭმადიანთა მოლა ერთის გვარისანი  
იყვნენ ერთ დროს. 3) არალი—657 სული; 4) ბოლა-  
ჯური—58, უმრავლესობა ამ სოფლისა ქართველი-მაჭმა-  
დიანია. 5) ბნელა—42 სული. ჯავახეთში, ანუ ახალქა-  
ლაქის მაზრაში, სულ ორი სოფელია, სადაც ქართველ-  
კათოლიკეთა ბინა შერჩენიათ და სადაც სუფთად ლაპა-  
რაკობენ ქართულად: 1) ხიზაბავრა—1698 სული და 2)  
ვარგავი—141, სულ მაშასადამე 6408.

მრავალი ქართველ-კათოლიკე ჩანთქა ულმობელმა  
ისტორიამ, ბევრიც წარსულს საუკუნეს გადაიხვეწა სტამ-  
ბოლს, ტფილისს, ქუთაისს და ბათუმს. ასე რომ ნაშთი  
ქართველ-კათოლიკეთა სულ ეგ 6408 სული ორივე სქე-  
სისა გახლავთ. ამ მცირე ნაშთსაც ბ-ნი სარუხანა გვედა-  
ვება—ეგენი მუდამ გვარ-ტომობით სომხები ყოფილან  
და დღესაც სომხები არიანო. ოვით ბ-ნი სარუხანა ერის  
კაცია, ტომით სომები, სარწმუნოებით სომებ-გრიგორია-  
ნი, ხელობით, კარგად არ ვიცით, ვაჭარია, თუ ნოქა-  
რი. საოცარი აქ ისაა, რომ თითქოს არც ხელობა და  
არც წოდება ხელს არ უწყობს ბ-ნ სარუხანას ლიტერა-  
ტურაში საეროვნო, ან საეკლესიო კითხვების ძიება-  
გამოკულებას მისდევდეს, მაგრამ რას იზამთ. უჯობს და  
ლაპარაკობს. ბევრს ედავა თამამ პუბლიცისტს ა. ხახანა-  
შვილი, დაუმტკიცა სიყალბე საბუთებისა, ისიც კი გა-  
მოუძებნა ხახანაშვილმა ბ-ნ სარუხანას, რომ ისტორიულ

დოკუმენტების წაკითხვის შნო და უნარი არა გქონიაო, მაგრამ რა. ხახანაშვილის დავას პრაქტიკული ნაყოფი არა მოაქვს-რა. ბ-ნი სარუხანა მეტის-მეტი გულქვავი და მკაცრი აღამიანი ყოფილა. მისი საქციელი ასეთს სურათს მაგონებს: იყო მეფე სვიანი, მძლავრი და კეთილი, პორფირითა, ძვირფასი სამკაულით და გვირგვინით მოსილი. უკეთურთ შეიშურეს მისი დიდება-სვიანობა და გაძარცვეს, დაშთა მხოლოდ გაძარცულს მეფეს მცირე რამ სამაჯური და მკერდს ნაკიდი ძეწკვი, აღმნიშვნელი ძველის დიდებისა. ერთს უკეთურთა უკეთურთაგანს, ყმასა მზაკვარსა, ესეც შეშურდა მეფისათვის და უკანასკნელი სამკაულიც მოსტაცა.

სარუხანასთანა პუბლიცისტები სხვისაგან კაც-მოყვარეობასა და ლმობიერებას თხოულობენ, თვითონ კი ისეთი მაღიანები ბრძანდებიან, რომ წარბ-შეუხრელად კაცს გადაჰყლაპავენ.

ახლა განვიხილოთ, თუ რამდენი დარჩა დიდებულ მესხეთის ბეითალმანზე ქართველი მართლ-მაღიდებელი. მართლ-მაღიდებელმა ქართველობამ თავი იჩინა მხოლოდ მესხეთის ორ ნაწილში: ჯავახეთსა და ახალციხეს (იგულისხმეთ ახალციხეს მხარე, ოლქი) რუსობის დამკვიდრების შემდეგ. მესხეთის სხვა ნაწილებში მართლმაღიდებელ ქართველის სინსილა და სახსენებელი კარგა ხანია გასწყდა. ჯავახეთი საციციანო მთას აკრავს, ახალციხე კი გურია-იმერეთს და დღევანდელ ზემო-ქართლს. ალბად ამ სიახლოვემ შეუწყო ხელი, რომ ქრისტიანობა სრულიად არ ამოვარდა და ნაცრის ქვეშ ჰლულდა ქრისტეს სიყვარული. ისიც უნდა გვახსოვდეს, რომ ქართლ-იმერეთიდგან ხშირად გადმოცვინდებოდნენ ხოლმე ქრისტიანენი სხვა და სხვა მიზეზის გამო. ს. კოთელიას, ხი-

ზაბავრას და სხვაგან დღესაც არიან ისეთნი, რომელთაც კარგად ახსოვთ, თუ რამ აიძულა მათი მამა-პაპანი აყრი-ლიყვნენ და აქეთ გადმოხვეწილიყვნენ. ერთმა კოფე-ლიელმა მთელი ისტორია მიამზო თვისის მამა-პაპის აყრა-გადმოსახლებისა სოფ. ქარელიდგან.

1900 წელს ჯავახეთსა და ახალციხეს ითვლებოდა მართლ-მადიდებელნი ორისაცე სქესისა სულ 10,088 სუ-ლი<sup>19</sup>). ამ რიცხვში ნაანგარიშევია მცირეოდენი რუსობა და ბერძენი სოფ. მიქელ-წმინდისა და ქ. ახალციხისა. მართლ-მადიდებელნი ბინადრობენ 1281 კომლად და შე-ადგენენ 13 სამრევლოს: 1) ახალციხისა, 2) წმ. მარი-ნესი, 3) ახალქალაქისა, 4) ბარალეთისა, 5) აწყურისა, 6) ვალესი, 7) გოგაშენისა, 8) ზედათმოგვისა, 9) ქილ-დისა, 10) მუსხისა, 11) ტოლოშისა, 12) საროსი და 13) ერკოტისა.

აი სოფლებიც, სადაც ბინადრობენ მართლ-მადი-დებელი ქართველნი: ახალციხის მაზრისა: 1) ვალე. 2) ტატანისი, 3) ქობარეთი, 4) ლრელი, 5) ანდრია-წმინდა, 6) მუსხი, 7) ქუნცა, 8) ერკოტა, 9) ტობა, 10) რო-კეთი, 11) დადეში, 12) ძველი, 13) ტოლოში, 14) ზე-დათმოგვი, 15) აგარა, 16) აწყური, 17) ტყემლანა და 18) ქვაბის-ხევი. ახალქალაქის მაზრისა—1) ბარალეთი,

<sup>19</sup>) მართლ-მადიდებელთა შესახებ ცნობანი ვადმოგვეცა დეკა-ნოზა დიმიტრი ხახუტაშვალმა. დღევანდელ ახალციხის მაზრაში ხუთ სოფელია, რომელთა მკვიდრნი ბორჯომის ხეობიდგან ამო-ვიდნენ მე-XIX საუკუნეს. ამ ხუთ სოფელში მხოლოდ ქვაბის-ხევი ეკუთვნის ახალციხის საბლალოჩინოს, დანარჩენი: დვირი, ტაძრი-სი, დგვარი და საკირე ბორჯომისას. ბერძნები და რუსები რომ გამოვაკლოთ, ქართველ მართლ-მადიდებელთა რაოდენობა დაახ-ლოვებით შეიძლება მივიღოთ 10,000 სული.

2) სარო, 3) ვარევანი, 4) ვარგავი, 5) თოკი, 6) კო-  
თელია, 7) აზაერეთი, 8) ბალანთა, 9) ჭიხარულა, 10)  
ფრთენა, 11) მურჯახეთი, 12, ჩუნჩხა, 13) ქილდა, 14)  
ვოგაშენი და 15) აფნია.

როგორც ყველგან საქართველოში, იმერეთს ვარ-  
და, ქალაქად მკიდრი ქართველი ძალიან ცოტაა. ხალ-  
ციხეს კანტი-კუნტად კიდევ მოიპოვებიან, მაგრამ ჯავა-  
ხეთის ახალქალაქი წმინდა სომხების ქალაქია. გახსოვს,  
აქ ერთი მოხუცებული მეწისქვილე იყო მართლ-მადიდე-  
ბელი ქართველი და, ვგონებ, უძეოდ ესეც ამოწყდა.  
არის კიდევ ერთი ქართველი და, როგორც მითხრეს,  
იმერეთიდან გადმოსახლებულა. ასეთი ქართველი კი ან-  
გარიშში არ არის მისაღები, როგორც მოსული დროე-  
ბით ქართველი მოხელეობა.

ზემოდ დასახელებულ რიცხვში (10,088) სასულიე-  
რო წოდებისა 193 სულია, სამხედრო—102; ვაჭარი,  
ხელოსანი და მოქალაქე—201, გლეხი—9170.

მთლად მართლ-მადიდებელთა სამრევლოებში 1900  
წელს დაბადებულა: 240 მამრი, 294 მდედრი, სულ 534.  
ქორწილი ყოფილა 109. გარდაცვლილა: 144 მამრი,  
149 მდედრი, სულ 293. მაშასადამე „დიდებულ მესხე-  
თის ნატამალს“ 1900 წელს უმატნია 241 სულით <sup>20)</sup>).

„დიდებულ მესხეთის“ მთელი ავლა-დიდება დღეს  
სულ ეს არის. რაღაც 10,000 სული, ათას ორას ოთხ-

<sup>20)</sup> ვერ გამოვარკვიეთ, რა გიზეზია, რომ ქალები ასე სჭარ-  
ბობენ მამა-კაცებს. დაბადებითაც მეტი დაბადებულან, სიკვდილი-  
თაც მამა-კაცზე მეტო მომკვდარან. ყველგან მამა-კაცი სჭარბო-  
ბენ, აქ კი ქალებს გაუმარჯვნიათ. ეს ხომ არ არის მიზეზი მესხე-  
თის დაკნინებისა? ხუმრობის გუნებაზე რომ ვიყოთ, სწორედ ამ  
მიზეზით ავხსნიდით მესხეთის ამოვარდნას...

მოცდა ერთ კომლად გაბნეული ორს მაზრაში. ამოდენა ხალხი ხომ სოფელ საგარეჯოშიაც იქნება ტა თუ კოტა რამ დააკლდება, მიუმატეთ მეზობელი სოფელი პატარ-ძეული, ან ნინო-წმინდა და მიიღებთ 1281 კომლს ქართველს. გარე-კახეთის ორისა, თუ სამის სოფლის ქართველობა რაოდენობით უდრის მთელ მესხეთის ქართველობას, თუ, რასაკვირველია, ანგარიშში არ მივიღებთ სომხის ტიბიკონზე მდგარ ქართველ კათოლიკეთ და გამამაღიანებულ ქართველობას, რომელთაც ასე უწყალოდ და ულვთოდ აიცრუეს და აიყარეს გული მშობელ დედაზე და სამშობლოზე<sup>21)</sup>... დაცინვაა ბედისა, მაშ რა არის!..

1897 წელს იანვრის თვეში ერთის დღის განმავლობაში აიწერა რაოდენობა ხალხისა რუსეთის იმპერიაში. ამ აღწერამ აღმოაჩინა, რომ ახალქალაქის მაზრაში ითვლებოდა 67,919 სული ორისავე სქესისა, ხოლო ახალციხის მაზრაში— 53,757, სულ ორთავ მაზრაში 121,676 ადამიანი<sup>22)</sup>). ქართველები: კათოლიკენი და მართლ-მალიდებელნი რომ ერთად შევაერთოთ, მივიღებთ 16,408. მაშასაზამე ქართველობა შეადგენს მეშვიდე ნაწილზე ცატა მეტს და მერვეზე ცოტა ნაკლებს, ანუ აქაურ ყოველ ას კატე ქართველი მარტო თორმეტ კაცამდე იქნება.

თუ მოისურვებთ და მეცნიერულ ელფერს მისკემთ

<sup>21)</sup> საბედნიეროდ, ამ უამად 1914 წ., ქართველ-მაჭადიანებში დაიწყო ეროვნული მოძრაობა. ქართველი-კათოლიკენი ხომ აშკარად იბრძვიან ეროვნულ უფლებისათვის. ამისი უტყუარი საბუთებია.

<sup>22)</sup> იხ. კავკასიის კალენდარი 1901 წ. გვ. 23 მესამე განცოდილებისა.

ციფირებს, დაცინახავთ, რომ ქართველები შეადგენენ ახალციხისა და ახალქალაქის მაზრების მკვიდრთა საერთო რაოდენობისას  $13,48\%$ .

ეს ყველა ქარგი, მაგრამ საქმე ისაა, რომ მეზობლები გვედავებიან 6408 კათოლიკეთ და ჯერ დავა საბოლოოდ არ გადაწყვეტილა. ჩვენ რომ ჩვენი ვსოდები და იმათ თავიანთი, ამითი საქმეს არა ეშველება-რა, ვიდრე ავტორიტეტის მექონე დაწესებულება არ გადასწყვეტს დავასა. სანამდე კი, მეტი რა ჩარაა, სათვალავში უნდა ვიქონიოთ მხოლოდ მართლ-მადიდებლობის აღმსა-რებელი ქართველობა. ესენი, როგორც მოვიხსენიეთ, არიან 10,000 სული, ესე იგი  $8,21\%$  ორის მაზრის მკვიდრთა საერთო რიცხვისა, ანუ ყოველ ას კაცზე რვა მრთელი და ერთი მეხუთედი მართლ-მადიდებელი ქართველისა მოვა.

ყველა ნათქვაშის შემდეგ ნუ თუ სრული, კანონიერი საბუთი არა გვქონდა ამ წერილების ეპიგრაფად გვეხმარნა ანდაზად მიჩნეული ბრძნული ლათინური თქმულება: *sic transit gloria mundi*<sup>23)</sup>. ვფიქრობთ, რომ არც ერთ ქვეყანას ისე ზედგამოქრით არ მიუდგება ეს ანდაზა, როგორც მესხეთს. განა გაგონილა სხვაგან სადმე ასეთი უკულმართობა, ცვალებადობა და სიმუხთლე ბედისა? განა შესაძლებელია, ძველი დიდება ისე გაჰქრეს, რომ მისი ერთი სხივიც აღარ გვინათებდეს და გვათბობდეს? განა გონებით მისაწვდენელია, რომ სამშობლო რუსთველისა, გიორგი და ექვთიმე მთაწმინდელთა, ბექასი და აღმულასი ისე აოხრდეს, რომ კაცმა ვეღარ იცნოს? ას კაცზე რვა-ლა დარჩენილა ქართველი, თუ

23) ქართულად ასე ითქმის: ასე წარმავალია დიდება ქვეყნისა.

გნებავთ თოთხმეტი იანგარიშეთ. ცხადია, რომ ჩვენ უფრო სტუმრის სახელი შეგვშვენის, ვიდრე მასპინძლისა. ვაგლახი მაშინ იქნება, მასპინძელს თუ სტუმრიანობა მოსწყინდა და ანდაზისაებრ: დილით ოქრო ხარ, სტუმარო, საღამოს ვერცხლად იქცევი, თუ ხანი დაგიგვიანდა, სპილენძად გადაიქცევი, --თავაზიანად გვიბრძანოს — მიბრძანდით, სახლ-კარი გამინთავისუფლეთო.

---

# ნატული და გაგონილი.

## I

შიხეილ გეფისაშვილის გარდაცვალების გამო.

თერთმეტ იანვარს აქ, ახალკიხეს, გარდაიცვალა შიხეილ მეფისაშვილი, ართვინის ოლქის უფროსად ნამ-  
ყოფი. ბევრის მხრით იყო შესანიშნავი განსვენებული...

უკანასკნელ დროს ხშირად ლაპარაკობენ, ქართველ  
კაცს ნიჭი, უნარი არა აქვს მართვა-გამგეობისა, უფრო-  
სობისაო. მაზრა რა არის, იმის პატრონობაც კი არ შე-  
უძლიანო, ვითომ ისე დაძაბუნდა, ისე დალაჩრდა და და-  
ხურდავდა ქართველიო.

სრულიად მოკლებულია სიმართლეს განზრახ აჩე-  
მებული აზრი. მაგალითების საძებნელად შორს რომ არ  
წავიდეთ, მარტო განსვენებულის წარსულის მცირედად  
გახსენებაც საკმარისია, რომ ზემოდ აღნიშნულის აზრის  
უსაფუძვლობა დავინახოთ.

მეფისაშვილს არც უნივერსიტეტი, არც გიმნაზია  
დამთვრებული არა ჰქონდა. მიუხედავად ამისა, მართვა-  
გამგეობის უნარიც ჰქონდა, ნიჭიცა. მთელის ძეელის  
მესხეთის ტერრიტორია არზრუმ-ტრაპიჩონამდე რომ ჩაგე-

გარებინათ, პირნათლად გაუძლვებოდა და ქვეყანას არა-  
ვის ააოხრებინებდა. შესანიშნავის ზედმიწევნით იცოდა  
განსვენებულმა მთელი ეს კუთხე, ზნე და ჩვეულება  
მკვიდრისა და მისი სულიერი ვითარება. ამასთანავე სამ-  
შობლო ქართულის გარდა ზედმიწევნითვე, თითქმის ხე-  
ლოვნურად იცოდა სომხური და ოსმალური. მისი სჯა-  
ბასი ოსმალურად ბეგებთან ოსმალეთის ტივან-ხანას მო-  
გავონებდა და ამის მნახველს უნებლიერ აზრი სტამბო-  
ლისაკენ გაგიტაცებდა.

ბუნებრივს ნიკა და გამჭრიახობას გარეგნობაც  
ხელს უწყობდა. წამოსადეგი და ახოვანი იყო მეტად.  
კილო საუბრისა ხომ ისეთი ძლიერი, მბრძანებელი და  
მორჩილების გამომწევი ჰქონდა, რომ უნებურად იფიქ-  
რებდი, ეს კაცი მბრძანებელად არის სწორედ დაბადე-  
ბული და არა სხვის ბრძანების აღსასრულებლადათ.

ასეთი კაცი პოვნაა მხედართ-მთავრისა და სარდ-  
ლისათვის. აკი კიდეც იმიტომ მიაკუთ ყურადღება მე-  
ფისაშვილს განსვენებულმა გრაფმა მიხეილ ტარიელის ძე  
ლორის-მელიქოვამა რუს-ოსმალოს ომის დროს. რუსები  
რომ იტყვიან, ეს კაცი ჩემი მარჯვენა ხელიაო, სწორედ  
ზედ გამჭრილია მეფისაშვილსა და ლორის-მელიქოვ-  
ზედ. ლორის-მელიქოვამა აკარის გამგებელ შარიფ-ბეგ  
ხიზშიაშვილთან სადიპლომატო მოლაპარაკება მეფისა-  
შვილს მიანდო. ყველამ იცის, რითაც, ან როგორ გა-  
თავდა ეს მოლაპარაკება. ხიზშიაშვილმა აკარა რუსეთს  
დაუგმო უომრად. მიწერ-მოწერა მეფისაშვილსა და  
ლორის-მელიქოვს ამ მაღალ-მნიშვნელოვან საგნის შე-  
სახებ ქართულად ჰქონიათ.

დიდის მწერხარებით უნდა აღვნიშნო, რომ ლორის-  
მელიქოვის წერილები სამუდამოდ დაღუპულია ისტო-

რისათვის. უბედურის შემთხვევის წყალობით წერილები დაიკარგა!..

განსვენებული მეფისაშვილი იყო კათოლიკე სარწმუნოებით. ამის გამო მიცვალებულს ანდერძი აუგეს სომეხ-კათოლიკეთა ტიბიკონისამებრ.—ბოლიშს ვიხდი განსვენებულის ჭირისუფლებთან, თუ აქ მეტი რამ მომივიდეს უნებლიერდ.—ანდერძი დაიწყეს ქართულად, მაგრამ რაღან მლელელთა შორის ზოგი ტომით ქართველი იყო და ზოგი სომეხი, ვერ შესძლეს ქართულად ბოლო გაეტანათ მწყობრად და არჩიეს სომხურად გადასულიყვნენ. წირვაც სომხურად გახლდათ, მხოლოდ სახარება იქმნა წაკითხული ქართულად.

ამბობენ, ძალიანაც რომ უნდოდეთ, ველარც კი მოახერხებენ ქართველ-კათოლიკენი წირვა-ლოცვას ქართულად, რაღან ქართული საღმრთო წიგნები აღარ მოეპოვებათ და ახლად ველარ ჰბეჭდავენო. თურმე აგრე სამოცი წელიწადი სრულდება, რაც ქართულს სტამბას ქართველ-კათოლიკეთა აღსარების წიგნი არ დაუბეჭდია...

განსვენებული სიბერის დროსაც არწივს მოგავონებდა, მართალია ფრთებ-მოტეხილს, მაგრამ მაინც არწივს...

განსვენებული დაკრძალეს ს. ივლიტას. ამ სოფელში, ასე მითხრეს, რამდენიმე კომლი მაჰმადიანნი „ქართველი ტომისანნი“ და კათოლიკენი, ტომით სომეხნი, სკხოვრობენო. ეკლესიის გალავანში კი საფლავის ქვას ქართული წარწერანი აქვს. ეკლესიაში სომხურად აღიდებენ უფალსა და საფლავის ქვებს კი ქართულად უკეთებენ ზედწარწერას. ბედის დაცინვაა, მაშ რა არის ესა?

კარგს იზამდა ბ-ნი ილია ჭავჭავაძე, მესხეთისკენ ვა-

მოესეირნა, ვიდრე „ქვათა ლალადი“-სის წერას შეუდგებოდა. აბა, აქ პნახავდა ნამდვილ ქვათა ლალადს!

მართალია, ბედი ცულლუტი და ცვალებადია, მაგრამ არც ასეთი გადამეტებული სისასტიკე ვარგა. უკუღმართმა და შავად და ბნელად მოსახსენებელმა მარტოოდენ საფლავის ლოდნი-ლა გვიწყალობა სანუგეშებლად. ძლვენი მწირია, მაგრამ რას იზამთ?

მეფისაშვილის საფლავის ქვასაც ხომ ქართულად დაწერენ ეპიტაფიას საბუთად იმისა, რომ აქ ქართველი ასაფლავია. ისტორიას ეს ქართული წარწერა-ლა დარჩება.

„კარგი რამ გჭირდეს, გიკვირდეს, ავი რა საკვირველია..

## II

### მაჟმადიან თართველების გადასახლება.

ერთი სურათი ვნახე ამას წინად ბორჯომის სადგურზედ და უნებურად გამახსენდა მშვენიერი პატარა მოთხობა განსვენებულის ჩვენის ალექსანდრე ყაზბეგისა—ელისო.

სადგური სავსე იყო ქართველ მაჟმადიანებით, ლამის პირველი საათი იქნებოდა, ბავშვები და დედა-კაცნი კერებებივით ეყარნენ ცივ იატაკზედ. მამა-კაც არ ეძინათ, ხოლო ორიოდე დედა-კაცი აქა-იქ წამოყუნდაულიყო და ბავშვებს ძუძუს აწოვებდნენ, თან რაც ძალი და ღონე ჰქონდათ ჩაღრებს იფარებდნენ, რომ უცხოთა თვალთაგან დაემალათ პირისახე. კარგა ხანს ვუყურეა ამ სევდისა და დარდის ამშლელს სურათს, ვიდრე გო-

ნებამ ხელახლა არ გამიტაცა მოხუცი ანზორისკენ, ელი-სოსა და ვეუიასაკენ.

სხვისა რა მოგახსენოთ და მე კი იმ აზრისა ვარ, რომ ყველაზე ძლიერი სევდა, იდამიანის დამაავადებელი და დამასწულებელი ისაა, როდესაც ჰგრძნობ, რომ შენი ბედი შენს ხელში არ არის. ეს რომ ასე არ იყვეს, განა ამ სურათს წავაწყდებოდი? განა ამ საცოდავებს აქვე ვერ მოვაწყობდით? ხომ ცხადია, რომ ეს უბედურ-ნი იქ, უცხოეთში, სამოთხეს ვერ იპოვნიან და მხოლოდ პირი ციფი სამარისკენ მიუმართნიათ.

თვალი მოვყარი ნაცნობ გლეხსა.

— საიდა, შენა? ეს რა ამბავია, განა ასე მალე აი-ბარეთ?

— დიახ, ბატონო, აკი იმ დღეს მოგახსენეთ, რომ წასვლას ვაპირებთო. ყველაფერი რაც რამ გვება-და, მივყიდ-მოვყიდეთ, მატარებელს ველით, დაგვპირ-დნენ, ცალკე ვაგონს მოგცემთ ბათუმამდინაო.

საუბარი შევწყვიტე. ან კი რაღაზე გველაპარაკნა? მართლა, ორი კვირის წინად, ბევრი ვილაპარაკეთ, მე ჩემსას არ ვიშლიდი, საიდა თავისას. ბოლოს თავისი ისევ საიდამ გაიტანა და აიბარება. იმასთან სხვამაც ბევრმა მოშალა მამაპეული ფუძე.

საიდა და მისი მეზობლები ს. საკუნეთიდან არიან. ეს კარგა მოზრდილი სოფელი აწყურს აკრავს, ასე 5—6 ვერსი იქნება. შიგ მშვენიერი თლილი ქვის პატარა ქარ-თული ეკლესია დღესაც კოხტად გამოიყურება. ამბო-ბენ და ბევრსაც სჯერა, რომ ეკლესიიდგან ხანდახანო-ბით, საღამო უამს, ნათელი მოსჩანსო. ერთხელ, განსვე-ნებულმა აწყურის ეჭიმმა, შესანიშნავის გულის პატ-რონმა კაცმა ივანე ბარამიშვილმა კიდევაც წამიყვანა სა-

ლამო ხანს აწყურიდგან საკუნეთისკენ — ეგები დავინახოთ ნათელიო, — მაგრამ ვერა დავინახეთ-რა.

საკუნეთს ძველად საყოველთა ერქვა ქართულადაო. არ ვიცი, რამდენად მართალია ესა, ასე კი ამიხსნა. ამ სოფლის ერთმა ბატონთაგანმა. მთელი სოფელი დღე-საც, დიდი და პატარა, წმინდად და სუფთად ლაპარა-კობს ქართულად. ძველი ქართული გვარებიც ისევეა კარგად შენახული, როგორც შუაგულ ქართლსა და იმე-რეთში.

სევდის ამშლელ სურათს მოვშორდი და ჩემს გზას გავუდექი. გზაში მომაგონდა ამ სოფლის მოძღვარი-მოლა, ახალგაზდა, სანდომიანი, წმინდა ქართველური სახის მეტყველებით. გაცნობის დროს გამოვყითხე მო-ლას—სად მიიღო განათლება. ბევრი რამ მიამბო საყუ-რადლებო. ნაამბობმა ცხადად დამანახვა, თუ ასე უწყა-ლოდ რად აიყარეს ჩეენზე გული ჩეენმა თანამემამუ-ლეთ.

თორმეტი წლისა ვიყავი, როცა სტამბოლს გამგ-ზავნეს სწავლის მისაღებადაო. საცხოვრებელი იქ არა მქონდარა, სახლიდგან მარტო გზის ხარჯი გამატანესო. მივებარე სასწავლებლად სტამბოლის მოლებს და ვცხოვ-რობდი ჩემთვისო.

— მოლა, რას ამბობ, განა მშიერი არ მოკვდი უც-ხოეთში, იმ უშველებელ ქალაქში, სადაც არც ნათესავი და არც თვის-ტომი არ მოგეძევებოდა?

მოლამ იტკიცა.

— როგორ თუ უცხოეთი? განა იქ სულ ჩეენები არ არიან? ქვეყანა დიდია, ძლიერი, მდიდარი, განა აქაურ ფუხარებსა (ლარიბი) ჰგვანან? მაჲმადიანი იქ მშიე-რი როგორ მოკვდება.

ამას .რომ ამბობდა, ახალგაზდა ჯან-ლონით სავსე მოლას სახე გაუბრჩყინდა სიამაყითა და ამპარტავნებით, ასე .რომ მევე შემჩრცვა ჩემის გაოხრებულის და გატრა-ლებულის სამშობლოსი.

მოლამ ისიც მიამბო, რომ ათი წელიწადი დავრჩი სტამბოლსაო. სახლიდგან საზრდო არა მომდიოდა-რა, მაგრამ საჭიროც არ იყოვო. რამაზანისა და ბაირამის დროს, აგრედვე სხვა დიდ დღესასწაულებში წავიდოდით სტამბოლს გარედ, სოფლად, ლოცვებს ვკითხულობდით. ვგალობდით, აი ისე, როგორც ქართველები ჭონაზე დადიან ხოლმეო და იმდენს საშოვარს ვშოულობდით, რომ წლითი-წლობით თავზე საყრელი გვქონდაო.

მგონი ადვილად მიხვდებით ეხლა, თუ სადაა ამ ყმაწვილი მოძღვრის „alma mater“-ი, საით მიჰთრინავს მისი გონება და რა გუნებაზე უნდა იყვეს ან თვითონ ეგა, ან მისი მრევლი. დიდ სიღუბჭირეს და უბედურებას ჩვენის დღევანდელის ცხოვრებისას ვიდა იტყვის, როცა მცირედი ნაკლულევანება აუცრუვებს კაცს გულსა და დატოვებინებს სამშობლო მიწა-წყალსა.

რალა ესენი და რალა ნარზე მჯდომარე ნიბლია ჩიტი!

---

ამ დღეებში, მეორე, ბოგელ მოლასთან მქონდა საუბარი. სოფელი ბოგა იგივე ქართველ მაჰმადიანებითაა დასახლებული და სუფთა ქართული შერჩენიათ. გადასა-თარგმნი მქონდა მცირე რამ თათრული. თარგმანს რომ მოვრჩით, მასლაათი გავაბით.

— თორმეტი წელიწადი ვისწავლე დილურის მოლებ-თანო და შემდევ ეგზამენი დავიკირე მოლის ხარისხის მისაღებად ტფილ ქალაქში მუფთიასთანაო.

დღევანდელ მესხეთში დილურის სკოლას ხუმრობით „მაჰმადიანების აკადემიას“ ეძახიან. აქ ბლომად არიან ნასწავლი მოლები, იყვანენ შეგირდებს და ასწავლიან არაბულს და ყორანს. მთელი ავლა-დიზება ამ აკადემიისა ესაა, სხვა იქ არა მოიპოვება-რა.

სოფელი დილური, რუსულად დგვირ, ფოცხოვშია, გარშემო სულ ქართული სახელებია სოფლებისა, როგორც მაგალითად: საიხე, გული, კილვანა, პეტუბანი, ზენდარი, საკირე, ხერთვისი, მერია, სამიხელია, გუნია, ჯაბორია, კოდისი, ტაბალა, ხონამისი, ფარხანა, ხეოთი, ალი, აგარა, წურწყაბი, სათლმალი და სხვა, მაგრამ სახელის გარდა ქართული აღარაფერია. სულ აღვილა დედამიწის პირიდან ქართველის სახენებელი.

მოგეხსენებათ, რომ მოლებიც კაცნი არიან და სმა-ჭამა უნდათ. შეგირდები ფულს არ აძლევენ, ათასში ერთხელ თუ მცირე ძლვენს მიართმევენ; მაგალითად შა-ქარსა და სხვა ამ გვარ ტკბილეულობას. მასწავლებელ მოლებს დიდ მფარველობას უწევდა და ასაზრდოებდა ფოცხოვის გავლენიანი და შეძლებული კაცი შაქირ-ბეგი. იგი ენათესავებოდა კარგად ცნობილს, განსვენებულს ფეიზულა ბეგ-ათაბეგოვს — ქვაბლიანელს.

შაქირ-ბეგიც სხვებსავით შარშან აიბარგა ცოლ-შვილით, გადავიდა საოსმალოში, იყიდა მშვენიერი სახლი სტამბოლს და იქ დაესახლა. ეხლა ვიღა პატრონობს დილურის „აკადემიას“, არ ვუწყით.

დილურის „აკადემიიდგან“ გუვერნიორებიც გამო-დიან. ბევრგან ბეგების ოჯახში მინახავან მასწავლებელ-გუვერნიორნი დილურის აკადემიისა. საზოგადოდ მოლას ნასწავლ-ნაკითხ კაცს ეძახიან. რამდენჯერ უთქვამთ ჩემ-

თვის გლეხებს „კაი ნაკითხი“ მოლა გვყვავსო. ამ ჯურის გუვერნიორ-მასწავლებელნი ჯილდოდ შრომისათვის ფულს არ იღებენ. ასმევენ, აქმევენ, ბინას გაუჩენენ, მორჩა და გათავდა. ესენიც მწიგნობრობენ მფარველ ბეგის ოჯახში და ბავშვებს არაბულად წერა-კითხვას ასწავლიან. თუ შტატის მოლაა და მრევლი ჰყავს, მაშინ, რასაკვირველია, მღვთის მსახურებასაც ასრულებენ და ემორჩილებიან სამაზრო ყაზის.

დარწმუნებით და მტკიცედ ვიცი, რომ მოზარდი თაობა ლიდის გაჭირვებით ითვისებს არაბულ ენას მოლების სკოლაში. უცნაური აზრი მომივიდა, მოდი და ამ ჩემს ბოგელ მოლას ეგზამენს ვუზამ, გამოვცდი, თუ რამდენად იცის არაბული-მეთქი. წიგნი არა მქონდა-რა, ნ. მარრის თხზულების გარდა: „Тексты и разыскания по армяно-грузинской филологии“, ტ. IV. გადაუშალე ლექსიკონი, საცა ბ-ნ მარრს მოყვანილი. აქვს უცხო ენებიდგან ქართულში შემოტანილი სიტყვები. ასეთს ნასესხებ სიტყვებს არაბულად და სპარსულადაც უწერია გვერდით. მოლამ ბეკაფიოდ წაიკითხა: ალამი, ათაბეგი, ალვა, ალი, ალმასი, ამბარი (ароматъ), ბალჩა და სხვა.

— მოლა, კარგად ყოფილხარ ნაკითხი,— მოვუწონე კითხვა; ქართულად ჩემსაებრ ლაპარაკობ და ნუ თუ ქართული წერა-კითხვა არ იცი?

— რად მინდა, ბატონო, ქართული, რაში უნდა გამოვიყენო? — მკვირცხლოდ მომიგო აკადემიკოსმა მოლამ.

ამ პასუხიდგან ნათლად სჩანს, რა ულმობელის თანდათანობით ეკარგება ფასი ქართულსა და გამოუსადეგარი ხდება. მას შემდეგ, რაც მთავრობამ ქართველი მაჰმადიანი „თათრად“ აღიარა, სულ მოლო ეღება ათასი

წლოვან ქართულსა. ქართული ენის გადაშენების პროცესი ჯერაც არ შეჩერებულა და, ვერ წარმომიდგენია, ამ ფრიად საყურადღებო საგანს ასე გულ-გრილად რად ეკიდება ჩვენი ყოველდღიური პრესსა.

შარშან და შარშაწწინ მთავრობამ მოახდინა რეფორმა ადგილობრივი მართვა-გამგეობისა აქარაში, სადაც დღესაც წმინდად ლაპარაკობენ ქართულს გურულის კილოთი. განმეორდა ბედშავი შეცდომა (როკოვა იშინა). აქარლების სამშობლო ენად აღვიარეს ოსმალური-თათრული, სწორედ ისე, როგორც ახალციხის აღების შემდეგ პასკევიჩის მიერ, მესხეთისა და ჯავახეთის ქართველ-მაჭადიანობას უწოდეს თათრები. ასეთი ისტორიისა და ბუნების წინააღმდეგი შეცდომის გამო სასოფლო სამართველოებში მოიწვიეს მწერლებად (ИИИ-ეარ) ისეთი, რომელთაც უეჭველად უნდა იცოდნენ სახელმწიფო ენის გარდა, ესე იგი რუსულისა, მხოლოდ თათრული. თათრულის მკუდნენი აღმოჩნდნენ ამ კუთხეში მარტოოდენ ბერძნები და სომხები და სწორედ ესენი გაამწესეს მწერლებად. მკითხველი აღვილად მიხვდება, თუ რა ხეირი დაყყრება ქართულ ენას აქარა-ჭანეთ-ქობულეთსა და ტაო-კლარჯეთში. ბათუმიდგან ტრაპიზონამდე წერიალით გაისმოდა ქართული და მისი კილო-ჭანური, ხოლო ამ შეცდომის წყალობით, არ გაივლის 20—30 წელიწადი, რომ სრულიად მოისპობა შოთა რუსთველის ენა და მეტმე, ვგონებ, ქართულის შესაწავლად მხოლოდ ფრონის ხეობანი-ლა დაგვრჩება, ვინაიდგან ეს ხეობანი შუაგულ ქართლშია და ჯერ-ჯერობით იერიშით აქ არავინ მოვალეობია.

საუბრის დასასრულმა მოლასთან მცირედი იმედი მომტა საქმის გამოტრიალებისა, უკეთუ დიდი და პატა-

რა სავსებით შევიგნებთ ჩვენს მოვალეობას და ერთმანეთში ლაფში ამოსვრის მაგიერ, ვიშრომებთ მეღვრალ და გავაკეთებთ, რის გაკეთებაც შეგვიძლიან, ან რის უნარიც გვიწყალობა უფალმა.

— რაյი შეიტყო ფოცხოვის უფროსშია მიხაკო ხერხეულიძემ, — სთქვა ბოგელმა მოლამ, რომ სკოლაჩი (ასე ამბობენ აქ მესხეთის ქართველ-მაჭმადიანნი) ქართულად მოლაპარაკე ბიჭები სწავლობენო, — იქ ხომ ქართული არავინ იცის, მაშინადვე მობრძანდა, მოგვიყითხა, ერთად დაგვაგროვა და სულ თავზედ ხელს გვისვამდაო. სახე სულ უცინოდა, მხიარულობდა და სტკბებოდა ჩვენის ხილვით. უბრძანა ჩაფრებს დაეკლათ ჩვენთვის კრავი. მასწავლებელ მოლებს უბრძანა, თუ ეს ბიჭები გავილახნიათ, აქ აღარავის გაბოგინებოთ. ბევრჯელ ყოფილა კნიაზი ჩვენსას და პატივი უციაო.

ამ მხარეს თავადი მიხეილ ხერხეულიძე განთქმული ყოფილა უზომო, წმინდა ქართველური გულუხვობით, სტუმართმოყვარეობით და მასპინძლობით. დღევანდელს ქართველ ინტელიგენტს, ცოტა არ იყოს, ეხამუშება წრეს გადასული სტუმართმოყვარეობა, მაგრამ რას იჩამთ, როდესაც ჯერ ჩვენთვის ჩვეულება რჯულზედ უმტკიცესია. მე პირადად კარგად არ ვიცნობდი თ. ხერხეულიძეს (მხოლოდ ერთხელ ვნახე ტფილისში, სადაც ბანკში დაგირავებულ მამულის საქმეს არიგებდა), მაგრამ დავრწმუნდი კი, რომ მისი შესანიშნავი გულუხვობა და პურმარილი ბევრს დაჰვიწყებია და მარტო ირონიით მოუგონია წარსული ლხენა-ქეიფი \*). დიახ, სწორედ რომ

\*) ერთხელ თურმე ფოცხოვს ეწვია მთავარ-მართებელი თ. დონდუკოვ-კორსაკოვი. ახლდა თავადს დიდი და ბრწყინვალე ამა-

საჭიროა. წინადვე გავითვალისწინოთ ხოლმე, ვის ვუ-  
ლებთ სახლის კარსა, ვის ვუმასპინძლდებით და ვის ვაძ-  
ლევთ სალაშს. ეროვნების შესანახად და მის გასაძლიე-  
რებლად სწორედ რომ საჭიროა ყველა ესა და უპირვე-  
ლესად კი ნივთიერი ძალ-ღონე.

ამ ისედაც ყოვლის მხრივ რიგიანის ჟაცის პურ-  
მარილი ბევრს ზნასწავლს. დავიწყებია, არ დავიწყებია მხო-  
ლოდ მისი ქართველური გული და სიყვარულით აღსავსე  
ორიოდე ტკბილი სიტყვა ბოგელ მოლას.

— ბატონო, ეხლაც რომ მოვიგონებ კნიაზსა, პირ-  
ზე ნათელი მაღვებაო. რომ იცოდეთ, რა კაცი იყოვო...  
ასე ლაპარაკობდა მოლა.

მე კი ისე ვფიქრობ, რომ ეს წარუხოცელი კავში-  
რი ამ ორ ადამიანს შორის გაუბამს სამშობლო ენის, მის  
მიუწდომელს და უხილავს ძაფებს. გულს გული იცნობს  
და სულს სულიო. ასეთი გაცნობა ხვედრია მხოლოდ  
სამშობლო ენისა, უიმისოდ ერთმანეთისას ვერას გავი-  
გებთ და სამუდამოთ დავშორდებით.

### III

#### მთავარ-დიაკონი ჯვარიძე.

ახალციხის მაზრის სოფელ ძველში (რუსულად ვე-  
ველი) დღესაც სცხოვრობს ღრმად მოხუცებული მთავარ-

---

ლა. თ. მიხეილ ხერხეულიძემ ისეთი ნადიმობა გაუმართა თ. დონ-  
დუკოვს, რომ მთელი მესხეთი აალაპარაკა.—თ. ხერხეულიძე შემ-  
დევში ყარსში გადაიყვანეს პოლიციების ტრად. ამ მხიარულმა და  
სტუმართ-მოყვარე კაცმა ტრაგიკულად დაასრულა დღენი თვისი-  
თავი მოკლა.

დიაკონი ანდრია ჯვარიძე. მოხუცებულს საკუთარის თვალით უნახავს თათრების (ასე ეძახის ხალხი თსმალოს და ენგიჩართა) რეზიმი, მათი ბატონობა და პარპაში აკლებულ და აწიოკებულ მესხეთში. დიდი ხანია მსურდა ამ მოხუცის ნახვა: და ფაგება ძველის-ძველის ამბებისა, მაგრამ, სამწუხაროდ, ვერ ჩავიგდე ხელში ჩემთვის საინტერესო „კოცხალი არქივი..“. ბოლოს რომ გამიტირდა, ანდრიას შეილს, ლევან ჯვარიძეს, მივმართე თხოვნით — გამოეკითხა. მამისთვის ძველი ამბები, კარგად და-ეხსოვნა და შემდეგ ჩემთვის ემბნა.

თხოვნა შემისრულეს და აი, რა უამბნია ანდრიას შეილისათვის ჩემთვის გადმოსაცემად.

— დიდ გაჭირვებასა და წვალადაგვაში ვიყავით მართლ-მაღიდებელი ქართველები თათრების ბატონობის ღრუსაო. ძნელად თუ ვინმე მოახერხებდა თვისი ოფ-ლით ნაშრომი და მონალვაწი სარჩო ოჯახში მშვიდობით შეეტანა: მზა მომკილს ჭინახულს გათამამებული თა-თარი არხეინად იტაცებდა და თავისთვის მიჰქონდა. თუ ვინმე გაპბედავდა სიტყვის შებრუნვებას, ან წინააღმდეგობას, წუთის სოფელს უნდა გამოსთხოვებოდაო. ამას არ აქმარებდნენ და ცოლ-შვილსაც მოსტაცებდნენ და ახალციხის ბაზარზე დაპყიდვნენ. გაუპატიურებული, დაჩაგრული და დამცირებული ქართველი საჩივარსაც კი ვერა ჰქედავდა ვერც აღგილობრივ მოხელესთან და ვერც უმაღლეს მთავრობასთან. აღგილობრივ საქმეებს, საჩი-ვარსა და დავიდარაბას განაგებდნენ ყადები (კავი) და ეფენდები (ეფენდი). ვინც კი მიჰმართავდა სასულიერო მოხელეთ, ან თვით ფაშას, უარესი დღე დაადგებოდათ ხოლმე და უფრო მეტად იწბიონებოდა და იჩაგრებოდათ.

თათარი მარტო ცარცვა-გლეჯით არ კმაყოფილდე-

ბოდა. ისეთი ხარჯი (გარდასახადი) დაგვადო კისრადა რომ მისი ატანა ყოვლად შეუძლებელი იყოვო. თითო სულ მამაკაცზე წლიური ხარაჯა ოცდა თხუთმეტ ყურუ-შამდე ადიოდა. მართალია, ყურუში დიდი რამ არ არის, ეხლანდელი შაურის ოდენაა, მაგრამ მაშინდელს დროს ძნელი საშოვარი იყო. დღეს თუმნის შოვნა უფრო ადვილია, ვიდრე მაშინ ერთის ყურუშისაო. ბევრი ქართველი ვერ შოულობდა ამოდენა ფულს და იძულებული ხდებოდა ხარჯის თავიდან ასაცილებლად მაჭმაღიანობა ჩიელო. ვინც გამაჭმაღიანდებოდა, ხარჯისაგან იმ წამსვე ანთავისუფლებდნენ. ბევრნი კიდევ თათრების მოსაჩვენებლად სვინნათდებოდნენ (დაცვეთა) და აშკარად აღვიარებდნენ მაჭმაღის სარწმუნოებას, სულით და გულით კი ქრისტიანობას მისდევდნენო.

მე თვითონ მოწამე და დამსწრე ვარ შემდეგი ამბებისაო.

— მამა ჩემი ალექსი და ბიძა ჩემი პავლე დასვინნათებულან თათრების მოსაჩვენებლად. მიზეზი ესა ყოფილა: ვიდრე ლონისძიება და შეძლება პქნიათ, უხდიათ თათრის ხარაჯა, როცა ძალზე გალარიბებულან და ხარაჯას გადახდის თავი აღარა პქნიათ, შემწეობა უთხოვნიათ ძველშივე მალულად მცხოვრებ ბლვდელ მამა პავლე ზედგინიძისათვის. ზედგინიძესაც უჩუქებია ერთის წლის გადასახადი და ასე ამ გვარად ერთი წლობით კიდევ შეუნარჩუნებიათ ხილულად ქრისტიანობა.

მეორე წელიწადს მიმართეს თხოვნით ახალციხელ ქართველ კათოლიკე მღვდელს, ამასაც უჩუქებია წლიური გადასახადი. კათოლიკენი ხარჯისაგან თავისუფალნი იყვნენო. ამ წელიწადსაც, როგორც იყო, შეირჩინეს ქრისტიანობა. მესამე წელიწადს ხელი აღარავინ გაუ-

ბართა, ან კი სად ექნებოდათ სხვისთვის გადასახდელი ფულით. ხარჯის საშოვნელიად დაიწყეს ს. ონგორაში (რუსულად *Ongora*. მე ვვონებ, რომ ეს სოფელი ორგორა უნდა იყვეს) კირის წვა და ზიდვა ზურგით ახალციხეს გაასყიდად (ახალციხიდან ონგორამდე 28 ვერსია). ზურგზე ორთავეს კირის ზიდვით ტყავი გადასძრათ და მაინც ძლივ-ძლივობით იშოვნეს ერთის წლის ხარჯა.

მეოთხე წელიწადი უფრო სამწუხარო და სავაგლახო დაგვიდგათ ძალ-ღონე შემოელიათ მამა-ბიძას და კირის ზიდვით მარტო ოცდა თხუთმეტი ყურუში იშოვეს, ესე იგი ერთი ადამიანის გადასახდელი. გაჭირდა საქმე, ან ერთს უნდა მიეღო მაჰმადიანობა, ან მეორეს, მაგრამ რომელს?

— რომელსა, ალარ მახსოვეს, მაგრამ იმ წელიწადს, დიდის ყოყმანისა და რჩევის შემდეგ ძმათა შორის, ერთი მათგანი ეახლა ყადის, მიართვა ძმის ოცდა თხუთმეტი ყურუში და განაცხადა, ხარჯიდგან მე გამანთავისუფლეთ, რაღვან მისი გალება ალარ შემიძლიან და მაჰმადიანობას მივიღებო. თხოვნა აუსრულეს.

ამ გვარი ვაინაჩრობით კიდევ შეირჩინა ერთ-ერთმა ძმამ ქრისტიანობა ერთის წლით, მაგრამ როდემდის? მეორე წელიწადს ისიც დასვინნათდა და მაჰმადიანობა მიიღო. მამა ჩემს ალექსის „მურადაი“ დაარქვეს და პიდა პავლეს „ბადალაი“. დღესაც ბიძა ჩემის ჩამომავლობას „ბადალაანთ“ ეძახიანო“.

არც მეორე ამბავია ყურადღებას მოკლებული და უფრო საოცარიცაა, რაღვან მომხდარა რუსის შემოსვლის შემდეგ მესხეთში.

სოფელ აბს (ქ. ახალციხეს აკრავს. სხვა დანარჩენი ქართველი სოფლები: მარდა, მეორე მარდა, ურია, ჯა-

ნიანთ მარდა, მლაშის-ხევი, აბის გვერდით მდებარენი, სულ ამოვარდნილა და ეს ნასოფლარები დღეს ვერანები არიან) გათათრდა და დასვინნათდა ერთი ქართველი ზე-მორე აღნიშნულის მიზეზის გამო. სახელად უწოდეს „სულია“. ქართული სახელი აღარ მახსოვესო. მალულად მაინც ახალციხეს დადიოდა, აღსარებას ამბობდა განსუენებულ დეკანოზ გ. გამრეკელთან და წმინდა საიდუმლოს იღებდაო. სიკვდილის ჟამი რომ ეწვია სულიას, კვლავ ჩამოსულიყო ახალციხეს და ზიარებულიყო, რის შემდეგაც გადაცვლილიყო თავის საკუთარ სახლში, სოფელ აბს. დეკანოზს დროზედ შეეტყო ეს ამბავი, საჩქაროდ დამიბარა და ვითარცა დიახოქი, თათრულის კარგი მუდნე, თან წამიყვანა ს. აბს. ვიდრე ჩვენ მივიდოთ, მოლას კიდეც აესრულებინა ყოველივე წესი თათრულის სჯულისა, ესე იგი ებანებინა, შეესუდრა თავიანთ რიგისამებრ და წაეკითხა ყოველივე ლოცვები. მიველით თუ არა, დეკანოზმა მოლა დაითხოვა, თანაც აუხსნა, რომ სულია მართლმადიდებელი ქრისტიანეა. შეკუსრულეთ ქრისტეანული წესი და იქვე დავასაფლავოთ.

— დასვინნათებულნი ქართველნიო, — მოგვითხრობს იგივე მამა ანდრია ჯვარიძე, — დიდის გაჭირვებით ნათლავდნენ ახლად შეძენილ ბავშვებს მალულად ხან სადა და ხან სადაო. სოფელ ძველში დღესაცაა მივარდნილ ტყეში (წინად ხშირი და დაბურული იყოვო) ერთი პატარა წყარო, რომელსაც სახელად ეძახიან „მონათლულ წყაროს“. აი სწორედ ამ წყაროზე ნათლავდა ბავშვებს ს. ძველის მღვდელი ჯერ მამა პავლე ზედგინიძე და შემდეგ მისი შეილი მამა ქრისტეფორეო.

— ძალუა ჩემი, რომელიც შარშან გარდაიცვალა

თითქმის ასის წლისა, შემდეგს მიამბობდა ხოლმე თვის ქორწინების შესახებო: ცხადად ჩემს დროს ჯერის-წერას ვერავინ გაბედავდა; უჯვარის წეროდ კი არავინ ქორწინდებოდა. ამის გამო ქორწილი მალულად ხდებოდა. საქორწინონი ახალს ტანისამოსს ვერ ჩაიცვამდნენ, რადგან თათრები შენიშნავდნენ, გახდიდნენ და უპატიურობასაც მიაყენებდნენო. მე სხვებსავით ფარულად წამომიყვანეს ს. ჩუნჩხილგან (ჯავახეთშია) ვაჟის ტანისამოსით და ჯვარი დამწერეს ჩუმად ს. ძველში ერთს შიგნი-შიგან მივარდნილ და ბნელ სახლში. ექვსი-შვილი რძალ-პატარძალი იწერდა ჯვარსა ერთი და იგივე ლურჯი სამოსლის კაბით, ან თხოვნით, ან ყიდვითაო, ისე შევიწროებული ვიყავით თათრებისაგანაო.

ასეთია ეს სამწუხარო მოთხრობა მოხუცის მთავარდიაკნისა. სამოცდა თხუთმეტმა წელიწადმა განვლო მას შემდეგ, რაც პირველად ოსმალოს ბარბაროსობას მედგარი მეხი დასკა პასკევიჩ-ერევნელმა ქ. ახალციხესთან 15 აგვისტოს 1828 წ., სწორედ ზედ მარიამბა დღესა, მაგრამ ეხლაც არ გამთელებულა მისგან დაწყლულებული ქართველის გული \*).

\* ) ეიშნად ამ ისტორიულ გამარჯვებისა აგებულია ძეგლი და პატარა საყარაულო მთავარმართებლის თავად ა. ი. ბარიათინსკის მიერ. ომში დახოცილ აფიცერთა გვარებიცაა ამოჭრილი ძეგლზე. ქართველებსაც დაუნთხევნიათ სისხლი მესხეთის გასანთავისუფლებლად. აი მათი გვარები: პორუჩიკი თ. ვაჩნაძე, პოლკორუჩიკი თ. სოლოლაშვილი, პრაპორჩიკი თ. აბილახვარი. კიდევ ორი საეჭვო გვარია: სიმონავი და ბეჭანოვი. დანამდვილებით ვერ ვიტყვით — ქართველები არიან ესენი, თუ რუსები. გიზეტტის წივენი რომ გვქონდეს ხელში, ადვილად გამოვიკვლეულით ამ გარემოებას, მაგრამ ყრუ პროვინციაში ვინ გვალირსებს ასეთს ბეჭნიერებას.

უნახავი და მოუკლელი არ დამრჩენია თითქმის არც ერთი კუთხე საქართველოსი და ისე დაჩაგრული ერი, როგორიც მესხეთშია, არსად არ მინახავს.

მონობისა, შიშისა, მოკრძალებისა და უიმედობის ბეჭედია გამოხატული მათს შებლსა და სახეზე. არ იქნა, ვერ შევეჩვიე აქაური მკვიდრის სიტყვა-პასუხსა და სალაში. „გამარჯვების“ მაგირ მძიმედ დაგიკრავს თავსა და დაიხრება სწორედ დედა-მიწამდინ. თუ სათხოვარი, ან საქმე აქვს რამე, ისე გთხოვს, როგორც შეჰფერის ჰარამხანაში აღზრდილს საკურისსა, ან მონას, რომელსაც თავის სიცოცხლეში მზე და მთვარე არ უნახავს, ან ლრეკით, ხვეწნით, მუდარით და მლიქვნელობით თავს მოგაბეჭრებს და აღარ მოგშორდება მეგრულ ციებ-ცხელებასავით. არც ამაყობა, არც თავმოყვარეობა, აღარაფერი ეტყობათ. ვინც კი ევროპული განათლება იგე-მა, ან ასცილდა ნეტარ-ხსენებულ ბატონყმურ ატმოს-ფერას, სწორედ ტანში იშლება, როდესაც ასეთს სიტ-ყვებს ისმენს: „ხელს გულინი, ბატონოვო“, „აქ თქვენა და მაღლა ლმერთიო“. საქმის გაკეთება უქრთამოდ, უფეშქაშოდ ვერ წარმოუდგენიათ. თითქმის სამასი წე-ლიწადი სცურავდა მესხი „ფეშქაშების“ მორევში და სხვა, რიგიანი წესი მართვა-გამგეობისა ველარ შეუთვისებია. — სახელოვანი ძველიად მესხი დღეს ასეა დაძაბუნებული სუ-ლიერად და ხორციელად.

ღვთის წინაშე კი რომ ვსთქვათ, ან რა გასამტყუ-ნარია. ეხლანდელ ვითარებაში ვინ შეუწყო ხელი, ვინ ეცადა, რომ მონობის უღელი მოგშორებინა მესხს, გა-ლონიერებულიყო ჯერ ნივთიერად და შემდეგ, რასა-კვირველია, სულიერადაც. ხეც არ იზრდება მოუკლე-ლად, უპატრონოდ და ადამიანს რა დაემართება, თუ

მამობრივი, მოსიყვარულე გულით გზას არავინ უჩენებს, ცხოვრებასთან საბრძოლველ იარაღს დროზედ არ მიაწვდის. ჯერ არ მინახამს, ვინმე მოსულიყვეს სოფლად, ხელში სკეროდეს შტო მირტისა და ეთქვას: გეყოფათ ამდენი „მოიტა“, „მოიტა“, ახლა თქვენც მიიღეთ მცირედი რამე მის, ესე იგი „მოიტას“ მაგიერო. ასეთს ვითარებაში მაშ რა მოუვა დაბეგრილს კაკს, რომ არ დაბეჩავდეს და აკი დაბეჩავდა კიდეც \*).

#### IV

#### შოთა რუსთაველი.

რუსეთის გამოჩენილმა სატირიკოსმა შჩედრინმა ერთს ნალვლითა და გესლით შეზავებულს წერილში გულის კვნესითა სთქვა:

— მკითხველო, სადა ხარო?

მწერალი მწერლობს თავისთვის, მკითხველი კიდევ კითხულობს მის ნაწერებს. მორჩა და გათავდაო. არავითარი სულიერი კავშირი არ იკვანძება მათ მორის, არ ებმის ის უხილავი ძაფი, რომლის წყალობით გულის სიღრმილგან ამონაკვნესი სიტყვა მწერლისა უნდა მოხვდეს მკითხველსა.

შჩედრინი ისე მოკვდა, რომ ვერ ელირსა სანატრელის „მკითხველის“ ხილვას.

ჩვენში უარესობაა. აგერ ბ-ნი დუტუ მეგრელი რანაირად სწუხს: მკითხველი საზოგადოება კი არა, თვით

\* ) ფრჩხილებში ჩასმული სიტყვები და შენიშვნა ჩვენ ვვაკუთვნის.

მწერალნიც არა გვყავსოდა ჰფიქრობს, როგორმე გააჩინოს ეს ყოვლად საჭირო მოღვაწენი. გააჩენს თუ არა: ავტორი მწერლებს იმ გზით, რა გზასაც დასდგომია, არ ვიცი, ის კი კარგად ვიცი, რომ ვინც ჩვენში ამ საპატიო პროფესიას დასდგომია და, შეძლებისა დაგვარად, უმსახურნია, დრო-გამოშვებით მაინც, ვერაფერ გუნებაზე ბძანდებიან.

მართალია, ჩვენ შჩედრანთან ფეხს ვერ გავჭიმავთ, მაგრამ იმის თქმისა არ იყოს, დიდი უბედურებაა „მარტობა“ მწერლისა, მისის სულის ობლობა.

რით ინუგეშოს მწერალმა, თუ მკითხველი არა ჰყავს, სად მოიპოვოს და მოიკრიფოს ძალა უმაღლურისა და ძნელის შრომისათვის? ხომ მაჯა დაუდუმდა უმკითხველოთ, ხომ დაუჩილუნგდა გონება და კალაში ხელიდვან დაუვარდა?

-- სამშობლოს სიყვარულია მოგცეს ეგ ძალაო, — ავტობს ბ-ნი პეტრე უშიყაშვილი.

თქვენ პირს ჟაქარი, უმაგისოდ რა გავეთდება, მაგრამ სიყვარული ქვა და კლდე ხომ არ არის?! სიყვარულს, ნამეტნავად სამშობლოსას, ზრდა და ლოლიობა უნდა. ეს კი არსადაა. ხელ-შეუწყობლად ისე ჩაქრება, როგორც წყალ-დასხმული ცეცხლი.

დიალ, მთქმელს გამგონე უნდა.

შარშან „დიდებულის მესხეთისა წარსულის თვალის გადავლებამ მცირე სევდა არ აგვიშალა. ამ სევდით შეკურობილმა საზოგადოებას მივმართეთ და ესა ვსთქვით: კუველა ეს მკრთალი ნათელია იმ საქსე მთვარისა, რომელიც გამოსცა მესხეთმა პოეზიის სახით. ბედმა წილად მესხეთს არგუნა ერთი უდიდებულესთაგანი მსოფლიო პოეტთა შორის, შეუდარებელი და სხივოსანი, შოთა

რუსთაველი, რომლის წყალობით ქართული პოეზია ალ-ყავდა და გაიფურჩქნა, ვით მაისის ვარდი, რომლის მეოხებით ქართული პოეზია გაბრწყინდა, ვით ვარსკვლავი და რომლის პოეზიამ „დილის ნიავიკით“ დაპერა ქართულ ტლანქს და უგემურს შაირ-ლექსობას....

„ერიც პურადი, მხნე, გულადი და დარბაისელი ჰყავდა მესხეთსა. ვის არ გაუგონია მშენიერი თქმულება ხალხისა: „პირველ თქმულია ძველთაგან სიღარბაის-ლე მესხისაო...“

დღეს მესხეთს ვეღარ იცნობთ, აჩრდილი და ნატა-მალია წარსულისა. ჩონჩხი რა არის, ჩონჩხისთვისაც კი ვერ შეგვიდარებია რუსთველის, ბექასი და ალბულას სამშობლო, ისე დაკინდა მშვენიერი და სიცოცხლით სავსე მხარე ძველის ერთიანის საქართველოსი. დღევან-დელი მესხეთი ურთი რაღაც შემხარავი, თვალ-გაღუწვ-დენელი და უსამზღვრო სასაფლავოა. ქართველი მოგ-ზაური, ქართულის ისტორიის ცოდნით შეიარაღებული, სწორედ დასწეულდება აუარებელ ნანგრევების ხილვით. დღევანდელ თითოეულს სოფელს სამ-ოთხ ნასოფლა-რის ადგილ-მამული უქირავს. ნასოფლარს რუსები „შე-თოშა“-ს ესახიან. ყურთა სმენა წაილო სწორედ ამ „პუს-ტოშა“, რომელიც ძალაუნებურად, მხოლოდ, სიკ-დილსა და უბედურებას მოგაონებს...“

საფარის და ათაბაგთა პალატის ნანგრევთა ხილვით გულ-ნატკენი მგზავრი დარდის გადაყრას ვერ მოასწ-რობს, რომ უფრო სამწუხარო გულ-სატკენს და სამგ-ლოვიარო სურათსა ჰნახავს. ესაა სოფელი რუსთავი, ათასგვარ სიბინძურითა და სისაძაგლით სავსე. ერი ამ-ბობს, რომ აქ დაიბადა შოთა რუსთაველი; ესაა მისი სამშობლო სოფელიო. გული ნალველით აგევსება, რო-

დესაც წარმოიდგენ, რომ პარნასის ღმერთთა სწორის, გენიოსის სამშობლოს არე-მარე ასეთ, ენით გამოუთქმელ სიბინძურეს შეუპყრია. დღევანდელი რუსთავი ერთი უხეირო, ოთხ-ხუთ კომლიანი სოფელია, რომელსაც ა? შვენებს მხოლოდ სასუქის უშველებელი ზვინები. რუსთავში ბინადრობენ ქურთნი, თუ თარაქამანი, ადამიანი ვერას გაიგებს იმათსას. მიწური სახლები ამ ყოველ კულტურას მოკლებულ ველურის ტომისა სულ მთლად ასახიჩებს სოფლის სურათსა. ქალნი და კაცნი სოფლის შესაფერისნი არიან. იმდენი ჭუჭყი დასდებიათ პირსა და სახეზე, რომ თითქოს დაწყი-დაბადებიდგან იქვე, ახლოს მოდუდუნე მტკვრის წყალი მათ არ მიჰყარებიათო. ასეთია მათი სამოსელიც, დასტამალად ქცეული. დღეს შოთა რუსთველის მომხსენებელნი ეს ჭუჭყიანნი და პირუბანელნი თარაქამანი, თუ ქურთინები არიან!.. უბედურების სიშმრადაც არ მოელანდებათ, თუ რა კაცის ნასახლარზე ბინადრობენ...

რუსთავი ტიტველა, ხრიოკის მთის კალთაზეა შეფენილი. წინ მშვენიერი, პოხიერი ველია დაცუმული. პატარაა, მაგრამ ლამაზი. ორი არ მეგულება ამისთანა მომცემი და ნაყოფიერი ველი მთელს ამ მხარეს... .

რუსთავის პატარა ველზე ერთად-ერთი პატარა გორაკია ამართული, თითქოს განგებ აქ ვიღასაც მიწა დაუყრიაო. სიმაღლით ორი-სამი საუენია, სიგანეც სულ ათიოდე საფენი ექნება. სწორედ ზედ გამოკრილი ბექია ძეგლისათვის. აქ რომ შოთა რუსთველს ძეგლი, ან ობელისკი დაედგას, მშვენიერება იქნება. ბექი მტკვარს ზედ თავზე დასკერის, იქვე შარა გზაა, შოსსე. გამვლელ-გამომვლელი თვალს ვერ აარიდებს ძეგლსა, ისია-მოვნებს იმ ფიქრით, რომ შვილნი უმაღურად არ მოჰქ-

ცეკიან სახელოვანს მამას და იმასაც ხომ გაივლებს გულში, რომ გავერანებული მესხეთი ოდესმე ბედნიერი ყოფილაო... .

ნუ თუ დღევანდელი ქართველი ისე დაკნინდა, ისე დაძაბუნდა, რომ მცირედი ფასის ძეგლიც ვერ მოუხერხებია შესანიშნავის პოეტისათვის? ერთმანეთის ძიგნამ და ჭორიულამბამ სული ამოგვართვა და განა დრო არ დადგა ერთსულად მოქმედებისათვის? იცოცხლეთ, დროა ზურგი შევაქციოთ ჩვენს დამლუპველს საეროვნო სენს, მაგრამ სადაა!... „\*)

წერილი შოთას შესახებ თავდებოდა ასეთის მოწოდებით: „სიყვარული კიდევ, როგორიც უნდა იყოს, მსხვერპლს მოითხოვს. უამისოდ სიყვარულს სიყვარული არ ეთქმის. მაშ, შევსწიროთ ისტორიის სიყვარულს მცირედი მსხვერპლი და აუგოთ შოთას რუსთავის ლამაზ ველზე პატარა ობელისკი მაინც!“

წელიწად ნახევარი გავიდა მას შემდეგ, რაც ეს სტრიქონები დაიწერა და კრინტი, კრინტი რა არის, ისიც არავის დაუძრავს! ნუ თუ შოთა რუსთაველი ლირი არ არის მცირედის ძეგლისა, ან ობელისკისა? სხვაგან მესამე ხარისხოვან მწერალთა, სამხედრო და საერო მოღვაწეთა ძეგლებით სავსეა მოედნები და ქუჩები, ჩვენ კი რუსთაველისათვისაც ვერ მოგვიხერხებია ძეგლის დაღვმა.

მაშ, რამ აღზარდოს ეროვნული გრძნობა ახალთაობაში, რამ ანუგეშოს მოხუცთა თვალი, თუ რუსთველის სახესაც ყოველ დღე არ დაინახავს? ეროვნული

\* ) იხ. „მოამბე“, 1902 წ. № 3. წერილი ა. ფრონცელისა „დიდებული მესხეთი“.

გრძნობა, თავმოყვარეობა, სიაშაყე, არც ჭიანი კაკალია და არც დამპალი ჭანჭური, რომ თავის თავად ზეციდან ჩამოვარდეს. პატრიონობა უნდა, თორემ ისე გაითელება მთელი საქართველო, როგორც გაითელა შესანიშნავი ისტორიული მესხეთი, ეს საქართველოს ათინა. ეროვნულ გრძნობა-თავმოყვარეობის აღზრდა-გაფურჩქვნას კი ისე არა უწყობს რა ხელსა, როგორც დიდებულ წინაპართა ხსოვნა-მოგონება.

თართალია, საზოგადოებამ და მკითხველმა ყური მოიყრუეს ჩვეულებრივ, არ გაგვამხნევეს ეროვნულ საქმისათვის, მაგრამ მაინც იმედს არა ვკარგავდით. თუ ვერ დავამთავრებდით განძრახულ საქმეს—ძეგლის დადგმას, დაწყებით მაინც დავიწყებდით. უიმედო, უოცნებო სიცოცხლე, მოგეხსენებათ, ჩირად არა ლირს. რა სიცოცხლეა ის სიცოცხლე, როდესაც სამშობლოს ბედნიერების იმედი ჩაგიქრება გულში და მარტოოდენ იმით სულ-დგმულობ, რომ დღეს ხომ კარგად გიახელ ერთ ჭიქა არაყს, ნახევარ ბოთლ ლვინოს, ნაკერ მსუქან დოშს იმერულ ლომით, სალიანის ხიზილალით, რუსულ ბორშჩს წითელის ბადრიჯნით და სხვა-და-სხვა; ხვალაც თუ ეს ულეველად მექნება, ლმერთს მადლობას შეესწირავ ამ სიტყვით: ”გმადლობ, უფალო, რათა განმაძლე მეო“.

სწორედ რომ ფუჭია ასეთი სიცოცხლე!

დიალ, იმას მოგახსენებდით, გული არ გაგვტეხია და არც იმედი დაგვეარგვია.. მართლაც ნატვრა აგვის-რულდა და პირველი ნაბიჯი უკვე გადავსდგით.

ამ გაზაფხულის პირზე, ერთ პატარა კრებაზე კაი ჭართველის სახლში სიტყვა ჩამოვარდა რუსთველის ძეგლის შესახებ. დამსწრეთ სიამოვნებით მიიღეს წინადაღება—შევაგროვოთ თანხა და საქმეს შევუდგეთო. უველა-

ზე პირველად ჯიბეს გაიკრა ხელი ილია ზურაბის ძე გოპაძემ და გადასცა ა. ყიფუშიძეს ოცდახუთი მანათი. უკანასკნელმაც იცდახუთი მანათი გამოიღო და ამ გვარად შესდგა პატარა თანხა, სულ 50 მ. ნივთიერად ღონიერნი ქართველნი უფრო მეტს დაპირდნენ საქმის დამწყობს და შეიძლება მალე საქმარისი თანხა შეიკრიბოს. ფული, რასაკვირველია, უნდა ეგზავნებოდეს „წ. კ. გამავრცელებელ საზოგადოებას“ შესანახად და სათავნოდ.

არ ვიცი, რამდენი დასჭირდება რუსთველის ძეგლის, ან ობელისკს. ვსხოვ ჩვენებურ მექანდაკეთ შეიმუშავონ გეგმა ძეგლისა, ან ობელისკისა და აღნიშნონ ვარაუდით რა დაიხარჯება ფულად. მე ჩემად სრულიად საქმარისად მიმაჩნია მცირე სასყიდლიანი ძეგლი. ეხლა მეტი არ შეგვთერის. როდესაც ჩვენი სამშობლო წელში გასწორდება, გალონიერდება ნივთიერად და განათლებით, მაშინ იზრუნოს უფრო ძვირფას და რუსთველის ნიჭის შესაფერ ძეგლზე. ჯერ-ჯერობით პატარაც გვეყოფა.

ვფიქრობ, რომ გულგატეხილი საზოგადოება უგულებელს არა ჰყოფს ამ საქმეს და არ დაიშურებს წვლილს საეროვნო საქმისათვის. ოთხას-ხუთასი თუმანი იმაზე მეტად არ გავალარიბებს, რაცა ვართ ახლა. რამდენსა ვხარჯავთ უაზროდ, აქ კი ერთი მანათიც ნამდვილ საქმეს მოხმარდება. იმედია „წ. კ. საზოგადოებას“ უარს არ იტყვის და მიიღებს ფულს შესანახად, ვინც მოისურვებს და გადასცემს ამ საგნისათვეს \*).

\*) რამდენიმე შავათი უკვე შეგროვილია რუსთველის ძეგლისათვის და ინახება „წ. კ. საზოგადოებაში“, მხოლოდ გამორკვეული არ არის, სად დაიდგას იგი.

ჩვენ პირადად კმაყოფილნი ვართ, რომ დიდის ხნის  
ნატურა აგვისტოულდა და საქმე იწყება. დანარჩენი საზო-  
გადოების გულმხურვალებაზე ჰყიდია.

დასასრულ, შემდეგი უნდა მოვახსენო მკითხველსა.  
შარუაბ დაიბეჭდა წიგნი პროფესორის ნ. გარისა, სახე-  
ლად: „Тексты и разыскания по армяно-грузинской  
филологии. т. IV“. ბ-ნი მარი სცდილობს დამტკიცუ  
ამ გამოკვლევაში, რომ პოემა „თამარიანის“ ავტორი  
თვით შოთა რუსთაველია და ჩატრუხაძე მისი გვარია.  
გარი აი რას ამბობს რუსთაველის ლექსების ციტაციებაზე:

„И такъ, проникновенно выраженное въ ча-  
рующе звучныхъ стихахъ национальное настроение  
грузинъ XII-го вѣка находитъ не замирающей от-  
клика въ длинномъ рядѣ поколѣній и продолжаетъ  
жить и тогда, когда преданъ полному забвенію  
самъ памятникъ (Тамаріани), содѣйствовавшій по-  
пулярности въ Грузіи идеализованного образа гру-  
зинской царицы (Тамары). Храмъ забыть и за-  
щущенъ, но звуки раздававшихся въ немъ близ-  
кихъ сердцу пѣснопѣній еще слышны, какъ даль-  
нее эхо. Кто зодчій? Кто былъ такъ народенъ по  
духу, что въ придворныхъ одахъ далъ невольное  
выраженіе национально-государственного идеала?  
Кто былъ такъ властенъ надъ роднымъ языкомъ,  
что въ офиціально-торжественныхъ пѣсняхъ, сло-  
женныхъ для развлечения блестящаго двора, такъ  
ярко отразилъ простые, родимые звуки, дорогіе  
каждому грузину? Если-бы памятникъ (Тамаріани)  
дошелъ до насъ безъ рукописнаго преданія обѣ-  
его авторѣ, то едвали бы кто сталь осенаривать

его принадлежность тому безподобному художнику слова, который силой лишь чарующей музыкальности своихъ стиховъ сумѣлъ придать национальный грузинскій обликъ персидской переводной поэтической и сдѣлать ее народнымъ достояніемъ. Я имѣю въ виду Шоту Руставели, автора Барсовой кожи” (гл. 51).

Мეт҃р ადგილს (гл. 73) ბ-ნი მართ ასე იხსენიებს შთას: геніальныи грузинскій поэтъ”.

Б. მარს ემცურის ქართველი საზოგადოება, ჯერ დედანი არ გიპოვნია და რა საბუთით მიგაჩნია ვეფხისტყაოსანი ნათარგმნ პოემადათ, მაგრამ ესეთი აზრი პოემაზე არ უშლის პროფესორს დიდად აქმს რუსთველი, რაიცა ზემოდ მოყვანილ ამონაწერიდან ცხადადა სჩანს. მარიც, თავის მხრივ უკიუინებს ქართველობას: „ნიღვნი-острое желаніе видѣть въ поэмѣ цѣликомъ грузинское народно-национальное произведеніе” (гл. 55).

## V

### ვ ა რ ძ ი ა .

გაგონებით ბევრს გაგეგონებათ ვარძის სახელი. წახვით კი, დარწმუნებული ვარ, ბევრს არ გენახვებათ. ქართველს არ უყვარს მოგზაურობა, მივლა-მოვლა და შესწავლა თვის მშვენიერის სამშობლოსი. საოცარია სწორედ ეს ამბავი. ძველად ჩვენები ხშირად ანებებდნენ თავს სამშობლოს და შორს მიღიოდნენ. პურე აზია. ერთსალიმი. სინას მთა. დასავლეთი ევროპა. იტალია.

საქამბოლი, ოჯსეთი და სხვა, ყველგან მიღი-მოდიოდნენ. ქართველნი. საყიზილბაშოს ხომ ნულარ იტყვით. თავრიზ-თეირანის გზა ისე ჰქონდათ გათელილი, როგორც დღეს გოლოვინის პროსპექტი აქვთ გატკეპნილი უსაქმო ქუ-ჩის მტკეპნელებს. მარტო მეფე გიორგი XI მოიგონეთ. ეს საოცარი მეფე-რაინდი შავარდენივით დაპირობა სპარ-სეთის მაშინდელ ტერიტორიაზე რაღაც ხუთასიოდე ქართველით. ძვლებიც იქ ჩაყარეს ვაუკაცებმა უნაყოფოდ და უსარგებლოდ თვისის დამწვარის და დადაგულის სამშობლოსთვის. ქართველს, როგორც სამხრეთის მკვიდრს, ერთს ადგილს არ უნდა უყვარდეს ჯდომა, რადგან აშშორება იცის. მაგრამ მაინც ეხლანდელს ქართ-ველს არ უყვარს მოგზაურობა, არ ეტრფის მიხედ-მო-ხედვას ევროპიელივით.

კარ-ჩაკეტილობა წინადაც არა გვყვარებია, ვიყავით და ვართ სტუმართ-მოყვარენი, გულ-ახლილნი, ბუნება ხელს გვიწყობს გავინძრეთ, თუ შორს არა, შინ მაინც მივინძრ-მოვინძრეთ, მაგრამ არა, არ იქნა, ვერ შევეჩ-ვიეთ მოგზაურობას. ასე გასინჯეთ უურნალი „მოგზაუ-რიც“ დავაარსეთ, მაგრამ ვერც აშან შეგვაყეარა მგზავ-რობა.

რა გაეწყობა, წუწუნით საქმე არ გაიჩარჩება. მე მაინც ჩემსას არ დავიშლი და ხანდახანობით ნახულსა და გაგონილს გაგიზიარებთ. საგანი საუბრისა ამ უამად ვარძია გახლდება. ისტორიულს და გეოგრაფიულს ცნო-ბებს ბევრს არას მოგახსენებთ. ეს ვისთვისაა საჭირო? სულ ერთია, სანახავად არავინ გამოიქცევა და მაშასა-დამე, ამ ცნობებს ვერ გამოიყენებს. ისიც კი უნდა მო-გახსენოთ, რომ ვარძიის შესახებ ისე მცირეა ჩვენი ლი-ტერატურა, რომ სირტხეილით იწვი, ოდეს გაითვალის-

წინებ ამ გონების მცლე ნაწარმოებს. ქართულად მხოლოდ ერთი საკმაოდ ვრცელი წერილი მახსოვს ჯავახეთიდან გ. შატბერაშვილისა, რუსულად კიდევ პატარა წიგნაკი დეკანოზ დ. ლამბაშიძისა და ორიოდე სიტყვა ე. გ. ვეიდენბაუმს აქვს ნათქეამი „კუვასის გზის მაჩვენებელში“. მე, მეტი არ ვიცი. შეიძლება რამე გამომეპარა, მაგრამ ვგონებ, რომ არა. მცხეთის ტაძარივით ვარძიას ჯერ საკუთარი ნატროშვილი არ გასჩენია.

შარშან-წინ ორჯერ ზედი-ზედ ვნახე ვარძია. პირველად გზა ლეპისის სამამასახლისოდან გვქონდა გასავლელი. ორი დღის სიარულმა ამ გახრიოკებულ და მელოტივით მოტიტვლებულ ქვეყანაში არდაგანის ოლქის სამზღვარზე, ტანში მოგვშალა. ზაფხულობით მზე ისე იქმინება, ცხარე, გავარვარებული სხივები ისე გვესობა სახეში, თითქოს განგებ ეკლითა გვჩვლეტენო. ნაზი კანი ვერ უძლებს მჩხვლეტავ სხივებს, ბურცლება და სკდება. სახე თანდათან ილანძება და ილეწება. მტვერი და ქარი ხომ ისე შაშხავს აბურცებულს და ალაგ-ალაგ დახეთქილს კანს, რომ არ იცი, სად წაილო და როგორ დამალო ტანჯული პირი-სახე, ქალაქურ კოსმეტიკის ნაწარმოები, როგორც ვაზელინია და მისი მზგავსი ნაირნაირი წამლები, აქი ექვსი ათასის ფუტის სიმაღლეზე, ყოვლად გამოუსადეგარი და უძლოურია. ბატის სუფთა ქონი არ მიცდია, მაგრამ ვგონებ, რომ ეს შინაური წამლი აჯობებს ვაზელინსა და გლიცერინს.

კლდეში გამოქვაბული ვარძიის მონასტერი მტკვრის, ვიწრო ხეობაშია, საკა ზაფხულობით ძალიან ცხელა, ზამთრობით თბილა. ზემოდ კლდის თავზედ 20—25 გრადუსიანი ყინვა იცის, ძირს კი ამავე დროს ზომიერი ჰავაა. ვარძიის ქვემოდ, სოფ. გოგაშჩის პირდაპირ,

მტკვარი ისე მოჰქებს, ოფორტუ თერგი. საამოა მისი შხუილი და ბობოქრობა წყნარ და მთვარით გაკაშკაშებულს ლამეს. აზეირთებულის თერგის „სიძლიერე“ და „სიცოცხლე“ ილია ჭავჭავაძე პოეტურად შეამკო. მის ზეირთებსა და ტალღებში პოეტმა „სიცოცხლის“ სიმბოლო დაინახა. აქ, ვარძიასთან, ან ზემოდ მტკვრის თერგისებური ხათქა-ხუთქი რომ ენახა პოეტს, მაშინ თერგის შაგიერ მტკვრის მოუსვენრობა გახდებოდა „სიცოცხლის“ სიმბოლოდ. ხომ სულ ერთია, მაგრამ, რაც უნდა იყვეს, გულს უფრო იამებოდა მტკვრის „გაბატიოსნება“, მისი საცოცხლის აღნიშვნა, რადგან მტკვარი ჩვენია სათავიდან შესართავამდე. დღეს კი მარტო ნ. ბარათაშვილის „მოდუდუნე“ მტკვარი გვაქვს. გიუმაუბა ადამიანს ახალისებს, დუდუნი სევდასა ჰგვრის. მაგრამ რას იზამ, ასეთი ყოფილა ბედის წერა.

თერგივით მტკვარი შეზღუდულია მაღალის მთებით.. ძირობებში ბალებია გაშენებული. ზემოდ, მთის წვერებზედ და შემდეგ გავაკებულ მინდვრებზე, ჩირგვი არ მოიპოვება; აქ მტკვრის პირას, ხეხილია გაშენებული. კონტრასტი სწორედ დიდი და ძლიერია.

მონასტერი გამოქვაბულია მტკვრის მარცხენა ნაპირს მდებარე კლდის ფერდობაში. კლდე თანდათანობით კი არ ეშვება მტკვრისაკენ, არა, ისეა ჩაშვებული, თითქოს სარი დაურსვიათო. ამისათვის სამხრეთ-ჩრდილოეთიდგან ვარძიას მისასვლელი გზები ცუდი აქვს, აღმოსავლეთით (სოფ. ხერთვისიდან) და დასავლეთით (ჩილდირიდგან, არდაგანის ოლქი) ვაკე გზებია.

პირველ გზობას სოფ. აგარიდგან ჩავედით ვარძიას-ამ სოფლის მკვიდრნი ნახევარი მართლ-მადიდებელი ქართველია, ნახევარი გამაჰმადიანებული ქართველობა-

გვარები სულ იმერულია. ყური მოვკარ, ვითომც ეს ქართველობა იზერეთიდგან იყოს გაღმოსული. ისეთი სიბნელეა გამეფებული ამ უბედურს კუთხეს, რომ რიგიანად ვერას შეიტყობ. ორიოდე ქართველთა სოფელს დღეს თარაქამა ახვევია გარსა. აბა თარაქამის ხსენებაზე სიბნელის მეტი რა უნდა წარმოიდგინოთ?

გზა რომ ვახსენე, მართლა გზა არ გეგონოთ. დაქანებულ მთა-კლდის ფერდობზე ზოლივით მიიკლაკნება მიხვეულ-მოხვეული საცალფეხო ბილიკი. დიდ ხანს ვიარეთ ამ უბედურისა და კისერ-მოსატეხი ბილიკით. ებლაც ვერ გამიგია, როგორ დადის ხალხი ზამთარ-ზაფხულ ამ საეშმაკო და სატარტაროზო გზით. საკმარისია მცირედათ ფეხი მოგისხლტეთ და დაეშვებით ძირს, უჯვსკრულში, სადაც ყვავ-ყორანიც ვეღარ მიაგნებს თქვენს დაფლეთილს ლეშსა. ვიდრე სამშვილობოს ჩავიდოდი, მეჩემი დამემართა. თავს ბრუ დამესხა, მუხლები ამიკანკალდა, გულმა აჩქარებით ძაგ-ძაგი დაიწყო. ჩემს თანამგზავრსაც ჩემსავით გასჭირვებოდა ჩამოსვლა. ეს მერე გამოირკვა, წინ მიდიოდა და მაშინ რას გავიკებდი. ლმერთმა უშველოს აგარელებს. ზოგი წინ მიგვიძლოდა, ზოგი უკან და გაჭირვების დროს შეგვეშველებოდნენ ხოლმე. ბატონს უჩიოდნენ და თურმე ეს იყო მიზეზი, რომ ბლომად გამოგვყვნენ და დიდხანს არ გვშორდებოდნენ. უნდოდათ დაენახვებინათ ის საძოვარი, რომელიც ბატონმა ჩამოართვა. ცხვირწინ ვერას ვხედავდი, საძოვრისას რას გავიგებდი. გაკვირვებით კი ეხლაც მიკვირს, იმ კისერ-მოსატეს კლდეებზე რა პირუტყვმა უნდა მოიკიდოს ფეხი, რომ მოსწიწენოს დამკუნარი ბალახი, ან რაა კაცის ბუნება, რომ სადავოდ გახადო უმგზავსი კლდე და ააყაყანო მის გულისათვის ეს ბუნების შვილნი?

მეორე გზა ლეპისის სამამასახლისოდან ვარძიას ს. ზედათმოგვიდანაა. ამ სოფლის მკვიდრნიც მართლ-მაღი-დებელი ქართველობაა იმერულის გვარებით. სულ „ძე“, „შვილი“ არსადაა. ამ გზით არ მივლია, მაგრამ აგარისას არ ემჯობინება. მაზრის უფროს გაევლო ამ გზით ჩემზე წინ და სულ ბედს იწყევლიდა. ეს ყველა კარგი, მაგრამ ვარძია როცა ჰყავოდა, ნუ თუ მაშინაც ასეთი მისასვ-ლელი გზები ჰქონდა? ეს შეუძლებელია. ვარძიიდან 10—12 ვერსის მანძილზე ს. კარზამეთია. დიდებული ტაძარი დაუწყვავა თლილის ქვისა მაწყვერელს (აწყურის ეპისკო-პოზს), საუენ ნახევარი აუტანია, მოსულან თსმალონი და დარჩენილა ტაძარი დაუმთავრებელი. კარის თაღზე ხუცური წარწერა გვიამბობს აღმშენებელის ვინაობას. განა შესაძლებელია, რომ ვარძიიდგან 10 ვერსის მან-ძილზე დიდებული ტაძარი შენდებოდეს და გზა-კვალი კი არ ჰქონებოდა მონასტერს ლეპისისაკენ? ზეპირ-გადმო-ცემა ამბობს, რომ თამარ მეფეს ზედა სოფლებში (დღე-საც კაი საძოვრებია) დიდალი ძროხა ჰყავდაო, იქ მოწ-ველილი რე მონასტერ-სასახლეში მილებით ჩამოდიო-დაო. თუ ციცაბო კლდეზე მილები დააწყეს რძის საღე-ნად, უეჭველია, გზასაც გამოჰქვაბამდნენ კლდეებში, ხოლო დრომ და უამთა ვითარებამ ალბად დააქცია. ეხ-ლანდელი აგარისა და ზედათმოგვის ბილიკები კი „დღე-ვანდელი“ ქართველის უნარია.

როგორც იქმნა, ჩავედით ძირსა, მტკვრის ნაპირას. მცირე მანძილი გავიარეთ და დავინახეთ მონასტრის დან-გრეული ზღუდენი და დაზიანებული სამრეკლო. მონასტ-რის სენაკებს, ეკლესიებს და გალავანს მხრლოდ ერთის მხრიდან დაინახავთ კარგად, მტკვრის გარჯვენა ნაპირი-დან. უფრო კარგად იმ მაღლობიდანა სჩანს, საღაც და-

ფენილია ორი ქართველთა პატარა სოფელი: გოგაშენი და აფნია.

დღევანდელი ვარძია, კლდეში გამოქვაბული მონასტერი, ეს დიდებული ნაშთი დიდებულის წარსულისა, მინგრეულ-მონგრეულია, გავერანებული, პატივსა და დიდებას აყრილი, გვირგვინ-ახდილი და კერა-ჩამქრალი. უპატრონოდ დარჩენილს მონასტერს სტიქიონი უფლობს და ნულარ გაგიკვირდებათ, თუ მისი სენაკი ხელიკითა და ლამურათა ბინად გადაჭცეულა.

სიტყვით ვერ ვიტყვი იმ გულის სიმწვავეს, რომელიც ჩემს სულიერს არსებას მოედო, ოდეს ვიზილე ეს შეუბრალებელი გავერანება და გაოხრება-გატიალება. უნებურად, ოცნება-ფანტაზიამ გამიტაცა, ბურბუშელასავით დამტაცა ხელი და თვის დაუსრულებელ სამეფოში ამომაყოფინა თავი. ხილვა ვარძიისა, მისი შესწავლა სრულიადაც აღარ მეპიტნავებოდა, ფასი და გემო დაუკარგა დროებით მის ნანგრევებს, გონება ბურუსში გაეხვია, ხოლო ოცნება ცეცხლივით აპრიალდა. ნუ თუ ეს მინგრეულ-მონგრეული ვარძია სიმბოლოა დღევანდელის საქართველოსი? „ყაჩალობა“ ხომ დღესაც არ შეწყვეტილა? გულისა და სულის ამომგლეჯი ყაჩალი უფრო სასტიკი და საშიში არ არის, ვიდრე თოფ-იარადიანი ფირალი? ვინც მახვილით პარპაშებს, მახვილივე დალუპავს. სულისა და გულის „ნადირს.. რილათი უნდა შეხვდე! ამის უებარი წამალიც არის. ესაა ხასიათის სიმტკიცე, სიკაუე სულისა, გარჯა-მომჭირნეობა და თვით ცნობიერობა. ვაი რომ ვკოჭლობთ და გვაკლია ეს თვისებანი. თორემ, იცოცხლეთ, ბუზსაც ვერავინ აგვიფრენდა.

კლდის მესამე სართულში სახელმწიფო საბჭოს დაბაზია, სიგრძით თორმეტი არშინი. ეხლა ამ დარბაზს

დივანხანას ეძახიან. შიგა სდგას სამეფო ქვის ტახტი, დარბაისელთა და მსაჯულთა საჯდომნი, რასაკვირველია, ქვა-კლდისავე, სხვა-და-სხვა ადგილს ამოქრილია თახები, ზოგი ხატების დასასვენებლად, ზოგი კანონთა დასალა-გებელია. იქვე ცალკე პატარა ოთახია გადაწყვეტილ საქ-მეთა და სიგელ-გუჯართა დასაცველად, ანუ ეხლანდელი არქივი...

დივანხანის თავზე ცალკე ოთახია, სიგრძით 9 არ-შინი, სიგანით 6. ზეპირ-გადმოცემით თამარ-მეფის საწო-ლი და მოსასვენებელი ოთახი ყოფილა. საკუჭნაო და სალოგინე ცალკეა, სადარაჯო ოთახი კიდევ ცალკე. ნე-ტა რა ხელმა და მარჯვენამ გამოჰკვეთა ეს აუარებელი ოთახ-სენაკნი?

დარბაზი მტკვარს თავზე დასცეკერის. ამ სიმაღლი-დან მჩქეთარე, მაგრამ „უილბლო“ მტკვარი პატარა მდი-ნარედ მოსჩანს. მისი შუილი, ძირს ძლიერი, ხოლო ზე-ვით დანაზებული და მუსიკალური, დილაობით და ღამ-ლამბით, როცა ბუნება დაწყნარებულია, დარბაზს სწვდება და სიამოვნებას ჰქონის „სენაკთა სამეფოს“. სწო-რედ ნეტარებაა ამ დარბაზიდან აღმოსავლეთისკენ ცქე-რა, ფანტაზიის შემწეობით თამარის მეფობის ხილვა, წარმოდგენა და გათვალისწინება ამ საკვირველის დედა-კაცის ძლიერა-მოსილებისა.

უნებურად, იმავე ცხოველ ფანტაზიის დახმარებით, მინგრეულ-მონგრეული, მტკრითა და ნაგვით საესე დარ-ბაზი, ანუ დივანხანა გავამშვენიერე, მოვრთე, მოვკაზმე თამარის შესაფერად, სამეფო ტახტზე დავაბძანე თვით „ბრწყინვალე“ მეფე, მდივანთა ადგილებზე ჩავამწკრივე თამარის დროის დარბაისელნი: სასულიერო, საერო და სამხედრო მოღვაწენი და გავმართე ბჟობა, თამარის თავ-

მჯდომარეობით. გონიერის თვალით სულ აღვილად წარმოვიდგინე ყველა ის დიდებული საქმენი, რაც ამ ობიბას ქსელით გაბლანდულს დარბაზში გაირკვა და გადასწყდა. ხომ ბავშვობაა ამის თქმა, მაგრამ მაპატივეთ. დამენანა, სწორედ გული მეტკინა, რომ მეც მონაწილეობა არ მიმიღია მაშინდელის სახელმწიფო საბჭოს საქმიანობაში, რათა სავსებით, სრულის მოქალაქობრივის უფლება-მოსილებით ერთი წუთი მაინც მეცხოვრა, ერთი წუთი მაინც გულ-მკერდს ლალად ამოესუნთქა. მაგრამ მონობაში დაბადებული და აღზრდილი, მორჩილებას და დატუქსვას მიჩვეული, დაკინებულის თაობის შვილი, იმ თაობისა, რომელსაც „სამშობლოდ“ ის სოფელი მიაჩნია, სადაც თვითონ დაბადებულა და რომელსაც „იმერი და ამერი“ სხვა ტომის და ერის კაცად მიაჩნია, ლირიკი ვარ უმაღლესი სამოქალაქო ბედნიერებისა? გული გაგვიტყდა, სამშობლოსთვის თავ-დადებაზე ფიქრსა და ზრუნვას გადავეჩივეთ. ჩემი თუ არა გჯერათ, აბა, მოისმინეთ, რასა სთხოვს მხცოვანი პოეტი აკაკი განსვენებულის პეტრე უმიკაშვილის სულსა: შეგვავედრე ზეცასაო,

„რომ ჩაგვბეროს მაღლით ძალი  
ჩვენ აქ, დღეს გულ-გატეხილებს,  
და გვასწავლოს სამშობლოსთვის  
თავ-დადება შვილი-შვილებს“.

. კარგად ვიცი, რომ მოქალობრივი ბედნიერება ციდან ჩამოყრილი მანანა არ გახლავთ. დიდი შრომა და გარჯაა საჭირო მის საშოვნელად. ნატვრით და ოცნებით ვერას გავხდებით, ფონს ვერ გავალთ. მაგონდება თავადი ბისმარკი, ეს რკინის კაცი, მისი ფოლადივით მაგარი, მკაცრი და თან გესლიანი, შხამიანი სიტყვა, რომ-

ლითაც ბერლინის კონგრესზედ მიჰმართა ერთს საშშობლოს აღმადგენელს სასულიერო წოდების მოღვაწეს. ითაკილა „მოღვაწემ“ შხამიანი, მაგრამ მართალი სიტყვა, გაებუტა ბისმარქს და მეორე დღეს სადილად არ ეწვია, მაგრამ რაო? ბუტიაობით რომ „ჩატებილი ხილი“ კეთდებოდეს, ან „დანგრეული ოჯახი“ შენდებოდეს, შენი მტერი, დღევანდელი მაკედონია „ბუტიაებით“ გაივსებოდა და მაშინ იქ კაცს აღარ გაევლებოდა.

## VI

გზის მაჩვენებელი და ხელმძღვანელია საჭირო, თორემ, თუ ის არა გვყავს, ვერას გახდები, სწორედ დაიბნევი ამ აუარებელს გამოქვაბულს სენაკებში. მღვიმე-სენაკი რამდენსამე სართულადაა გამოქვაბული. ერთ სართულიდან მეორეში ასვლა ადვილი არაა, და ცოტა იყოს, სახიფათოა, რადგან ალაგ-ალაგ ქვის კიბენი გახეხილია, ჩარეცხილა და დამტკრეულა. ღმერთმა უშველოს დროებით ვარძიაში მყოფს, ერთს ქართველს ყმაწვილს! იმან გამიწია წინამძლოლობა და უცელაფერი მაჩვენა. დათვლით ვერ დავთვალე, რამდენი სენაკია, ზოგი ამბობს ათასზე მეტიაო, ზოგი ნაკლებს ამბობს. სიგძე გამოქვაბულ მონასტრისა თითქმის ერთი ვერსი იქნება.

გზის მაჩვენებელი წინ გამიძღვა და მიმიწვია — მომყენ. დალოცვილი ისე დახტოდა, თითქოს ქურციკი იყოსო. ფეხებზე მესტის მსგავსი ნაზი ტყავი ჰქონდა აკრული. მე კი... საცოდვი ვიყავ. ვერანა და მუდრეგი-საგზაო წალებს რომ ეტყვიან, ის ჩეცვა. სიცხე-პაპანაქე-ბისაგან ისე გაიფშიკა, როგორც ურიის მკვდარი. მოდი და მიჰყე ამ ფეხსაცმელით სიცოცხლით სავსე ჭაბუქს!

წინამძლოლი ერთს ციცაბო კლდეს მიადგა და გა-  
ჩერდა. შემომხედა, მობძანდიო და ზემოდ აცოცდა. ში-  
შით კინამ გული გამისკდა. ციცაბო კლდეზე საფეხურე-  
ბისა მეხუთედი აღარა სჩანდა. რალაც წვნიკი ხარიხა გაე-  
დოთ და ამ ხარიხის შემწეობით უნდა ავსულიყავით  
თაბარ მეფის სარდაფუში. რას ვიზამდი. მიყვე წინამძ-  
ლოლს, მაგრამ ვაი ამ მიყოლას! სარდაფი სავსეა ჩაკი-  
რულ უიდ თუ პატარა ქვევრებით.

ღმერთო, ეს რა ძალაა, რა ცხოველი სიძლიერეა,  
რომ ხუთ სართულად კლდე დახვრიტო, ათასამდე საც-  
ხოვრებელი ოთახი, დიდი და პატარა, გამოჰკვეთო, რაძ-  
დენიმე დიდი და პატარა ეკლესია გამოჰკვაბო წერაქვით  
და მაინც არ იქმარო, არ შედრკე! ქვევრების ჩასაყრე-  
ლად ხელახლა გაუპიათ ცივი გული კლდისა!..

სენაკებს რომ მოვრჩით, ეკლესიები მოვიხილეთ.  
მლვთის მშობლის ეკლესიის გარდა, დანარჩენები, თაბო-  
რისა, მაგალითად, სიგძით შვიდი არშინია. სიგანით ოთ-  
ხი. ეკლესიათა კედლები ბევრგან წაბლალულია რუსულ-  
ქართულ-სომხურ წარწერებით. ჩავუკვირდი რუსულ-  
ქართულ წარწერებს და გავოცდი. ბევრ ჩემ ნაცნობის  
სახელი და გვარი ამოვიყითხე და შემრცვა მათ მაგიერ.  
ყველაზედ დიდად მაშინ გავოცდი, როცა ვიპოვნე აწ  
განსვენებულის თავ. თარხნიშვილის სახელი და გვარი.  
სწორედ ლვთის წყრომაა და უბედურება ჩვენს თავსა!  
ალბად, მართალი უთქვაშს ცნობილს მოღვაწეს ქ. გორ-  
ში: ქართველები ისე ავზნიანი და უბედურები იყვნენ  
ძველადვე, რომ ლვთის მშობელმა ხელი აიღო და აღარ  
მობრძანდა ქრისტეანობის საქადაგებლად, თუმცა ეს ქვე-  
ყანა ჰხვდა წილადაო.

განსვენებული თ - შვილი განვითარებული, შესმე-

ნილი კაცი რყო, ყველას საყვარელი, რიგიანი და საპატიო თანამდებობის პატრონი და ნუ თუ არ ეყურებოდა, რომ შეთითხვნა, შებლალვა წმიდა კედლისა, წმიდა სახლისა, სადაც თამარ მეფე საათობით იდგა, ლოცულობდა წმიდის გულით და ავეღრებდა ლმერთს თვის ერსა, უდიდესი დანაშაულია სამშობლოს წინაშე?! ნუ თუ არ ესმოდა რომ დიდებულის წარსულის ნაშთს მუხლ-მოლდერეკით და მოწიწებით უნდა ვუმზერდეთ? არ მესმის რა მარჯვენამ უნდა აიღოს ნახშირი და გაგლისოს წმიდა ნაშთი თვისის გვარითა და სახელით, რომელიც არავისათვის არაა საინტერესო, მეგობართა და მახლობელ ნათესავთა გარდა. ვიღაც ნინო აგულოვისა და ს. ყიუმჩიბაშვილი რალა გავაძლენო, როდესაც შესმენა თ. გ. თ—შვილს არა ჰქონია. დიდად მეწყინა და ხმა მაღლა ცუდად მოვიხსენიე განსვენებული და ის წყეული გარემოება, რომელიც ასე გვამახინჯებს ეროვნულად. სიცოცხლეში კი სიამტკილობისა და სიყვარულის მეტი არა გვეთქმოდა-რა მე და განსვენებულს. ვარძის ნანგრევებზე გავიცანით ერთმანერთი და აქ გავსწორდით, მაგრამ ვაი და ვუი ამ გასწორებას. ვისთვისა საჭირო?..

ბევრჯელ მითქვამს და კიდევ მოგახსენებთ, დიდი უბედურობაა, რომ ეროვნულს აღზრდასა ვართ მოკლებული. თ-დი გ. თ—შვილი რომ სხვაფრივ ყოფილიკა აღზრდილი, ეროვნულს მკრეხელობას არ მოიქმედებდა და სხვასაც ნებას არ მისცემდა წაებილწნათ ვარძის კედლები.

სხვები ჩვენსავით არ იქცევიან, განათლებულს ეპროპელებს თავი დავანებოთ, ამათ საოცრად იციან თავიანთ მოჭირნახულეთა სიყვარული და პატივისცემა. გვუვანან ისეთი მეზობლებიც, რომელნიც თითქმის უმი-

ზეზოდ განგაშსა სცემენ ხოლმე და რწყილს აქლემად აქ-  
ცევენ. ამათაც თავი დავანებოთ, ღმერთმა საბედნიეროთ  
მოახმაროსთ თავიანთი საქონელი. მაგალითად ავილოთ  
პატარა ფინლანდია. ისტორიაში ამ ერის ღვაწლი არა  
გამიგონია-რა და ვგონებ ვერაფრით მოიწონებენ თავსა.  
რიგიანი თითქმის დამოუკიდებელი არსებობა, ისიც ნაწ-  
ყალობევი, სულ ოდაც ოთხმოცილდე წელიწადი ჰქონ-  
და წარსულს საუკუნეში. ბუნება ამ პატარა ქვეყნისა  
მკაცრია და მწირი, მაგრამ დაღვრემილმა ფინმა, ეროვ-  
ნულ დაწესებულებათა წყალობით, პევრი რამ გაიჩინა  
და, სხვათა შორის, ეროვნული პოეზიაც დაპატარა. ფი-  
ნებს ჰყავდათ პოეტი რუნებერგი. პოეტმა დიდი სახელი  
გაითქვა სამშობლოში, გარედ კი აგრე რიგად თვალ-  
საჩენი არ გახლავთ. ხომ ასეა, მაგრამ ის სახლი, სადაც  
პოეტი სცხოვრობდა და გარდაიცვალა—ქ. ბორგო,  
სათაყვანებელი გახდა ერისათვის. მთავრობამ შეისყიდა ეს  
სახლი (რუნებერგის სიცოცხლის დროს ფინლანდიის  
სენატი შეზღუდული არ იყო), ყველაფერი ისე დას-  
ტოვა, როგორც პოეტის სიცოცხლის დროს იყო.  
დღეს თურმე ბორგოს სახლი ფინნების საეროვნო სამ-  
ლოცველოდ გარდაქცეულა და თვითოვეული ფინი მო-  
ვალეობად სთვლის, ისე არ მოკვდეს, რომ რუნებერგის  
სახლი არა ჰნახოს.

ჩვენ, ქართველებს უფალმა არ მოგვცა ეს შნო და  
უნარი.

ჩემის აზრით, რუნებერგის პოეზია ვერანაირად ვერ  
შეედრება აი თუნდ ვაეთ-ფშაველას პოეზიას. სილარიბით  
ტანჯულს პოეტს ისეთი მარგალიტები მოქპოვება სალა-  
როში, რომ რუნებერგი კი არა, ბევრი, მეგობართა შეწ-

წეობით გაბერილი და სახელ-მორცმული პოეტი, იძულებული უნდა გაჰქდეს ქედი მოიხაროს მის წინაშე, მაგრამ სადაა პატრონი, სადაა გამკითხავი! რუნებერგს ჰყავდა ისეთი მეგობარი, ოოგორიცაა ი. გროტი. სახელოვანმა მეცნიერმა რუნებერგის ბევრი ლექსი სთარგმნა რუსულად და ამით სახელი მოუპოვა სამშობლოს გარედ. ჩვენს პოეტებს კი ჩვენ, ქართველები, ვყევართ მეგობარ-მოჭირნახულეთ! ერთხელ ხომ სამსალა ვასვით ვაჟა-ფშაველას, ღლეს პოეტი სიმშილით ილევა. აი როგორ დალილინებს ვაჟა-ფშაველა ქართულ რედაქციას:

„მომეცით ფული,  
გაწყალდა გული.  
თვე არის სრული  
ამოდის სული,  
რაც რედაქციას  
გარშემო უვლი...  
რადა, რისთვისა?  
— ავიღო ფული“.

ნურც რედაქციას დავემდურებით. რედაქცია, მოგეხსენებათ, ზარაფხანა არ გახლავთ, თუ არა შემოუარა, თანამშრომელს რას მისცემს? ჩვენი მკითხველი ისე გაურბის ქართულ მწერლობას, როგორც ურია ლორის ხორცს. ან კი ვინ გაამრუცნებს!.. სიბრძნით და ნიკით სავსე „ტიფლიცი ლისტოკს“ ვიღა წაიკითხავს მერე?

მოკლედ ე. გ. ვეიდენბაუმი ასე მოიხსენიებს ვარძიას:

„მტკვრის ლრმა ხეობაში, რომელსაც აქ ხერთვისისა ეწოდება, მდებარეობს ოდესმე საქართველოში სახელოვანი მონასტერი ვარძია. კლდეში გამოქვაბულია რამდენიმე ეკლესია, მრავალი სენაკი და სხვა შენობანი. ამ-

ბობენ, დიდად უყვარდა აქ დროს გატარება თამარ-მეფე-საო, რომელმაც გაადიდა და გააფართოვა მღვიმე-ქალაქი და ააშენა ეკლესია მღვიმეს მშობლის სახელზედ. ამ ეკლესიის კედლებზედ ფერადი საღებავით დახატულია სურათი სახელოვანის დედოფლისა. პირველად როდის აშენდა, ან რა დროს გავერანდა, არ ვიცითო“.

მღვიმეს მშობლის ეკლესიაში დღესაცაა წირვალოცა და მღვიმეს მსახურება ქართულად. ჩრდილოეთის კედლებზე დახატულია თამარ მეფის სურათი უშველებელ საყურეებით. სურათი ისეთივეა, როგორც ბეთანიის მონასტერში. მაგრამ აქ უკეთაა შენახული. განახლების შემდეგ ბეთანიის მონასტერი აღარ მინახავს, ეგებ იქაც გაასუფთავეს სურათი.

მღვიმეს მშობლის ეკლესიას ბევრგან ამჩნევია ნატყვიარი. ქურთები თურმე ნიშანში იღებდნენ კედლებზე და თაღში დახატულს წმინდანების სურათს და თოფის ტყვიით ხვრეტდნენ. ის ველურნი, ან ახალციხის ბიჭბუჭები, რომელთაც თვალები დასჩიჩქნეს საფარაში ათაბეგთ ბეჭასა და ოლბულის, როგორ გავამტყუნო, როდესაც ჩვენ თვითონ, განათლებულნი ქართველნი, უარესსა ვკადრულობთ.

მოღუშული, პირ-ულიმარი, სევდა-მოწოლილი, მკაცრ ბუნებასთან ბრძოლით გამწარებული, თითქმის დაბალ მოდგმის ჩამომავალი ფინი ქ. ბორგოში დაიარება ეროვნოლ პოეტის ნადგომ სახლის სანახავად, რათა დასტუბეს განსვენებულის რუნებერგის ნივთების ცქერით, ამ ხილუთ გამოწვეულ მოგონებით, ჩვენ კი იმას ვკისრულობთ, რასაც ქურთნი სჩადიან უგუნურობითა და ველურობით. ეს კიდევ რაა?! ვის ეკადრება ფინი რუნებერგი და ან რა სახსენებელია შოთა რუსთველთან?

მაგრამ რუნებერგს მრავალი ძეგლი აუგდს თოვლ-ყინულიან ფინლიანდიაში და შოთას სამშობლო სოფელი კი ჭუპყიან და მურდალ ქურთთა სადგურად და ბინად გავხადეთ. დღევანდელს საქართველოს ქურდ-ბატაცასავით შემოეპარა ველურობა და ბარბაროსობა, შთანთქა ძეელი კულტურა და მისი ნაშთნი და თაბამად პარპაშებს.

დიდ ეკლესიის ჩრდილოეთის კედლიდან ზემოდ კლდეში მიდის გრძელი ხვრელი. 81 საფეხური დავთვალე. საფეხურები კარგადაა შენახული, მაგრამ ჩემს წინამდლოლს რომ მივდევდი, სულ ძლივს ვიბრუნებდი. ტან-ში უნებურად ურუანტელი მივლიდა. ღამურეები ზედ სახეზედ მასკდებოდნენ და იმათი ცივი ფრთების შეხება და ხახუნი ცივ ითლს მასხავდა. ხვრელში საშიშო არა მომელოდა-რა, მაგრამ მაინც უხერხულად ვგრძნობდი თავსა. ერთი რომ იგრიალოს, მოზღვავდეს ეს უზარმაზარი კლდე, ხომ მორჩა და გათავდა ყველაფერი და გამოეთხოვე წუთი-სოფელს!

ხვრელი რომ გავლიერ, გავედით შედარებით ფართო მოედანზე. მტკვარი უფრო პატარად მეჩვენა, მაგრამ თერგივით მაინც სჩქეფდა და ცოცხლობდა. მოედნიდან იწყება ბერთა სენაკები, ვგონებ, მეოთხე სართულისა. ვარძია მარტო მონასტრიად არა ყოფილა. ციხე-ქალაქადაც ითვლებოდა. დიუბუას სიტყვით, გამოკვაბული სენაკები ზოგი საჯინიბო ყოფილა, ზოგი საცხოვრებელი და მაღაზია და ზოგიც დუქანი.

მოგეხსენებათ, რომ მონგოლებმა და უ ზილბაშებმა დაამხეს საქართველო და ტურქლიანის ხელით შებღალეს სული და გული ამ პატარა ერისა. მას აქეთ ქვეყანამ ვეღარ იხეირა და ცოცხლიაბს წელკავიანივით. მათ სიბილწესა და სიმურდლეს ვერც ვარძია გადარჩა.

მეთუთხმეტე საუკუნეში მონგოლებმა ააოხრეს ეს შესანიშნავი გამოქვაბული ციხე-ქალაქი, მეთექვსმეტე საუკუნეში ყიზილბაშები სწვევიან ვარძიას სტუმრადა და ყიზილბაშურადაც მოჰქცევიან. მუსულმანთა მწერალი ისკანდერ მუნჯი ასე მოვითხრობს ვარძიის აკლების ამბავს: „1551 წ. შაპ-თამაზი შეესია საქართველოს. ერი გაიხიზნა მთებში, კეთილშობილნი ჩაიკეტნენ ციხე-სიმაგრეებში. რამდენიმე თავადი გაიხიზნა დარნარის მიუღვომელს ადგილს, ან დერმარ-ქილისაში (მღვთის მშობლის ეკლესია). შაპ-თამაზის სარდალმა ზიად-ოლლიმ და იქირა მღვთის მშობლის ეკლესია, მამა-კაცნი ამოსწყვიტა და დედა-კაცნი და ბავშვები ტყვედ გაირეკა, სიმდიდრე და ძვირფასი ნივთები მშვენიერის ეკლესიისა სულ გაზიდა. ეკლესია წარმოადგენდა, ამბობს ისკანდერ მუნჯი, ადამიანის ხელის საოცარს და საკურიველს ნაწარმოებსაო... (დეკ. ლამბაშიძის წიგნაკიდანაა ამოლებული მუნჯის სიტყვები).

დიდხანს არ გაუვლია ვარძიის გაძარცვის შემდეგ და მესხეთს ოსმალეთი შემოესია (1625 წ.). ოსმალო შესხეთს მუსრს ავლებდა და ვარძიის განახლება-განსპერაკებისთვის არ ითიქრებდა. 1828 წელს პასკუიჩმა მესხეთის ნაწილი ოსმალეთს წაართვა და ვარძიაც საქრისტიანოს დაუბრუნდა. მაგრამ რადგან პატრონი და გულშემატკივარი არავინ გამოსჩენია, ქურთებმაც თავისებურად გამოიყენეს თამარ მეფის საყვარელი მონასტერი. უამინდობის დროს საქონელს აბინავებდნენ ვარძიის გამოქვაბულ სენაკისა და ეკლესიებში და გულის გადასაყოლიებლად წმინდანებს ტყვიით უხვრეტავდნენ თვალებს.

ტანჯულს საქართველოს ასე მუხთლობს ბედი დაწყიდაბადებიდგან. არც გარეული, ვინც უნდა იყოს იგი.

ბიზანტიულია თუ რომაელი, სპარსია, მონგოლია, თუ თურქი, არაბია, თუ სომები, და არც შინაური მეცადი-ნეობას არ აკლებენ, რომ შემუსრონ ბედ-შავი ქვეყანა და წაბილწონ მისი სიშმინდენი. არა, მათის გულის გა-სასივებლად, ისიც კი უნდა ითქვას, ლვთის წინაშე, რომ ვერ მოახერხეს საბოლოოდ გათელვა საქართველოსი. მოყვარეთა სანუგეშოდ ვიტყვით, რომ ეგები მალე სი-ცოცხლის ნაპერწყალი გაჩაღებულ ცეცხლად გადაიქცეს.

## VII

ვარძიის ნატამალს გუშაგობას და პატრონობას უწევს არქიმანდრიტი მამა სიმონი, ერობაში თავადი წულუკიძე. დღეს ქართველობას ბერობა თითქმის აღარა გვყავს. იგი წარსულს რევიმს სამუდამოდ თან გაჰყოლია.

მამა სიმონი ახოვანი ტანისაა. ლმობიერის სახისა, ძალზედ მოხუცი, მაგრამ მხნე და სიცოცხლით სავსე. ეტყობა, დადად უყვარს ვარძია. აქ შიმშილს ამჯობინებს სხვაგან განცხრომა-ფუფუნებას. მამა სიმონი ძველის ტიპის ბერია, რუსული სწავლა-განათლება არ მიუღია, საუბარი სასოებიანი და ქართული მარილიანი აქვს.

არქიმანდრიტს ორი მორჩილი ჰყავს, ვგონებ ერთი იმერია და მეორე—ამერი. ერთი პატარა ბიჭიცაა, ასე 12—13 წლისა, ცოცხალი როგორც ჩიტი და მარდი როგორც ნიბლია. მამა არქიმანდრიტს ხელზე ემსახურება, ჩაის უკეთებს, სუფრას უშლის და ქვეშსაგებს უმზადებს. ბავშვი იმერეთიდანაა ჩამოყვანილი. მისი წერიალა ხმა ზარივით გაისმის ამ მინგრეულ-მონგრეულ მღვიმეთა შორის. მარტოოდენ ეს ბალლია სიცოცხლის წარმომადგენელი და გამომსახველი. დიდხანს გასძლებს თუ არა.

ეს მაღხაზი ქოჩორა ჩიტი სიცოცხლეს მოკლებულ სავანეში, ძნელი გამოსაცნობია.

არავითარი სალსარი ცხოვრებისა მამა სიძონს კრებულით არა აქვს. დღესაც არ ვიცი, რითი საზრდოობს დიდებულისა და სახელოვანის ვარძის გუშაგი. ქონება არავითარი, არც მოძრავი, არც უძრავი. კრებულს ჰყავს ერთად ერთი სახედარი ფქვილისა და შეშის საზიდავად. ჰყოლიათ ერთი ცხენიცა და, რადგან ვერ გამოუკვებიათ, გაუბარებიათ.

ცოტაოდენი შეწირულობა მოუგროვებია მამა სიმონს და განუზრახავს. წისქვილი დაებრუნებინა მტკვარზე. სამი ქვა კიდეც მოეტანა ქუთაისიდგან, რუ გაეთხარა დიდის წვალებითა და ტანჯვით, მაგრამ წისქვილი ჩემს იქ ყოფნის დროს წესიერად ვერ მუშაობდა, წყალი ლონიერად ვერ სცემდა და წისქვილს უგემურად გაჰქონდა ღრიულინი. მაშასადამე, ეს განზრახული წყარო საზრდოს შოვნისა ჯერ-ჯერობით დაშრეტილია.

ვარძიას ძველად, რაღა თქმა უნდა, დიდი მამული ექნებოდა. დღეს შიშველ-ტიტველია ვითარცა ხე ციცს და ყინულიან ზამთარსა. უურნალ „მოგზაურუშია“, ნომრები: VI და VII, 1901 წ., კაბადონი 536, აი რასა ვკითხულობთ: „ვინმე მესხი გვარამაძე ვარძიის შესახებ შედეგსა სწერს: კარწახი (ახლა სომხები სცხოვრობენ), ზედა-ვარძია და ამათი მოყოლება მტკვრის- გალმა-გამოლმა მხარი, სულ ვარძიის შეწირულობა ყოფილა, ვენახებით, ბოსტნებით და ბალჩებითა; მეფის სამსაჯულოსთან სამწირველო ტრაპეზზედ ყოფილა წარწერილი მხედრულად, მაგრამ მტრებს ამოუმტვრევიათ, რამდენიმე სტრიქონი ნაწყვეტ-ნაწყვეტი კიდევ ეტყობა. ამის გუჯარიც ყოფილა. ეს გუჯარიც ინახებოდა პატარა ოო-

ნელ თევდორე მღვდლის მანველიძის სახლში; აღრე კოთელიის მღვდლად ყოფილა. 1846 წელს მღვდლის შვილმა სვიმონ მანველიძემ გოგაშნელებს (სოფელი ვოგაშენი მდებარეობს ვარძიის პირი, მტკვრის მაღალ კიდეზე) გარდასცა ეს გუჯარი. სამაგიეროდ ბედაური ცხენი აჩუქეს გოგაშნელებმა, ხოლო სიგელი ბლალობინს გ. გამრეკელს მიართვეს სიხარულითა. ერთს ხანს მიწერ-მოწერა გაიმართა, მაგრამ მაღლე ჩაყრუვდა საქმე-ბლალობინი გამოიცვალა და საქმე საბლალობინოში დარჩა, თუ ტფილისის საექსარხოსოს არქივში, აღარა ისმის-რა. ამბობენ, სომხების კარაპეტ ეპისკოპოსს შეუსყიდია-ივი 18,000 მანეთად. ვისგან შეუსყიდია, ეგ კი არ არის ცხადი».

სიტყვა-სიტყვით ამოვწერეთ „მოგზაურიდან“ ვინმე: მესხის ნათქვამი. შეიძლება ეს მართალი იყოს, შეიძ-ლება ტყუილიც. ამას კარგი და რიგიანი გამოკვ-ლევა უნდა. ურიგოს არ იზამენ ჩვენის წარსულის მკვ-ლევარნი, კარგად მოჩხრიკონ დაკარგული სიგელი, ან დანამდვილებით შეიტყონ მისი თავგადასავალი.

კარაპეტა ეპისკოპოსი კარგადაა ცნობილი ისტო-რიაში. პასკევიჩის დროს მისის წინამძღოლობით დიდ-ძალი სომხობა გადმოსახლდა არზრუმიდან და დაბინავდა მესხეთის ვერანა სოფლებში. ორი ქალაქიც: ახალციხე და ახალქალაქი გადმოსულებმა დაიკავეს. კარაპეტა ეპის-კოპოსმა საეკლესიო ფულით წმ. მაცხოვრის სახელობა-ზედ (ეს ეკლესია ახალციხეშია) იყიდა ჯავახეთში სოფ-თოები: კარწახი, სულდა, ყური-დადეში და სხვა, გოგ-დალის საძოვარი მთები. ამ უამად ჩამრთვლილ სოფლებ-სა და მთას შემოაქვს წელიწადში 22,000 მან. კერძოდ

კარწახილან, სულ ცოტა, შემოვა 5,000 — 6,000 მანე-  
თი. ეხლა ეს მამულები მთავრობის განკარგულებაშია.

ეპისკოპოსმა კარაპეტამ იაფად იყიდა მამულები,  
სულ რაღაც 2,500 მან. გრამოტები რომ იწერებოდა,  
სულდელები ახირდნენ, სოფ. სულდის წინანდელი ბა-  
ტონი ბეგი, ან აღა არა ყოფილა, „მუქიკი“ იყო ჩვენ-  
სავითა და ამის გამო სომხის ეკლესიას, როგორც „მუ-  
ქიკის“ მემკვიდრეს, ნება არა აქვს თავისუფალი მამული  
დაიტოვოს და სულ ჩვენ უნდა მოგვეცეს „ნადელში“,  
რაც სულდის ფარგალშია მოქცეულიო. წინანდელი ბა-  
ტონი ბეგი რომ ყოფილიყო, კანონით გლეხების ასეთს  
პრეტენზიას ლაგამს ამოსდებდნენ. სულდელებმა თავისი  
გაიყვანეს, სენატმა სამართლიანად იცნო მათი ახირება,  
წინანდელი მფლობელი ბეგად არ აღიარა და ბრძანა:  
მიეზომოს სულდელებს, თითო სულზე ხუთ-ხუთი დესე-  
ტინა სულდის ვერანებილანაო.

ეს ამბავი იმას გვასწავებს, რომ ვინ იცის, ეგები  
სულდის ვითომდა მებატონებ სხვისი სამკვიდრო მიჰყიდა  
ეპისკოპოსს კარაპეტას. სოფ. კარწახი მოსამზღვრეა სულ-  
დისა. უკეთუ ამ ეჭვს რაიმე საბუთი აქვს, მაშინ ადვი-  
ლად მივხვდებით, რომ კვეთანი და გონიერი წინამძლო-  
ლი გადმოსახლებულ სომხებისა, ეპისკოპოსი კარაპეტი  
შეეცდებოდა როგორმე ხელში ჩაეგდო კარწახის სიგე-  
ლი. ფულსაც, რაღა თქმა უნდა, არ დაიშურებდა ამ  
საქმისათვის. მართალია, სიგელის პონას პრაქტიკული  
მნიშვნელობა არ ექმნება ვარძიის მონასტრისათვის, მაგ-  
რამ ჰეშმარიტებისა და სიმართლის იღდენა ცოტა რა-  
მედ არა ღირს. ვარძიის გუშაგი მოხუცი არქიმანდრიტი  
სიმონი კარწახის საამოდ გაშლილ ველ-მინდვრებს რომ  
მთავლებს ოვალს აგარის მწვერვალებიდან, მელანქო-

ლურად გაიფიქრებს: ასე წარმავალია დიდება ქვეყნისაა! გუშინ ეს ველ-მინდორი ვარძიისა იყო და დღეს კი სხვას უჭირავსო. შემდევ მხურვალე ლოცვითა და მარხულობით დარდს გადიყრის და მიუტევებს, ვითარცა დიდ-ბუნებოვანი ადამიანი, უკეთურს ცოდვასა და შეცომილებას, სიავესა და სიხარბეს.

რითი საზრდოობს ვარძიის ეხლანდელი კრებული, ძნელი გამოსაცნობია. მონასტრის მიდამო გოხები, სათიბ-საძოვარნი გამიჯვნის დროს ბაიბურთლებმა და ბაგრა-ტუნოვებმა (აჩზრუმიდან არიან მოსულნი) „კანონიერის წესით“ დაისაკუთრეს. მონასტერს დარჩა მხოლოდ რა-ლაც 50—60 დესეტინა გახრიოკებული კლდეები. ცხვრის გასასეირნებლად თუ ივარგებს ეს კლდეები, სხვაფრივ რა ჰყრია მათში. შემოსავალი ბევრი-ბევრი 30—40 მანათი იყოს წელიწადში. კრებულს ეს შემოსავალი ვერ დაა-პურებს, თუ სული წმიდა არ მოეშველა.

ვარძიის რკინის რგოლივით გარს არტყია მაჰმადიანობა; ნეტა ოსმალონი მაინც იყვნენ, ან ჩვენი აქარლები, ვინ რას იტყვის კიდევა. უვარგისი წარმომადგენელნი მაჰმადიანობისა: ქურთნი, თარაქამა, მუტრუფნი, ბოშანი გაბნეულან ვარძიის გარშემო. ქართველთა მარტო თხი სოფელია: აფნია, გოგაშენი მტკვრის მარჯვნივ, აგარა და ზედათ იოგვი—მარცხნივ. ეს სოფლები ერით მცირენი არიან, ღარიბნი და დაჩაგრულნი, უნიადაგონი და განუვითარებელნი. ამათ რა უნდა გაიმეტონ მონასტრისათვის? მაინც და მაინც ისევ ისინი თუ ჩამო-ლენ ათასში ერთხელ ვარძიას, ილოცვენ და შეიძლება ორიოდე აქაური ქადა-ნაზუქი დაუტოვონ კრებულს. (ქართლურ შესანიშნავ ნაზუქს მიჩვეული ვერც კი მიე-კარება აქაურს ერბოთი გაელენთილს და ურძეო ნაზუქს).

მორჩილნი ალბად მათხოვრობენ, თეფშით აგროვებენ ხორბალს და ისე თუ იკვებებიან. მთავრობა მონასტერის არაფერს ულუფას არ აძლევს, ილბად შტატ გარეშე თუა დარჩენილი, როგორც სხვა ჩვენი მრავალი ძველად შესანიშნავი მონასტერი.

ამ სიღარიბესა და უილაჯობას რომ ვუცქეროდი, ფიქრმა უნებლიერ შავი ზღვის პირას გადამიტანა. მოკლედ თვალი მოვავლე ახალ-ათონის ისტორიას. ჯერ ისევ უკანასკნელ რუს-ოსმალოსთან ომამდინ ძველ ათონიდან მოვიდნენ ბერები და შეუდგნენ მონასტრის აშენებას. ომის დროს ოსმალოთ და აფხაზებმა ბერების ნაცოდილარი მიანგრ-მოანგრიეს და ქვა-ქვაზე არ დასტოვეს. დასრულდა ომი. ბერები ისევ მოვიდნენ და უფრო მხნედ შეუდგნენ მოლვაწეობას, მაგრამ რას გახდებოდნენ მარტო მხნეობით, თუ დახმარებაც არ ყოფილიყო. დახმარებაც მთავრობამ აღმოუჩინა. ნამესტნიკად მაშინ ბრძანდებოდა დიდი მთავარი მიხეილ ნიკოლოზის ძე, რომელიც დიდ მნიშვნელობას აძლევდა რუსთა კოლონიზაციას ამიერ კავკასიაში. ეს საქმე პირველად ნამესტნიკმა თავადმა ვარანცოვმა დაიწყო, მაგრამ სრულიად მოულოდნელად დასრულდა მისი განზრახვა-მეცადინეობა. გადმოსახლებულნი გაქართველდნენ. განსვენებული ვ-ველიჩო რომ შეუდგა ამ საქმეს ჩვეულებრივის მხნეობით და გაბედულობით, ბევრს ეგონა ამან დაიწყო პირველად ეს საქმეო. არა, დედა აზრი თ. ვარანცოვისაა და დიდის მთავრის მიხეილ ნიკოლოზის ძისა, ხოლო ველიჩომ მათი შეცდომანი არ გაიმეორა, ესე იგი ლონიერ ჯგუფებად უნდა დაესახლებინათ კოლონისტები, უსათუოდ თან მოყოლილი მღვდელი ჰყოლოდათ, ეკლესია აეგოთ და სამრევლო სკოლა გაემართათ. ახალ-

შენელებს ცოლებიც თან უნდა მოეყვანათ, თორემ თუ ჩვენი თინია-დარეჯნები გაერეოდნენ ახალშენელებში, „საქმე წახთებოდა“, იმერულად რომ ვსოდეთ.

მაგონდება ერთი სასაკილო ამბავი. ხალხის ყრილობას დავესწარი. მოხელეებს ირჩევდნენ, ყურთა-სმენა წაიღის, ისე ლრიალობდა ხალხი; გიო, გიო გვინდაო. ვინაა ე გიო, ერთი თვალით გვაჩვენეთო, უბრძანეს უფროსებმა. მოიყვანეს.

- ბიჭო, ვინა ხარ?
- გიო, შენი კირიმე.
- გვარი?
- მარტინენკო.

სახტად დავრჩი. ჩემ წინ გამოჭიმული იდგა ტიპიური ქართველი ტეტია, შალის ჩოხით, წინდა-ქალამნით.

მართალია, გიო მარტინენკო კროლა იყო, მაგრამ განა ცოტაა კროლანი ჩვენში? ერთი ჩემი კარგი ნაცნობი ისეთი კროლაა, რომ მაგისთანა „ანტიკა“ კროლას შიდა რუსეთშიაც ვერ იპოვნი.

დიალ, იმას მოგახსენებდით, რომ ახალს ათონს უხვად უწყალობეს სახნავ-სათესი, მდინარენი, მთანი და ტყენი; უბოძეს აგრედვე მონოპოლია თევზის ჭერისა შავ ზღვაში დიდ მანძილზე. მკაფიოდ აღარ მახსოვს, რამდენი რა იყო, მამა დეკანოზ ვოსტორგოვის ფელე-ტონები, გაზეთ „კავკაზში“ დაბეჭდილი, ხელთ არა გვაქვს ამ უამად. მლოცველიც დიდალი ჰყავს ათონს და გაივსო სიმდიდრით.

კარგა ხანია, სიკაბუკის დრომ, როცა რელიგიური გრძნობა ცხოველია, განვლო, და მას შემდეგ ეკლესია-მონასტრებისთვის შესაწირავი არ გამილია. როგორლაც

შემთხვევა არ გვეძლეოდა. ვარძიის კრებულის სილარიბე და სილატაკე რომ ვიხილე, გულმა აღარ მომითმინა და ორჯელ, ზედი-ზედ, შესაწირავი მივართვი. ეს საქმე ისე ბუნებრივად, კანონიერად და სამართლიანათ მეჩვენა, რომ ერთს წუთსაც არ მიყოყმანია. ვგონებ უპირველესი მოვალეობაა ყოველის ქართველისა გაიღოს მცირე რამ იმათ შესანახად და საზრდოთ, ვინც ესეთის სიყვარულით, თავგამოდებით და ბედის წინაშე მორჩილებით დღე და ღამ გუშაგობენ დიდებულ თამარის საყვარელ ციხე-ქალაქსა და მონასტერსა. იქ, სადაც ფორთოხალის და ლიმონის ბალებს ჰმართავენ, ან იხვთა და გედთა საჭყუმპალაოდ მარმარილოს აუზებს აგებენ, შეიძლება არა-ვითარმა სხვა ემოციამ არ შეგიცყროს, გარდა ესტეტიკურისა: რასაკვირველია, მაშინ საბერო-სამონასტრო შესაწირავს ადგილი აღარ ექნება და შეგიძლიანთ არ-ხეინად დოინჯ-შემოყრილმა ისეირნოთ და, მშვენიერებით დამტკბარმა, თუ გუნებაზე მოხვალთ, კიდეც იღილინოთ.

მამა სიმონს ჰყვარებია ქართულის კითხვა. ჩემსობას „ივერიას“ მოვყარი თვალი არქიმანდრიტის სენაკში. საწყენია, თუ ფულით იწერდა. საიდან უნდა გაიღონ ერთი თუმანი? კარგს იზამს რედაქტია, თუ უსასყიდლოდ გამოუგზავნის გაზეთს. ნუ დაივიწყებს გაზეთი, რომ ეს სამი-ოთხი ქართველი-ლა დარჩა ძველის საქართველოს წარმომადგენლად ამ გამაპმადიანებულს და გასომხებულს მხარეს. ვსთხოვ „ცნობის ფურცელსაც“ და „მოამბდეს“, ნუ დაიშურებენ ურნალსა და გაზეთს ვარძიისათვის, ხოლო ნახატებიანი დამატება საჭირო არაა, ვინაიდგან ვარძია იტალია არ არის და მამა სიმონი იმ ბერთა ჯგუფს არ ეკუთვნის, რომელნიც ბოკაჩიოს დროს სცხოვრობდნენ. შიშველა

ქალთა სურათნი „დეკამერონიბას“ გასწევენ და რა ხელ-საყრელია, რომ უდაბნოში ჩვენსავე ხელით „შევიტანოთ უშმაკულობა“ და თავი სული“. საჭიროა პური არ-სობისა და გონების საზრდო და არა სულისა და გულის მაცონებელი. ესენი სხვა ჯურის ბერთათვის და ნერვებ-მოშლილ ინტელიგენტიისათვის დაგვილოცნია.

### VIII

15 ავტისტოს იცის ვარძიობა, ანუ ჩვენებური მა-რიამობა. მინდოდა ამ დღეს მონასტრის ნახვა და კიდეც ავისრულე სურვილი. ჯავახეთის მრავალი სოფლები გა-ვიარე და სოფ. გოგაშენს შევისვენე ჩვენებურ ქართლელ მღვდლის მ. გიორგი კარბელაშვილის ოჯახში. გოგაშენი-დან ვარძია ისე სჩანს, თითქოს ხელის გულზე გაქვს გა-დაშლილიო. სულ ბევრი მონასტრამდე სამი ვერსი. იყოს სასიარულო, მაგრამ უშველებელი დალმართია და მისი ჩავლა ცოტა არ იყვეს მალონებდა. ერთხელ რაკი გა-მოვცადე ს. აგარიდან ვარძიას ჩასვლა, სწორედ მიძნელ-დებოდა საქმე, თუმცა გამოცდილი მხლებელი, ს. აფ-ნიიდან საპოლიციო დარაჯი, გზას მიადვილებდა, გო-გაშნელებს ხომ სიცილად არ ჰყოფნიდათ ჩემი ეჭვი და შიში.

— ბატონო, რა ზორბა ტქვენა ბრძანდებით, თუ გაგიჭირდებათ, სულ ხელით ჩაგიყვანთო.

მართლაც, ბილიკი შედარებით აგარისასთან ლვთის-ნიერი აღმოჩნდა. მაინც მუხლთ მეკეცებოდა და წელი მწყდებოდა. ხშირი ბინდი იყო. მონასტრის აღმართს რომ შევუდექი და დალლილობისაგან სიარულს ვეღარ ვახერხებდი. არ ვარგივართ ეხლანდელი ინტელიგენტი,

რაკი ევროპელივით მიჩვეული არა ვართ ფეხით სიარულს, ორ ნაბიჯს გადავდგამთ თუ არა, ვაისა და ვუის უნდა მოვყვეთ.

მხლებლისა და თარაქამის დახმარებით, როგორც იყო, მივაღწიე მამა სიმონის სენაკს და კუტივით დავეგდე ტახტზე. ეხლაც კარგად მახსოვს მოლიმარე სახე ამ ახოვანის თარაქამისა. შორიდანვე შეატყობ, რომ ბუნების მოუხეშავი შვილია და ნეტა რა ძალაც მოიყვანა ვარძიას ლამის სათევად? ლვინოს ეგ არა სეამს და არაყს, ქრისტე მაგას არ მიაჩნია და ვარძია; მაშ რა იზიდავს?.. უნდა გენახათ, რანაირად გაუბრწყინდა სახე, ნაცნობი ნიკო (ჩემი დარაჯი) რომ დაინახა.

„ხოშ გიალდიო“, მხიარულად მიესალმა და მაგრად ხელი ჩამოართვა. ნიკომ უკმეხად რალაც წასჩურჩულა თამალურად, ალბად ამცნო ჩემი ვინაობა, და თარაქამას მხიარული სახე უცბად შეეცვალა. ნიკოსავე თხოვნით, მეორე იღლიაში მტაცა ხელი და ციმ-ციმ მიმიტანეს არქიმანდრიტის სენაკთან.

ხალხი ბუზივით ირეოდა ლვის მშობლის ეკლესიის გარშემო მდებარე მცირე მოედანზე. საოცარია, რატომ არავინ იჩეხება აქედან? მოაჯირი რომ ჰქონდეს სამხრეთიდგან, კიდევ ჰო, მაგრამ მოედანი შემოუზღუდავია, უბრალო ხარიხაც არა აქვს შემოვლებული და მაინც უბედურება არა მომხდარა-რა მარიამობას.

სიბნელის გამო ვერ ვარჩევდი სენაკის ფანჯრიდან, რა ეროვნების ხალხი ირეოდა ეკლესიის წინ. ყველაზედ წინ ამის გამოცნობა მაინტერესებდა. ნუ თუ შორიდან ქართველობა დაიძრა ვარძიის თაყვანის საცემლად და თან დროს გასატარებლად? მაგრამ არა, შემდეგ გამოიჩივა რომ ყველაზე ნაკლებ ჯავახეთის ქართველობა

იყო, უფრო კი ქურთები, თარაქამა, სომხობა, მაჰმადიანობა, ბერძნები და სხვა. ასე გასინჯეთ, ერთი ახალციხელი ებრაელიც კი ვნახე მეორე დღეს.

მამა სვიმონი სენაკში არ გახლდა, ეკლესიაში ხალხს ამწყალობებდა. ეხმარებოდნენ გოგაშნელი მოძღვარი გ. კარბელაშვილი და საროელი ს. უსტიაშვილი (კახელია), სოფელ საროდან (20 ვერსია) შვილით ფეხით მოსული. როგორლაც ვკითხე მამა სოლომონს, რა გაჭირვება გადგა, რომ ამ სიცხე-პაპანაქებაში ფეხით წამოსულხარ-მეთქი. წმ. დავით გარეჯელის უდაბნოში აღვიზარდე, იქ ვისწავლე ლვთის-მსახურობა და გალობა და ვერ გავგედე ეტლით, ან ცხენით ვარძიას მოსვლაო. დღევანდელი „განათლებული“ კურსოვნიკები, „გაწაფულნი“ ხრისტიანთა აფერადებულ ბლავვნაში, თქმა არ უნდა, ამ გვარ პასუხს არ გვალირსებენ. ვერც მოიცლიან ლვთის წინაშე, შემოსავლიან „პრიხოდების“ ძებნას უნდება მათი დრო და ენერგია.

მამა სოლომონი წინადაც მენახა. ს. ტოლოშს ხალხი იყო დასაფიცებელი. ფიცის ქაღალდი დავიწყებოდათ, როგორც იყო, მოკლედ და უთავბოლოდ გარდასცეს შინაარსი ფიცისა მ. სოლომონს. სწორედ დასტკებებოდით, რომ გენახათ, რა ლრმა და წმინდა ქართულით დააფიცა მ. სოლომონმა ხალხი. ახალ სკოლის „კურსმა-ჯერ შებლალა და შემდეგ ცივ სამარეში ჩაჰულა ლრმა და სასოებიანი ქართული.

არქიმანდრიტის სენაკში ვიგრძენ სულის უობლობა. ნაცნობი ინტელიგენტი, ან ისე ცოტათი მაინც განათლებული ჩემიანი არავინ იყო, რომ საუბრით წარსულსა და აწყობე გული გადაგვეყოლებია. სენაკში ბლობად შეიკრიბნენ ფალავანდიშვილები (ფრონელები

არ გევონოთ), მაგრამ რა? ამათ ქართული არ იციან, მე კიდევ ოსმალური. გულზე მოწოლილ ბოლმა-დარღს შხოლოდ სამშობლო ენით იტყვი, უცხო ენა არ უხდება.

საუბარი რომ გაჩაღდეს, საჭირო ისიცაა, რომ მომუსაიფეს შენსავით შენი დარღი გულს უსერავდეს და ულარავდეს. თუ შენი დარღი და კირი, ან აღფრთოვანება და ტრფიალი მომუსაიფეს არაფრად მიაჩნია, საუბარი „სალონურ“ უსულ-გულო ყბედობად გარდაიქცევა. ასეთს მუსაიფს ისევ ისა სჯობია, იგი დარღი გულის სილრმეში ჩაიკლა.

მეც სწორედ ასე მოვიქეცი. ფალავანდიშვილებში ერთი ახალგაზდა ბეგი ერია, ხარკოვის უნივერსიტეტის საექიმო ფაკულტეტის სტუდენტი. გავაძით უაზრო წყალწყალა ლაპარაკი, სწორედ ისეთი, როგორც აი ჩვენმა „ინსტიტუტკებმა“ იციან ავსა და კარგს ტაროსზე. ყბებსა და ტუჩებს ვაცმაცუნებდით, მაგრამ, ვგონებ, ერთმანეთისა არა გვესმოდა-რა. მე სულ იმას ვფიქრობდი: უცნაური ყოფილხარ, ჩვენო ბედო. ვინ იცის, ამ ყმაწვილის რამდენმა წინაპარმა რაოდენი სისხლი დაანთხია, რაოდენი ტანჯვა-ვაება გამოიარა ვარძისა და საქართველოს საბედნიეროდ! დღეს კი აგერ ეს სასიამოვნო სახის კაბუკი (ჯავახეთის ფალავანდიშვილები ახოვანი უზარმაზარი ტანისანი არიან), უმაღლესი სწავლა-განათლებით შემოსილი, სდგას ჩემ წინ, მიუყრებს პატივისცემით, თითქმის მოკრძალებით, რადგან ბედმა და შემთხვევამ მცირედად ცხოვრების ზედა პირზე შემასკუპა, ზაგრამ ჩემი დარღი არ ესმის, გულმწვავი სიტყვა ვერ უთქვამს და ჩემგანაც მარილიანი, მხენე და გულის მისაწვდომი პასუხი ვერ მიუღია. ვართ ისე თითქოს ახლო, მაგრამ ისე და-

შორებულნი, რომ ერთმანეთისათვის სიტყვა ვერ მიგვიწვდენია. ვხედავ, რომ მისი აზრი თავს ევლება ბაქოში თაღიევის მიერ ახლად დაარსებულს რუსულ-თათრულს სკოლას, სადაც მუსულმანთა ქალნი იზრდებიან (ფალავანდიანთ ქალნიც სწავლობენ), აზრი და ფიქრი კიდევ ვერ განშორებია ვარძიის წარსულს „დიდებას“ და დღე-ვანდელს „სილაჩრეს“, ოდეს ჩვენს „მხნე ქალებს“ ერთი საქალებო სკოლა რა არის, ისიც ვერ გაუმართავთ, რომ ქართველი ქალი „ქართულად“ გაზარდონ. ერთის სისხლისა და ხორცისანი ვართ მე და ეს კაბუკი, მაგრამ შეხეთ მუხთალ ბედისა, რანაირად დაგვაშორა ერთმანეთი! ნეტა დაიბადება ჩვენში ისეთი გენიოსი, რომელმაც შესძლოს გასდოს ჩვენ შორის შემაერთებელი ხიდი? სწორედ უხილავს, მაგრამ ჩაუქრობელს ლამპარს აანთებს ყოველი ქართველის გულში ის „დიდებული“. ხუროთ-მოძლვარი, ვინც შეიძლებს ისეთი ხიდის აშენებას, რომელზედაც შეეძლოთ სიარული ერთად, ძმურად ერთის ეროვნულ საქმისათვის ტომით და სისხლით ქართველებს, ხოლო სარწმუნოებით სხვა და სხვას.

თორემ, აბა, რასა ჰგავს ესა? რამოდენა ქართველს უყო პირი სარწმუნოებამ „ჩვენ დამლუპველს ოსმალე-თისექნი“ ისევ მომაგონდა პოეტი. ქართველი ერის გულთა მხილავნი სწორედ ესენი არიან, ისე მკაფიოდ და სიტყვის მოკრით აღნუსხავენ ხოლმე მის ჭირსა და ტრფიალს, ზოგი ლექსით, ზოგი კიდევ პროზით. აბა მოისმინეთ, რა სევდა მოსწოლია პოეტს, ქართველი იანი-ჩარი რიმ უხილავს.

აგერ რაზმიდან ისკუპა ყარაბაღულმა მერანმა, შორსა გაჭიანტა თრთოლით ხმა მისმა რაზტისა ელერამა... რიპერის, მიპერინავს, მიკერავს, უკან მისდევს მტვრისა ბუჭი,

მასზედ ჰათის ივერიელი ჭაბუკი ვინმე ჩაუქი.  
აგერ უეცრად რაღაცამ ჰაერში დაიკრიალა,  
თურმე მან თოფი თავისი შეაგდო, შეატრიალა,  
მერე ლამაზად ხან მარცხნივ, ხან მარჯვნივ გადმოწვებოდა,  
ხან ცხენიდანა ჰეტებოდა, ხან ზედვე შეპტრინდებოდა.  
ჰეტენოდა იგი ჭაბუკი ცხენზედა ვით ალვა რგული,  
მაგრამ მე მის მცერეტელს ნალვლით ამერია სული გული...  
კასთვეი, თუ ვისოთვის შენ კისკასობ, ვისოთვის იჩენ სიმარდესა?  
შენი რაა, რომ ამშვენებ შენ დამღუპეელს ოსმალეთსა?  
შენს სიმარდეს, სიჩაუქეს ქართლი შენი არ დაჰყურებს,  
მეფე შენი თავის ქებით ჭაბუკს გულს არ გიხალისებს!..

ი. ჭავჭავაძე.

ლამის თორმეტი საათი იქნებოდა, სენაკში რომ შე-  
მობრძანდა მამა არქიმანდრიტი. ბეგები დიდის თავაზით—  
მოწიწებით ფეხზე წამოუდგნენ, მიეგებნენ მოკრძალებით  
და ოსმალურად სალამი უძლვნეს. მისალმების შემდეგ  
მიართვეს ძლვენი, ხილი და წავიდნენ ბინაზედ ლამის  
სათევად. რაღა მოხსენება გინდათ, რომ ბინა გამოქვა-  
ბულ სენაკში ჰქონდათ. ზედი-ზედ ძილმა გამოქვაბულ  
კლდეში უნებლიერ მომაგონა ქრისტიანობის პირველი  
დრო. ქრისტე გამოქვაბულ კლდეში დაიბადა; პირველი  
ქრისტიანენი გამოქვაბულებში იკრიბებოდნენ სალოცა-  
ვად და ღვთის სადიდებლად. მაშასადამე, ნათელი ქრის-  
ტესი და ის შესანიშნავი უმაღლესი საქრისტიანო ზნეო-  
ბა, რომელსაც „ქრისტეანობას“ ვეძახით, ქვეყანას გა-  
მოქვაბულიდან მოევლინა. ამ გვარად ვამოქვაბულს ქრის-  
ტეანობასთან დიდი კავშირი აქვს. ჩვენც, ქართველები  
ძალიან ადრე გავხდით მონაწილენი საქრისტეანო სწავლა-  
მოძღვრებისა. ეს კავშირი ხომ არაა მიზეზი, რომ კე-  
თილ-მორწმუნე მეფენი, მამა-შვილი, გიორგი და თამარ,  
დიდის გულ-მოდგინებით შესდგომიან კლდის გამოქვაბ-

ვას, ეკლესიისა და სენაკების აშენებას? თუ ეს მოსაზრება ცოტათაც არის სიმართლეს არაა მოკლებული, მაშინ აშკარა ხდება, რომ ვარძია გამოუქვაბავთ ზეციურის მოძღვრების და საქრისტეანო სწავლის განსამტკიცებლად და გასავრცელებლად. ისიც უკვეველია, რომ წარსულში ვარძიას დიდი მნიშვნელობა ექმნებოდა ქრისტიანობის, ჯერ გავრცელებაში და შემდეგ მის მტკიცე შენახვაში. ხოლო ამ უამად აი რაა საფიქრებელი. ერთად ერთი გუშაგი ვარძიისა ლრმად მოხუცებული ბერია, რომელიც, უფალმა დიდხანს აცოცხლოს, მაგრამ ბუნების კანონს და ლვთის განგებას უნდა დამორჩილდეს წიალსა შინა აბრაამისასა სამუდამო განსასვენებლად. მაშინ ვარძიის გამოქვაბულნი სამუდამოდ შეიკვრენ პირსა და მოგვეძობა გამოქვაბულიდან მოვლენილი ნათელი ქრისტესი, სწორედ ისე, როგორც მოგვაჟლდა ნათელი და ნუგეში. ზარზმისა, კულესი, კუმურდოსი, წყაროს-თავისა და სხვანი.

იმედი მაქვს, რომ მკითხველი ადვილად მიხვდება. ჩემ ფიქრთა დენას და მიმიხვდება, რომ ამ საუბრის დროს ქრისტეანობა და ეროვნობა მჭიდროდა მაქვს შეკავშირებული და განუყრელი. ძველადაც ასე იყო, დღესაც ასეა მესხეთ-ჯავახეთში. ქართველი სინონიმია ქრისტეანობისა. თუ ვარძიას უკანასკნელი დარაჯი და ჭირისუფალი მამა სიმონ მოაკლდა, მაშინვე ამ უამად უხილავი მტერი მოგვტაცებს გამოქვაბულს და, მაშასადამე, უკანასკნელი სიმბოლო ჩვენის ეროვნებისა და მასთან შესისხლხორცებულ ქრისტეანობისა გაჰქრება ამ კუთხეში.

მწარე ფიქრებით შეწუხებულმა გულწრფელად ვინატრე: ბარემ ჩამოინგრეს ეს უზარ-მაზარი კლდე, ლორ-ლოთა და ქვით ამოავსოს გამოკვეთილი სენაკი, სამუდა-

შოდ დამარხოს წარსული ჩვენი დიდება თვის ნანგრევთა შორის, თორემ, როგორც ვხედავ, უთვისტომო მტერი თვალგაქუეტილი თავს დაგვჩხავის და მალე დაეპატრონება უპატრონო ვარძიას და ისედაც დაავადებულს გულს უფრო ძრიელ დაავადებს. განა არა სჯობს, დაინგრეს ვარძია, ვიდრე სხვას დარჩეს? თუ ნათელი და კეშმარიტება, გამოქვაბულიდან აღმოხდილი, მოგვესპო, ბარემ თვით გამოქვაბულიც, ეს უტყვი მოწამე წარსულისა და სიმბოლო ჩვენის ეროვნება-ქრისტეანობისა, გაჭქრეს ვითა სიზმარი ლამისა?

დაუსრულებელი არა არის-რა ქვეყანაზედ. ჩემს მწარე ფიქრებსაც ბოლო მოელო, ამ უამაღ მაინც. შეუღამეს აღარა უკლდა-რა, მამა არქიმანდრიტის თანამოსამსახურე მოძღვარნი დაბინავებას აპირებდნენ, თვით არქიმანდრიტი კარგა ხანი იყო, რაც გამოგვემშვიდობა და წავიდა სენაკს მოსასვენებლად. ვახ მამი უნებებია. მეც ვეპირებოდი თვალის მოტყუებას. უცებ შემომესმა ტკბილი და სასიამოვნო წმინდა ქართლური სიმღერა. გამიკვირდა, ამ მიყრუებულ ხეობაში, არდაგანის ოლქის სამზღვარზე, სადაც ქართულის სახსენებელი ლამის ამოვარდეს, რა უნდა ჩვენებურს სუფრულს? მერე რა სიმღერა! ხომ იცით დღევანდელი ლხინი ქართლ-კახეთის დღეობებში, ადამიანს აღარ გაევლება იქა. გალეშილი ლოთი ბიჭები დაეხეტებიან უგზო-უკვლოდ არღნის საზიზდარი ჰყვიტინით, მღრღნიან ხრინწიან, ჩახლეწილ, მამლაყინ-წურ ხმით კინტოურ სიმღერებს უშვერის და უაზრო სიტყვებით, ჯამბაზურად - იპრანჭებიან და იგრიხებიან, ბუქნაობენ და ვირულად ტლინკებს ისვრიან. არა, ასეთი არ გახლდა, ჩემ სენაკამდის სიმღერაშ რომ მოაღწია. იგრიყონა დარბაისლური, სევდა-ნალვლიანი და თან ძლიერი. სწო-

რედ ასე მლეროდნენ ამ ოცდა ათის წლის წინად დიდი და  
პატარა, თავადი თუ გლეხი, მღვდელი და ერი. ეშმაკმა  
და ტარტაროზმა წაილოს ეს უკულმართი დრო! სიმღე-  
რისა და ლხინის შნო და ლაზათიც კი დაგვეეკარგა.

საოცრად იმოქმედა ჩემზედ საჭმობლო სიმღერამ.  
„უცხოთაც“ შორის გადაკარგულს ხშირად ემართება ესა.  
გულმა აღარ მომითმინა, ვეღარ გავძელ ჩამობნელებულ  
სენაკში და წაველ მომღერალთა დასათვალიერებლად-  
შუალამისას მათი მოძებნა ადვილი არ იყო. სენაკიდან  
სენაკამდე გზა ვიწროა, ბევრგან ჩახრამული, კლდე ჩამ-  
ტვრდული და ადვილად შეიძლება. გადაიჩეხო უფსკრულ-  
ში. ლეპისის მამასახლისი ჩემს ახლო იყო და იმის შემ-  
წეობით მალე მივაგენ მომღერლების სენაკს. ხუთიოდ-  
ექვსიოდე მამა-კაცი შემოსხდომიდა ლურჯ სუფრას, შავი-  
ჩოხები ეცვათ და პატარა კახური ნაბდის ქუდები ეხუ-  
რათ. მოსუფრალთა სამი დედაკაცი დასტრიალებდა თავ-  
სა, თავშალწაკრულები და მცირედად... კაბა-აწეულნი-  
ეტყობოდათ, ფუსფუსი გაეთავებინათ და მამა-კაცებს.  
გვერდზედ მოუსხდნენ. მოქეიფენი შეზარხოშებულიყვნენ  
და ბულბულივით თვითონვე სტკბებოდნენ თავიანთის-  
სიმღერით.

გზაში მამასახლისს ვსთხოვე — ჩემი ვინაობა არ გა-  
ემხილა, თორემ გულიან საუბარს დაგვიშლიდა. ამ „გა-  
დარჯულებულს“ მხარეს მთავრობის კაცი, თუნდა ეს კაცი.  
ადმინისტრაციის წევრი არ იყვეს, აგრე რიგად არ ეპიტ-  
ნავებათ.

სალამ-ქალამის შემდეგ, სენაკში რომ შეველი, ერთ-  
მანერთის ვინაობა მოვიკითხეთ. დიდ-თონელები აღმოჩნ-  
დნენ, ტფილისის მაზრიდან, ანუ ძველებურად რომ  
ვსთქვათ, საბარათიანოდან. დიდათ გაეხარდათ, როცა

შეიტყოს, რომ კოტე ყავრიშვილის ნაცნობი ვიყავი. ამ ნაცნობობამ ისე დაგვაახლოვა, თითქო განუშორებელი მეზობლები ვყოფილიყავით.

— აქ რამ გაგაჩინათ, ვარძიას როგორ მოხვედით? წუ თუ საბარათიანოდან განგებ წამოხვედით სახლობით სალოცავად?

— არა, ბატონი, განგებ იმ სიშორიდან ვინ წამოვიდოდი. ცხვარი აქ ახლოს გვიყენია, ჩალდირში, არღა-განის ოლქში. პასკევიჩმა გვიბოძა საძოვარი ადგილი და ყოველს ზაფხულს ცხვარი ამოვეიდის საბალაზოდ; რაკი ასე ახლო ვდგევართ, ვარძიას ჩამოვდივართ ხოლმე ლაშის სათევად ამ ბეღნიერს დღეს.

## IX

გენერალ-ფელდმარშალი ი. თ. პასკევიჩი მთავარ-მართველობდა საქართველოში 1827 წელს 27 მარტიდან 1831 წლის აპრილამდე. თ. ციციშვილიდან დაწყებული თ. კორონცოვამდე საქართველოს მთავარ-მართველი ეომებოდნენ თსმალეთსა და სპარსეთს „საქართველოს“ სახელით. ყირიმის თმის დროს ეს სახელი და საბაბი და-ვისა თითქმის აღარ იხსენიება, შემდეგ ხომ მისი სახსე-ნებელი სრულიად წაიხოცა და გაჰქრა. სწორედ ამ პას-კევიჩმა გამოჰველივა ხელიდან თსმალეთს მესხეთის ნაწი-ლი და დაუბრუნა საქართველოს მისი ძველი სამკვიდ-რო. ვარძიაც საქართველოს ამ სარდლის დროს შემო-უერთდა.

დიდ-თონეელებმა მიამბეს, რომ პასკევიჩმა ჩვენს მამა-პაპას უწყალობა, ეხლა რომ საძოვარი ადგილები გვი-

ჭირავსო. გაგვიგონია, რომ პასკევიჩისათვის რაღაცა დიდი სამსახური გაუწევიათ ჩვენებსაო.

ფრიად საყურადღებოა ეს მოთხოვბა. მე მეგონა, რომ ქართველი კუტივით უძრავია და თვით „რუსული მეხიც“ ვერ შეანძრევს მის დუნცხობასა-მეთქი. თონელების ისტორია კი წინააღმდეგს გვასწავებს. სჩანს, შესაძლებელი ყოფილა, ხელი რომ გაენძრია ვისმე, ან უნარი და ეროვნული წინდახედულობა გამოეჩინა, მთელი ახლად შეძენილი ნაწილი მესხეთისა, ჯავახეთი და ახალციხე, სულ ქართველობით მოგვეფინებოდა. ცოტაოდენი მართლმადიდებელნი ადგილობრივ მოიპოვებოდა, ნაწილი გამაჰმადიანებულთ ქართველობისა სიხარულით დაუბრუნდებოდა ქართველობას, რადგან სარწმუნოება გამოეცვალათ შიშისა და დევნისა გამო და ჯერ ქართველური გული არ გასცივებოდათ. მაშასადამე, ერთი ხუთასიოდე კომლი რომ მოგვეძებნა, ორთავე მაზრას დავიკერდით, მაგრამ მაგარი ის არის, რომ საქართველოს გულშემატკივარი პატრიონი არ გამოუჩნდა და ერთი შეთხელებულ კუთხისკენ არავინ გადმოასახლეს.

1829 წელს ახალციხის ოლქის უფროსად იყო დიდი ცნობილი ჩვენში ქართველი თავადიშვილი ვასილ იოსების ძე ბებუთაშვილი და, ჩემის ფიქრით, ამ ქართველ კაცის უფროსობის დროს სულ ადვილი იქნებოდა. მესხეთის შევსება ქართველებით. მაშინდელი რუსის მთავრობა ამ კეთილის განზრახვის ასრულებისათვის მარტო-სისხლის ჯვრით“ არ დააჯილდოვებდა „მამულის მოყვარე“ ქართველ მოღვაწეს, კაი ზორბა რომელისამე: გაქცეულის ბეგის მამულსაც უწყალობებდა. სწორედ სასიამოვნო იქნებოდა მთავრობისთვის ქართველთა კოლონიზაცია. რუსის მთავრობის მართვა-გამგეობის შესწავლაში

მუცხრამეტე საუკუნეში ამიერ-კავკასიასა და საქართველოში მათქმევინა აქ მოყვანილი მოსაზრება. ნურც იმაზე ამიხირდებით, რომ თ. ბებუთაშვილი, როგორც სომხის ჩამომავალი, თანაგრძნობით არ მოექიდებოდა ქართველთა კოლონიზაციას, თუ კი უნდე ამ საქმეს ითავებდა და პასკევიჩს თვალს აუხელდა. სომეხთა ტომის ქართველთა თავადიშვილებმა ყარაბაღელთა და ერევნელთა გავლენით დღეს დაიწყეს „აზგასერობა“, თორემ მაშინ, 1829 წელს, სად იყო ეს ახალი ხილი? წარსულ საუკუნის დასაწყისში დიდი და საპატიო იყო ქართველის სახელი. ვინ იფიქრებდა მაშინ, რომ ორმოც-სამოცის წლის შემდეგ ქართველის სახელი ვიგინდარების და ყვავ-ყორანთა საკორტნელად გარდაიქცეოდა!

ესეც კია სათქმელი, რომ მაშინდელის საქართველოს სოციალური წეს-წყობილება გულს დაუთუთქვდა, კიდეც რომ გამოჩენილიყო მადლიანი პატრიოტი. რუსობის დროს ჩვენებური პატრიარქალური ბატონ-ყმობა ფრთხებს ისხავდა და, „ვარდივით იფურჩქნებოდა“. ვაქცეულ ყმებს თავადები გამოუყენებლნენ ხოლმე წვრილ-ფეხა აზნაურებს და იკერდნენ, საკა კი მოასწრებდნენ, როგორც იკერენ გარეულს ცხენს ქამანდით. რომელი თავადი გაიწყვეტდა „ლუკმა პურს“ და გაუშვებდა ნება-ყოფლობით თავის მარჩენალს ყმასა?

საეკლესიო და სახასო გლეხნი? არც ამათ უჭირდათ ისე, როგორც ეხლა და ადვილად არ აიბარებოდნენ მამა-პაპეულიდგან. ჩვენ მაინც ვფიქრობთ, რომ თუმცა დაბრკოლება დიდი იქნებოდა, საქმე კეთილად დაგვირგვინდებოდა, თავი რომ ვისმე გამოედო. ოლონდ გლეხს ბლომად მამულს დაპირდი, შედავათი აღუთქვი და სად არ წავა? კარაპეტა ეპისკოპოსისთანა ან პოლკოვნიკ ლა-

ზარე იაკიმის ძის ლაზარევისთანა კაცი რომ გამოჩენილიყო ჩვენში, მაშინ პნახავდით, როგორ დაითრგუნებოდა ყოველი დაბრკოლება.

რაკი პასკევიჩმა თვით საქართველოში „მუშტარი“ ვერ იშოვნა მესხეთის დასასახლებლად, სომხები წამოიყვანა არზრუმიდან. ბ-ნ ეზოვის ცნობით, მაშინ მოსულა 14,000 ოჯახი. დაბინავდა ზოგი ქ. ახალციხესა და ახალქალაქს, ზოგი—მაზრებში, ზოგი—გუმბრსა და მის მაზრაში და ზოგიც გაიფანტა ამიერ-კავკასიაში. აი სწორედ ეს შემოხიზნული სომხობა და ჩვენსავე დარჩენილი თარაქამა-ქურთობა რეინის რგოლივით შემოევლო ვარძიას. უკვე მოგახსენეთ, რომ მხოლოდ ოთხი პატარა სოფელი: აფნია, გოგაშენი, აგარა და ზედათმოგვი ობლად შესცემის ვარძიას-მეთქი. მაშინ ნულარ გეუცხოვებათ ჩემი გაკვირვება და სიხარული, ოდეს შემომესმა ვარძიობას შორიდან მშობლიური „სუფრული“ და სიამოვნებით ამიძგერა გული.

მეორე დღეს, 15 მარიამობისთვეს, ძალიან ადრე დაიწყო ერმა დაშლა. ლვის-მშობლის დიდ ეკლესიაში შეველი და მლოცველთა ფიზიონომიას ვაკვირდებოდი. სწორედ ბევრი რამ მეუცხვა. მლოცველთა შორის ძალიან ბევრი შევამჩნიე ბერძნობა. რა ვქნა, საიდან გაჩდა ამოდენა ბერძენი აქ, ამ საშორეზე? მთელ ახალქალაქისა და ახალციხის მაზრაში მხოლოდ ერთი პატარა სოფელია, სულ 18 კომლიანი, სახელად მიქელწმინდა, ქ. ახალციხის ახლო. კიდევ გორის მაზრის ს. ციხისჯვარი, ბერძნებით დასახლებული, ცოტათი ემხრობა ვარძიას. მორჩა და გათავდა. მაშ, საიდან მოზღვავდა ამდენი ბერძნობა? კითხვა-კითხვით გავიკვლიე, რომ ბერძნები მოსულან ბორჩალოდან, წალკიდან; რატევნიდან,

ბორჯომისა და ატენის ხეობიდან (მარტო ბორჯომიდან ვაჩიძიამდე 110 ვერსია), ყარსიდან, განჯიდან, და კიდევ, ვინ იცის, საიდან. ასე გაშინჯეთ, ყურძენიც კი მოეტანათ საკურთხევლად. ეს კიდევ არაფერი: ისე გულმოლენედ ლოცულობდნენ, ისეთ დიდ კელაპტრებს ანთებდნენ, რომ სწორედ საკვირველი იყო. ეს რა ავბავია, — ვეკითხები ჩემს თავს, — რად ეტანება ასე გულმხურვალედ ეს სამშობლოს მოკლებული ერთ ვარძიას? ხომ არა ჰსურს აქ, ვარძიაში, იპოვნოს ისრაელივით გაბნეულმა ერთა თვისი რწმიდათა წმიდა“, დასდოს საფუძველი და მერმე... დაისაკუთროს? ეჭვების ბლანდების ბადეში გავები. კარგად ვიცნობ დღევანდელს „გაოსმალოებულს“ ბერძენს, რომლის ძარღვებში კლასიკურის ბერძნის სისხლი ნაკლებად სჩქეფს, უფრო კი იმ ველურ სლავიანთა ტომისაა, ბალკანეთსა და პელოპონეზს რომ შეესია. ვარძიაზე ნაკლებ არ არიან განთქმულნი საქართველოში სხვა საყდარ-მონასტერნი უფრო სამხრო მათვის, ვიდრე ვარძია, რატომ იქით არ მიიკლავენ თავსა ეს ჩვენი მეორე „პატივცემულნი სტუმარნი“, თუ მართლა მარტომდენ რელიგიური გრძნობა აგულიანებს და ალფრითოვანებს? მე ჩემად გამოცანა გამოვიცანი და თქვენი რა მოგახსენოთ. მოისმინეთ.

შესანიშნავის და სახელ-მორჭმულის აბაშეთის რაინდის აშინოვის თანამოლვაწე არქიმანდრიტ მამა პაისის დამკვიდრებამდე საფარას, „დიდებულ მესხეთის“ ამ მეორე ბურჯა, დარაჯობდა მხოლოდ ერთად-ერთი ქართველი მწირი, სახელიდ ქრისტესია. ბევრჯელ მინახავს ყმაწვილობაში ეს თავგადადებული მამულის შვილი შუაგულ ქართლში, საზრდოს მოსაგროვებლად რომ დადიოდა. რა მაფიქრებინებდა მაშინ, პატარაობისას, თუ ეს

მათხოვარა მწირი ლირსი გახდებოდა ძეგლისა და ჩემის თვალით ვნახავდი ქრისტესიას „გაპატიოსნებას“. არქი-მანდრიტი მამა პაისი რომ დაბინავდა საბოლოოდ რიცხვ-მრავალ კრებულით საფარას, სადაც მტრის მტარვალობას და უამთა ვითარებას გადარჩა ცამეტი თლილის ქვის ეკლესია, სხვათა შორის წმიდა საბასი, სადაც დახატულია ფერადის სალებავით სარგისი, სამცხეს სპასალარნი: ყვარცვა-რე, შალვა და ათაბეგი-ბექა, მანდატურთ-უხუცესი, დამ-ფუძნებელი და გამაშვენებელი ტაძრისა, — საწყალს ქრის-ტესიას, როგორც მეტ-ხორცს, აეკრიფნა გუდა-ნაბადი და აპარგულიყო. ის კი აღარ ვიცი, დაიბერტყა გულ-დამ-წვარმა მწირმა ქრისტესიამ ფეხთა თვისთაგან მტვერი და დასტოვა საფარას, თუ არა.

ბერი ქრისტესია უბერო საქმედ ვერ დარჩებოდა, როგორც თევზი უწყლოდ. თვის საყვარელს საფარას რომ განშორდა, დაიწყო თურმე ძებნა საქართველოს სხვა ნატამალისა, მალეც იპოვნა, რაღვან ქართველს დიდხანს არ მოუნდება ძებნა წარსულის ნაშთისა. ბორ-ჯომის ხეობაში გამოეძებნა ერთი გაოხრებული მონას-ტერი, შეჰქედლებოდა და დაეწყო მისი ჩვეულებრივი გამშვენიერება. სამუდამო განსვენებაც ქრისტესიას აქ უპოვნია: იგი გარდაცვლილა 30 მაისს 1892 წ.

ახალციხის ქართველობას კარგი უნებებია, რომ გა-უხსენებია ლვაწლი თვისის მოამაგე ბერისა და მცირე ძეგლი დაუდგამს: საფარას ქვის ზღუდე ადგია. ძეგლი სწორედ ილაყაფის კარწინაა. მართალია, საფარას მო-მაგე და მოჭირნახულე ღირსი იყო, რომ ზღუდეთა შო-რის აეგოთ ძეგლი და არა გარედა, მაგრამ ესეც კარგია. ალბად ახალციხელმა ქართველიაბამ შიგნით ვერ მოა-

ხერხა ძეგლის აგება, ვინაიდგან დღევანდელი ქართველი ძველებურად აღმართს ველარა. ჰენავს.

ძეგლს რუსულ-ქართული წარწერა აქვს. ქართულად ასეა: „ახალციხის ქართველთა საზოგადოებამ ნებართვით შეუფე საქართველოს ეგზარხოსისა აუგეთ ძეგლი 1893 წ. ბერს ქრისტესიას სახსოვრად მისის დაუღალავის შრომისა საფარის მონასტრისათვის. რუსულად: „Ахалцихское грузинское общество съ разрѣшенія владыки Экзарха Грузіи воздвигло памятникъ сей въ 1893 г. рясофору Христесію въ память неутомимаго труда его для Сафарскаго монастыря. Погребенъ 30 мая 1892 г.“

საფარის ქრისტესია ბერი მაინც დარაჯობდა და გუშაგობდა, წელიწადში ორჯელ-სამჯელ მაინც აანთებდა სანთელს საბას ეკლესიაში და მრგვერს მოაცლიდა ამ ტაძრის ამშენებელს ბექას, მესხეთის ამ შესანიშნავს კანონ-მდებელს, — ვარძიისთვის ბედმა ჩაირიც კი (რიასოფორი) დაიშურა.

1854 წლამდე ვარძიის გამოქვაბული მონასტერი, მისი შშვენიერი წარუხოცელ ფერადებით შემკული ეკლესია დიდებულ თამარის სურათით „ძაღლისა და ღორის“ ანაბარად ყოფილა დაგდებული. ამ წელს ოსმალეთიდან გამოქცეულა ვიღაც ბერძენი, გვარად პაპანდოპულო. როგორც მომეტებული ნაწილი ოსმალეთიდან მოსულ ბერძენთა, ეს პაპანდოპულოც ქვის მთლელი უოფილა. შემთხვევით ვარძია უნახავს და ფიქრად მოსვლია მონასტრის აღდგენა. მაშინდელ ეგზარხოს ისიდორესაგან ნებართვა აულია და საქმეს შესდგომია. ეკლესია გამოუგვია, ალაგ-ალაგ გზები შეუსწორებია, იაფ-ფასიანი კანკელი დაუდგაშს, აი სოფლის ყავრით დაბურულ ხის.

ეკლესიებში რომაა ხოლმე, იმისთანა, ერთის სიტყვით, ლვთის მშობლის დიდი ტაძარი საკურთხევლად მოუმზა-დებია.

ეურნალი „მწყემსი“, რედაქტია დეკანოზ დ. ლამ-ბაშიძისა (იხ. Древній Вардзійскій монастырь, გვ. 14) გვიამბობს, რომ ვითომ არქიეპისკოპოსს ევსევის ვარძია დაუთვალიერებია 1857 წელს და უკურთხებია პაპანდო-პულოს მიერ გამზადებული ეკლესია. კურთხევის შემდეგ მალე განუწესებიათ წინამძღვარი კრებულით. ყოვლად სამლენდელო კირიონი კი თავის შესანიშნავ მეცნიერულ გამოკვლევაში, რომელიც აშენებულია საარქივო მასა-ლასა და დოკუმენტებზე, ამბობს, რომ საქართველოს ეკლესიას განაგებდა მიტროპოლიტი ისიდორე 1844 წ. 12 ნოემბრიდან 1858 წლის 1 მარტამდე. (იხ. Крат-кій очеркъ истории грузинской церкви экзархата за XIX столѣтіе, გვ. 23). თუ მართალია, რომ ვარ-ძის დიდი ეკლესია უკურთხებიათ 1857 წელს, მაშინ ისიც მართალი იქნება. რომ იგი უკურთხებია ევსევის, კი არა, — მიტროპოლიტ ისიდორეს, რომელიც მწყემს-მთავრობდა საქართველოს ეკლესიას 1858 წელს 1 მარ-ტამდე.

პიონერობა ვარძიის განახლებისა ეკუთვნის ოსმა-ლოელ ბერძენ პაპანდოპულოს. ეს კეშმარიტი ამბავი კუშმარიტად დარჩება. „მწყემსის“ მიერ დაბეჭდილი ბრო-შურა (1—14 გვ.) სხვა ლიტერატურაც მიაწერს პაპანდო-პულოს. ლვთის მოშიში და სწორედ ნამდვილი ქრის-ტეანე იყოვთ. სული შეუშფოთდა, ასე გავერანებულ-გაოხრებული რომ იხილა საქართველოს ძველი შესანიშ-ნავი საქართველო სახსოვარი და, აღტყინებული რელი-გიურ გრძნობით, საქმეს შეუდგაო.

შორიდან პაპანდოპულოს ამბავი ისე გვეჩვენება, რომ მადლობის მეტი არა გვეთქმის-რა, საქმით კი ცოტა სხვა ელფერი ედება მის ხასიათსა და ნამოქმედარს. პაპანდოპულო იმასაც კი ვერ ეღირსა, რომ ვარძიაში და-საფლავებულიყო. სადლაც, ვარძიის გარეთ, მიუბარებიათ ცივ დედამიწისთვის პაპანდოპულოს გვამი. მთავრობას არ მოესურვა მისი „გაპატიოსნება“ და ლირსად არ ეცნო, რომ ვარძიის „განმახლებელის“ გვამი ვარძიაშივე დამარხულიყო. ნამდვილი მიზეზი ასეთის სასტიკობისა არ ვიცი, გაგონებით კი ეს გავიგონე, რომ ბატონი პაპანდოპულო ვითომც გაკრეჭილი მღვდელი ყოფილიყოს, რაღაც ბოროტებანი ჩაედინოს სამშობლოში და, რომ თავიდან აეშორებინა ლირსეული სასჯელი, საქართველოში გამოქცეულა.

ამ ოცის, ოცდა ათის წლის წინად ხშირად შეხვდებოდით რუსეთსა და საქართველოში მაწანწალა მღვდლებს, რომელნიც გულ-უბრყვილო ერში ბლომად აგროვებდნენ ხორბალსა და ფულს. ჩვეულებრივ თავს იკატუნებდნენ, ოსმალებმა დაგვარბიეს, ეკლესია დაანგრიეს, სოფელი ამოაგდეს და მრევლი გაგვიულიტესო. ან კიდევ შესაწირავს აგროვებდნენ ათონისა და იერუსალიმის ტაძარ-მონასტრებისთვის. მათს ვინაობას არავინ იძიებდა და ისინიც თამამად ჰქონდნენ უბრალო ხალხსა და მდიდარ ვაკრების კოლშვილს.

მთავრობაშ რომ გამოიკვლია შათო ვინაობა, ვინ იცის, რა არ აღმოჩნდა. ზოგი კაცის მკვლელი გამოდგა, ზოგი სათოკე ყაჩალი, ზოგი კიდევ ცრუპენტელა მატყუარა, გაიძვერა და ვერაგი. ეს კიდევ არაფერი. მართლ-მაღიდებელ მღვდლობას ირქმევდა სომეხ-გრიგორიანი და კალიგრად ვაკრობდა მდაბიო ხალხის წმინდა

რელიგიურ გრძნობით. ამისთანა ლიტფებს თვით სომხის ერმა კოხტა და მოხდენილი სახელი უწოდა, „ხაჩაგოგი“, ანუ ჯვრისპარია.—ვარძის განმახლებელი პაპან-დოპულო, ვინ იცის, ევები, ხაჩაგოგის ჯურის მოღვაწე გახლდათ.


პაპანდოპულოს მიერ აგებული კანკელი ერთი რა-ლაც უშნო, ულაზათო ნათუთხნია. აფსუს, დიდებულო ტაძარო, რომ მარტო ასეთს „შეკეთებას“ ელირსე და მერე ვისგან? მაწანწალა, ოსმალეთიდგან მოთრეულ ბერძ-ნისაგან!

კანკელის სიგრძეზე, ზედ აღსავლის, კარზე, ბერძ-ნული წარწერაა. სწორედ დიდი სირცხვილია და თავის მოჭრა, რომ თამარ დედოფლის მიერ აშენებულს ეკლე-სიაში დღეს წარწერაა გამოჭიმული ვიღაცა უთვისტომო პაპანდოპულოსი აღსანიშნავად აღბად იმ ამბისა, რომ დანგრეული ტაძარი განაახლა და კანკელი ააგო ოსმა-ლეთიდან ჩამოსულმა პაპანდოპულომ სადიდებლად ღვთი-სა, საოხად სულისა თვისისა და მისატევებლად ცოდვა-თა. ცოდვათა მიტევება რომ ეჭირვებოდა პაპანდოპუ-ლოს, ეს გარკვევით ვიხილეთ, მაგრამ მაწანწალა კაცის ცოდვათა მისატევებლად და საოხ ასპარეზად განა თა-მარის, ამ საქართველოს ღვთაების და ბრწყინვალების ემბ-ლემის, ტაძარი უნდა გახდეს? გესლიანი ირონიაა, და-ცინვა ბედისა, მაშ რა არის?

პაპანდოპულოს ჩხირკედელაობა, მისი სურვილი, რომ ვარძიაში დაკრძალულიყო, ბერძნული წარწერა კან-კელზე—გარდაქცეულა იმ ანდამატად, რომელიც იზი-დავს ბერძნობას ვარძიობას, თორემ კარელ, განჯელ და წალკელ ბერძნებს რა მოარბევინებს იმ სიშორეზედ სალოტავად? განა ცოტაა საქართველოს განთქმული

წმინდანები მათ ბინის ახლოს? ვარძიას თავისი საკუთარი  
”წმინდანიც“ კი არა ჰყავს, როგორც, მაგალითებრ, თი-  
თო-ოროლა ეკლესიას, სასწაულთ-მომქმედი ღვთის-  
შშობელი, ან სარკეს წმ. გიორგი, ილორისა და სხვა.  
ოლონდაც რომ არის, მაგრამ ეტყობათ, რომ ოხრად  
დატოვებული ქართველთაგან გამოქვაბული მონასტერი,  
სადაც უცოდვილია პაპანდოპულოს; ნიშანში ამოულიათ  
და ჰლამიან წარიტაცონ, ვინაიდგან ადვილია მისი და-  
ჩემება, და გარდაჰქმნან თვის ეროვნულ უსიწმინდედ“.

იქნება ბერძნებს იზიდავს ქვისა და ლოდის ტრუი-  
ლი? მოგეხსენებათ, რომ ბერძნებს დიდად ეხერხებათ ქვის  
და ლოდის ტრება, გამოკუთხვა, დარგვალება და გალამა-  
ზება და, რადგან ვარძია კლდეშია გამოქვაბული, იმისა-  
თვის გული აქეთ უფრო უწევთ. ქვა და ლოდი დიდის  
სიამოვნებით დაგვითმია მათვის, მაგრამ ჩვენს ისტო-  
რიულ ნაშთთან რა ხელი აქვთ? ნუ თუ ჩვენი სამღვდე-  
ლოება ისე დაძაბუნდა, ისე დაკინდა, რომ აღარ შეს-  
წევს ზნეობრივი ძალა მოსეულს ხმა-მაღლა უთხრას--  
შორს ჩვენგან, ეშმაკეულო და განვედი, კათაკმეველო-  
ვო? ალბად დაკინდა, რომ მარტო მრევლთან დავი-  
დარაბაში ამოსდის სული... ეროვნული ეკლესიის ინტე-  
რესის დაცვა და ზრუნვა სხვას ჩააბარა და თვითონ კი  
მარტოოდენ მსუქან ტაბლებისათვის ჰავიქრობს...



# სამშობლო ქვეყანა

დედა მიწის ზურგზე ბევრი ქვეყანაა და ბევრი სხვა და სხვა ტომის ხალხი სცხოვრობს. ჩვენი პატარა სამშობლო უძველესი ქვეყანაა და მისი წარსული ცხოვრება ათას წლობით ითვლება. კირი და ვარამი იმოდენა უნახავს, იმოდენი უბედურობა და ტანჯვა დასტეხია თავსა, რომ ძნელად იქნება საღმე სხვა კუთხე და ხალხი, რომ ამოდენა განსაკუდელი გამოეაროს და არ გამქრალიყოს. კირსა და ვარამთან ერთად საქართველოს კარგი და ბედნიერი დღეებიც ბევრი ჰქონია, თამამად და გაბედულად უცხოვრია, სიკეთე უთესია, გონება გაუბრწყინებია და მეზობლობაში საპატიო სახელი შეუძენია.

ასე კირნახულია ქართველი ერი წარსულში და შეუძლებელია, რომ მომავალიც ბედნიერი არა ჰქონდეს. ფრიად საქიროა მხოლოდ, რომ ვიცოდეთ, როგორ ყოფაშია დღეს ჩვენი კირნახული ქვეყანა, როგორ ცხოვრობს ქართველი კაცი და ცხოვრებისა რა საღსარი აქვს ხელში. საქიროა აგრედვე ვიცოდეთ, ვინა სცხოვრობს ჩვენ მეზობლად, სადაურები არიან და როდის დასდეს ბინა ჩვენს მიწა-წყალზე.

ბუნება საქართველოსი მრავალ ფეროვანია, ერთი კუთხის ჰავა და ნიადაგი მეორისას არა ჰგავს. არც ცხოვ-

რება გვქონია და გვაქვს ერთ-ფეროვანი. ასე გასინჯეთ, სახელიც კი ერთი არა გვაქვს. სხვა და სხვა კუთხის ქართველი ტომი თავისებურ, საკუთარ, ადგილობრივ სახელს ატარებს. ალბად ეს გარემოება დაიხვია ხელზე რუსის მთავრობამ და ქართველის ტომის კაცი სხვა და სხვა ხალხად ჩასთვალა, ვითომც მათ საერთო არა აქვთ-რაო. ჩვენ ქვეყანას საქართველოს მაგიერ „გრუზია“ უწოდეს და ჩვენ, ქართველებს, კიდევ „გრუზინები“. მეზობლებიც ასევე უკულმართად მოიქცნენ. ზოგმა ჩვენს საშობლოს „გეორგია“ უწოდა, ზოგმა „უეორეი“ და ზოგმა კიდევ „გურჯისტანი“. ამ გვარი არევ-დარევა სახელისა და ერთის ერის დანაწილება და დაწიწვნა დიდი შეცდომაა და წინააღმდეგორ როგორც მეცნიერებისა, აგრძელებისა და ქეშმარიტებისა.

არც სარწმუნოებითა ვართ ერთფეროვანნი ქართველები. არიან ისეთი ქართველები, რომელნიც ქრისტეანობას მისდევენ ბერძნულ მართლ-მადიდებლობის წესით, არიან ისეთებიც, რომელნიც ალიარებენ ქრისტეანობას კათოლიკობის წესით და ისეთებიც, რომელთაც მაჰმადიანობა უჭირავთ. მოიპოვება წჩვენში ისეთი ქართველიც, რომელიც ქრისტეს ადიდებს წმინდა გრიგოლის წესით.

სხვადასხვაობა ადგილობრივ, თემურ სახელწოდებისა; სხვადასხვაობა სარწმუნოებისა და ოჯულისა არა ნიშნავს სხვადასხვაობას ერისას. სარწმუნოება და თემური სახელები, მართალია, განსხვავდება, მაგრამ ქართველი ერი იყო და არის ერთი და განუყოფელი, თუნდა იმერელი და ქართლელი ერქვას, თუნდა გურული და კახელი, თუნდა მესხი და აჭარელი.

მაშ შევუდგეთ საქმეს და ნაწილ-ნაწილ გადავშა-

ლოთ და ვიხილოთ, თუ სად და ორგორ ცხოვრობს ქართველი კაცი. გზა და გზა მეზობლებიც მოვიხსენიოთ ხოლმე, რადგან ეგენიც დიდი ხანია ჩვენს ქვეყანას შემოეხიზნენ და ჩვენთან ეწევიან ცხოვრების უღელს და ვაპანს.

# I

## სამცხ-საათაბაგო.

დღევანდელი ახალციხის მაზრა მესხეთის, ანუ ზემო-ქართლის ერთი საუკეთესო ნაწილია. მესხეთის ამ კუთხეს, ოსმალების ბატონობის დროს (1626 – 1828 წ.), ეძახდნენ ახალციხის საფაშოს, ან ფაშალიყს. წინად, ვიდრე ოსმალონი ჩაიგდებდნენ ხელში მესხეთს, ქართველები და თვით მესხნი ეძახდნენ ამ კუთხეს „სამცხეს“. რადგან აქაურმა მთავარმა, ესე იგი მესხეთის პატრონ-ბატონ-მა ათაბაგობის წოდება დაიჩინა, „სამცხეს“ სახელს საათაბაგოც მიუმატეს და ამ გვარად გაჩნდა ოძირი სახელი. ისტორიაში მოხსენებულია კიდევ ერთი სახელი მესხეთის ამ ნაწილისა. ესაა ოძრხე. ეს იმ დროის სახელია, როდესაც საქართველო საერისთავოებად იყო დაუფლილი და აქაურ მთავარ-ერისთავს უძახდნენ ოძრახოსის მთავარს.

ახალციხის მაზრა, იგივე სამცხე-საათაბაგო, პატარა ქვეყანაა. უკირავს სულ 2333 ოთხ-კუთხი ვერსი, ანუ 486,036 დღიური (243,018 დესიატინა). აღმოსავლეთით უდევს თრიალეთის მთა, დასავლეთით აჭარისა, ჩრდილოეთით — ქართლ-იმერეთის უღელ-ტეხილი და სამხრეთით ჩალდირის მთები. ამ სამზღვართა შორის სცხოვრობს ამ უამაღ სულ 78,100 სული, ქალი და კაცი.

სამცხე-საათაბაგო მთა-გორიანი და კლდიანი ქვეყანაა, დასერილი ხეობებით და ლელე-ლრანტეებით. უფრო დიდი ხეობანი ესენია: ბორჯომისა, წნისისა და მუსხის ვიწროები, ოშორისა, ხერთვისისა, ურავლისა, ფოცხოვისა და ჯაყის-წყლისა, ქვაბლიანისა და აბასთუმნისა. ბლომადაა წყარონი და მდინარენი, დიდი და ჩქარად მომდინარენი. დიდი მდინარე მტკვარი თითქმის შუაზე ჰყოფს სამცხეს და ძალიან ჩქარა მოდის. ხერთვისისა და ბორჯომის ვიწროებში ისე ჰქონდეს, როგორც თერგი, ან რიონი რაჭაში. მშვენიერი და სამოსანახავია წყალდიღობას ჯაგარ-აყრილი, აზირთებული მტკვარი. პოეტ ნ. ბარათაშვილს აქ თუმ ენახა მჩქეფარე მტკვარი, „მოდუდუნეს“ აღარ დაუძახებდა.

მტკვარს გარდა შემდეგი მოზრდილი მდინარენა საათაბაგოში: ფოცხოვის-წყალი, ჯაყის-წყალი, ურავლისა, ქვაბლიანისა, აბასთუმნისა და წნისისა. მთის მდინარენი სავსეა კალმახით, იცის აგრედვე ციმორა და მურწა. შემოდგომა-ზამთარს მტკვარზე აკეთებენ ოჩებს და ბლომად იქრენ თევზს. აქაური ოჩების თევზი ისევე გემრიელია, როგორც გორისა.

აქაური წყარონი ტკბილია, მშვენიერი და კარგნი.

ზამთარი ადგილ-ადგილ ცივი და დიდ თოვლიანია; ადგილ-ადგილ კი ფრიად თბილი და ზაფხულს შეზავებული. ჰავა ჯანმრთელობისთვის მარგებელია. რადგან აქ კაობები და დაგუბებული წყალი არ მოიძებნება, ამიტომც არ იცის ციებ-ცხელება, როგორც სამეგრელოს და ზღვის-პირის აფხაზეთმა.

ველ-მინდორი სამცხე-საათაბაგოს ძრიელ ცოტა აქცს. ან კი საიდან იქნება აქ გაშლილი მინდორი, როდესაც მთელი ეს კუთხე მოფენილია მოსაზღვრე მთა-გრეხილთა

ტოტებით \*). ქართლ-იმერეთის უღელ-ტეხნიკზე, რო-  
მელსაც ეძახიან აგრედვე ვახტანგის მთას, ან სურაშის  
ქედს, აჭარისა და არსიანის მთის მწვერვალებზე ზაფხუ-  
ლობითაც არ იღევა თოვლი. მხოლოდ მყათათვის გა-  
სულს დნება ამ მაღლობებზე ძველი თოვლი. მარიამო-  
ბისთვის გასულს, ან ენკენისთვის დასაწყისში ხელ-ახლა  
მოდის ახალი თოვლი და თეთრ ბოხოხა ქუდივით გა-  
დაეფარება ხოლმე მესხეთის ამ ნაწილს.

სამკურნალო წყლებითაც მდიდარია სამცე-საათაბა-  
გო. განკქმულია უფრო აბასთუმნის წყალი, პლატესი,  
ურავლისა და ასპინძისა. აბასთუმნის სამკურნალო წყალს.  
ასე აგვიწერს ბატონიშვილი ვახუშტი \*\*): მთის კალთას  
გამომდინარებს ფრიად დიდი და ცხელი წყარო, მდუღა-  
რის მზგავსი. კლდეზე აშენებულია აბანო და ბანაობენ  
მრავალნი, რადგან არჩენს ქარით დახუთვილსა, მუწუ-  
სა და ბუგრსა, მკურნალთაგან ძნელად საკურნებელსა.

სამცე-საათაბაგო განკქმული იყო ძველად ბუნებრ-  
სიუხვით და ნაყოფიერებით. მრავალი ჯურის ხილი ხა-  
რობდა და მოდიოდა ყოველნაირი მარცვალი. მრავალი  
იყო ვენახი, ბალი და სავარდე.

დღეს, ევროპაშიც არ მეგულება, გარდა ბოლგარე-  
თისა, ვარდის ბალები, ანუ სავარდენი. ეტყობა, ჩვენს  
წინაპრებს დიდად ჰყვარებიათ ვარდი, რომ ვარდის ბა-

\* ) ლეპილის ველ-მინდორი, ვარძიის შესანიშნავ მონასტერს.  
რომ თავს დაჰყურებს, უფრო ჯავახეთს წააგავს და მთავოობამ  
ტყუილად მიაკერა იგი ახალციხეს. ლეპილი უტყეო და ბოტიტვ-  
ლებულია, როგორც ჯავახეთი.

\*\*) ეს ის ისტორიკოსი და გეოგრაფია, რომელმაც დაგვიტო-  
ვა შესანიშნავი წიგნი: აღწერა საქართველოისა. წიგნი დაუსრუ-  
ლებია ვახუშტს 1745 წ. რუსეთს, საღაც გადახვეწილი იყო.

ლები უშენებიათ, აი სწორედ ისე, როგორც იაპონელს უყვარს თითქმის გაგიუებით ვარდ-ყვავილი. უეპელია, სავარდეებს მარტო სასიამოვნოდ არ გაიჩენდა მესხი და სარგებლობასაც ნახავდა. ვარდის ფოთლიდან ზეთა ჰედიან და სამურნალოდ ხმარობდნ. ვარდის ზეთი ძალიან ძვირად იყიდება. რა ტურფა და მომხიბლავი იქნებოდა მაშინდელი მესხეთი მაისის თვეს, შემკული ვენახ-ბალებით და სავარდეებით! დღეს აღარც ვენახებია, აღარც სავარდენი. ამბობენ, ვაზი ველარ ხეირობსო, სუსხიანი ზამთარი სძრავს ვაზს და ნაყოფი აღარ მოაქვსო. უწინ რომ ვენახები ბლომად ყოფილა, იქიდანა სჩანს, რომ ხშირად პოულობენ მიწაში ჩაფლულ ღვინის ქვევრებს. მე თვითონ მინახავს 1891 წ. მუსხისა და ტოპის ძირობებში, მტკერის პირას, გამხმარ ვაზის ჯირკები. ერთობა ვენახები გადაშენებულა ამ უკანასკნელ ოცდა ათის წლის განმავლობაში. მოელ სამცხე-საათაბაგოს ეხლა აღარც ერთი ვენახი აღარაა და ვისაც ყურძნით პირის გასველება ჰსურს, უნდა იყიდოს აჭარიდან, ან ქალაქიდან მოტანილი. ხილის ბალები კი ბლომალაა და კარგი და გემრიელი ხილიცაა, განსაკუთრებით ვაშლი. აქაური საუკეთესო ჯიშის ვაშლი, უშავ-ალმასაც, ან ბეფის საკადრის ვაშლს რომ ეძახიან, განთქმულია მთელ საქართველოში და თვით რტსეთშიც. საღაც ბლომად გააქვთ გასასყიდად.

ტყითაც მდიდარია სამცხე-საათაბაგო. ბევრგან, როგორც საზოგადოდ საქართველოში, უგუნურად ექცევიან ქვეყნის მშვენება ტყეს და უწყალოდ სჩეხავენ, მაგრაც ჯერ-ჯერობით მაინც საკმარისადაა საშენი და საწვავე ტყე. მთა და მთის ტოტები შემოსილია ტყით, განსაკუთრებით ქვაბლიანისა და აბასთუმნის ხეობანი. შენა-

ხულია უფრო ის ტყეები, რომელიც ხაზინას ეკუთვნის. ხაზინა უფრთხილდება და წესითა და რიგით სჩეხავს, ისე რომ ტყე არ დაილიოს. ორიოდე მამულის პატრონის გარდა, კერძო მემამულენი უწყალოდ ექცევიან ტყეს, ანადგურებენ და იმას აღარ დაგიდევენ, რომ უტყეო ქვეყანა უდაბნოს დაემგზავსება, სადაც ცხოვრება და წარმატება შეუძლებელია. განსაკუთრებით კარგადაა შენახული ტყე მთის მიუვალ აღილებში. აქ შეგხვდებათ ნაძვისა და ფიჭვის დიდრონ-დიდრონი ხეები, რომელსაც ათხ არშინიანი საბელი ვერა სწვდება, ისე სქელია ზოგიერთა ხე. სულ ცოტა, ასეთი სქელი და დიდ-ტანიანი ხე იქნება სამას-ოთხასი წლისა, მაშასადამე ამოსული იმ დროს, როცა სამცხეს პატრონობდა და უვლიდა ათაბაგი და ამ განათლებულ და ღონიერ ქვეყანას ჯერ არ ეხილა არც ასმალოსა და არც რუსეთის მართვა-გამგება.

სამცხე-საათაბაგო მდიდარია ფრინველითაც. იცის აგრედვე ნადირი და გარეული ფუტკარი. მეფუტკრეობას მისდევენ ბესხნი, მაგრამ უხალისოდ, თუმცა თაფლი ტკბილი და გემრიელია.

უწინ, ვიდრე ასმალონი დაიკერდნენ მესხეთს, აქაური მკვიდრი, ქალი და კაცი, ყოფილა ნელად და ენა-ტკბილად მოუბარი, ტანკვანი, მხნე, მშვენიერი და ცოდნა-ხელოვნების მოყვარე. შემდეგ ქრისტეანობა მაჰმადიანობაზე რომ შეუცვლიათ, მესხებს ეს თვისება-ლირსებანი დაუკარგავთ.

პირველად რჯული გამოიცვალეს ათაბაგმა და თავად-აზნაურებმა. ვინც სარწმუნოებას იცვლიდა, იმას მამულ-დედულიც შერჩებოდა ხოლმე და სხვა წყალობა-საც იღებდა ასმალთა ფალიშაპისაგან, ანუ მეფისაგან.

თავად-აზნაურობის შაგიერ მისცეს ხარისხი და პატივი ბეგისა, ასე რომ, ვსოდეთ წინად თუ დიასამიძე თავადი იყო, ოსმალოთა ბატონობის დროს გახდა ბეგი დიასა-მიძე. ეს გვარი ეხლა ამოწყვეტილია, მაგრამ სხვა ქართველ კეთილშობილთა გვარები ბლომადაა დარჩენილი.

შემდეგში თავად-აზნაურობას გაჰყვა გლეხ-კაცობა და თუმცა კარგა ხანს ჯიუტობდა და ქრისტეანობას არა ღალატობდა, მაგრამ ძალატანებას და გადამეტებულ ხარჯს ვეღარ გაუძლო და ახალი რჯული მიიღო. რჯულის გამოცვლას თან მოჰყვა ზნეხასიათის გამოცვლა, ჩვეულებისა და ტანისამოსისა. ამდენ ცვლილებასთან შერეული თაორულ-ოსმალური ენაც შეითვისეს, ასე რომ თუ ძველად, ოსმალების მოსვლამდე, მესხი სავსებით წააგავდა ქართლელსა, შემდეგ, ამოდენა ცვლილების წყალობით, ასეთი მზგავსება დაიკარგა. რაც უნდა იყვეს, გაოსმალებული და გამაჭმადიანებული მესხი მაინც ძალიანა ჰგავს ქართლელსა და კახელს. საკმარისია მცირედად დააკვირდე აქაურ ჩალმოსან მაჭმადიანს, და მაშინვე მიხვდები, რომ იგი ქართველია და არა ოსმალო. ზოგი კი პირწავარდნილი ქართლელია გარეგნობით და სახით. შეცვლა სახისა და გამომეტყველებისა, უეჭველია, იმითი აიხსნება, რომ რამოდენიმე ოსმალო და თაოარი, ქალი და კაცი დაბინავდა სამცხე-საათაბაგოს, დაუნაოესავდა მკვიდრსა და ამ გვარად მოხდებოდა სისხლის შერევა.

სამცხე-საათაბაგომ თითქმის სამასი წელიწადი იცხოვრა ათაბაგების ხელში დამოუკიდებლად და საქართველოს მეფეებს არ ემორჩილებოდა. ჰქონდა მხოლოდ მეზობლური კავშირი და მისვლა-მოსვლა დანარჩენ ქართველობასთან. პოლიტიკურად დიდად გაძლიერდა საათაბა-

ბაგო, როს გამო ათაბაგებს ამაყად ეჭირათ თავი. ეს ძლიერებაა მიზეზი, რომ ათაბაგებმა მოინდომეს საკუთა- რის კათალიკოზის ყოლა და აღმოსავლეთ ბერძენ პატ- რიარქების ნებართვით კიდეც დააწესეს აწყურში საკათ- ლიკოზო კათედრა, რომელსაც უნდა დამორჩილებოდა სრულიად ზემო-ქართლის სამღვდელოება. აღმოსავლე- თის პატრიარქებს არ ესიამოვნებოდათ სიძლიერე სრუ- ლიად საქართველოს კათალიკოზისა, მცხეთაში რომ ჰქონდა კათედრა, და ამის გამო ხელს უმართავდნენ აწყურის მთავარ-ეპისკოპოზს, განდგომილიყო მცხეთის კათედრიდან და მის ნება-დაურთველად ემართა ზემო- ქართლის ეპარქია. მაგრამ ათაბაგების, აწყურის და აღ- მოსავლეთ ბერძენ პატრიარქთა მეცადინეობამ ფუჭად და ამაოდ ჩაიარა. სიმართლისა და საეკლესიო კანონების წინააღმდეგი იყო ასეთი სურვილი და მეცადინეობა და ბოლოს საქმე იმითი გათავდა, რომ მესხეთის ეკლესია ძელებურად მცხეთის კათალიკოზს დამორჩილდა.

შინაური ცხოვრების განვითარება და მოქალაქობა იმ ხარისხამდე ავიდა, რომ საათაბაგომ საკუთარი კანო- ნები გაიჩინა, როგორც შეჰვერის ყოველ განათლებულ და განვითარებულ სახელმწიფოს. ასეთია კანონები ათა- ბავ ბექასი და მისის შვილის-შვილის აღბუღასი. უფრო იმითია შესანიშნავი და საყურადღებო ამ კანონების და- წერა, რომ იმ დროს ჩვენ სამშობლოს შემოესია ლანგ- თემური, წინამძღვარი მონგოლთა და ჩამდენჯერმე ააოხ- რა საქართველო.

მეჩვიდმეტე საუკუნის დასაწყისს, ასე 1626 წელს, ისმალებმა დაიკურეს საათაბაგო და ფაშობა შემოიღეს ათაბაგობის მაგიერ. დიდი ზარალი და ზიანი მოუტანა საერთოდ ჩვენს ქვეყანას და კერძოდ საათაბაგოს ისმა-

ლების ჩამოთვესლებამ და დამკვიდრებამ ზემო-ქართლში. ჯერ ერთი საქართველო სრულიად მოსწყდა განათლებულ დასავლეთ ევროპას, რადგან ოსმალო უზარ-მაზარ კედელსავით აგვეყუდა წინა, მისვლა-მოსვლა გაგვიძნელდა ევროპასთან და დავრჩით გამომწყვდებულნი, როგორც კარ-მიხეურულ გალიაში. მეორე კიდევ ისაა, რომ ოსმალონი გაუნათლებელი ხალხი იყო მაშინ; თვითონ რომ არა იკოდნენ-რა ომიანობის მეტი, ჩვენს ქვეყანას რას მოუტანდნენ. მას შემდეგ, რაც ოსმალონი გაბატონდნენ სამცხე-საათაბაგოში, სწავლა-განათლება, ხელოვნება და ვაჭრობა უკან-უკან წავიდა ამ კუთხეში. წინად რომ მესხეთს ებადებოდა შესანიშნავი მგოსნები, აი როგორც შოთა რუსთაველია, განთქმული მქადაგებელნი, ფილოსოფოსნი და სახელმწიფო მოღვაწენი და სარდალნი, ოსმალოს ბატონობის დროს ცხოვრება ისე დაღუმდა და დაქვეითდა, რომ აღარც სარდალ-მოღვაწენი, აღარც ბრძენ-ფილოსოფოსნი და აღარც მგოსან მქადაგებელნი აღარა ჩნდებოდა ამ ქვეყანაში. ქალაქი ახალციხე შეიქმნა სხვა და სხვა ავაზაკთა ბრძოების საბუდრად. აქ იქრიფებოდა მოუსვენარი ხალხი, უფრო კი დალესტრიდან ჩამოსული ლექაბა და ხანდა-ხანობით ხან ქართლს აწიოკებდნენ ახალციხიდან გამოსული ავაზაკები, ხან გურია-იმერეთს. ახალციხის ფაშები ხელს აფარებდნენ ამ ავაზაკებს და პატრონობას უწევდნენ. ბევრი ურჩი და აბეზარი კაცი ქართლ-კახეთიდან და იმერეთიდანაც გადადიოდა ახალციხეს და იქ აფარებდა თავსა. ასე მიღიოდა საქმე მთელი ორასი წელი-წადი, მოკიდებული 1626 წლიდან 1828 წლამდე. ამ წელიწადს კი საქმის გარემოება შეიცვალა.

1801 წელს საქართველოს ნაწილს, ქართლ-კახეთს,

დაეპატრონა რუსეთი. მეფე ერეკლემ და დედოფალ ეკატერინე მეორემ ხელშეკრულობა დასდეს 1783 წელს, რომლის ძალით რუსეთის მეფებმა ვალად დაიდეს და იკისრეს სამცხე-საათაბაგოს დაბრუნება საქართველოს-თვის. წარსულ საუკუნეში, 1828 წ. რუსეთის მეფეს ომი ჰქონდა ოსმალეთთან. რუსის ჯარის სარდალმა გრაფ პასკევიჩმა დაამარცხა ოსმალოს ჯარი ახალციხესთან. ჯარი ჯავახეთიდან ჩამოვიდა, დილა აღრიან გასტობა ზოგარი სოფელ ქვათახევთან, შეებრძოლა ქოსა-მაჭომედ და მუსტაფა ფაშებს და წართვა ოთხი გამაგრებული ბანაკი. ეს იყო 9 აგვისტოს. ზედ მირიამობა დღეს, 15 აგვისტოს, იერიშით აიღო პასკევიჩმა თვით ქალაქი. ქოსა-მაჭომედმა 16 აგვისტოს ჩააბარა პასკევიჩს თვით ციხე. ამ დროს ახალციხეში ითვლებოდა 50,000 სული გუბრეში. სწორედ ამ დროიდან საქართველოს შემოურთდა ძველი მისი საუკეთესო ნაწილი, სამცხე-საათაბაგო.

გაოსმალებულმა ქართველობამ იუკადრისა ქრისტეან რუსების ბატონობა და მათ ხელში ყოფნა. მაშინაც და დღესაც საფიქრებელად ესა ჰქონდათ და აქვა: ჯარის კაცად წაგვიყვანენ და იმისთანა საჭმელს გვაჭმევენ, რომელიც რჯულით აღკრძალული გვაქვსო. ეგება სხვა მიზეზიცაა გადასახლებისა და სამშობლოს მიტოვებისა, მაგრამ საბაბად ეს დაიხვიდეს ხელზე, იხუვლა მრავალმა მათგანმა და ოსმალეთს გადიხვეწა. საზოგადოდ ბინის მოშლა და ოჯახის დაქცევა აღვილი არაა, მდიდარსაც უკირს ახალი ბინის შოვნა, ახალი სახლ-კარის გამართვა და ოჯახის აშენება და აბა ლარიბ გლეხ-კაცობას რა მოუვიდოდა?

რუსის მთავრობა ხელს არ უშლიდა გადასახლებას.

ვისაც არ სურდა აქ დარჩენა, გზა მშვიდობისა უთხრეს. აიკრიფეთ გუდა-ნაბადი და საცა გნებავთ, იქ წადითო, ხოლო ვადად ორ წელიწადს გინიშნავთო. გადასახლების მსურველებმა ოხრად მიჰყიდ-მოჰყიდეს ოჯახის ნივთეულობა, საქონელი, მამულ-დედული, სახლ-კარი, ბოსტან-ბალები, შეაბეს კრიალი. ურმები, ჩასხეს შიგ დედა-კაცობა და ქულფათობა და დაადგნენ ოსმალეთის გზას. წასული მესხები სახლდებოლნენ მცირე აზის და ევროპის ოსმალეთში, ბევრი გაწყდა გზაში სიმშილ-სიცივისაგან. ვინც მიაღწია ოსმალეთს უვნებლად, იმანაც ვერ იხეირა. ათასი გაჭირვება და ვაივაგლახი ნახა ახალ ადგილზე, ვერ უძლებდა თავზე დატეხილ მრავალ უბედურობას, სნეულდებოდა და წუთი-სოფელს ესალმებოდა. მცირე აზია ერთ უშველებელ, ცივ და ყრუ სამარედ გადაიქცა ჩვენის ლვიძლის ძმებისათვის. ვინც ცოცხალი დარჩა, ვერც ისა ხეირობდა. სამშობლოს დარდი და სევდა კვალივით აწვებოდა, უცხოობას ველარ იჭანდა, უკან ბრუნდებოდა, მაგრამ ვაი ამ დაბრუნებას! სახლ-კარი დაქცეული, მამული გაყიდული უხვდებოდა შინა. ბინას ველარ სდებდა და დახეტიალობდა ასე უპატრონოდ, ეულად და ბოგანოდ. ხელის შემწყობი, ნუგეშის მცემელი და კირისა და ლხინის მოზიარე არავინ იყო! მსწავლული მოგზაურები გვიამბობენ, რომ მცირე აზია და ევროპის ოსმალეთი მოფენილია მესხეთიდან გადასახლებულთა სოფლებით, სადაც დღესაც თურმე გაისმის წერიალა ქართული ენა.

გადასახლებულთა მწარე ბედმა კუუა ვერ ასწავლა ჩვენში დარჩენილ გამაპმადიანებულ მესხებს, გული ეთანალრებათ და სულ სტამბოლისკენ უჭირავთ თვალი. ასე ჰერინიათ, იქ სამოთხეა და ნაზუქის სულით დაიბნიდე-

ბიან. გახიზვნა ოსმალეთს ჯერაც არ შეჩერებულა. ბევრი თჯახი დღესაც იყრება და მიღის მცირე აზის, ან ევროპის ოსმალეთს. მე ჩემის თვალით მინახავს ბაწარ-ალებით მიმავალი ბათუმისაკენ ფურგუნები, დატვირ-თულნი გადასახლებულთა ბარგი-ბარხანით და ცოლ-შვილით. ქვას გული უნდა ჰქონდეს ადამიანს, დაინახოს ეს სურათი და არ შესწუხდეს უზომოდ. სამშობლო ქვეყ-ნის დაქცევა-დარბევა, ხალხით დაცლა დიდი ცოდვაა და ვინც ხელს უწყობს ამ საცოდავების აბარგვას და გახიზ-ვნას, ის სწორედ მტერია ქვეყნისა, პირშავი და შეჩვე-ნებული.

სამცხე-საათაბაგო დაიჭირა გრაფმა პასკევიჩმა 1828 წელს. აქაურ მკვიდრს მესხის მაგიერ თათარი დაარქვა მთავრობამ. ეს უდიდესი შეცდომაა და წინააღმდეგი როგორც ბუნებისა, აგრედვე მეცნიერებისა. კაცმა რომ რჯული გამოიცვალოს, განა ხალხოსნობას და ეროვნო-ბას დაჭარგავს ძველ რჯულთან ერთად? რჯული, რწმე-ნა, სვინილისის საქმეა, ეროვნობა-ხალხოსნობასთან რა საქმე აქვს? კათოლიკეთა სარწმუნოებას (ჩვენში ფრან-გობას ეძახიან) მისდევენ ფრანგები, ინგლისელები, გერ-მანელები, პოლონელები, ესპანელები, ზოგი ქართვე-ლები, სომხები და თვით თითო-ოროლა რუსი და განა ყველა ესენი, რაკი ერთი რჯული აქვთ, ლათინებად და რომაელებად გადაიქცევიან? თავის დღეშიც არა. ყველა მათგანი იმ ერად რჩება, რომელსაც ეკუთვნიან. ბათუმის მხარე რომ დაიჭირეს რუსებმა 1877 წელს, კი-დევ გაიმეორეს ძველებური შეცდომა და ლვიძლ ქართ-ველებს: აქარლებს, ქობულელებს და სხვებს თარები დაარქვეს და იმათ სამშობლო ენად ოსმალური გამო-აცხადეს, თუმცა აქარლები და ქობულელნი ისევე სუფ-

თად და წმინდად ლაპარაკობენ ქართულად, როგორც  
შინა-ქართლელი და ისეთივე ქართველები არიან, რო-  
გორც ქართლელნი.

რაკი ახალი მთავრობა ასე გულცივად და უგუ-  
ლოდ მოექცა გამაჭმალიანებულ მესხებს, იმის მაგიერ-  
რომ დაეცვავებინა და გაეადვილებინა უცხო და მიუჩვე-  
ველ მთავრობის ხელში ყრაფნა, რაკი წასასვლელი გზა-  
დაულოცა, ისინიც ადგნენ და გულმრცივნეულნი, სამ-  
შობლოს დარღისაგან შეწუხებულ-დაოსებულნი, გაე-  
მართნენ ოსმალეთისკენ. დაცარიელებით არ დაცარიე-  
ლებულა მესხეთი, მაგრამ ბევრი სოფელი ვერანად გა-  
დაიქცა. წასულთა და გადახვეწილთა ნასოფლარებში  
მთავრობამ ჩააყენა აზრუმის საფაშოდან გადმოყვანილი  
სომხები. კარგა დიდი ნაწილი აზრუმელებისა დაბინავ-  
და ახალციხის — წყლის მარჯვენა ნაპირზე, პირდაპირ ძველ  
ქალაქ ახალციხისა, სწორედ იქ, სადაც ძველია იყო  
ქართველთა სოფელნი: მარდა, ურიათ მარდა, ჯანიანთ  
მარდა და მლაშის-ხევი. ამ გვარად, დაახლოებით 1830  
წელს, ქართველთა ნასოფლარებზე გაშენდა ახალი ქა-  
ლაქი, დასახლებული აზრუმელ სომხებით, რომელსაც  
ეწოდება იგივე ძველებურა სახელი ახალციხე.

თვით მაზრაში შემდეგი ნასოფლარები დაიკირეს.  
მოსულმა სომხებმა: ჭავარაქი, გოგოთ-უბანი, სასძლო,  
სხვილისი, წინუბანი და ორთავე წყრუთი, არხის-ციხე,  
წყალთბილა, ნაოხრები, დიდი და პატარა მამაჯი და  
ტამალა.

ამ გვარად ძველ მესხეთში, ანუ სამკე-საათაბაგოს  
დღეს ბინადრობს: აზრუმიდან მოსული სომხობა წმინდა-  
გრიგოლის საჩწმუნოებისა და სომებ-კათოლიკენი; ოს-  
მალეთის ბატონობის დროიდან დარჩენილი თარაქამა და.

თურქენი, ორთავე ტოში მაჰმადის სარწმუნოებას მის-  
დევს, და ქართველობა, ძველ მესხების ჩამომავალნი:  
მართლ-მადიდებელნი. კათოლიკის სარწმუნოების მიმდე-  
ვარნი და მაჰმადიანი ქართველები, ანუ გამაჰმადიანებუ-  
ლი მესხები. ამათ გარდა ბინაღრობენ სამცხე-საათაბაგოს  
ებრაელები, უფრო კი ქ. ახალციხეს, ცოტაოდენი ბერძ-  
ნები და რამდენიმე ნასალდათარი რუსი.

როგორც ზემოდ მოვიხსენიეთ, სულ ახალციხის  
მაზრაში დღეს ითვლება 78,100 სული, ქალი და კაცი.  
ამ უამად ქ. ახალციხეში ცხოვრობს 19,220 კაცი და  
ქალი. ამათში ქართველია 107 ა., რუსი—470, ბერძენი  
116, ებრაელი—2322 და სომები—15,031. მაზრაში  
ცხოვრობს: სომები განურჩევლად სარწმუნოებისა—  
6852, ბერძენი—130, ქართველი, მართლ-მადიდებელი  
და კათოლიკე 8865, ებრაელი,—218, ქურთი—2400,  
რუსი—99, თათარი—32, ახალციხეს და თურქი (ოსმალო)---  
7752.

მიაქციეთ ყურადღება უკანასკნელ ორ ციფრს.  
სწორედ ესაა უკულმართობა და შეცდომა, რომელიც  
მთავრობაში ჩაიდინა. ამოდენა ქართველობას სახელი შე-  
უცვალა და თათრად გადანათლა. განა ხერთვისელ გე-  
გიძეს, ჯაყისმანელ ნემსაძეს და გეორგაძეს თათარი  
ეოქმის? შეიძლება კანტი-კუნტად იყვეს საღმე ჩასახლე-  
ბული რაოდენიმე ტოშით და ჩამომავლობით თათარი,  
თორემ ვის გაუგონია ახალციხეს მაზრაში ამოდენი თათ-  
რები? საჭიროა რიგიანი, კეშმარიტი და მეცნიერული  
აღწერა ერისა, რომ ნამდვილად ვიცოდეთ რაოდენობა  
თითოეულის ტოშისა, მაგრამ ჯერ-ჯერობით ასეთი აღ-  
წერა არა გვაქვს. არც ოსმალოა იმდენი, რამდენსაც  
ზემოდ დასახელებული ციფრი 7752 აჩვენებს. ნამდვი-

ლი ოსმალო ძალიან ცოტაა და ბევრი-ბევრი თარაქაშა, თურქმენი, ქურთი და ოსმალო ოთხი ათასი, ან ხუთი ათასი იყვეს ახალკიხის მაზრაში, ანუ სამცე-საათაბა-გოს.

არის ერთი მეცნიერება, სტატისტიკას ეძახიან, რო-  
მელიც იკვლევს, სხვათა შორის, ხალხის რაოდენობა-  
საც. ამ მეცნიერების მადლიანი ხელი ჯერ არ მოხვედ-  
რია ჩვენს ბედისა და მოხელეთაგან დავიწყებულს სამ-  
შობლოს და ამის გამო დანამდვილებით არ ვიცით —  
რამდენი ვართ. მთავრობის მოხელეთაგან შეკრებილი  
ცნობანი უხეიროა, უაზროდ და გადარეულად შეკრები-  
ლი. მაგრამ, რას ვიზამთ, იოლად უნდა წავიდეთ იმითი, რაც  
მოიპოვება, ვიდრე ნამდვილი სტატისტიკა გაგვიჩნდება.

ქართული ენა, ეს სული და გული ყოველის ერი-  
სა, უტყუარი მოწმე კულტურისა და განათლებისა,  
შესანიშნავად განვითარებული მესხეთში, სადაც მზე და  
მთვარე პირველად იხილა დიდებულმა საერო მგოსანმა  
შოთა რუსთველმა, შევიწროებაში არა ყოფილა ოსმალ-  
თა ბატონობის დროს. ოსმალეთმა ევროპელივით ჩა-  
ტოვება არ იკოდა, — გინდა თუ არა, ჩემი ენა შეისწავ-  
ლე, ჩემ ენაზე სწერე, იკითხე და ჩემ ენაზე ილაპარა-  
კეო. ოსმალური ენა თავისით ვრცელდებოდა, ძალა დაუ-  
ტანებლივ.

ყველაზე აღრე შეითვისა ოსმალური ენა მაღალშა  
წოდებამ, ესე იგი თავად აზნაურობამ, შემდეგ ბეგები  
რომ დაერქვათ. რაც ხანი გადიოდა, ქართული ენის  
ცოდნა თანდათან სუსტდებოდა და დღეს თითქმის აღ-  
რავინ იკის. თითოთ დაითვლება იმათი სახელი და გვა-  
რი, ვინც ამ ხანად ლაპარაკობს სუფთა ქართულს. ესე-  
ნი არაან: ჰამიდ-ბეგი ავალიშვილი, რომელმაც ქართუ-

ლი შერა-კითხვაც იცის, ორიოდე თულაშვილი, ორიოდე წერეთელი, მორჩა და გათავდა. ერისთვიანთ, მანაბლიანთ, ხიდირბეგიანთ სრულებით აღარ იციან ქართული. ზოგ-ზოგი მათგანი ამტვრევს საყველპურო ქართულს, მაგრამ ასეთი ცოდნა ცოდნად არ ჩაითვლება. აქ ჩამოთვლილ ბეგებს კარგად ესმით, რომ ქართველები არიან, აღარ უარობენ და აღარა სწყინთ ქართველობა, მაგრამ უქართულობა დიდად უშლის ხელს საჭირო სულიერი კავშირი იქონიონ დანარჩენ ქართველობასთან.

გლეხ-კაცობა უფრო მძიმედ ითვისებდა ოსმალურ ენას, დედა-კაცობა ხომ, რადგან კერას არა სცილდებოდა და სულ შინ იჯდა, სრულებით არ ეტანებოდა ოსმალურს, დღესაც ბევრია იმისთანა მიყრუებული სოფელი, სადაც თუმცა მაჰმადის რჯულია გამეფებული, მაგრამ ოსმალურში ფეხი ვერ მოიკიდა მკვიდრად დედა-კაცობაში.

საოცარი ამბავია, მაგრამ შეურყეველი და კეშმარიტი ისაა, რომ ქართული ენა დაიჩაგრა რუსების მოსვლის შემდეგ სამცხე-საათაბაგოს. არის იმისთანა სოფლები, როგორც თოლერთა, უთხის-უბანი და სხვა, სადაც მოხუცებულები კიდევ ლაპარაკობენ ქართულს, ხოლო ყმაწვილყაცობა სრულებით აღარ ეტანება ქართულს. მიზეზი ისაა, რომ ქართულმა დაჰკარგა ფასი ხალხის თვალში რუსების მართვა-გამგეობის დროს, აღარაა იგი ხმარებაში სკოლაში, სასამართლოში და პოლიცია-ადმინისტრაციაში. ამიტომ ქართული ენა აღარავის ეპიტნავება, ვითარცა პატივ-აყრილი და გამოუსადეგარი ცხოვრებაში.

მესხი მაჰმადიანი სუფთად ლაპარაკობს ქართულად აწყურისა, იდუმალისა და კლდის სამამასახლისოში.

ნარევ-ნარევად სხვა დანარჩენ სამამასახლისოებშიც მოი-  
პოვება ქართულად მოლაპარაკე სოფელი, მაგრამ საერ-  
თოდ რომ ვთქვათ, თუ დროზე რიგიანი სკოლა არ მი-  
ეშველა ამ გვარ სოფლებს, ქართული ენა ძირიან-ფესვია-  
ნად ამოვარდება.

აქაური ებრაელები მტკიცედ ინახავენ ქართულ  
ენას. იგია მათი სამშობლო, ღვიძლი ენა და ამ ენა-  
ზევე აქვთ მიწერ-მოწერა. უხსოვარ დროიდან დაბინავე-  
ბულან ებრაელები ახალციხეს, ქართული იერი, ზე და  
ჩვეულება შეუთვისებიათ, და აღარ ღალატობენ არც  
ერთსა და არც მეორეს, თუმცა ორას წელიწადზე მეტს  
ქართველებთან ერთად ოსმალების ბატონობას იტან-  
დნენ. სწორედ საკვირველია მათი ასეთი სიმტკიცე. ქარ-  
თულ ენის შენახვა-პატრონობაში მესხეთის ებრაელობას  
დიდი ღვაწლი მიუძლვის და ესეთი მისი სამსახური არა-  
სოდეს არ უნდა დაგვავიწყდეს. დღევანდელ ახალციხეს  
თუ კიდევ ქართული იერი ცოტათი მაინც შერჩენილი  
აქვს, ეს ებრაელების წყალობაა. მათი ბავშვები ხარბად  
ეტანებიან ახალციხის ქართულ საქალებო სკოლას, მაგ-  
რამ სამწუხაროდ სკოლის გამგენი ხშირად უარს ეუბნე-  
ბიან ხოლმე მსურველთ უადგილობის გამო. მაინც ოცი,  
ოცდა ხუთი ებრაელი ქალი მუდამ სწავლობს ამ სკო-  
ლაში და სწავლას იძენს ქართულად.—აქაურ ებრაე-  
ლებს ჩვეულებად აქვთ იერუსალიმს წასვლა და იქ და-  
ბინავება, სიბერის უამი რომ მოაწევს. ამ ჩვეულებას უფ-  
რო შეძლებულები მისდევენ.

სოფლად გლეხეცაცობა ცხოვრობს ზოგან არეულად,  
განურჩევლად სარწმუნოებისა, ზოგან კი ერთი ტომისა  
და სარწმუნოების ერია შეჯგუფული. არის ისეთი სოფ-  
ლები, როგორც მაგალითად ვალე, სადაც ბინადრობენ

ქართველი მართლ-მადიდებელი, ქართველი კათოლიკე, სომები გრიგოლიანი და ქართველი მაჭმალიანი. შუღლი და მტრობა არავის გაუგონია. სოფელ უდეს უმრავლესობა ქართველი კათოლიკე, უმცირესობა მაჭმალის რჯულისა. ქრისტეანეთი მოძღვარი ამ სოფლისა და მაჭმალიანთა მოლლა ორთავე ჭილაშვილები არიან. გამოდის რომ სახლიკაცები აღიდებენ ღმერთსა სხვა და სხვა ენით და სხვა და სხვა წესით. ამ გვარი საქმე მეზობლობას არა შხამავს და არც უნდა მოშხამოს, რაღან რჯულისათვის კინკლაობაშ და თავში ცემაშ დიდი ხანია თქვენი ჭირი წაიღო. ამას გარდა ქართველი კაცის ბუნება ხალვათია, მოსიყვარულე და არ ეხერხება გულში ჩადება შურისა და მტრობისა. სხვა რჯულისა და ტომის კაც-საც ძმასავით ვუცქერით. სამეზობლოდ ქართველი ერი საუკეთესო ერია, რაღან სხვისი დაჩაგვრა არ იცის. თვითონ რომ ხშირად სხვას ეჩაგვრინება, ეს კი სრულებით არ ვარვა. საჭიროა თავის დაცვა და გაფრთხილება.

უნდა მოვიხსენიოთ, რომ მესხეთის ქართველი კათოლიკენი ისტორიის უკუღმართ შევლელობის გამო იძულებულნი გამხდარან, ქრისტეანობის შესანახად, სომხის ტიბიკინი მიეღოთ, ესე იგი სომხების წირვა-ლოცვის წესი და რიგი. ამის გამო წირვა-ლოცვა სომხურად აქვთ და არა ქართულად, როგორც სტამბოლში. ეს გარემოებაა მიზეზი, რომ ბევრს ქართველ კათოლიკეს სომხური გვარი და სახელი აქვს, მაგალითებრ პოლოს მათეოზოვი. არის მხოლოდ ერთი პატარა ეკლესია ძველ ახალციხეს (რაბათი), სადაც უმთავრეს ღვთის მსახურებას (მესსა) ლათინურად ასრულებენ, ხოლო ზოგიერთ წვრილმან ღეთის შსახურებას და გალობას ქართულა-

დაც, დიდი ხანია მთაცრობასთან ამ საგნის გამო მიწერ-მოწერაა გამართული, მაგრამ ჯერ ბოლო არ მოლებია ამ გაჭიანურებულ საქმეს.

დღევანდელი მესხი, გადაგვარებულ-გადაკეთებული, ხასიათით მშვიდი და წყნარია, აურზაურს ერიდება და ძნელად თუ ხმას აიმალებს, თუ მეტის მეტად სიცოცხლე არ გაუმწარა უსამართლობამ. ძველებური სიკვირცხლე, თავმოწონება, ვაჟკაცობა და სილამაზე სადღაც გამქრალა, ფერფლად და მტვრად ქცეულა. ჩაცმულობაც ულაზათოა, განსაკუთრებით ქალებისა, რომელთაც გაგიუებით უყვართ წითელ ფერის სამოსელი. საზოგადოდ დღევანდელი მესხი დაჩაგრულია, წელში მოხრილი, თავი მაღლა ვერ აულია და ყველაფრისა ეშინიან. წარსულის მოგონება, როდესაც იგიც აღამიანად ითვლებოდა და მსოფლიო ისტორიაში მონაწილეობას იღებდა, არ ახალისებს, დიდებულ და ბრწყინვალე ისტორიის ნაშთს გულგრილად უყურებს, თითქოს ეს ტურთა ხეოოვნების ნამოქმედარი მისი წინაპრების აგებული კი არაა, არამედ ვაღაც გადამთიელისა. ხალისით, სიმკვირცხლით და სიოამამით ისევ ქვაბლიანელები სჯბიან დანარჩენებს, ჩაცმა-დახურვით ესენი ძრივლ წაავავენ აჭარლებსა. იარალის ტარებაც ამათ უფრო უყვართ. დაჩაგრულობისა და სიმხდალის სენი ჯერ ისევ ბატონიშვილ ვახუშტის დროს შევპარვია მესხეთს და მას შემდეგ ხომ უფრო უმატნია ამ სენს. ბევრჯელ დავს-წრებივარ სოფლად გლეხის მუშაობას, ხვნას, თესვას. შეას, თიბვას, ლეწვას, სიმინდის თოხნას და ერთხელ არ გაშიგონია წკრიალა, იმედიანი სიმღერა, გუგუნი ვაჟკაცური, ან ტკბილი, ნაზი და სევდიანი კილო ქართლულისა. საერო, საჯარო სიმღერა სამუდამოდ გამქრალა.

ამის მაგიერ დღეობა-ქორწილებში მოისმენ სპარსულ კილოზე ერთხმიან სიმღერას, ბალა-ბალას მზგავსაა. მომღერალნი უფრო ქურთები არიან. მხოლოდ ერთხელ მოვისმინე სოფ. ოშორაში სევდიანი სიმღერა ქართველ მაჰმადიანისა ქართულადვე. მომღერალს საზი ეკირა და ამ უბრალო სამუსიკო იარალზე დამღეროდა. სამწუხა-როდ, უბის წიგნი, სადაც ლექსი მქონდა ჩაწერილი, დაიკარგა და საშუალება აღარა გაქვს იგი აქ მოვი-ყვანო.

მესხის სოფელი სასიამოვნოს არას წარმოადგენს. საშინელი ვიწროობაა სოფელში, სახლები ზედი-ზედაა მიყრილი, მომეტებულად მიწაშია ჩადგმული ხის შენობანი. ხის გაშლილი კარაპნები რომ არ ედგათ წინა, ვერც კი შეატყობთ, რომ აქ სახლებიაო. სინათლე ერდოდან ჩადის. სივიწროვის გამო სოფელში უსუფთაობაა და სიბინძურე. ნეხვი და ნაგავი ხშირად ზედ გზაზეა დაყრილი. ამ მხრივ ისევ ქვაბლიანის ხეობა სჯობიან, ხეობის ფერდობებზე კოხტად გამოიყურება ხის სახლები. აქაური მდებარეობა და მოწყობილობა სოფლებისა ძალიან წააგავს გურია-აჭარისას.

როგორც ჯავახებს, მესხებსაც უყვართ სუქანი, ერბოიანი საჭმელი. სისუქნის სიყვარული აიხსნება იმითი, რომ ჰავა გრილია და ზამთრობით ხომ კარგი ლაზათიანი სიცივეები იცის. მთა-გორებში და მთიან ტრიალ-მინდვრებზე, როგორც მაგალითად ლეპისის გაშლილი ველია, სიცივე და ყინვა ისეთი ძლიერია, რომ ნამდვილი ტეხვრაა. ეს ყრნვა-სიცივეა მიზეზი, რომ მესხები ძრიელ ეტანებიან ერბოს. უერბოოდ მწვადსაც კი არ შესწვამენ. მოხრაკულ და შემწვარ ბატყანს და ცხვარს წკურწკურით ჩამოსდის ერბოს წვეთები და ამ გვარად

შომზადებულ საჭმელს ვერ დაეკარება იმერელი. კერძოდ მე, როგორც შინა ქართლელს და ჩამომავლობით იმერელს, ხშირად მომშლია მადა და უსადილობა მიმჯობინებია მსუქან და ერბოთი გაულენთილ მოხრაკულის შექცევას.

უმთავრესი წყარო სამცხე-საათაბაგოს მკვიდრის ცხოვრებისა ხვნა-თესვაა, ბალოსნობა და საქონლის მოშენება. გარედ გასვლა და ცხოვრების შეძენა არ უყვარს მესხსა, მოუკალათნია შინა და ფათურობს თავის-თვის. ვაკრობასაც არ ეტანება. ძველად ახალციხის ვაჭარ-სოვდაგარნი ვაჭრობის უნარით იყვნენ განთქმულნი. დასავლეთ ევროპასთან და სტამბოლთან გაჩაღებული მისვლა-მოსვლა ჰქონდათ. დადიოდნენ ართვინზე და ბათუმზე. ამ გზით შემოვიდა ჯერ მესხეთს და შემდეგ დანარჩენ საქართველოში შესანიშნავი მოგზაური შარდენი. რომელმაც (მეჩვიდმეტე საუკუნის პირველი ნახევარი) ფერად-ფერადი სურათებით ასწერა მაშინდელი საქართველო. მესხების მისვლა-მოსვლას ევროპასთან ისიც უწყობდა ხელს, რომ საქართველოს ამ კუთხეში ადრე გავრცელდა ფრანგობა და ევროპა ხომ ფრანგებითაა სავსე. ჩვენებურ კათოლიკე მესხებს ნათესავები ჰყავთ სტამბოლს და ხშირად მათ სანახავად მიდი-მოდიან. ერთი მათგანი დიდ თანამდემობას ასრულებს ოსმალეთში რკინის გზაზე. ასე რომ თუ ოდესმე მგზავრობა მოგიხდეთ რკინის გზით სტამბოლიდან ქალაქ ვენაზე და კუპეში წმინდა ქართულით გამოგელაპარაკოთ ოსმალოს მოხელე, ნუ გაგიკვირდებათ, იცოდეთ რომ ეს მოხელე თქვენი სისხლი და ხორცია. ერთი საუკეთესო თანამედროვე ისტორიკოსი მღვდელი მიქაელ თამარაშვილი.

იტალიაში ოობ კონვრობს, მკვიდრი მესხია, დაბადებულ-ალზრდილი სამცხე-საათაბაგოში.

ორმოცი წლის წინად ახალციხის მაზრა ქუთაისის გუბერნიაზე იყო მიწერილი. მისვლა-მოსვლა მესხებს ქუთაისთან ჰქონდათ ზეკარის უღელ-ტეხილით. მაშინ მესხები ჩალვადრობას მისდევდნენ და მიჰქონდ-მოჰქონდათ სხვა და სხვა საქონელი. დღეს ეს ხელობა სრულიად გაჰქირდა. უკანასკნელ ომამდე (1878 წ.) ოსმალეთის სამზღვარი ზედ ეკრა ახალციხის მაზრას. ბადელას ხიდთან საბაჟოები და საყარაულოები იყო დამართული. დიდის სიმარტით და გაბედულობით შემოჰქონდათ მესხებს სამზღვარ გარეთიდან ბაჟ-გადუხდელი საქონელი და ამ ხელობით კარგ სართაში იყვნენ. ეს ხელობაც გაჰქირდა, რადგან ჩვენი სახელმწიფო სამზღვარი ოსმალეთთან ძალიან დაგვიშორდა.

ამ ბოლოს დროს მესხეთში თავი იჩინა ახალმა ხელობამ. ესაა მეტივეობა. ეს ხელობა შეიტანეს ხეობის (ბორჯომისა) ქართველებმა. მეტივეობენ აგრედვე სოფელ მეტებისა და გომის მცხოვრებნი შინა ქართლიდან. შესხებში უფრო ეტანებიან მეტივეობას ქართველი მაჰმადიანები. მეტივეობა გაჩაღდა აწყურისა და იდუმალის სამამასახლისოებში და ქვაბლიანში.

რადგან სამცხე-საათაბაგო მთა-გორიანია და ველ-შინდორი ცოტაა, ამიტომ სახნავი მამული ნაკლები აქვს მესხსა. მთის კალთებზე და ფერდობებზე უხეირო მოსავალი იცის, ძირობებში და ხევის პირებზე კარგი. ძირობის ყანები ბევრი ირწყვის მთის ნაკადულებით. საკუთარი მოსავალი ძლივ-ძლივობით ჰყოფნის მკვიდრსა, გარედ გასაყიდად ვერას გაიტანს ნაკლებობის გამო. მიწის ნიადაგი თიხიანია, კირნარევი. ასეთი ნიადაგი ხელს

უწყობს ბალოსნობას და ხილის მოყვანას, რომელსაც  
ხალისით მისდევენ. ხეხილის გაშენება-მოვლაში მესხები  
დიდ მუყაითობას იჩენენ და კარგ ოსტატებად ითვლე-  
ბიან. ხვნა-თესვისა და ბალოსნობის გარდა საქონლის  
მოშენებასაც მისდევენ, უფრო კი იქ, სადაც საზაფხულო  
იალაღები მოიპოვება. საქონლის ჯიში უხეირო და  
წვრილია. ტყიანსა და ჩირგვ-ძეძვიან ადგილებში თხებს  
ინახავენ. საქონლის ჯოგები თვით მესხებს არა ჰყავთ.  
ზაფხულობით მთის საძოვრებზე მეგრელებს ამოუდით  
სხვილფეხი საქონელი.

მესხეთს რომ დაეპატრონენ ოსმალები, ბატონ-  
ყმობა არ შემოუტანიათ, რადგან მუსულმანების ქვეყ-  
ნებში არსადაა წესად მიღებული ბატონ-ყმობა. ადამიანი  
პირადად თავისუფალია, ხოლო რაც მამულია სახელმწი-  
ფოში, ეკუთვნის მეფეს, ანუ სულთანს, ფადიშავს. სა-  
ხელმწიფოს სასარგებლოდ გლეხ-კაცი იხდის მიწის მო-  
სავლის განსაზღვრულ ნაწილს, უფრო კი მეათედს.

ოსმალეთის მთავრობა ამ შემოსავალს ხან სავსე-  
ბით, ხან ნაწილს, მოხელეებს უთმობდა ჯამაგირის მა-  
გიერად და ამასთანავე დაავალებდა ხოლმე, ქვეყანას  
უპატრონე, მოუარე, იზრუნე და გაუფრთხილდი, რომ  
მტერმა არ წაახდინოს მობარებული კუთხეო. ერთი  
სიტყვით მაშინდელი მოხელე ჯამაგირის მაგიერ მიწის  
შემოსავალს ჰკრეფდა, ზოგს თვითონ იტოვებდა, ზოგს  
სულთანის ხაზინაში ჰგავნიდა. შემოსავლის განაწილება  
მოხელესა და ხაზინას შუა, ან სავსებით აკრეფა მოხე-  
ლის სასარგებლოდ იმაზე იყო დამკიდებული, თუ რა  
პირობით ჰქონდა ჩაბარებული მოხელეს რომელიმე სო-  
ფელი, ხეობა, კუთხე, ან მთელი ქვეყანა და ოლქი.  
მხვნელ-მთესველისთვის სულ ერთი იყო, როგორ ინაწი-

ლებდნენ მიწის შემოსავალს სულთანი და მოხელენი და ვის რამდენი მიჰქონდა, რადგან გლეხის გადასახადს ამ განაწილებით არაფერი ემატებოდა და არც აკლდებოდა.

მოხელეებად უფრო ხშირად ბეგები იყვნენ, ჩამომავალნი ქართველ თავად-აზნაურებისა. რუსები რომ დამკვიდრდნენ მესხეთში, ბეგების მომეტებული ნაწილი ოსმალეთს გადიხვეწა და თავიანთი ნაკერი სოფლები მიჰყიდეს როგორც საკუთრება მოქალაქეებს, აზრუმიდან მოსულ სომხებს და ქართველ თავად-აზნაურებს. ბევრი უკანონობა დატრიალდა ამ სყიდვა-გაყიდვის დროს, მაგრამ რადგან ახალმა მთავრობამ ვერც თავი გაუგო და ვერც ბოლო ამ დახლართულ საქმეს, ბევრის კვლევაძიების შემდეგ საქმე სასამართლოში მოსპეს და გასყიდული მამულები საკუთრებად დარჩათ მყიდველებს. ბეგებისაც, ვინც აქ, საჩვენოში, დარჩნენ, საკუთრებად დაუმტკიცეს მათი ნაკერი და დაჩემებული სოფლები. ასე გაჩნდა კერძო საკუთრება მამულისა სამცხე-საათაბაგოში, რუსების მოსვლის შემდეგ.

14 მაისს 1870 წ. გამოვიდა საბოლოო კანონი, რომლის ძალით გლეხობას მიეზომა სასარგებლოდ და სახმარად ის მამული და სახლ-კარი, რაც ხელში ეჭირა. ბეგებისა და მამულის პატრინთა სასარგებლოდ გლეხი იხდის შემოსავლის მეათედს, ან ათში ერთს.

სამცხე-საათაბაგოს გლეხ-კაცი შედარებით ქართლისა, კახეთისა და იმერეთის გლეხობასთან, შეღავათიან პირობებში ცხოვრობს, რადგან იხდის მამულის პატრინის სასარგებლოდ მოსავლის მეათედს, ქართლელი, კახელი და იმერი კი მეოთხედს. შეშა-ფიჩითაც უფასოდ სარგებლობს, სადაც ასეთი ჩვეულება იყო. ჩვეულებისავე

ძალით წველელ ფურზე იხდის წელიწადში გირვანქა ნა-  
ხევარ ერბოს და ამდენსავე თაფლს თითო ფუოკრის  
სკაზე.

ქართლსა და იმერეთში გლეხ-კაცობა ძალიან ეტა-  
ნებოდა ძველად მამულის შეძენას საკუთრებად. ამიტომ  
ეს კუთხენი სავსეა მესაკუთრე გლეხებით. ხოლო ასე არ  
არის სამცხე-საათაბაგოს. ამ ქვეყანაში სრულებით არ  
მოიპოვება ისეთი გლეხი, რომ საკუთარი მამული ჰქონ-  
დეს. მარტო ამ ბოლო დროს შეუდგნენ მამულის სყიდ-  
ვას თითო-ორთოლა სოფელში.

სამცხე-საათაბაგოს ყოველ ყანას და ხნულს, ხევსა  
და ღელეს, მთასა და გორას, ტყესა და ჭალას წმინდა  
ქართული სახელი ჰქვიან. მარტო თითო ორთოლა ადგი-  
ლას ძველი სახელი უთარგმნიათ ოსმალურად, მაგალი-  
თაღ ოქროს ციხეს ეხლა ალტუნ-ყალას ეძახიან. შემო-  
ხიზნულ სომხებს და იმ ქართველ მაჭმადიანთ, რომელ-  
თაც დაივიშყეს სამშობლო ქართული ენა, არ ესმით  
მნიშვნელობა სხვა და სხვა სახელწოდებისა, მაგრამ სა-  
ხელი კი მაინც ხმარებაშია. ამ გაუგებლობის მიზეზია,  
რომ ზოგიერთა სოფლის სახელი საშინალადაა დამახინ-  
ჯებული და გადაგვარებული. მაგალითად სოფელ ძველს  
ეძახიან „ზურზელს“, სოფელ სასძლოს უწოდებენ „საღ-  
ზელს“.

ძველად სამცხე-საათაბაგო, საქართველოს ნაწილს  
რომ შეადგენდა და აგრედვე ათაბაგების დროს, მჟიდ-  
როდ ყოფილა დასახლებული. მას შემდეგ ამ ქვეყანამ  
ბევრი მწუხარება გამოიარა, ბევრჯელ შემოესია მტერი  
და უწყალოდ ააოხრა. მრავალი სოფელი გაჰქრა და დღეს  
მხოლოდ მათი კოხტა სახელი-ლა დარჩენილა ერის ხსოვ-  
ნაში.

ნასოფლარებს ეხლა ვერანას ეძახიან. ამისთანა ვერანა ამ უამაღ ასზე მეტია. იქნება მეტიც იყოს, მაგრამ ჯერ-ჯერობით მათი სახელები არ ვიცით. აი რამდენიმე ვერანის, ან ნასოფლარის სახელი. გოგოთ-უბანი, გაყინულა, თეთრი-ჭალა, თაფლა-ხევი, თავის-ჯვარი, მამაჭი-ხელი, მარიამ-წმინდა, საყევარი, სამეფო, საღორე-ხევი, საწერეთლო, ქორის-ხევი, შუა-კარავი, ჭოჭები, ჯინჭველა-ხევი და სხვა. ყოველ ვერანას საკუთარი ეკლესია აქვს, ზოგი კარგად შენახული, ზოგი კი დანგრეულ-დაქცეული.

სამცხე-საათაბაგოს ველ-მინდორი უხვადაა მოფენილი შესანიშნავ ისტორიულ ნაშთებით. არსად საქართველოს სხვა ნაწილში იმდენი ციხე და ეკლესია-მონასტერი არ მოიპოვება, როგორც აქა. ეკლესია-მონასტრების სიუხვით ამ ქვეყანას თუ შეედრება მდინარე ჭოროხის ხეობა. ციხე-მონასტერთა სიმრავლე და სიუხვე ცხადად ამჟკიცებს, რომ ძველად ამ კუთხეში სიკოცხლე სდულდა და გადმოდიოდა, რომ მესხი სულიერად და ნივთიერად ლონიერი ყოფილა. დიდად საწყენი და დასალონებელია, რომ მესხეთის ბედი უკუღმართად წავიდა. წინ წასვლისა და წარმატების მაგიერ უკან დაიხია, გალარიბდა, სულით დაეცა და წარსულის დიდების ნიშან-მოწამეს პატრონობას ველარ უწევს და ეკლესია-მონასტრები და ციხენი თავზე ენგრევა. ქარი და წვიმა, ადამიანის უგუნური ხელი თითქოს ერთმანეთს ეჯიბრებიანო, სწიწვნიან და ჰელევენ უწყალოდ ჩვენ წინაპარაგან დატოვებულ განძსა. კულტურითა და სწავლით განაქმული ევროპელები დიდის მოწიწებითა და მოკრძალებით ეკიდებიან ისტორიულ ნაშთებს, უვლიან და ჰქანარონობენ. დღევანდელ ქართველებს თითქოს სამუ-

დამოდ გაუქრათ გულში წარსულის სიყვარულით, სწორედ ისე იქცევიან. უბრალო ქვის ღობე რა არის, იმასაც კი არ უკეთებენ იმისთანა შესანიშნავ ტაძარს, როგორიცაა ჭულები და შიგ თავისუფლად ბინას იკეთებს ხან ნაღირი, ხან მწყემსი, ავსებენ უსუფთაობით და კედლებს სკვარტლავენ. ბევრგან ეკლესიათა თაღის სურათები თოფის ტყვიითა დახვრეტილი.

ბორჯომის ხეობაში სამი ციხეა: პეტრესი, ტიმოთისა და აწყურისა. ამ რამდენიმე წლის წინად ზარბაზანი უსროლიათ აწყურისა და ტიმოთის ციხეთათვის, უნდოდათ თურმე გამოეცადათ სიძლიერე ზარბაზნისა. რკალივით შენგრეული კედლები, მტკვრის ნაპირზე მიმავალ ქვაფენილ გზას, რომ დაჰყურებენ, ცხადად მოწმობენ, რომ წარსულის სიყვარული არა გვაქვს და არ ვიცით მისი პატივისცემა.

დღევანდელი სოფელი აწყური ძველად ყოფილი ქალაქი და დასახლებული მესხებით, ურიებით და სომხებით. ეხლა აწყურელები გამაჰმადიანებულები არინ, ხოლო ქართული არ დავიწყებიათ. არის სამინისტრო სკოლა, მაგრამ ქართულს არ ასწავლიან. ამ სკოლაში ისეთი მასწავლებელიც ყოფილა, რომელიც ამბობდა, რომ აწყურელები თათრები არიანო. მტკვრის მარცხენა ნაპირზე მოსახლობენ მართლწალიდებელი ქართველნი, სომეხნი და ურიანი. ქართველებს აქვთ სამრევლო სკოლა, სადაც ქართული ენაცაა. აწყურში იჯდა მიტროპოლიტი და კათედრად პქონდა მშვენიერი გუმბათიანი ტაძარი. გუმბათი ჩამონაგრეულა, ინგრევა აგრედვე კედლები. ამ ეკლესიის გალავანში დასაფლავებულია ჭაბუკი ბატონიშვილი ლევან იულონის

ძე, რომელიც ლეკებმა მოჰკლეს 1811 წელს პეტრეს ციხესთან.

სოფელი აწყური იმითიცაა შესანიშნავი, რომ რუსის მხედრობის სარდალმა გრაფ ტოტლებენმა უღალატა აწყურთან 1770 წ. აპრილის თვეში მეფე ერეკლეს. ეს გენერალი რუსეთიდან იმისთვის გამოგზავნეს, რომ ქართველების დახმარებით ოსმალები დაემარცხებინა. ბრძოლა რომ უნდა დაწყებულიყო, სწორედ მაშინ გამობრუნდა ტოტლებენი, დასტოვა მარტო ერეკლე ძლიერ მტრის წინაშე და თვითონ აბასთუმნის გზით ზეკარის უღელტეხილზე გადაიარა და იმერეთს ჩავიდა. ერეკლემ მაინც აწყურთან გაიმარჯვა და 21 აპრილს ხომ სავსებით დაამარცხა ოსმალეთის ჯარი სოფ. ასპინძასთან.

ეხლანდელ ახალციხის მაზრაში კიდევ შემდეგი დიდი ციხეებია: რაბათისა, აბასთუმნის ხეობის შესავალში; ოქროს-ციხე \*), ქვაბლიანში; ჯაყისმანისა, სადაც მდინარე ჯაყის-წყალი ერთვის ფოცხოვის წყალს; ასპინძისა, სადაც ერეკლემ დიდად დაამარცხა ოსმალონი 1770 წელს, თვით ქალაქ ახალციხის ორპირი ციხე და საკირესი. უკანასკნელი ციცაბო და განმარტოებულ გორაზეა აშენებული, როგორც გორის ციხე. საკირეს ციხე თავს დაჟყურებს ს. ტაძრისს, სადაც ძველად შესანიშნავი დედათა მონასტერი ყოფილა, ეხლა კი ცარიელი ნანგრევებია.

\*) ლალა-ფაშა რომ შემოესია საქართველოს 1578 წელს, ათაბაგ ქაიხოსროს ცოლი დედის-იმედი დიდხანს გამაგრდა ამ ციხეში. დედის-იმედის შვილმა მანუჩარმა პირველმა მიიღო მაჭადის რჯული და სახელად დაერქვა მუსტაფა-ფაშა. მისი ძმა ბექა დაინიშნა ახალციხის ფაშად, სახელად დაარქვეს საფარ.

აქ ჩამოთვლილ ციხეების ნახვა ძალიან ადვილია, ქართველებს რომ უყვარდეთ ევროპელებსავით მოგზაურობა და სამშობლო ქვეყნის მიმოხილვა და შესწავლა. პატარ-პატარა გუნდები რომ შეადგინოს ახალგაზღობამ, ზურგზე წამოიკიდოს პარკუჭანებით საგზალი და ჩაიცვას საგზაო ქალამნები, სულ ორ კვირეს მოივლის ფეხით მთელ სამცხე-საათაბაგოს, დაათვალიერებს ისტორიულ ციხეებს და ეკლესია-მონასტრებს და დასტკებება სულიერად მათის ხილვით და აგრედვე იმ დიდებულ ბუნებით, რომლითაც ასე უხვადაა დაჯილდოვებული ჩვენი საწყალი ქვეყანა.

ეკლესია-მონასტრები ხომ აუარებელია დიდებულ მესხეთის ნაწილ სამცხე-საათაბაგოში. უფრო შესანიშნავია ზარზმა, საფარა, ჭულე, ანუ ჭულები, შორეთი, გავეთი, კარზამეთი, ჯაყისმანი, საკუნეთი და კლდეში გამოქვაბული მონასტრი ვარძია.

ზარზმა აგებულია მეათე საუკუნეს ქრისტეს დაბადების შემდეგ დავით კუროპალატის დროს. მაშასადამე მონასტრი არსებობს ცხრაასი წელიწადი. ახალციხიდან ზარზმამდე 35 ვერსია, გზა მშვენიერია და ქვაფენილი. ასე ლამაზი, კოხტა და ტურფა საყდარი ორი არ მეგულება მთელ საქართველოში. ზარზმა აშენებულია ამაღლებულ ადგილზე და თავს დაჰყურებს ქვაბლიანის ხეობას. გარემო მთები ტყითაა შემოსილი, ძირს ხეობა სავსეა ხეხილის ბალებით და საამურად მიიკლაკნება მათ შორის მდინარე ქვაბლიანი. სილამაზე ბუნებისა და სიტურფე ტაძრისა უნებურად პხიბლავს და ათრობს მაკერალს და არ იცი, რას უყურო—ტურფა შენობას, თუ თვალ წარმტაც ბუნებას. სწორედ უფალს უხვი თვისი კალთა აქ, ზარზმაში, დაუბერტყია.

ზარზმას დიდი ბედი ეწვია. განსვენებულმა დიდმა მთავარმა გიორგი ალექსანდრეს ძემ თვისის ხარჯით და საფასით განაახლა ტაძარი, გაასუფთავა და გაამშვენიერა. ზარზმაშია დახატული ათაბაგნი: სარგისი I, შვილი მისი ბექა I, და შვილიშვილები სარგისისა: სარგისი II და ყვარყვარე.

ზარზმის სიახლოეს, სოფ. აღიგვენის თავზე, მეორე მონასტერი ჭულეა, ზარზმასავით მშვენიერი. სამრეკლო ისეთი ლამაზია, რომ მისი ბადალი არ მოიპოვება მთელ საქართველოში. ჭულები უპატრონოდ გდია, თუმცა ის მამული, სადაც აგებულია ჭულები, ეკუთვნის მდიდარ მებატონის ფეიზულა ბეგ ქვაბლიანელის მემკვიდრეებს. მონასტერი აგებულია 1308 წლამდე. კედლებზე ათაბეგებია დახატული.

მესამე შესანიშნავი მონასტერი საფარაა. ახალციხიდან მონასტრამდე სულ შვიდი ვერსია. მონასტერში ოთორმეტი თლილის ქვის ნაგები ეკლესია ყოფილა. თერთმეტი დღესაც კარგადაა შენახული, მეოთორმეტე კი დაქცეულა. ამ ეკლესიათა შორის შესანიშნავია წმინდა საბას ეკლესია. ქვა საყდრისა მოწითალია, აშენებულია ხრამის პირას. კარი და ფანჯარა წმ. საბას ეკლესიისა დიდებულადაა შემკაბილი ჩუქურთმით. ეკლესიის ქვებზე მრავალი ხუცური წარწერებია. მონასტერი აშენებულია მეოთორმეტე საუკუნეში.

საფარაში დაბინავდნენ ჯვიცი ბერები და სულ გააოხრეს ეს შესანიშნავი და ტურფა მონასტერი. კედლები კირით შელესეს და გააფუჭეს ძველი მშვენიერი მხატვრობა. მას შემდეგ რაც აქ ბერები დასახლდნენ, ამბობს ერთი ისტორიის მცოდნე სწავლული, საფარას ნახევარი ფასი დაეკარგათ.

ახალკიხისავე მაზრაშია შეოთხე შესანიშნავი და ისტორიაში განთქმული, კლდეში გამოქვაბული მონასტერი ვარძია. ს. ხერთვისიდან ვარძია მდე მტკვრის ვიწრო ხეობით იქნება 18—20 ვერსი. მონასტერში მრავალი გამოქვაბული სენაკია ბერებისა, რამდენიმე სართულად გამწკრივებული. ეკლესიებიც ბლომადაა, სულ კლდეში გამოქვაბული. უმთავრეს ეკლესიაში დახატულია თამარ-მეფე იმ სახით, როგორც ჰხატავენ ამ მეფეს სურათებზე. მეთოთხმეტე საუკუნეს მონგოლებმა აიკლეს ვარძია, ხოლო მეთექვსმეტე საუკუნეს ყიზილბაშებმა.

ამ უამად მცირედად განახლებულ ვარძიაში ცხოვრობს მოხუცი არქიმანდრიტი სიმონ წულუკიძე და დარაჯობს მონასტერს.

ამბობენ ძრიელ უყვარდა თამარ-მეფეს ვარძიაში ცხოვრება და დროს გატარებაო. გამოქვაბულია ერთი დიდი დარბაზი, რომელსაც ეძახიან სახელმწიფო საბჭოს დარბაზს. თამარის თავმჯდომარეობით დიდებულნი საქართველოსნი აქა სწყვეტლნენ ქვეყნის საქმეებს.

დღეს ამ დარბაზში თავისუფლად მხოლოდ ლაშურანი დაფრინავენ.

## II

### ჯ ა ვ ა ხ ე თ ი.

ჯავახეთი მეორე წარჩინებული ნაწილია დიდებულ მესხეთისა, ანუ ზემო ქართლისა. ისტორიული ჯავახეთი კარგა შოზრდილი ქვეყანა იყო. დღევანდელ ახალქალაქის მაზრის გარდა ჯავახეთს ეკუთვნოდა აგრედვე არტაანი, ეხლა რომ არდაგანს ეძახიან. ამ უამად ჯავახეთს

ვეძახით საქართველოს იმ კუთხეს, რომელსაც რუსებმა ახალქალაქის მაზრა უწოდეს და ოსმალონი კიდევ ახალქალაქის სანჯაყად იხსენიებდნენ.

გართალია ჩვენს მთავრობას არ უყვარს ძველი ისტორიული სახელები და, თუ კი შესაძლებელი და მოსახერხებელია, ყველგან და მუდამ ჰსპობს ძველის ნიშანწყალს, მაგრამ ერთს ხსოვნა აგრე ადვილად როდი ივიწყებს ძველ სახელს. ისტორიული სახელი ცარიელი სიტყვა ნუ კი გვონიათ. იგი სავსეა ნეტარისა და პოეტურის მოგონებით, ჩაქსოვილია ხალხის გულსა და ხსოვნაში. ისტორიული სახელი ტკბილი და საამო ნანაა, რომელიც მუდამ და განუწყვეტლივ აახლებს და აგონებს ადამიანის მამა-პაპათა ქველიბა-ვაჟაცობას, ჭირსა და ლხინსა, ბედნიერებას და უბედურებას. კაცი არ შეუძლიან დაივიწყოს ერთს თავგადასავალის გამოშხატველი ისტორიული სახელი, როგორც არ შეიძლება დავიწყება სიკაბუკე-სიყმაწვილისა. ისტორიის დავიწყება თავის თავის დავიწყებაა, ანუ ზეობრივი და ფიზიკური სიკვდილი.

დღევანდელი ჯავახეთი, ან ახალქალაქის მაზრა, როგორც საათაბაგო, პატარა ქვეყანაა და უკირავს სულ რაღაც 2407 ოთხ-კუთხი ვერსი, ან 250,729 დესეტინა (501,458 დლიური). ამ მცირე ადგილზე ცხოვრობს 84,183 სული მამრი და მდედრი.

აღმოსავლეთით დღევანდელ ჯავახეთს უდევს ბორჩალოს მაზრა (ჯავახეთის მთანი), დასავლეთით ახალციხის მაზრა (მდინარე მტკვარი), ჩრდილოეთით გორის მაზრა (თრიალეთის მთანი, კოდიანის მთის ტოტი) და სამხრეთით ყარსის ოლქი (ნიალის ყურის მთა).

ისტორიული ბედი და თავგადასავალი ჯავახეთისა

ისევე მოუსვენარი და მფოთიანი იყო, როგორც საზოგადოდ საქართველოს დანარჩენ სხვა ტომთა. მარტო წისკილი არ დატრიალებულა მის თავზე, თორებ სხვა უბედურება, კირი და ფაგლახი ბევრისაგან ბევრი უნახავს. აღმოსავლეთში არც ერთი ძლიერი ტომი და ერთი არ დარჩენილა, რომ არ გაეთელოს ჯავახეთის ფართო და კალოსავით გაშლილი ველ-მინდორი. საუბედუროდ ზოგჯერ თვით ქართველებიც შეესევოდნენ ხოლმე ჯავახეთს და ზარალს აძლევდნენ.

ვიდრე საქართველოში მეფობას შემოიღებდნენ, ჩვენი სამშობლო საერისთავოებად იყო დაყოფილი. ჯავახეთს განაგებდა და ჰპატრონობდა წუნდის ერისთავი. წუნდა მაშინ ქალაქი იყო და მდებარეობდა მტკვრის ვიწრო ხეობაში, თბოგვის ციხის პირდაპირ და გამოქვაბულ მონასტერ ვარძიის სიახლოეს. ამ უამად წუნდას ნაქალაქევს ეძახიან და წარსულის დიდებისა აღარა ელყობა-რა. ნაქალაქევი პატარა და უხეირო სიფელია.

წუნდას გარდა ჯავახეთში სხვა ქალაქებიც იუმ, მაგალითად ხერთვისი, ბარალეთი, გოკია და არტაანი. ხერთვისი დღეს კოხტა სოფელია, შემკული ბალ-ვენახებით. ხერთვისელებმა ქრისტეანობა შესცვალეს მაჭმაღის რჯულზე და მტკიცედ ადგანან ამ სარწმუნოებას. ხერთვისში თავი გვარი ყოფილა ძველად ვაჩნადე. ვაჩნაძიანი დღესაც არიან და ამ გვარიდან ინიშნებოდა მაჭმაღის რჯულის პირველი სამღვდელო კაცი — ყაზი. ნაქალაქევსა და გოკიაში სრულებით აღარ არიან ქართველები. იმათ მაგიერ დასახლებულან თარაქამები, რომელთაც ერთი სიტყვა ქართული არ იკიან. ბარალეთში მართლ-მადიდებელი ქართველობაა დღეს და აზრუმიდან მოსული სომხები გრიგოლის სარწმუნოებისა.

ჯავახეთი, ან წუნდის საერისთავო საქართველოს სამეფოს განუყრელი და განუყოფელი ნაწილი იყო დიდ ხანს. ხოლო ოდეს სამცხის ბატონი გაძლიერდა და საქართველოს მეფეს თავს აღარ უკრავდა, დაეპატრონა ჯავახეთსაც.

ჯავახეთსაც ისევე, როგორც სრულიად მესხეთს, ან ზემო-ქართლს, თავისუფალი ცხოვრება და არსებობა მოუსპო ოსმალეთში მეჩეთიდეტე საუკუნის დასაწყისში (1625 წ.). ორას წელიწადზე მეტი იბატონებს ოსმალეთის მთავრობის მიერ დადგენილმა ფაშებმა. ხეპრე და უწიგნო მთავრობამ მარტო ის მოახერხა, რომ მრავალშა ჯავახმა რჯული გამოიცვალა და ქრისტეანობის მაგიერ მაჰმადის რჯული იწამა. ამის გამო თითქმის სავსებით დაეცა ძველი მამა-პაპეული სარწმუნოება, შესანიშნავი ტაძარი კუმურდოსი უპატრონობისაგან წახდა და ეხლა ბან-ჩამონგრეული დაღვრემილი შესკერის უცხო ტო-მით დასახლებულ არე-მარეს.

საერთოდ საქართველოს ისტორია სისხლის მელნი-თაა დაწერილი. განსაკუთრებით ილეწებოდა მტრისაგან განაპირა კუთხენი, იგინი ნელ-ნელა იცლებოდნენ სისხ-ლიდან და ლონე-მიხდილი ქართველობის იერს და ელ-ფერს ჰერგავდნენ. ქართველების ნასოფლარ და ნაქა-ლაქევ ადგილებზე სხვა უცხო ტომი სდებდა ბინას და ჩვენ წინაპართა სისხლით გაპოხიერებულ ნიადაგს სხვა ისაკუთრებდა. ჩვენ მიერ ნაამაგდარი მშობელი მიწა სხვას უჩენდა სარჩო-საბადებელს, ხოლო ჩვენ, მისი კა-ნონიერი მემკვიდრენი, იძულებული ვხდებით უცხო ქვე-ყანას შევაფაროთ თავი და იქ ვეძებოთ სარჩო-საბადე-ბელი.

გამუდმებულმა მტრის შემოსევამ ძარღვი მოუდუნა

ჯავახს, გაალარიბა, გაალატაკა და რაოდენობით შეასტურა. სადღაა ჯავახეთის ძველებური სიმრავლე ერისა? ქართველთა სოფლები დღევანდელ ჯავახეთში აქა-იქა კივკიუობენ, როგორც აზვირთებულ ზღვა-ოკეანების აფრა-ჩამოშვებული და საჭებ მომტვრეული ნავი. ბევრი-ბევრი დღევანდელ ჯავახეთში ქართველობა სამ-თავე წესისა: მართლ-მადიდებელნი, კათოლიკენი და მაკ-მადიანნი მეექვსე-მეშვიდე ნაწილს შეადგენდნენ.

მოკლედ რომ მოვკრათ სიტყვა, აი რა აოხრება და დარბევა განიცადა ისტორიულმა ჯავახეთმა. შერვესა და მეცხრე საუკუნეს, ქრისტეს დაბადების შემდეგ, არა-ბებმა გალეშეს ჯავახეთი. ადკილად არ ემორჩილებოდნენ მაშინდელი მხნე და გმირი ქართველები შემოსეულ მტერსა, მუდმივ ეპრძოდნენ და ამა' ობაში ბრძოლის ველი—ჯავახეთი სულით-ხორცამდე ილუზებოდა ასევე დაემართა ამ პატარა ქვეყანას, ბერძნების იმპერატორი ვასილი რომ შემოესია საქართველოს. პირველი ლიპარიტ თრდელიანის და მეფე ბაგრატ IV ბრძოლის დროსაც სიკეთე არ დაჰყრია ჯავახეთს.

სულთან ჯალალ-ედინის და საერთოდ შონგოლების შემოსევამ მთლად აამტუტა ჯავახეთი. ამბობენ, ერთი შენობაც ალარ დარჩენილა დაუნგრევილი. დანვ-რევა-დაქცევას გადარჩენია მხოლოდ ციხენი და გამაგრებული აღგილები.

მეთხუთმეტე, მეთექვსმეტე და მეთვრამეტე საუკუნებში რამდენჯერმე შემოესივნენ ჯავახეთს ყიზილბაშთა განთქმულნი შავი. თმოვვი, ვარძია და სხვა მაგარი აღგილები სულ დაანგრიეს. ნაღირ-შავმა რაც ქონება ჰქონდათ ჯავახებს, სპარსეთს წაილო, თანვე წასხა სა-ქონელი. ტყვეები არ წაუყენიათ, ამბობს მარიანე.

ალბად ყველას სიცოცხლეს უსპობდა, ვინც ხელში ჩაუ-  
ვარდებოდა და დახოცილთა გვამნი რაღაში ეპრიანებო-  
და გამძვინვარებულ სპარსეთის უგუნწურ ბატონს.

ოსმალებმა რომ მოიკალათეს ჯავახეთში მეჩიდმე-  
ტე საუკუნის დასაწყისში და შინ დაბრუნებას ალარ აპი-  
როპდნენ, ქართლ-კახეთის მეფენი, მამა-შვილი, თეიმუ-  
რაზი და ერეკლე, სულ იმის ფიქრში იყვნენ, თუ რო-  
გორ დავუბრუნოთ ჯავახეთი საქართველოსათ. ოსმალე-  
ბის ჩამოთხესლება საათაბაგოს და ჯავახეთს გულში ლახ-  
ვარივით მოჰვედა თეიმურაზსა და ერეკლეს. როგორც  
თითის ნუნაში შესობილი ხიჭვი არ ასვენებს კაცს, ისე  
ეს მეფენი ვერ ისვენებდნენ ოსმალების ახლო მეზობ-  
ლობით. ორჯელ თეიმურაზი და ორჯელ ერეკლე შე-  
იქრნენ ჯავახეთს, გამარჯვებითაც გაიმარჯვეს ოსმალოს  
ჯარებზე, თან ქვეყანაც დაზარალდა ომიანობით, მაგრამ  
ჯავახეთ-საათაბაგო ვერ დაიბრუნეს. ჯავახეთ-საათაბაგოს  
დაბრუნების სურვილი იყო ერთი უმთავრესი მიზეზი, რომ  
მეფე ერეკლე მიეკედლა ოუსეთს და პირობა დაუდო, --  
უთუოდ ეს ორი ქვეყანა დაუბრუნეთ საქართველოსათ.

ასრულებით აასრულეს პირობა რუსის მხედართ-  
მთავრებმა, მაგრამ დღევანდელ ქართველს გაუკირდება  
თამამად და გადაჭრით სოქვას, — რა ეჯობინებოდა, ას-  
რულება პირობისა, თუ აუსრულებლობა მისი.

23 ივლისს 1828 წელს გრაფ პასკევიჩმა დაიმორ-  
ჩილა ახალქალაქი და 2 სექტემბერს ქ. აღრიანოპოლში  
ხელმოწერილ სამშვიდობო ტრაქტატის ძალით ჯავახეთი  
შემოუერთდა ოუსეთს და გაშასადამე საქართველოსაც,  
როგორც ოუსეთის იმპერიის ნაწილს.

ამავე დროს მოხდა საოცარი და სამწუხარო ამბავი.  
გამაჭმადიანებული ჯავახობა ოსმალეთს გადიხვეწა და

დაცარიელდა ჯავახეთი მკვიდრისაგან, რომელიც ათას წლობით თავს დასტრიიალებდა ქვეყანას, ავი იყო თუ კარგი, უვლიდა და ჰპატრონობდა. დარჩა მხოლოდ მცირეოდენი ჯავახობა. გრაფ პასკევიჩმა დაცარიელებულ ჯავახეთის სოფლებში ჩააყენა აზრუმიდან წამოყვანილი 6,000 კომლი სომეხი და რაოდენიმე ოჯახი ბერძენი. შემოხიზნულ სომხებს დაურიგეს დაცარიელებული სოფლები, მოუზომეს ადგილ-მამული, ოჯახისა და მეურნეობის მოსაწყობად მისცეს ფული, ხოლო ხელოსნებს სახელოსნო იარაღი. ერთი სიტყვით რაც შეცვერებოდა მაშინდელ დროს სტუმართ მოყვარე რუსის მთავრობას პატივისცემა არ დაუკლია ახალშენელებისთვის.

გამართლდა ჯავახის თქმული: „ოთხმოცჯერ წახდენილა ჯავახეთი, ოთხმოც და ათჯერ აღშენებულაო... აღშენებით აღშენდა ჯავახეთი, მაგრამ სხვანაირად. უკულმა. ქართველების გასაგისი თითქმის ამოვარდა და მათ ნაოხრებზე სხვა დამკვიდრდა.

მეფე ბაგრატ IV (1027 – 1072 წ.) ააშენა ქალაქი ახალქალაქი, რომელიც ამ დროიდან ითვლება ჯავახეთის უპირველეს ქალაქად. ამ ეამად ახალქალაქი (1897 წლის აღწერილობით) სულ 5440 სული მამრი და მდედრი. სომეხია 4024 სული, ქართველი 297, ლანარჩენი სხვა ტომისაა. აქედან სჩანს, რომ ჯავახეთის დედა ქალაქს ქართულ ქალაქის იერი და ელფერი დაცკარგა.

ჯავახეთი უხილო, უვენახო და უტყუო ქვეყანაა, მაგრამ ამასთანავე უვავილიანი და წყაროიანი. მამული ლონიერი და ნაყოფიერია და იცის მოსავალი მოუცდენელი. ხნული კუპრავით შავია და ალაგ-ალაგ სილრწე შავ მიწისა თითქმის არშინ ნახევარია. ნააღრევი ყინვე-

ბი, გვალვა და ბშირი სეტყვა რომ არ იცოდეს, ჯავა-  
ხეთი მთელ საქართველოს დაპურებდა მოსავლით. რაც  
უნდა იყვნეს, შაინც ისე არ მოსცდება, რომ ხორბალი-  
შორიდან მოსატანი გაუხდეს ჯავახს. მოსავლიან წელი-  
წალს ხომ პური და ქერი ბლომად გააქვთ აქედან გასას-  
უდად.

ველ-მინდორი ჯავახეთისა ფართოდაა გაშლილი.  
აშირანის გორიდან <sup>\*)</sup> რომ დაპურებ, გეგონება უზარ-  
შაზარი ზღვა-ოკეანე გაკიმულაო. კოდიანის მთის კალ-  
თახე შეფენილ სოფელ ბურნაშეთიდან თითქმის მოელი  
ჯავახეთი მოსჩანს. ზაფხულობით, სწორედ საამო სანა-  
ხავია ზურმუხტის ფრად აბიბინებული და ამწვანებული  
მინდორი. გაზაფხულის გასულს სურათი იცვლება: შე-  
მოსული ყანები ოქროს ფერს იღებს და თვალ გადუწვ-  
დენელი მინდორი მცირეოდენ სიოსაგან ირხევა ლერ-  
წამსავით და პლელავს ზღვასავით. თუ ბარს ბურუსი არ  
აყრია, კა მოწმენდილია და კარგი დარია, ამ დიდებულ  
სურათს ბუნების მოტრფიალე ადამიანი თვალს ვერ მო-  
აშორებს. გინდა უყურო სიკედილამდე ბუნების სიკე-  
ლუცეს და ამაგს ლონიერ ადამიანისას.

ბევრჯელ დავმტკბარვარ უზომოდ ამ დიდებულის  
სურათის ცქერით, ბევრჯელ უნებურად ამილია ხელი  
საქმიანობაზე და ბევრჯელ უნებურადვე გონების თვალი  
წარსულისთვის მიმიკია, იმ წარსულისთვის, ოდეს ბილ-  
წი ყმობა-მონობა გვძაგდა და თავისუფალ ცხოვრების-  
თვის სიცოცხლეს არ ვზოგავდით.

ებლა ხომ სულ სხვაა. სანთელსავით დნება ჩვენი

<sup>\*)</sup> თურქები „თავშანს“ — კურდლის გორას ეძახიან; რუსებმა  
კი სახელი „თავშანკად“ გადანათლეს.

სახელი და ვითქვითებით უცხო ტომთა და ერებში ომ-  
გორც მაწონი სადლვებელში. შედარებანი წარსულისა  
და აწმყოსი, მოგონებანი, ზოგი ტკბილი და ზოგი  
მწარე ფუტკარსავით ირევა გონებაში. გარინდებული,  
გაქვავებული დგეხარ სვეტივით და იტანჯები გამოუთქ-  
მელ სევდა-ვარამით. აზრი და გონება, მოელი სულიერი  
არსება ძლიერად კვნესის და სწუხს, რომ ეს დიდება  
ბუნებისა, მისი მშვენიერება, ეს მობიბინე ველ-მინდორი  
ხომ ჩვენი იყო და რატომ აღარაა ჩვენი? რად დაგვე-  
მართა ასეთი საქმე? რად დატრიალდა ასე უკულმართად  
ბედი ჩარხისა, რომ ჯავახი, ჩვენი სისხლი და ხორცი,  
საუკუნოებით ამ ქვეყნის მომვლელ-პატრონი, მისი  
დამცველი, მოამაგე და მოკირნახულე, ზოგი გაწყდა  
მორის ხელით და ზოგი გადიხვეწა ოსმალეთს? რად მოხ-  
და ისე, რომ ჩვენ ჩვენს ქვეყანაში სტუმრებს დავემ-  
გზავსეთ და შემოხიზნული უცხოელი დაეპატრონა ქვე-  
ყანას? ისეთი რა დავაშვეთ, რომ ქვეყანა გაგვიოხრდა  
და გაგვივერანდა? მთასა და გორას, ველსა და მინდორს,  
დაბასა და სოფელს მხოლოდ სახელი-ლა შერჩა ქართუ-  
ლი, თორემ სახრავი დიდი ხანია სხვამ მიითვისა. ესეც  
არ იკმარეს და ცარიელ სახელსაც გვედავებიან. ქვის-  
ჯვარს (სოფ. ქოთელიას და ხანდოს შორის) ხაჩ-კარი  
უწოდეს, ნიალის-ყურს გეგ-დაღი და სხვა.

ეს ხომ ასეა, მაგრამ მე მაინც მგონია, რომ შემო-  
ხიზნულნი ვერ შეიყვარებენ ახალ სამშობლოს და პირს  
იქით იზამენ, საიდანაც მოსულან, ან სხვაგან მოსდებ-  
ნიან ბინას. სამშობლოს მოწყვეტილი ადვილიდ ვერ დას-  
დებს ბინას უცხო ქვეყანაში. საბაბად უბრალო მიზეზი  
ეყოფა, აიყრება და წავა ან სხვაგან, ან ძელ სამშობ-  
ლოს მიადგება. ამისი მაგალითი ბევრია. ათას წელიწად-

ზე მეტია, რაც გაიბნა ებრაელობა, და მაინც თვალი იერუსალიმისკენ უჭირავს. სამასი წელიწადი სრულდება რაც ქართლ-კახეთიდან ყიზილბაშებმა წაასხეს ქართველები თავიანთ ქვეყანაში, მაგრამ მათ ჩამომავლობას მაინც გული ეთანალრება და ძველ სამშობლოსკენ მოიწევს.

წარსულის მოგონებით გამოწვეული სევდა-ვარამი, გულს რომ უთუთქამს ხოლმე ადამიანს, არ გეგონოთ, რომ ბოროტება და სიძულვილია ხიზან-სტუმრისადმი. სევდა სამშობლოსი ბუნებითი გრძნობაა, დაბადებით დაყოლილი. აბა ნაამაგდარ შვილის დაკარგვას როგორ აიტანს მოსიყვარულე დედის გული, თუ ზოგჯერ მღულარე და ანკარა ცრემლი არ დალვარა და გული არ მოიფონა!

ჯავახეთის მდებარეობა მაღალია, ზღვის პირიდან თითქმის 5,000 ფუტს უწევს სიმაღლე. ეს მაღალი მდებარეობაა მიზეზი, რომ ჯავახეთში ზამთარი დიდ-თოვლიანი და ყინვიანია. მარიამობისთვის ნახევარს ჯავახეთის მთის წვეროებზე: აბულსა და სანსარზე უკვე თოვლი მოდის. შემდეგ თოვლს ჩამოჰყრის ხოლმე კოდიანსა და ნიალის ყურეზე. ასე რომ შემოდგომის პირზე ჯავახეთის მთაგრეხილნი სამის მხრით თოვლით იმოსება და ლაზათიანს სუსხს იჭერს. იმერელი, ან მეგრელი თავის თხელი და სიფრიფანა ტანსაცმელით გაფიჩდება აქა, ისე საგრძნობელი და ძლიერია შემოდგომის სუსხი. სიცივესა და ყინვას მიჩვეული ჯავახი კი არხეინადაა, გაეხვევა ტყავში და მხნედ მუშაობს ხოლმე.

ბარში თოვლი გიორგობისთვეში მოდის; ქრისტიშობისთვის პირველ დღეებში გაჩაღებული ზამთარი დგება. ამ დროს სამარხილო გზა ჩინებულია.

დღისით აგრე რიგად არა ცივა ზამთარში, ლამ-ლამობით კი დიდ სიცივეს იჭერს. ხშირად სიცივე 10—15 გრადუსია რეომიურისა. უფრო დიდი ზამთარი ტბის უკრის და ფარვანას ტბის არე-მარემ იცის. ამ ადგილებში თოვლი მოდის ასე ენკენისთვის ნახევარს და ძლივ-ძლივობით დნება აპრილის თვეში.

გეოგრაფი ვახუშტი ამბობს, რომ ჯავახეთი უტყეო ქვეყანაა. დღევანდელ ჯავახეთში მართლაც ტყეები აღარაა, აქა-იქ მოიპოვება მხოლოდ ჯაგნარი, მაგალითად სანსარის მთის და ციხის-ჯვრის ფერდობსა და ძირიბებზე. ჯავახეთზევე მიწერილი ჭობარეთის ტყე, მაგრამ იგი საათაბაგოს სამზღვარზე დევს და ჯავახნი სიშორისა და უგზობის გამო ვერა სარგებლობენ ამ ტყით. ჭობარეთი უფრო ბორჯომს, გორის მაზრას (ქართლს) ეჯუთენის, ვიდრე ჯავახეთს.

დიახ, ჯავახეთში ეხლა აღარაა ტყეები, მაგრამ ვაჟუბა, რომ ძველად დიდი ტყეები ყოფილა. სოფელ სანსარს დღესაც კარგადაა შენახული მშვენიერი მოზრდილი ეკლესია-მონასტერი. მონასტრის კედლიდან გადმოვარდნილი უშველებელი თლილი ქვა, აღმად მიწის ძვრის დროს, და ზედ ასეთი ხუცური წარწერა აქვს: ოდეს ეს წმიდისა ლვთის მშობლის ეკლესია აღშენდა, მაშინ ესე ადგილი ტყისაგან არა ჩნდაო. ეს წარწერა ნათლად ვკიჩენებს, რომ ძველად ჯავახეთში დაბურული და ხშირი ტყეები ყოფილა.

მე მგონია, რომ ტყეები თვით გეოგრაფ ვახუშტის სიცოცხლის დროსაც (18 საუკუნე) იქნებოდა ჯავახეთში. შეიძლება ულრანი და გაუტეხელი ტყე აღარ ყოფილიყოს, მაგრამ ალაგ-ალაგ გატეხილი მაინც შეჩებოდა. მე ჩემი თვალით მინახავს ს. იხტილაში თავხე,

იქვე სოფლის ახლო მდებარე შეტხელებულ ფრთონის ჩავახეთში მოკრილი. კოთელიელები ამბობენ, რომ ტყეები ჯავახეთში აზრუმიდან მოსულმა სომხებმა ამოაგდესთ. რაკი სამშობლოში ტყის მოვლა-პატრონობა არ იცოდნენ და თვალითაც კი არ ენახათ, აյ რომ დაბინავდნენ, მიესივნენ ტყეებს და სულ გაანადგურეს... ჯირკვებს და დიდრონ ხის ფეხვებს ეხლაც ვპოულობთ ხვნის დროსათ.

რადგან საწვავი შეშა-ფიჩხი არ მოიპოვება ადგილობრივ, ჯავახნი იძულებულნი არიან ხის მასალა შორიდან მოიტანონ სახლკარის ასაშენებლად. ხის მასალა გამოაქვთ ბორჯომისა, ოკისა და ზემო თშორას ტყეებიდან. ბორჯომის ტყე მდებარეობს გორის მაზრაში და ოთისა და ოშორისა ახალკიხისაში. დიდ შრომასა და ჯაფას ალევს ჯავახი ხის მასალის მოტანას; ერთი ხის მოტანას ყევარი ხარით და ურმით ექვსსა და რვა დღეს უნდება ხოლმე. უშეშობა და ზამთრის მკაცრი სიკივეა მიზეზი, რომ ჯავახი მიწურ სახლებს იკეთებს. ლრმად ამოთხერილ დედამიწას ტალახისა და ქვის კედლებს გაუკლებს, ზედ თავხეებს დააწყობს და ბანს სქლად მიწას აყრის. ზოგჯერ დაყრილ მიწის სილრმე-სიმაღლე არშინ ნახევარს უწევს ხოლმე. ზამთარში კიდევ ამოდენა მიწას ერთი-ორი არშინი სილრმე თოვლი დააწვება და ამგვარად ჯავახის სოფელი ზამთრობით მიწისა და თოვლისაგან აკოკოლავებულ ბორცვების გროვას უფრო ჰგავს, ვიდრე ჩვეულებრივ სოფელს.

შეშის მაგიერ ჯავახეთში ხმარობენ პურის გამოსაცხობად, საჭმლის მოსახარშად და სახლის გასათბობად წივას. წივას აკეთებენ ასე: სხვილფეხა საქონლის ნაკელს შეაქუჩებენ გაზაფხულზე, ან ზაფხულში სახლის

წინ, ან კალოზე, დაზელენ ნიჩბებით და შემდევ აშოსკ-რიან აგურივით, გაპუენენ კალოებზე, კალოს ღობეებზე და სახლის ბანებზე. როცა გამოხმება მზეზე, მწერივად დაალაგებენ, როგორც საუენის ჟეშას, ან ბჯას. ჯავახე-თის სოფლები სავსეა ასეთი სასაცილო ბჯებით. ზოგი-ერთა ოხუნჯი კაცი, შორიდან მოსული, თუ სასაცი-ლოდ აგდება უნდა ჯავახისა, იტყვის ხოლმე: ჯავახეთი სავსეა ყინვარე შაქრის კეცებითო.

ერთი საუენი წივისა ფასობს 8—12 მანათი. ცხვრის ნაკელიდან ამოლებული წივა უფრო ძვირია, რაღაც მეტი სიცხოველე აქვს და ღირს 14—16 მანათი საუე-ნი. წივის კეთება უფრო ქალების მოვალეობაა. მამა-კაცები ეშველებიან ნაკელის დაზელაში და ალიზებად ამოლებაში. გაშრობა, გამწერივება კალოებზე, შემდეგ ბჯად დადგმა სულ ქალების საჭმეა.

წივის კვამლი ძალიან ავი ასატანია და თვალებს ძრიელ სწვავს. სიმყრალით სკარბობს ცხვრის ნაკელისა-გა5 მომზადებული წივა. რაც უნდა ბევრი წივა მოამზა-დოს ჯავახმა, მაინც იოლად ვერ წავა ცივსა და გრძელ ზამ-თარში. ამის გამო ჯავახი სარგებლობს საქონლის სიო-ბოთი. თავლა-ბოსლის ერთ ნაწილს გადალობამენ დარა-ბებით, ან ქვის კედლით (უკიროდ) ნახევრად და ერთ მხარეზე რომ საქონელია დაბინავებული, მეორეზე ჯავა-ხის ჯალაბი. ამ ოთახს ოდას ეძახიან. ოდაში და თავ-ლაში სუნი მძიმეა და შეუჩეველ კაცისათვის ძნელი ასატ ნი. პირველად ამისთანა ბინაზე ხამი აღამიანი დი-დად იტანჯება. საქონლის ფშვინვა, საჭმლის ხრამუნი, მოცად საქონლის ზმუილი, ნეხვისა და პირუტყვის შარ-დის სუნი, საერთოდ შეხუთული და აშმორებული ჰაე-რი სულს უხუთავს ხამ აღამიანს. გაფუჭებული ჰაერი

დიდ ზიანს აძლევს თვალს და ამის გამო ხშირია თვალის ავადმყოფობა ჯავახეთში და თუ სხეულით ჯანსაღია ჯავახი, იმის მაღლობელი უნდა იყვეს, რომ ბინის გარედ მეტის მეტად სუფთა ჰაერია და ცივი ანკარა წყაროები უხვად მოიპოვება.

თავლასა და ოდას ზედ მიღებული აქვს საბძელი, სათორნე, იარალის საწყობი, შენობანი და სხვა. შეძლებულ ჯავახს ხშირად ექვსი-შვიდი თვალი შენობა აქვს და ამოდენა ოთახებს ერთი კარი აქვს, საიდანაც შედის და გამოდის ადამიანი და პირუტყვი. თუ მიჩვეული არა ხარ, კისერს მოიტეხ, პირველად რომ შედიხარ ამ დაუსრულებელ ბნელ ოთახთა ლაბირინტში, ან ცივ კედელს მიახლი ცხვირსა და პირს, ან საქონელს წაწყდები. შეიძლება ზორბა ქოფაკსაც წამოჰკრა ფეხი და ვაი შენი ბრალი შაშინ! მე მუდამ შიშითა და კრძალვით შევსულვარ ჯავახის სახლ-კარში. ფეხის გადადგმას ვერ გავბედავდი ხოლმე, ვიდრე ხელს არ მომკიდებდნენ და წინ არ გამიძლვებოდნენ.

შეძლებული ჯავახნი ნელ-ნელა ამოდიან თხუნელისებურ სოროებიდან და სახლ-კარს რიგიანს იკეთებენ. განსაკუთრებით დიდ ყურადღებას აქცევენ სასტუმრო ოთახს, ანუ ოდას. ხიზაბავრას, ხერთვისს და ბარალეთს ბლომად მოიპოვება მიწაზე დადგმული ქვიტკირის შენობანი.

ერთი კარგი თვისება აქვს ჯავახს, — ძალიან უყვარს სიუხვე ლოგინისა. რაც უნდა ლარიბი იყვეს, ორი-სამი ხელი ლოგინი მაინც ექნება სასტუმროდ შენახული.

მთელ საქართველოში არ მოიპოვება იმისთანა სალი ჰავა, როგორიცაა ჯავახეთში. რა ხილია ციებ-ცხელება, აქ არავის გაუგონია. ან საიდან გაჩნდება ციებ-

ცხელება ამ მაღალ ველ-მინდორზე, სადაც ჰყაპი და ჭაობიანი აღგილები არაა. ზაფხულობით ბარში წყალი დუბელაა და სასმელად მაწყინარი, ჯავახეთში კი ისეთი ცივი წყაროებია, რომ კბილსა ჰქვეთს,

**ტბანი და მდინარენი.** მთელ საქართველოში არ მოიპოვება იმდენი ტბა, რამდენიც პატარა ჯავახეთშია. ტბათა სიუხვით ჯავახეთი წააგავს ფინლიანდიას. ჯავახეთის ტბებს უჭირავს 8,558 დესეტინა აღგილი, ან 17,116 ქართული დლიური. ყველაზე დიდი ტბა ფანავრის ტბაა, რომელსაც უჭირავს 6,744 დლიური. ამ ტბას ჯავახი დღეს ფარვანას ეძახის, რუსები კი ტოპარავანს. მეორე—ტბის-ყურის ტბაა, უჭირავს 2,620 დლიური. ამ ორ ტბას გარდა ექვსი დიდი და პატარა ტბაა კიდევ ჯავახეთში. ზოგიერთი ტბა განთქმულია გემრაელი თევზით და კალმახით, მაგალითად ტბის-ყური და სალამოს ტბა. ბატონაშვილი ვახუშტი ასე აგვიწერს სალამოს ტბას: „ტბა სალამოსი, დიდი და აღვისილი თევზითა გემოიანითა, ამის-თვის რამეთუ არს ანკარა და ქვიანი..“

ხალხი ამბობს, რომ ტბის-ყური თამარ-მეფემ მდინარე ქციადან აღინაო. —არხი, ნარუალი დღესაც ეტყობა“. თუ ხალხის გადმოცემა მართალია, ალბად „არხს იმ აზრით გასკრიდნენ, რომ მდ. ქციას გემრიელი კალმახი ამ ტბაშიაც მოშენებულიყო“.

მდინარენი შედარებით ცოტაა ჯავახეთში. დასავლეთით ჩამოუდის მტკვარი და ისე ღრმა ხეობაში მოდის, რომ შეუძლებელია რუების გამოყვანა ხეხილის, ან ყანების მოსარწყავად, ან-და წისქვილის დასაბრუნებლად. მხოლოდ ხერთვისელებმა მოახერხეს პატარა რუს გამოყვანა და სოფლის ბოლოს დიდი რუს გაყვანა სა-

წისქვილედ. წყაროს-თავიდან \*) მოყოლებული გომამდე (ახალციხისა და ახალქალაქის მაზრათა . სამზღვარზეა) მტკვარი ძრიელ ჩქარა მოდის და სრულიად არ წააგავს - მოდუდუნე - მტკვარს, ტფილისს რომ შუაზე ჰყოფს და ზღაზენით მიდის კასპის ტვისაკენ. მეორე მოზრდილი მდინარე გამოსდის ფარვანის ტბას. გაივლის საღამოს ტბას, ჩაუვლის ქ. ახალქალაქს გვერდზე და შეერთვის არტაანის მტკვარს სოფ. ხერთვისთან. ფარვანის წყალს ოსმალონი ეძახდნენ თოფარავან-ჩიის, რუსები ეძახიან ტოპარავან-კას, ქართველები კიდევ ჯავახეთის მტკვარს. ქ. ახალქალაქიდან ვიდრე ხერთვისამჟე ამცევე მდინარეს ეძახიან ახალქალაქის წყალს. დანარჩენ მდინარეთა შორის უფრო საყურადღებოა ბარალეთის წყალი და ცულასისა, ანუ ორმოცი წყარო, თაორულად ყირბ-ბულახ.

**ხვნა-თესვა.** ხეილი. ჯავახეთში ხვნა-თესვა ისე-თივეა, როგორც დალოცვილ ქართლ-კახეთში. იგივე მამა-პაპური გუთანი, ორხელა, გუთნის დედა, ლაშისა და დღის მეხრენი, ფარცხი და სხვა. განსხვავება ისა მხოლოდ, რომ ჯავახის გუთანზე ისეთი მხიარულება არაა, როგორც ქართლისაზე. აქ ვერ გაიგონებ საქონლისა და მეხრის გამამხნევებელ ოროველას. ოსმალთა ბატონობამ ჯავახსაც გული დაუთუთქა და მოსპო ეროვნული სიმღერა, როგორც ბევრი რამ სხვა.

ჯავახეთში ღოლის ნაკლებად სთესავენ. ეშინიან სიცივისა. მომეტებულად ითესება დიკა. ქერშიც უფრო ახალთესლი ითესება, ვიდრე ძველთესლი. რადგან ჯავახეთის ჰავა სასტიკი და სუსხიანია. ქერი და პური

\*) წყაროს-თავი არტაანის ოლქშია. აქ შესაძილებელი ქართული უკლესია, ქართველები კი იღარ არიან.

გვიან შემოდის. ქერებს სთიბავენ 1 აგვისტოდან, დოლს (შემოდგომის ნათესი პური) პირველ აგვისტოდან. ამალ თესლს აგვისტოს გასულს. მეა სრულებით არ იყიან და მაშასადამე აქ ვერც პოოპუნას გრიალს მოისმენ. მარტი სოფელ ეშტიაში ეხერხებათ ნამგლის ხმარება. ეშტიოლები გადმოსახლებული სომეხ-კათოლიკენი არიან.

რაյო მოსავალი გვიან შემოდის, კალოობაც გვიან იყიან. თუ ავდარმა უსწრო, ბჯები გაულეწავი რჩებათ და როცა ყინვებს დაიკერს, ესე ნოემბრის შუა რიც-ვებში, კალოობა ხელახლად გაჩაღდება ხოლმე, მაგრამ ვაი ამ კალოობას. კევრზე ქურქსა და ტყავში ვახვეული კაცი დგას და წამდაუწუმ ხელებზე პირია ორთქლს უბერავს. საცოდავი სანახავები არიან გოგოები, სალამიობით ხვავს რომ აცხავებენ. პირისახე და ხელები სიცივისაგან დალურჯებული აქვთ. ტანი უძაგდაგებთ და მაინც ცხავს ახანხალებენ. თუ ყინვა კარგა ხანს გავძელდა, ლეწვას მორჩებიან, მაგრამ თუ თოვლა მოუსწრო, კალოობა გაზაფხულის გასულს, ან ზაფხულის პირზე თავდება.

საუკეთესო მხვნელ-მთესველები ჯავახეთში ქართველები არიან. ამათ არც ზოსული სომხები ჩამოუვარდებიან. საქონლის მოშენება უფრო ეხერხებათ თარაქამებს, ქურთინებს და თურქმენებს, ხოლო მებალობაში ხეხილის მოვლა-პატრიონობაში ქართველ—მაჭმალიანს; სუნის მიმდევრები) ვერავინ უედრება.

ხეხილის ბალები მარტო მტკვრის ლრმა ხეობაშია. ხენა-თესვის გარდა მისდევენ ხეხილის გაშენებას ხიხაპავ-რელები, საროელები და ხერთვისელები. ვარძიის პირდაპირ მდებარე ქართული სოფლები აფნია და გოგაშენიც მისდევენ ამ საქმეს, მაგრამ ნაკლებად. სარგებლო-

ბას დიდს ვერასა ხედვენ, უფრო გულს აყოლებენ და ხალისობენ. საროსა და ხიზაბავრას (მართლ-მაღიდებელი და კათოლიკე ქართველები) ვენახებიც აქვთ, მაგრამ აქაური ღვინო კაჭაჭა დააჩხავლებს.

ხეხილიან ბალებით განთქმულია ჯავახეთში და მთელ სამხრეთ საქართველოში ხერთვისი და მის გვერდით მდებარე პატარა სოფელი შადრევანი. თუთა იცის იმისთანა, რომ კამით ვერ გაძლები. მარტო თუთას საჭმელად ღირს რომ ეს ცუმროს კაცი ხერთვისს და შადრევანს.

ხერთვისი ღიდი სოფელია და ტურფა, თვალწარმტაცი მდებარეობა აქვს. შეუენილია ტიტველ კლდის ფერდობზე, კოხტა სახლები კიბე-კიბეა აშენებული და ამფითეატრივით მაღლა, კლდის წვეროსკენ მიღის. წყლის პირიდან დაჰყურებს ამაყად სოფელს ძველი ციხე. სოფელსა და ციხეს ორის მხრით ჩამოურბის მტკვარი არტანისა და ჯავახეთისა. ჯავახეთის მტკვრის ზეირთები ზეცასა სწვდება, ქუხს და გრგვინავს გააფთრებულ ლომივით. უზარ-მაზარ ლოდებზე ხათქა-ხუთქისაგან წყალი თეთრადაა აქაფებული და მისი შხელისაგან ყურთა სმენა აღარაა. აქ, ისტორიულ, კირნახულ მტკვართა შესართავის პირას მოსვენება და განცხრომა ზაფხულობით, კარავში, ფართო თუთის ქვეშ, სახელოვან ციხის გვერდით, სწორედ რომ ნეტარება და ბეღნიერებაა! განა ბევრია ქვეყანაზე ასე შემყული კუთხე, მაგრამ აბა ისიც მითხარით, ბევრია იმისთანა ქართველი, რომელსაც ენახოს ხერთვისი?

ადამიანი განცვიფრდება, ხერთვისის ბალებს რომ პნახავს. ბალები კლდე-კლდე მიღიან და გარეგანი სახით ძველ ბერძენთა ამფითეატრს წაგავან. ბალებს ასე აშე-

ნებენ: ჯერ მოსჩეხავენ კლდეს, მერმე ქვემოდან გაუვლებენ კედელს ისეთ დიდრონ-დიდრონ ლოდებით, რომ ზოგის წონა 10,000 ფუთი იქნება. სწორედ გასაოცარია, რა ხელმა და მარჯვენამ მიაგორა ეს უშველებელი ლოდები კედლის ამოსაყვანად? ზღაპრებში რომ მდევების და ციკლოპების ნაშენობაზეა ლაპარაკი, სწორედ ეს შენობანი მოგაგონდება.

როცა კედელს გაავლებენ და ადგილს მიასწორ-მოასწორებენ; ზურგით აზიდავენ მიწას, მოჰქონენ, შემდეგ დააყრიან პატივს და მხოლოდ ამის შემდეგ დარგავენ ხეს, ან დასთესენ თესლს. დიდი ჯაფა და შრომაა საჭირო ამისთანა ბალის გაშენებისთვის, მაგრამ რა გაუჭირდება გლეხის კურთხეულ მარჯვენას.

ხერთვისი სახაზინო სოფელია, მცხოვრები ორას კომლ კაცზე მეტია. სახელმწიფო მიწა ისე ცოტა აქვთ, რომ სათქმელადაც არა ლირს. თითო სულ ადამიანზე მოდიოდა ამ ოცდა ორის წლის წინად სამი მეათედი დესეტინისა, ან 720 ოთხ-კუთხი საუენი, ესე იგი ნახევარ დღიურზე ცოტა მეტი. ხერთვისელები ცხოვრობენ ხილის მოსავლით. აქა ხართბს ვაშლი, სხალი, თუთა, ალუბალი, კაკალი, ატამი, შინდი, ქლიავი. ხერთვისში სკოლაც არის, სადაც ჩვეულებრივ ქართულს არ ასწავლიან. ხერთვისელებს ძალზე აქვთ დავიწყებული ქართული.

ხერთვისი ისტორიული სოფელია, ძველად ციხე-ქალაქად ითვლებოდა. იგი იხსენიება ალექსანდრე მაკედონელის დროს როგორც მაგარი ციხე. 1588 წელს ათაბაგ მანუჩარ II ხერთვისი დაუთმო შაჰ-აბასს, მაგრამ შესანიშნავმა ქართლის მოურავმა გიორგი საკაძემ წართვა სპარსელებს 1624 წ. 1636 წ. თურქები დაე-

პატრონენენ ხერთვისს, ჩააყენეს რაზმი ენგიჩართა, ხოლო 26 ოქტომბერის 1828 წ. პასკუევიჩმა დაიჭირა ხერთვისი უბრძოლველად და მას აქეთ ხერთვისი საქართველოს შემოუერთდა.

ხერთვისის ლამაზ ციხეს ორი დიდი კოშკი აქვს, აღმოსავლეთისა და დასავლეთისა. კოშკების აშენების ამბავს ხერთვისელები ასე მოგვითხრობენ: თამარ მეფემ უბრძანა ორ კალატოზს აეშენებინათ ორი კოშკი. ერთი იყო ოსტატი და მეორე მისი შეგირდი. ოსტატს უნდა აეშენებინა აღმოსავლეთის კოშკი, ხოლო შეგირდს დასავლეთისა. მეფე დაპირდა, — უხვად დააჯილდოვებ, ვინც უფრო კოხტა და ლამაზ კოშკს ააგებსო. ოსტატი და შეგირდი გულმოდგინედ შეუდგნენ საქმეს. ჯერ არ დაემთავრებინათ ხელოსნებს მუშაობა, რომ ხალხმა ყაყანი დაიწყო, — შეგირდის ნაშენობა სჯობია ოსტატისათვის.

მართლაც, თამარს შეგირდის კოშკი უფრო მოეწონა და წინდაწინვე უხვად დააჯილდოვა ხელოსანი. საშინლად გაბრაზდა ოსტატი, იხელთა დრო და თავის შეგირდს კიბე გამოაცალა სწორედ მაშინ, როდესაც შეგირდი კოშკის თავს ასრულებდა. რა ექნა შეგირდი? რაკი უკიბოდ მირს ველარ ჩამოვიდოდა, ადგა და გაიკეთა ფთები ურიოდე დარჩომილ ფიცრიდან. ცული წელში გაირკო და გადაფრინდა ჯავახეთის მტკვრის მარჯვენა ნაპირზე. ეს მანძილი ბარე ოცი საუენია დასავლეთის კოშკიდან. ძირს ისე უხერხულად დაეშვა, რომ დაიჭირა ცულით და გარდაიცვალა. ამ ადგილს ეხლაც ეძახიან ხერთვისელები მსხვერპლის ადგილს. იგი გზის პირადაა \*).

\* ) ეს ლევენდა დამკედილია ივ. 3. როსტომაშვილის წიგნში.

**საქონლის მოშენება.** საქონლის მოშენებას დი-  
ლის ხალისით მისდევენ ჯავახნი, რაღაც იალალები საკ-  
მარისად მოიპოვება. საქონლის ხელი უფრო იციან ქურ-  
თინებმა და თარაქამამ. ქართველები, სომხები და დუ-  
ხობორები კი უფრო მუშა საქონლის მოშენებას მისდე-  
ვენ. თუმცა ესენიც, სადაც კი ადგილის მდებარეობა  
ხელს უწყობს, არ ერიდებიან ცხვრის ფარის და ცხენის  
ჯოგების გაჩენას. ცივი ქვეყანაა ჯავახეთი, მაგრამ კამე-  
ჩობასაც არ ილევენ, ცხენები ხომ ბლომადაა, განსა-  
კუთრებით დუხობორიაში. აქ უშველებელი ტანის ცხენი  
იცის, ძრიელ ლონიერია, მაგრამ საჯდომად არ ვარგა,  
რაღაც ტლანქია და ნელად მოსიარულე. იმაზე სასაკი-  
ლო არაფერია, როცა ახმახი დუხობორი ბოხოხა ქუ-  
დით და უშველებელ წალებით გადააჯდება უზარმაზარ  
ტანიან ცხენს და გააკენებს, თითქოს მიწის ძრააო, ისე  
ზანზარებს ხოლმე დედა-მიწა, როცა ხუკი-ექვსი ამის-  
თანა მხედარი ერთად მიაკენებს ცხენებს. აპა საღ ცე  
სურათი და საღ კოხტა, ტან-წერწეტა, გძელ ჩოხაში გა-  
მოკვაწრული მეგრელი, როცა იგი ჯირითობს, ან სხვის  
სანახავად ცხენს გააკენებს.

თითო ცხვარი ჯავახეთში იძლევა ესე ორ განაცს  
წმინდა შემოსავალს წელიწადში, ხოლო ძროხა 11 ვა-  
ნაოს. დუხობორებს სხვილი ჯიშის საქონელი ჰყავთ, ად-  
გილობრივ მკვიდრს კი უფრო წვრილი.

ჯავახეთის იალალებზე შორიდანაც მოუდით ცხვა-  
რი. ფშავ-თუშნი, ქიზიყელები, მთიულნი ხშირი სტუ-  
მარნი არიან ნიალის ყურისა, სამსარისა და აბულისა.  
ორ-სამ თვეს რჩება აქ მათი ცხვარი და აგვისტოს გა-  
სულს, ან ენკენისოვის ნახევარს უკან ბრუნდება. ათი-  
ათასობით ამოდის ნიალის ყურეზე შირაქიდან თუშები-

სა და ფშავლების ცხვარი და მრავალი მწყემსი. ტიტ-ველა ნიალის ყური და ქაჩალ-გორა, უნაღირო და უფ-რინველო, სამარესავით ჩუმი ზამთარ-შემოდგომით, ზაფ-ხულში ცოცხლდება და ურიამულით ივსება მისი ხევ-ხუვნი. ქართული სიტყვა-პასუხი, სიმღერა მწყემსისა მო-გაგონებს შუაგულ საქართველოს და გავიწყდება, რომ ეს ქვეყანა სხვისაა და არა ჩვენი.

**გზები.** ჯავახეთი უგზოობას ვერ დაემდურება. გვენიერი შარა გზები მიღის ახალქალაქიდან ერთი ახალციხეს, მეორე არტაანს, მესამე ბაკურიანსა და ბორ-ჯომს და მეოთხე გუმბრს (ალექსანდროპოლი). ძველი გზა ახალციხიდან ახალქალაქს ხიზაბავრაზე რომ აღიოდა და რომლითაც გაიარა 1837 წელს იმპერატორმა ნიკო-ლომზ პირველმა ეხლა გაუქმებულია. აღარც ის გზაა პატივში, რომელიც ტბის-ყურის ტბასთან მიღიოდა კო-ჯორზე და რომლითაც დაბრუნდა ტფილისში ერეკლე II, ასპინძასთან რომ სასტიკად დაამარცხა 1770 წ. 21 აპ-რილს, ზედ აღდგომა დღეს, ძრიელი ჯარი ოსმალოსი და ლეკებისა.

**ხალხი.** თურქების შემოსევამდე, მეჩვიდმეტე საუ-კუნის დასაწყისს, ჯავახეთი მარტო ქართველებით იყო დასახლებული. რაკი თურქებმა (ოსმალონი) დაიჭირეს საქართველოს ეს კუთხე, ხალხიც აირია და აჭრელდა. ყველაზე უწინარეს ჯავახეთს შემოეპარნენ ოსმალეთიდან ქურთები და თარაქამანი. როგორც ქურთი, აგრედვე თარაქამა მომთაბარე და ეული იყო, ესე იგი მოხეტია-ლე და ერთ ადგილას დიდხანს არა ჩერდებოდა. რაკი მოსწყინდებოდა ხოლმე რომელსამე ადგილს დგომა, აიყრებოდა, აიკრებდა ბარგ-ბარხანას და გასწევდა სხვა-

გან. თარაქამა და ქურთი უსწავლელი, ხეპრე, ოლანქი და გაუთლელი იყო.

როგორც ძველ სამშობლოში, ისე ჯავახეთში ეს ველური ხალხი მწყემსობას დაადგა. სადაც საქონელს მირეკავდა და დროებით ბინას დასდებდა, იმის სოფელიც იყო. სახლების აშენებით თარაქამა და ქურთი თავს არ იცხელებდა. წამოსჭიმამდა ალაჩუყს და შიგ არხეონად მოიკალათებდა. ესე სახელდახელოდ წამოდგმული ალაჩუყი, ანუ კარავი სავსებით აკმაყოფილებდა ქურთსა და თარაქამას და სხვას არას დაგიდევდა. ხენა-თესვას, ხეხილის გაშენებას, ან ბოსტნის მოყვანას თურქები და თარაქამანი სრულებით არ მისდევდნენ. წლითი-წლობით ასე უგემურად და ველურად ცხოვრობდნენ და მკვიდრ ქართველობაზე არავითარი გავლენა არა ჰქონიათ.

სამაგიეროდ ოსმალეთის მთავრობისაგან განწესებულ მოხელეებს დიდი გავლენა ჰქონდათ ჯავახეთის ქართველობაზე. ოსმალონი ფიქრობდნენ, ჯავახი მაშინ იქნება ჩვენი ერთგული და ჩვენგან განშორებას აღარ მაისურვებს, უკეთუ სჯულს გამოიცვლის და მაჰმადის სარწმუნოებას მიიღებსო. ეს ყალბი და შემცდარი აზრი და ფიქრი გახდა მიზეზად იმისა, რომ ოსმალოს მოხელეებმა სასტიკი ძალმომრეობა იხმარეს და ჯავახეთი გაამაჰმადიანეს. რაკი რჯული შეუცვალეს ჯავახს, სახელიც გამოუცვალეს და ქართველის მაგიერ დაუხახეს თათარი. ამის გამო დღევანდლამდე რჯული და ეროვნობა დომხალივით არეულია ჯავახეთში და საერთოდ გამაჰმადიანებულ საქართველოში.

რუსებმა რომ დაიკირეს ჯავახეთი 1828 წელს, ეს ძეელის-ძეელი კუთხე საქართველოსი თითქმის სრულე-

ბით იყო გადარჯულებული. მალულად, ჩუმად, თითო-ოროლა სოფელი თუდა მისდევდა ქრისტეანობას. გა-დარჯულებულ, ანუ გამაჰმადიანებულ ჯავახს, როგორც ზევით იყო მოხსენებული, არ მოეწონა რუსობა და მისი ბატონობა, მოშორდა სამშობლოს და გადიხვეწა ოსმა-ლეთს. დარჩენ მხოლოდ ჩუმი მართლ-მადიდებელი ქრისტეანენი, ქართველი კათოლიკენი სომხის ტიბიკო-ნისა, ქურთი, თარაქამანი და სულ მცირე ნაწილი გა-მაჰმადიანებულ ქართველობისა. დაცარიელებულ ჯავა-ხეთში რუსის მხედრობის სარდალმა პასკევიჩმა მოიყვანა. 1830 წ. აზრუმიდან დიდიალი სომხობა და დააბინავა ქართველების ნასოფლარებში.

ათის წლის შემდეგ, ესე იგი 1840 წ. რუსის მთავ-რობამ კიდევ მოუმატა ხალხი ჯავახეთს. რუსეთში სდევ-ნიდა დუხაბორებს, ანუ მწვალებლებს, თავისუფალ ცხოვ-რების ნებას არ აძლევდა და ადგა და შინ დაწუნებულ-ნი დაასახლა ჯავახეთს.

ამ გვარად დღევანდელ ჯავახეთში ცხოვრობენ: 1) ოსმალეთის ბატონობის დროიდან დარჩენილი ქურთე-ბი; 2) თარაქამანი; 3) აზრუმიდან მოსული სომხები; 4) რუსეთიდან გადმოსახლებული დუხაბორები \*) და 5) მკიდრი ქართველნი: მართლ-მადიდებელი კათოლიკე და მაჰმადიანი ქართველები. მართლ-მადიდებელი ქართველები სკხოვრობენ სოფ. საროს, აფნიას, გოგაშენს, ქილდას, ფრთენას, კოთელიას, ბარალეთს, ბალანთას, ჭიხარულას, ვარევანს, ჩუნჩხელს, მურჯახეთს, თოქს და ვარგავს.

\*) ჩვენში მთავარ-მართებლად თ. გოლიცინი რომ იყო, იმის დროს დაიწყეს ჯავახეთში მართლ-მადიდებელ რუსების დასახლე-ბაც. ჯერ ჯერობით ირი პატარა სოფელი გააშენეს.

სომხის ტიბიკონზე მდგომი ქართველი კათოლიკენი ცხოვრობენ ს. ხიზაბავრას, ხულგუმოს, ბავრას, კართიკამს და ტურქების. სომხის ტიბიკონს რომ ვახსენებთ, ეს იმას ნიშნავს, რომ ტომით და ჩამომავლობით ქართველი, იმ თუნდ ხიზაბავრელი, სომხურ ენაზე ისმენენ წირვა-ლოცვას. ესაა მიზეზი, რომ ამ ტიბიკონის ქართველს ხშითად სახელი სომხური აქვს, მაგალითად პავლეს მაგიერ ტერტერა (მღვდელი) პოლოსას არქემეს, გიორგის მაგიერ გეორქას და სხვა. მთავრობაც ხელს უწყობს ამ სიღუბჭირეს და მახინჯობას. ამ რამდენიმე წლის წინად ხიზაბავრელებმა ქვის ეკლესია ააშენეს და ზედ წარწერა გაუკეთეს ლათინურად და ქართულად. ვილამაც შეატყობინა მინისტრს, ხიზაბავრელები ქართველობას ჩემულობენ და საყდარზე ქართული წარწერა გააკეთესო. ფიცხელი ბრძანება მოვიდა პეტერბურგიდან: წაშალეთ ქართული წარწერაო. მეტი რა ჩარა იყო, ქვაზე ამოკრილი წარწერა კირით გაგლისეს.

ქართველი მაჰმადიანები სუნნის აღსარებისა პინადრობენ ს. ხერთვისს, შადრევანს, თოქს და სხვაგანაც. სოფელ ხერთვისს შერჩენია ქართული გვარები: ვაჩინაძე, გეგიძე. ს. თოქს \*) აბაშიძე და ხოსპიოს—ფალავანდი-შვილი. საზოგადოდ ჯავახეთის ქართველი მაჰმადიანი ან სრულიად აღარ ლაპარაკობს ქართულად, ან თუ ლაპარაკობს ისე ცუდად, რომ ძლივს მიხვდები მის ლაპარაკის აზრსა.

ჯავახეთის სხვა და სხვა აღსარების ქართველები

\*) ამ სოფლის ქართველობა ნახევარი მართლ-მადიდებელია, ნახევარი მაჰმადიანი. უკანასკნელები სუფთად ლაპარაკობენ ქართულად.

ერთის შეხედვით დიდად განიტჩევიან ერთმანეთისაგან. ჩატულობით, მიხერა-მოხვრით, ზნე-ხასიათით მართლ-მადიდებელნი წააგავან ქართლელებსა და კახელებს. გან-სხვავება მხოლოდ ისაა, რომ ჯავახი უფრო ეტანება გა-ნიერ შარვალს, ვიდრე ქართლელი. ცხვრის ტყავისაგან უშნოდ შეკერილი ქუდიც სილამაზეს ვერა ჰმატებს ამ ქვეყნის შვილს. არც წინდა-პაიჭი უფარგა ჯავახს, უშნო, ულამაზო და შეულებავია.

ქართველი მაჰმადიანი ჩატულობით, ზნე-ხასიათით და ჩვეულებით დიდად წააგავს თათარს. ქალები ქარ-ჩაკეტილები არიან და თუ საღმე მოუხდათ წასვლა პირს იბურავენ ჩადრით, ერიდებიან უცხო მამა-კაცთან საუ-ბარს და შეხევედრას. დიდი სირცხვილია და თავის მოქრაა ქალისათვის, უცხო კაცმა რომ დაინახოს პირახდილი. ქალი ვალდებულია უცხო მამა-კაცს რომ შეეფეთება, ან პირი დაიფაროს ჩადრით, ან უმაღლ ზურგი მიაქციოს და ჩაქუქდეს. ნასწავლ კაცს უნებურად გაელიმება, ამ უც-ნაურ და სასაცილო სურათს რომ წააწყდება. როგორ-ლაც არა გჯერა, რომ ჩადრში გახვეული, პირ-უკულმა ჩამჯდარი გზის პირას მანდილოსანი ქართველი ქალია. ქართველი, ქალია თუ კაცი, სითამამით განთქმულია, არავის ერიდება და აგერ აქ კი, ამ გამაჰმადიანებულ საქართველოში, სარწმუნოებამ ასე შესცვალა ჩვენი ზნე და ხასიათი. მარტო ბებერი დედა-კაცი და პატარა გო-გოები არა ჰმალავენ თავიანთ სახეს. კვირაობით ვყო-ფიოვარ ქართველ მაჰმადიანის ოჯახში და ქალისათვის თვალი არ მომიკრავს. უქალოდ კი ოჯახურ ცხოვრებას და სიამოვნება-მხიარულობას აჩრდილივით თან დასდევს ერთფერობა და უკემურობა, თითქოს ხალხში კი არა, საღლაც უდაბურ კუნძულზე ხარ მარტოდ მარტოვო.

ვიდრე ქართველ მაჰმადიანის ოჯახში ქალი არ გამეფ-  
დება, როგორც ყველგან განათლებულ ქვეყნებშია მი-  
ლებული, მანამდისინ ქართველ მაჰმადიანის ოჯახს შენ  
და ლაზათი არ მიეცემა. რაც უნდა კარგად შეაზავო  
საჭმელი, თუ მარილი აკლია, მაინც უგემური იქნება.  
სწორედ ასე ემართება ქართველ მაჰმადიანის ოჯახს, სა-  
დაც ქალი ეს მარილი ოჯახისა კარჩაკეტილია და მოკ-  
ლებული თავისუფლებას.

—

**თარაქამა და ქურთი, ანუ ქურთინი.** ესენი ჩაცმა-  
დახურვით ძრიელ წააგავან ქართველ მაჰმადიანებს სუნ-  
ნის აღსარებისას, ითვლებიან მაჰმადიანებად, მაგრამ არც  
თუ აგრე დიდად იხეთქავენ თავს რჯულისათვის. რო-  
გორც თარაქამანი (ყარა-ფაფახი, შავქუდა), ისე ქურთი-  
ნები მწყემსობას მისდევენ. ამ ბოლო დროს დაიწყეს  
მკვიდრად დაბინავება პატარ-პატარა სოფლებად და ხვნა-  
თესვას მიჰყვეს ხელი. ქურთინების სოფლებში სულ ორი-  
სამი კომლია. რაც უნდა დიდი სოფელი იყვეს ქურ-  
თისა, ათ კომლზე მეტი მაინც არ იქნება. მომეტებუ-  
ლი ნაწილი ყარა-ფაფახებისა ცხოვრობს ლეპისის გაშ-  
ლილ ველ-მინდორზე, არტაანის ოლქის გვერდით \*).  
ლეპისში მშვენიერი საძოვარი მინდვრებია და იცის ნო-  
ყიერი ბალახი. აქაა აშენებული მოწითანო თლილის ქვის  
საყდარი გავეთისა და დაუსრულებელი უზარ-მაზარი ეკ-  
ლესია კარზამეთისა. ეკლესიის შენობა დაუწყვია აწყვე-  
რის მღვდელ-მთავარს და კედლები რომ ამოუკვანია შე-  
სავალ კარის სიმაღლეზე, ლეპისი თურქებს დაუკერიათ  
და შენობაც შეჩერებულა. კარზამეთისა და გავეთის

\*) ეს კუთხე შეცდომით ახალციხის მაზრაზეა მიწერილი.

მშვენიერ ეკლესიებს ვინ უპატრონებს დღეს? თარაქაშაშ  
რა იცის მისი ყადრი და ფასი? საქართველოს ეკლესიას  
რაკი საკუთარი მამული და ქონება ჩამოართვეს, სილა-  
რიბის გამო, თავი აღარა აქვს რომ პატრონობა გაუწიოს  
და უამთა ვითარების წყალობით ორივე შენობა ოხრდე-  
ბა და ტიალდება.

ლეგენდა ამბობს, რომ თამარ დედოფლის ძროხის  
ჯოგი ლეპისის მინდვრებზე სძოვდათ და აქ მოწველილი  
რდე მილებით და ლარებით პირდაპირ ვარძიის გამოქვა-  
ბულ მონასტერში ჩადიოდათ. ისტორია მოგვითხრობს,  
რომ ვარძია დიდად უყვარდა თამარს და ხშირად აქ  
ატარებდა დროსათ.

**სომხები.** როგორც ზემოდ იყო ნათქვამი, სომხები  
გადმოასახლა რუსის მთავრობაშ 1830 წელს ჯავა-  
ხეთში. უფრო დიდი ნაწილი გადმოასახლებულ სომ-  
ხებისა აღიარებს წმინდა გრიგოლის სარწმუნოებას, ხო-  
ლო მკირე ნაწილი კათოლიკობის მიმდევარია. სომხე  
კათოლიკენი დგანან ს. ალასტანს, ეშტიას, კულიკაშს  
და კიდევ რამდენსამე სხვა სოფელს. ორთავე რჯულის  
სომხები მშვენივრად ლაპარაკობენ თათრულად. ქართუ-  
ლიც იციან იმათ, ვინც ქართველებთან დაბინავდა. მა-  
გალითად ბარალეთის სომხობა ისევე კარგად ლაპარა-  
კობს ქართულს, როგორც ქართველები. ისიც სათქმე-  
ლია, რომ ჯავახეთის და საათაბაგოს ქართველობა კარ-  
გად ლაპარაკობს თათრულს. იციან აგრედვე სომხური  
თუ სომხებთან ერთ სოფელში ცხოვრობენ. ერთ კუთ-  
ხეში მოქცეულ სხვა და სხვა ტომის ხალხს შუღლი არ  
მოსდით და მშვიდობიანად ეწევიან ცხოვრების კაპანს.

გრიგოლის სარწმუნოების სომხეს არ უყვარს სო-  
მხები კათოლიკე. იმათათ, ამბობენ გრიგოლელები, სტუ-

მარი არ უყვართ, სისუფთავეს არ ეტანებიან, ზნეობის სიფაქიზეს აგრე რიგად არ აფასებენ და საერთო, მეზობლურ ცხოვრებას გაურბიანო. ყველა თავის კერიისაცენ მიიწევსო.

ბავრისა, ხულგუმოს და კართიკამის და ტურქის კათოლიკეთ სომხური არ იციან. ზოგნი ამბობენ, რომ ეგნი ქართველები არიან და გადმოსახლდნენ არტაანის ოლქიდან (ველი), ზოგნი კი უჩვენებენ სომხეთის მუშა, საიდანაც ვითომ იგინი მოსულან. ველი ძველად ქართული პროვინცია იყო.

სომებ-კათოლიკეთ წირვა-ლოცვა სომხურად აქვთ და რომის წმ. პაპას ემორჩილებიან საეკლესიო საქმეებში. აი სწორედ ქართველი კათოლიკენი ამ სომებ-კათოლიკეთა ტიბიკონზე დგანან, ქართული წირვა-ლოცვა მოსპობიათ და გაუგებარ სომხურ ენაზე ისმენენ ღვთის მსახურებას.

ჯავახეთს მოსული სომხობა განთქმულია შრომის-მოყვარეობით. ტანთსაცმელი სომხისა ისეთივეა, როგორც ქართველ ჯავახისა, ხოლო სომებ ქალის ჩასაცმელი ცოტათი განსხვავდება ქართველ ქალის საცმელისაგან. სომხის ქალი იცვამს ლურჯ კაბას; კაბას წინიდან წითელი წინსაფარი აქვს აკრული. თავზე იხურავენ გასახოვარი ქალები ონშალურ ფესსა, ხოლო გათხოვილები ამავე ფესსა, მაგრამ ზედ ახვევენ შალ-ლეჩაქებს, შუბლზე იკეთებენ ჩვენებურ ჩიხტს, ოქროს ფულებით ახუნ-ძლულს.

**დუხაბორები.** ჩამომავლობით დუხაბორები რუსები არიან (ველიკოროსი). ამათ უარპყვეს წეს-რიგი რუსეთში გაბატონებულ მართლ-მადიდებელ ეკლესიისა, ხელი

აიღეს ბერებზე და მღვდელ-დიაკვნებზე, ნათლობა-ქორწინებაზე ეკლესიურის წესით და თავისებურად და-იწყეს ღვთის სამსახური. ღუხაბორებს დიდად სწამთ და უყვართ ღმერთი. მთავრობა გაუწყრა, როგორ თუ ბე-რები, მღვდლები, ეკლესია და ეკლესიური წესები არ გინდათო და აიღო და გადმოასახლა 1840 წ. ჯავახეთ-ში. მაშინ ჩვენი საქართველო რუსებს ისე მიაჩნდათ, როგორც დამღუპველი ქვეყანა, საიდანაც რუსი კაცი შინ ველარ დაბრუნდებოდა ცოცხალი. ეხლა რუსები ისე ეტანებიან საქართველოს როგორც ბუზი თაფლს და ბაწარ-ალებით მოდიან ჩვენში, საღაც ჩვენც ველარ ვე-ტევით და სივიწროვით გული გვიწუხდება.

ღუხაბორები დაასახლეს ჯავახეთის თოვლიან-ყინუ-ლიან მთის კალთებზე იმ განზრახვით, რომ გაწყვეტი-ლიყვნენ. მთავრობას სძულდა ურჩი, პირქუში და შეუ-პოვარი ღუხაბორი, მწვალებელი და უარის მყოფელი ეკლესიის გარეგან წესებისა, იმ წესებისა, რომელთაც დაპირარეს და სავსებით ჩანთქეს სული და არსება კაც-მოყვარე ქრისტეანობისა. მთავრობას იმედი გაუცრუვდა, ღუხაბორები არ გაწყდნენ, გაუძლეს სასტიკ ბუნებას და დღეს ისე კარგად ცხოვრობენ, რომ ქართველი დიდებას ვერ მოესწრობა ამგვარ კეთილ ცხოვრებას. მთავრობა-მაც ამ უამად აზრი შეიცვალა და ღუხაბორებს დღეს თავზე ხელს უსვამს, რაც უნდა იყვეს მაინც რუსები არიან და მაშასადამე ჩვენი სისხლ-ხორციო.

ღუხაბორებმა რვა სოფელი გააშენეს ჯავახეთის ალ-მოსავლეთ-სამხრეთის ნაწილში: ბოგდანოვკა, გორე-ლოვკა, ეფრემოვკა, არლოვკა, როდიონოვკა, სპასკია, ტამბოვკა და ტროიცკაია. ნაწილი მათი გადასახლდა ამე-

რიკაში რამდენიმე წლის წინად, მაგრამ არც ერთი და-  
სახელებული სოფელი სავსებით არ დაცარიელებულა.

სასიამოვნო სურათს წარმოადგენს დუხაბორების  
სოფელი. ქუჩები სწორე და განიერია; კოხტა, თეთრად  
შელებილი სახლები ლამაზად გამოიყურებიან. ეზო და  
კარმიდამო დიდია, სადაც ყოველგვარი ოჯახისთვის სა-  
ჭირო შენობაა მოთავსებული. ასე გასინჯეთ ჯავახეთის  
ნაზექი—წივა, ესეც კი კოხტად და მწყობრადაა დალა-  
გებული. დუხაბორთა სოფლები სისუფთავით, რიგიანი  
შენობებით და საერთო კეთილდღეობით დიდად განირ-  
ჩევიან ქართველ და სომეხ სოფლებიდან. იქ რომ სიმ  
დიდრე და კეთილი ცხოვრებაა, აქ სილარიბე და სიდუხ-  
ჭირეა.

დუხაბორები შრომის მოყვარე ხაღლებია. „მუშაობა,  
ამბობენ დუხაბორები, სხეულს აპატიოსნებს, ხოლო სულს  
ამხანაგობას უწევსო“. ქალი და კაცი ყველა მუშაობს.  
დუხაბორმა ათასგვარი ხელობა იცის, წალებსაც თვითონ  
იკერავს, ურემსა, ფურგუნს, გუთანს სულ თვითონ აკე-  
თებს. სახლის აშენებაშიაც არავის იშველიებს. სოფლი-  
სათვის ყველა საჭირო ხელობა გამოუვა ხელიდან დუხა-  
ბორს, ამის გამო მარტო ნემსისა და მარილის საყიდლად  
თუ წავა იგი ბაზარში.

დუხაბორები ზნეობით ძალიან მაღლა დგანან, არ  
იციან რა არის ქურდობა, მრუშობა-გარყვნილობა და  
სხვა. ერთმანეთს ხალისით ეხმარებიან მუშაობაში. გა-  
ჭირვებულსა და ღარიბს სასოფლოდ ეხმარებიან: მოუხ-  
ნავენ, დაუთესენ ყანას, მოუთიბავენ ბალახს, უყიდიან  
საქონელს და ამ სახით დაძაბუნებულ კაცს თეხზე და-  
ყენებენ ხოლმე.

დუხაბორები მისდევენ ხვნა-თესვას და საქონლის

მოშენებას. თვითონ რომ ზორბა ტანისა არიან, ცხენებიც უშეელებელის ტანისა ჰყავთ. ტვირთის საზიდად დუხაბორის ცხენს არაფერი შეედრება. რუსებს 1877—1878 წ. ომი რომ ჰქონდათ ოსმალებთან, დუხაბორები ჯარისთვის ტვირთისა ზიდავდნენ ფურგუნებით და დიდალი ფულიც იშოვნეს. აქედან დაიწყო მათი დაუშრეტელი კეთილდღეობა. დუხაბორებს მთავრობამ დიდი მამული და სათიბი ადგილები მიუზომა. პური და ქერი აგრე რიგად არ მოდის დუხაბორებში, მაგრამ თივა აუარებელი აქვთ.

### III

ფოცხოვი, ერუშეთი, არტანი, ჩუღურეთი, კოლა.

საქართველოს ეს ნაწილები დიდხანს ეჭირა ოსმალეთს. ოსმალეთის ბატონობამ არც ამ კუთხეებს დააყრა ხეირი, აქაც ისევე ამოვარდა ქრისტეანობა და ქართული, როგორც სამცხე-საათაბაგოს და ჯავახეთში. განსხვავება მხოლოდ ისაა, რომ ჯავახეთსა და საათაბაგოს დღევანდლამდე შერჩა ალაგ-ალაგ ქრისტეანობა და ქართული ენა. ჯავახეთის და განსაკუთრებით საათაბაგოს გამაჭმადიანებულმა ქართველებმა ჯერ კიდევ იციან ქართული ლაპარაკი და თუ მალე არ მივეშველეთ და კარგი ქართული სკოლები არ დავმართეთ სოფლებად, მალე აქაც დაივიწყებენ სამშობლო ენას. ფოცხოვისა და ჯავის-წყლის ხეობაში, კოლასა, არტანსა და ერუშეთს სრულებით ალარ იციან ქართული. დაბა-სოფლების სახელები, მთისა და გორაკებისა, ველ-მინდვრებისა, მდინარეებისა და ხევებისა ისევ ქართულია, მაგრამ გა-

დარჯულებულ აქაურ ქართველს აღარ ეყურება პაჟი  
მნიშვნელობა. სახელწოდება სოფლებისა: საიხვე, ზეგა-  
ნი, ნაქალაქევი, ცხრაწყარო, სამლერთი, წურწყაბი.  
ალი, ყველი, არსიანი (მთა), ჯაყის-წყალი. და სხვანი  
უცხო და გაუგებარი სიტყვებია აქაურ ქართველისთვის.  
იგი ვერ მიხვდება, რომ ეს სახელები და სიტყვანი ქარ-  
თულია და შექმნილი ქართველი კაცის გენიოსობით და  
კუუა-გონებით. ბუნდოვანად ახსოვს მარტო, რომ ოდეს-  
ლაც იყო ქართველი და ქრისტეანი, მაგრამ დღეს თა-  
ვის თავს უწოდებს თათარს, იცის თათრული ენა და  
ქართული და ქართველობა აღარაფრად ეპრიანება.

საქართველოს ეს ოთხი პატარა ნაკერი, ანუ კუთხე:  
ფოტევისა და ჯაყის-წყლის ხეობანი, ერუშეთი, არტანი  
და კოლა, ანუ გოლა რუსეთმა შემოიერთა უკანასკნელ  
რუს-ოსმალოს ომის გათავების შედევ 1878 წელს. ამ  
დროიდან ეს კუთხენი დაუკავშირდნენ საქართველოს გა-  
რეგნობით. მართვა-გამგეობა და სამართალი ქართულ  
ენაზე რომ შემოელო მთავრობას, უკეველია, რომ არ-  
ტანის ქართველები ამ ოცდა ათი წლის განმავლობაში  
ძრიელ დაუახლოვდებოდნენ მტკვრისა და რიონის ხეო-  
ბათა ქართველებს. შეისწავლიდნენ ძველ სამშობლო  
ენას და ერთმანეთისას გავიგებდით რასმე. ეხლა კი სულ  
სხვაა. არტანელებმა ვერც რუსული ისწავლეს და ქარ-  
თულზედაც ძველებურად მოწყვეტილები არიან. მაშასა-  
დამე ვერც ჩვენ და ვერც რუსებმა ვერ გამოვიყენეთ  
უკანასკნელი გამარჯვებული ომიანობა და მჭიდროდ ვერ  
შემოვიერთეთ სამასი წლის წინად მოწყვეტილი ქართვე-  
ლობა.

რუსის მთავრობამ დასახელებული ოთხი ნაკერი  
საქართველოსი შეაერთა ერთ ოლქად და დაარქვა არ-

დაგანის ოლქი. ამ ოლქში ოთხი საპოლიციო ნაწილია: არდაგანისა, ფოცხოვისა, ჩილდირისა და ლელისა. ამ გვარად ძველი ქართული სახელწოდება საქართველოს ამ კუთხისა შეიცვალა და ერუშეთ, არტან, კოლა და ფოცხვის მაგიერ არდაგანის ოლქი გაგვიჩინეს. ასე ნელ-ნელა იშლება და იფხიკება კავშირი წარსულსა და აწყ-ყოს შორის. არ უნდათ, რომ გაიდოს შემაგროებელი ტიდი წარსულსა და აწყუოს შორის.

არდაგანის ოლქი დიდი ქვეყანა არ არის, უჭირავს 4924.90 ოთხ-კუთხი ვერსი, ან 513010.42 დესეტინა (ქართული 1026020.84 დღიური), ესე იგი ტფილისის ვაჟერნიის თავაქმის შემვიდედის ოდენა ადგილი.

შინა წერილებში გვქმნდა მოხსენებული, რომ ქართველმა კაცმა ძრიელ ნაკლებად იცის სამშობლო ქვეყნის ვითარება, როგორც წარსული, აგრეოვე დღე-ვანდელი. გართლაც საოცარია, რომ არ გვიყვარს მოგზაურობა და ჩვენი ბედნიერი თვალით ნახვა სამშობლოს სხვა და სხვა კუთხისა, არ გვიყვარს გავიგოთ და ვიცოდეთ, თუ რანი ვიყავით გუშინ, ვინ ვიყავით, რას ვშვრებოდით და რას ვაკეთებდით. რაკი წარსული ნაკლებად ვიცით და დღევანდელ ვითარების გაგებასაც ნაკლებად ვეტანებით, ალბად ამითი თუ აიხსნება, რომ დღევანდელ ქართველს ღვაიური ცეცხლი არ უღვივის გულსა და მკერდში სამშობლო ქვეყნისადმი. აბა როგორ შეიძლება ადამიანს უყვარდეს კეთილშობილურ სიყვარულით ის, რაც არ იცის, რაც თვალით არ უნახავს. ამიტომ დიდად საჭიროა ზედმიწევნით ცოჯნა სამშობლოს ყოველი კუთხისა და გაგება მისის თავგადასავალისა. სამშობლოს სიყვარულის ბუნებრივ გრძნობას მხოლოდ მაშინ მიეკემა ღრმა საფუძველი, როცა შევიტყობთ და

გავიგებთ ყოველ მის წვლილს. სწორედ ასეთ საფუძვლიან ცოდნა-სწავლის შემდეგ იბადება და იზრდება ეროვნული სიამაყე, რომლითაც ასე მოაქვთ თავი დასავლეთ ევროპის ერებს. ევროპელმა მამაო ჩვენოსავით ზეპირად იცის თვისის სამშობლოს წარსული და დღევანდელი ვითარება, მისი ბედი და უბედობა, ავი და კარგი, ამაყობს კარგით და ამის გამო მხნედ და იმედიანად უყურებს მომავალს.

ჩვენ, ქართველები, დიდად ჩამოვრჩებით განათლებულ და კვეიან ევროპელებს სამშობლოს სიყვარულსა და სამშობლო ქვეყნის სამსახურში. რადგან ქართველობა დაჩაგრული ერია, ამიტომ ერთი ათად მეტი მხნეობაა საჭირო წარსულისა და აწმყოს შესასწავლად, თუ ერს ეროვნული თავმოწონება აკლია, იგი დიდხანს ვერ იბოგინებს ქვეყანაზე, გაქრება და ამოვარდება.

უკანასკნელ რუს-ოსმალოს ომიანობის შემდეგ (1877—1878 წ.), რუსეთმა შეიძინა: ბათუმისა, ართვინისა, ოლთისისა და არდაგანის ოლქები, ანუ ძველი ქართული სახელწოდება რომ ვიხმაროთ: ქობულეთი, აჭარა, შავშეთი, ლივანა, ნაწილი ჭანეთისა, კოლა, არტანა, ერუშეთი, ფოცხვის და ჯაყის-წყლის ხეობანი. ოსმალები ამ ნაწილს საქართველოსას ეძახდნენ და დღესაც ეძახიან ოსმალეთის საქართველოს. კარგა მოზრდილი ნაწილი ჭანეთისა ქალაქ ტრაპიზონაზდე და მღინარე ჭორობის სათავე დღესაც ოსმალეთის იმპერიის ხელშია. ჭორობის ხეობის სათავეში მკაფიოდებმა ქართველობამ სრულებით დაივიწყა ქართული და გადაგვარდა და მისი გამოტრიალება ძალიან ძნელია. მარტო ზღვის პირას დაბინავებული ჭანები, ანუ ლაზები ისევე ლაპარაკობენ, როგორც მეგრელები, ესე იგი ქართულად.

მაგალითად ქართველი იტყვის: მამამ იმას ცხენი მისცა; მეგრელი იტყვის: მუმაქ (ბაბაქ) თის ცხენი მეჩუ; ჭანი (ლაზი) იტყვის: ბაბაქ ემუს ცხენი მეჩუ. განა ეს განსხვავებაა? სრულიადაც არა. თვითოვეულმა ხეობამ და კუთხემ იცის საერთო ენის გადახრა და მცირედი შეცვლა, მაგრამ დედა-ენას მარც ამითი არა უშავდება-რა და დგას სალ კლდესაცით მაგრად.

რაკი ჭანეთი (შავ ზღვის პირადაა გაჭიმული ტრაპიზონიდან მოყოლებული ქ. ბათუმამდე, ჭოროხისა და მტკვრის სათავეების საქართველო და არსიანის მთის კალთებზე დაფენილი საქართველოს ნაწილები იყო მოწყვეტილი, ამის გამო ქართველი ნასწავლი კაცები აგრე რიგად არ ეტანებოდნენ ოსმალეთის საქართველოს. რაკი ჩვენები არ მიდიოდნენ იქითკენ, იქიდანაც არავინ შემოდიოდა საჩვენოში. შესწყდა ამნაირად მეზობლობა, ჩვენ იმათი აღარა ვიცოდით რა და იმათ ჩვენი და ვიყავით ასრე გაუგებრობით მოცულნი.

ბოლო მოელო ამ გაუგებრობას 1873 წელს. ამ წელს იმოგზაურა ოსმალეთის საქართველოში პოლკოვნიქმა გიორგი ნ. ყაზბეგმა და დიმიტრი ზ. ბაქრაძემ. ამათ გვამბეს ნახული და გაგონილი. მაშინ გავიგეო, რომ მდინადე ჭოროხის ხეობა ისეთივე წმინდა საქართველოა, როგორც მტკვრისა და რიონისა. რუს-ოსმალოს ომის შემდეგ იმოგზაურეს ოსპალეთის საქართველოში ე. გ. ვეედენბაუმმა და თ. სახოკიამ. ამათ ნაწარებიდან ხომ სრულებით დავრწმუნდით, რომ ჭოროხელები ჩვენი ღვიძლი ძმეული არიან, ხოლო სარწმუნოება აქვთ შეცვლილი და ქრისტიეს მაგიერ მაჭმალს აღიდებენ. დღეს ჭოროხის ხეობის და მტკვრის სათავის ნახვა და იქ მოგ-

ზაურობა ადვილია და მგზავრს არაფრის შიში არ მოე-  
ლის.

პროფესორი ნ. ი. მარტი და ისტორიკოსი ე. ს.  
თაყაიშვილი ხშირად ეწვევიან ხოლმე როგორც კოროხის  
ხეობას, აგრედვე მტკვრის სათავეს, სწავლობენ და იკვ-  
ლევენ შესანიშნავ ეკლესია-მონასტრებს, ციხე-ქალაქებს  
და ნახულსა და გაგონილს უზიარებენ ქართველობას.

აქ ჩამოთვლილ სწავლულთა და მოგზაურთა ნაამ-  
ბობიდან ნათლად სჩანს, რომ ქართული ენა სუფთად  
შენახულა ქობულეთში, აჭარაში (აჭარის წყლის ხეო-  
ბა), ლივანში და ქანეთში. კოროხის სათავეს აღარ ეს-  
მის ქართული. შავშეთი ზედ აკრავს არტანს, მაგრამ  
ქართული აღარ იცის თითო ოროლას გარდა. ერუშე-  
თი, არტანი, კოლა ჯავახეთის მოსამზღვრეა, მაგრამ აქაც  
აღარ იციან ქართული. ფოცხვისა და ჯაყის წყლის ხეო-  
ბამაც, თუმცა ზედ აკრავს საათაბაგოს, დაივიწყა სა-  
შობლო ენა.

### ა) ფოცხვი.

ფოცხვის ხევს, ერუშეთს და კოლა-არტანს (არტა-  
განის ოლქი) ითვლება 67.576 ქალი და კაცი. რადგან  
მთავრობამ ქართველ მაჰმადიანებს ეროვნული სახელი  
შეუცვალა და ხან თურქებს, ხან თათრებს უწოდებს.  
ამიტომ ძნელი გამოსაცნობია ჯერ-ჯერობით, თუ რა-  
დენი ქართველი ცხოვრის არტაგანის ოლქში მაჰმადის  
რჯულისა და რამდენია სხვა ტომისა. თითქმის ნახევარი  
ამ კუთხის მცხოვრებთა—28,823 ნაჩენებია როგორც  
თურქი. მაშ უნდა ვითიქროთ, რომ ეს ოცდა რვა ათასი  
რვაას ოცდა სამი ადამიანი ან სავსებით ჩამომავლობით

ქართველები არიან, ან მცირედად შერეულნი. რასაკვირ-ველია, ამათში ნამდვილი თურქები, უფრო კი ოსმალო-ნიც ერვიან.

არა ქართველთა შორის ყველაზე ბევრნი არიან ქურთები—11,317 ქალი და კაცი; ბერძნები—10,136; ყარა-ფაფახნი (შავ-ქუდიანები)—9,108; თურქენები—4711; რუსები—1702; სომხები—519 და აჭარლე-ბი—25.

სხვა და სხვა ტომის ხალხი ძრიელაა აჭრელებული. არდაგანისა, ჩილდირისა და ლელის საპოლიციო ნაწილებში, ხოლო ფოცხოვში, სადაც ითვლება 14,366 სული, მარტო მაჰმადიანი ქართველობაა. ქურთები სულ-რაღაც 389 სულია, რომელნიც აქაც თავიანთ საყვარელ ხელობას ადგანან, ესე იგი მომთაბარობენ და საქონელს. მწყემსავენ.

ფოცხოვი მთა-გორიანი ქვეყანაა, სწორედ ისეთი-ვე, როგორიცაა ქვაბლოვანი საათაბაგოსი (ახალციხის მაზრა). ჰავა და ბუნება მშვენიერია, მთის კალთები და ფერდობნი შემკულნი ტყითა: ფიჭვით, ნაძვით, წიფელით და რცხილით. სოფელ ბადელადან მოკიდებული არსიანის მთამდე, საიდანაც იწყობა შავშეთი და აჭარა, ტყებშირია, ხოლო მთის მწვერვალნი სდგანან ტიტვლად. აქ შაფხულობით ერეკებიან სხვილფეხ საქონელს და ცხვარს. საბალახოდ.

ფოცხოვში ორი უმთავრესი წყალია, ფოცხვისა და ჯაყისა. ამათ ერთვის მრავალი ტოტი, გამომდინარე-ერუშეთის და რასიანის მთებიდან. წყლის პირებზე, ხე-ვებსა და ლელეებში სახნავი მიწებია და ხეხილის ბაღები. აქ მოჰყავთ პური, ქერი და სიმინდი. ხილეულობა-ში ყველაზე კარგად ხარობს ვაშლი.

ხენა-თესვა, საქონლის მოშენება ისეთივეა, როგორც  
ქვაბლიანში. ფოცხოველი აბეზარი არაა, მშვიდობიანი  
ხასიათისაა და ძალზე ეტყობა დაჩაგრულობა. ქვაბლია-  
ნელის სითამამეს და სიამაყეს აქ ვერ იპოვნით.

ფოცხოვს სიგრძეზე სჭრის ქვით დაფენილი გზა.  
იგი იწყობა ქ. ახალციხესთან, გაივლის ს. ვალეს, ბა-  
დელას, დამავლეს, მხარს აუკცევს დიგურს და ხანიო-  
რის ქედით გაემართება არტანისკენ. ხანიორის ქედს  
იქით ტყეები აღარ მოიპოვება. ძველად ფოცხოვიდან  
გზები გადადიოდა ერუშეთს, შავშეთს და აჭარას. დღე-  
ვანდელ ქვა-ფენილ გზას ცუდად ინახავენ, თუმცა ეტ-  
ლები დადიან და ჯარის მიმოსვლაც საძნელო არ არის.

უფრო თვალსაჩინო დაბა-სოფელნი ფოცხოვისა ესე-  
ნი არიან: დამავლე, აგარა, დიგური, ჯუმათელი, წურ-  
წყაბი, ზედა-წმინდა, სტეფან-წმინდა, ბადელა, არილა,  
პეტუბანი, ქალის-წყალი, ყველი, ალი, გიორგის-უბანი,  
საკირე, ვარხანი, სათლელი, ჭანჭახი, ჭილვანა, შუა-  
წყალი, ობოლა, საიხვე, ხეოთი, ლვინია, მერე, წინსა-  
თიბი და სხვა.

ს. დამავლეში ზის ფოცხოვის ნაწილის უფროსი და  
აქვეა მოთავსებული საპოლიციო, სამოსამართლო და  
სააღმინისტრაციო დაწესებულებანი. დამავლედან ახალ-  
ციხემდე ძლივს იქნები ოცდა ათი ვერსი, ამ სიახლოვის  
გამო აქაურებს დიდად ეადვილებათ ახალციხესთან საქ-  
მის დაჭერა, მგრამ რაკი ფოცხოვი აღმინისტრატიულად  
არტანზეა მიწერილი, იქ უნდა იარონ და იქიდან ქ.  
ყარსს. ეს კიდევ რაა, ვისაც საქმე გაუჩნდება საოლქო  
სასამართლოში, ერევანს უნდა წავიდეს.

დამავლედან ს. დიგურამდე სულ ხუთი-ექვესი ვერ-  
სია. ეს პატარა სოფელი (62 კომლი) იმითია შესანიშ-

ნავი, რომ აქ არსებობს მაჰმადიანთა სკოლა, საიდანაც ლვთის მსახურნი გამოდიან. სკოლაში ასწავლიან არა-ბულს და სამღრთო-რჯულს. მოწაფენი დიდხანს სწავ-ლობენ და ზეპირობენ ყორანს, მაგრამ რიგიანად და სა-ფუძლიანად ვერ ითვისებენ ვერც არაბულს და ვერც ყორანს. ხუმრობით დიღვირის (ასე ეძახიან ახალციხე-ლები) სკოლას აკადემიას უწოდებენ, მაგრამ ვაი ამ აკა-დემიას, ათი-თორმეტი წლის სწავლის შემდეგ შევირდე-ბი მიღიან სტამბოლს და იქ ამთავრებენ სწავლას. საა-თაბაგოს, ფოცხოვისა, ერთშეთის და კოლა-არტაშის მო-ლები დიღვირის აკადემიკოსები არიან, თითო-ოროლას გარდა.

შევირდები მასწავლებლებს ფასს არ აძლევენ. ათას-ში ერთხელ მათი დედ-მამანი მცირე ძლვენს თუ მიართ-ხევენ ოსტატებს. შევირდები შინიდან მოტანილ საგზ-ლით საზრდოობენ, ან არა და მათხოვრობით გამოდიან. ასევე ირჩენენ თავს თვით სტამბოლშიაც. კვირის-კვი-რამდე დადიან სოფლად, მღერიან სამღვთო საგალობ-ლებს, ცოტა რამ სანოვაგეს შოულობენ და ამ საგძ-ლით ბრუნდებიან სტამბოლში. როცა გამოელევათ საჭ-მელი, ხელ-ახლა გაემგზავრებიან ხოლმე სოფლად საზრ-დოს მოსაკრებად. ადვილად მიხედებით, რომ ამ გზით შეძენილი მეცნიერება იგრე რიგად ხელსაყრელი არ იქ-ნება. ეს კია სათქმელი, რომ ამ სახით აღზრდილი მოლ-ლა რჯულის დიდ და შეურყეველ სიმტკიცეს იჩენს ცხოვრებაში. მაჰმადის რჯულზე უკეთესი არა მიაჩნია-რა ვერ დააჯერებ, რომ ცხონება სხვა რჯულის შემწეობი-თაც შეიძლება.

დიღვირში (დიგური) ცხოვრობდა მდიდარი და გავ-ლენიანი ბევრი შაქირი, ნათესავი ფეიზულა-ბეგ ათაბაგ-

ქვაბლიანელისა \*) ამ რაზდენიშე წლის წინად შაქირ-ბეკშა მიყიდ-მოყიდა თვისი ქონება, ყველაფერი ფულად აქცია და სახლობით გადასახლდა სტამბოლს. ლონიერნი და ხმის ამომღებნი უცხოეთში მიდიან და შინ აღარავინ რჩება. დაჩაგრულსა და უმწეო ქვეყანას ვინდამ უნდა უპატრონოს, თუ ძლიერნი ამა ქვეყნისანი უცხოეთში გადიხვეწებიან?

ფოცხოვის ხეობანი სავსეა ციხე-კოშკებით და ეკლესიებით. კარგად შენახულან ეკლესიები: საოლელში, ზენდარში, მერეში და ალში. მრავალი მათგანი დანგრეულია. ვერანა ხეოსმანის ეკლესიას ისე აქვს მოხვეული ბუჩქები, რომ სულ აღარ სჩანს პატარა ეკლესია და ვერა გზით ვერ მიუდგები შენობას. დანგრეული ეკლესიები არიან: ორტელში, ლვინიაში, პეტუბანში, ჭაბორიაში, ჯაჯუნში, მარცვალეთში, სეჯაში, ხეოთში, ვარხანში, ხანუმისში და აგარაში.

ციხე-კოშკებითაც მდიდარია ფოცხოვი. დიდ-ჭარალის მაგარი ციხე ფოცხოვშია, მაგრამ ეს სოფელი ეხლა მიწერილია ახალციხეზე. აგრედვე მიწერილია საათაბაგოზე ს. ჯაყისმანი, სადაც შესანიშნავი ციხეა და თლილი ქვით ნაგები ბან-ჩამონგრეული ეკლესია ჭართულის წარწერით ხუცურად.

ციხეთა შორის შესანიშნავია ყალა-ბოინი და ჭანჭანი. ისტორიაში განთქმული ყველის ციხე სულ გავერანებულია და ოხრად გდია \*\*).

\*) განსვენებულ ფეიზულა-ბეკს თავი მოსწონდა თავის ჩამომავლობით, უყვარდა ჭართველობა, ჭართული თეატრი და არ ერი-დებოდა ქართველობას. ჭართველი საზოგადოება კარგად იცნობდა ფეიზულა-ბეკს.

\*\*) 1080 წელს მეფე ვიორგი II თავის ჯარით იდგა ყველის-ციხეში. თურქები დაუცნენ მეფეს და დამარცხეს. მეფე ყველიდან აჭარას გადავიდა.

ყალა-ბოინი (კლდის თავი) ამართულია ჯაყის-წყლის ორთავ ნაპირას, იქ სადაც იგი ერთვის ფოცხვეს. ციხე ამაყად დაჟყუჩებს ორთავ ხეობას და წარსულში, როცა განუწყვეტელი ომი და მტრის თავდასხმა აოხრებდა საქართველოს, ალბად ეს მაგარი ციხე ერთგულ სამსახურს და დარაჯობას უწევდა ფოცხოვს. ვახუშტის აზრით ეს ციხე ეკუთვნოდა ჯაყელებს, შემდეგ მესხეთის და საათაბაგოს ათაბაგთ.

ყალა-ბოინის სიახლოვეს მეორე უფრო დიდებული ციხეა ს. ჭანჭახში. ზემო და ქვემო ციხე მდინარის ერთ პირზეა, ხოლო მესამე წყლის მეორე ნაპირზეა. მათ შორის უეკელია ასაწევ-დასაწევი ხიდი იქნებოდა. ჭანჭახის ახლო-მახლი მრავალი დანგრეული ეკლესიებია: სოფელ საკირეში, ენგიქევში (ახალსოფელში) და სხვა.

ს. საკირეს ახლო სოფელ აღმი დღევანდლამდე გადარჩა მშვენიერი ეკლესია, ნაგები თლილის ქვით, მავრამ მალე ხელიდან გამოგვეცლება, რაღვან სოფლებში მოხსნეს თლილი ქვეპი და წაიღეს ჯამეს სახლების საშენად. ზოგი ქვა წყლის მილებად უხმარით. დასუსტებული კედლები და სვეტები გუმბათის სიმძიმეს ვეღარ გაუძლებენ და გუმბათი მალე ჩამოწვება. წარსულის დიდების ნაშთი—აღის კოხტა ეკლესიაც მალე დაინგრევა უპატრონობით და უზრუნველობით. ეკლესიას მხატვრობაცა აქვს. დახატულია დედოფალი და ჭაბუკი მხედარი.

ყველის ციხის სიახლოვეს არის სოფელი წურწყაბი. ბატონიშვილი ვახუშტის სიტყვით, წურწყაბში ყოფილა ეკლესია გუმბათიანი, კეთილ-მშვენიერად ნაგები

და დიდი. აქა მჯდარა ეპისკოპოზი, რომელიც განაგებდა სამწყსოს ახალციხის წყლიდან არსიანის და ერუშეთის მთებამდე და მდ. მტკვრამდე.

ამ მშვენიერ საკათედრო ეკლესიისა დღეს კვალიც აღარ მოსჩანს. წურწყაბელებს დაუქცევიათ და თლილი ქვით ჯამე \*) თუშენებიათ — აღმოსავლეთის კედელი ჯამესი აშენებულია ეკლესის კედელზე. ამ ცოდვის გასაჯარწყლებლად წურწყაბელები ამბობენ, რომ არც ჩვენ წინაპრებს არ ახსოვთ, რომ აქ ოდესმე ეკლესია ყოფილიყვესო. ჩვენ იმ ოსმალთა ჩამომავალნი ვართ, რომელთაც ეს ქვეყანა დაიმორჩილესო...

თურქ-ოსმალების უძმოსევამ მეჩეთიდმეტე საუკუნის დასაწყისს ასე წაახდინა ზემო-ქართლის ეს მშვენიერი კუთხე. ფოცხოვს დაუკარგა ქართული ენა, ეს უპირველესი განძი ყოველის ერისა და დღევანდელი ფოცხოველი, შეუგნებელი და ბნელით მოცული, წარსულ დიდების ამაგსაც და ნაშთებსაც აღარ ინდობს. მაგრამ მოხდება ის რაც მდინარეს ემართება ხოლმე, იგი ნარჯალს არა ჰყარგავს. ცოტაოდენი სიმხნევე და დაფერფლილი ეროვნული აზრი ხელ-ახლა აყვავდება.

### ბ) ერუშეთი, არტანი, კოლა, ჩუღურეთი.

მტკვრის სათავის ქვეყნება, ან ზემო ქართლი, ცირუ-შეთი, კოლა და არტანი ძველის-ძველად ერთ საერის-თოს შეადგენდა. ამ საერისთოს ეკუთვნოდა აგრედვე ჯავახეთი. ბაგრატიონთ გვარი რომ გამეფდა საქართველოში (VII საუკუნე), ზემო ქართლი გაიყო ორ საერის-

\*) ჯამე მუსულმანთა სამლოცველოა.

თოდ: წუნისა და არტანისად. ერუშეთ-კოლა-არტანის, თავი ქალაქი იყო არტანი, დღევანდელი არდაგანი. სამ-შობლო ისტორია ამბობს. რომ არტანი ააშენა მცხეთის მამასახლისის შვილმა ჯავახმა.

ერუშეთს ეჭირა მტკვრის მარცხენა ნაპირი არტა-ნიდან მოყოლებული მონასტერ ვარძის სირონამდე. მტკვრის მარცხენა ტოტი სამღერეთის, ან ერუშეთის წყალი შუაზე ჰყოფს ერუშეთს. რუსულ ქარტაზე სამ-ღერეთის სახელით არც ერთი მდინარე არაა მოხსენებული. გაჰქრა ეს წმინდა ქართული სახელი, როგორც ბევ-რი რამ ქართული. სოფელ ნაქალაქევის ახლოს აღნიშ-ნულია რუსულ ქარტაზე მდინარე ხანის-წყალი (ჩანი-ჩაი) და ალბად ეს მდინარე თუა ისტორიული სამღერე-თის, ან ერუშეთის წყალი \*).

ერუშეთის სამზღვრებია: აღმოსავლით მტკვარი, და-სავლით არსიანი, ჩრდილოთ ერუშეთის მთა და სამხრით არსიანის შტო.

არტანისა: აღმოსავლით ყარსის მთის შტო, დასავ-ლით არსიანი, ანუ ქვა-ურილი, ჩრდილოთ მცირე შტო არსიანისა და სამხრით მცირე მთა ფოსოს (ჩულურეთი) და კოლას შორის.

კოლასი: აღმოსავლით ყარსის მთა, დასავლით ქვა-ურილი, ჩრდილოთ მცირე მთა არტანისა და კოლას შო-რის და დასავლით იგივე ყარსის მთა, რომელიც იწყო-ბა ქვა-ურილიდან და მიემართება ჯავახეთის ნიალის-ყურამდე.

\*) კარგს იზამენ არდაგანის რ ლქში მცხოვრები ქართველე-ბი. თუ აიღებენ ვახუშტისა და რუსულ ხუთ ვერსიან ქარტებს და შედარების შემწეობით აღადგენენ ძველ ქართულ სახელწოდებას მოებისას, მდინარეთა და დაბა-სოფელთა და გამოუგზნენიან ამ ძვრფას ცნობებს „ნაკადულს“ ჩვენთვის გადმოსაცემად.

არტანს და კოლას მტკვარი ზედ შეა წელზე ჩა-  
მოუდის. ყარსისა და ქვა-ყრილის მთებიდან მრავალი  
დიდი და პატარა ხეობანი ერთვის მტკვარს. მტკვარი აქ  
მჩქეფარე და მარტივი, მოდის ღრმად დაცემულ ხრამში.  
ალაგ-ალაგ შევიწროებული კლდეთაგან ისე ჰქონდეს, რო-  
გორც განთქმული თერგი და ზვირთებს ისე მაღლა ისვ-  
რის, გეგონება ზეცას უნდა ააწვდინოს ქაფად ქცეული  
ზვირთებით. მშვენიერი სანახავია გაზაფხულზე აღიდებული  
მტკვარი! სიკოცხლით სავსე იგი წააგავს მაშინ ფაფარ-  
აყრილ ლომს.

წინად, საქართველოს მეფეების დროს და შემდეგ  
ოსმალების ბატონობის დროს, ერუშეთ-კოლა-არტანს  
საკმარისი გზები ჰქონდა. არსიანის მთით ერუშეთიდან  
გზები მიღიოდა შავშეთს და ტბეთს, ხოლო ერუშეთის  
მთით ფოცხოვს და სამცხეს. არტანიდან გზა გადადიოდა  
ბანას და არტანუჯს (რუსები არდანუჩს ეძახიან) ქვა-  
ყრილის ქედით. კოლიდან გზა მიღიოდა ყარსის აღგი-  
ლებში.

დღევანდელ არდაგანის ოლქს ორი ქვაფენილი (შოს-  
სე) გზა აქვს. ერთი მიღის ქ. ახალქალაქიდან და გაივ-  
ლის სულდას, კარწახს, ზურზუნას და შედის არტანში,  
ხოლო მეორე იწყობა ქ. ახალციხესთან, გაივლის ფოც-  
ხის ხეობას, გადალახავს ხანიორის უღელტეხილს და  
შემდეგ ჩადის არტანს. აქედან გზა გადადის ქ. ოლთის-  
ში, რომელიც ზედ ოსმალეთის სამჩღვრის პირზე სდევს.

ბუნება ერუშეთ-კოლა-არტანისა ისეთივეა როგორც  
ჯავახეთისა. რადგან ამ ქვეყანას მაღალი მდებარეობა  
აქვს, ზამთარში დიდი თოვლი მოდის და ძრიელ დიდ  
სიცივეს იჭერს. აქაური ყინვა არაფრით ჩამოუვარდება  
რუსეთის მკაცრ სიცივესა და ყინვა-ტეხერას. მაღალ მდე-

ბარეობის წყალობით ზაფხულში ჰავა გრილია, ხოლო ხანდახანობით დიდი მწვავი სიცხეები იცის. საზოგადოდ აქაური ჰავა სალი და მარგებელია. ციებ-ცხელება გაგრნითაც არ გაუგონიათ აქაურებს.

ჰავახეთსავით აქაც მოიპოვება ტბანი. ცველაზე დიდი ტბა ჩილდირისაა, რომელსაც უჭირავს 11.953 დესეტინა, ან 23,906 კართული დღიური. ჩილდირის ტბა განთქმულია კალმახით. აქაური კალმახი დიდი ტანისაა და მეტის-მეტად გემრიელია. სანახავიდაც საამურია, რადგან ბლომად აყრია ზურგსა და გვერდებზე დიდი წითელი წინწკლები. ჩილდირის ტბაში დაჭრილი კალმახი ქალაქშიაც კი მოაქვთ გასასყიდად.

ქართულად ჩილდირის ტბას პალაკაციის ტბა ჰქვიან.

ერუშეთ-კოლა-არტანი უვენახო და უხილო ქვეყანაა. ვერც იხეირებს აქ ვაზი და ხეხილი, კიდეც რომ გააშენონ, რადგან მდებარეობა ქვეყნისა მაღალია და ზამთარში სასტკი სიცივეები იცის. ხენა-თესვის გარდა მცხოვრებნი მისდევენ საქონლის მოშენებას. ამ ხელობას ხელს უწყობს უხვი იალაღები. არტანისა და კოლის ვაკენი და ველ-მიდორნი, აგრეთვე უტყეო მთანი გაზაფხულსა და ზაფხულში უხვად იმოსება ნოკიერის ბალახით, ყვავილით და დიდალ საქონელს აპურებს და ასაზრდოებს. საბალახოდ ცხვრის ფარები ამოჭყავთ არტანის მთებზე თუშებს, ქიზიცელებს და დიდ-თონელებებს. სოფ. დიდ თონეთს (მანგლისის ახლოა) საკუთარი საბალახო აქეთ არღაგანის ოლქში. გენერალ პასკევიჩს უწყალობებია ეს საძოვარი თონელებისთვის და დღევანდლამდე მაგრად უჭირავთ თავისი საკუთრება და არავის ანებებენ.

გადარჯულებულ და გადაგვარებულ არტანს რომ

ეწვევიან ხოლმე ზაფხულობით თუშნი და ფშავნი, ქიჩი-  
ყელნი და დიდ-თონელები, მარტო მაშინ ედება ამ ქვე-  
ყანას ცოტაოდენი ელფერი ქართველობისა. სხვა დროს,  
შემოდგომა-ზამთარს და გაზაფხულს აღარსად მოისმის  
ქართული ხმა და მარტოოდენ თურქ-ოსმალური სიტყვა-  
პასუხია ყველგან გაბატონებული.

ერუშეთ-კოლა-არტანის საქონელი დიდი ტანისაა..  
აქაურ საკლავ საქონელს გასასყიდად ტფილისში ჰეზავ-  
ნიან და ძალიან ხშირად იმერეთსაც ახალციხის გზით,  
ზეკარის ულელტეხილით და ბალდადით.

კოლა-არტანს სრულებით აღარაა ტყეები, არც ის  
ვიცით, იყო როდისმე აქ ტყეები თუ არა. ალაგ-ალაგ,  
ისიც წყლის-პირებზე მოიპოვება არყნალის ბუჩქები. ერუ-  
შეთში დღესაც არის ტყეები, მაგრამ ძალიან ცოტა.  
ასორმოცდა ათის წლის წინად აქ ბლომად ყოფილა  
ტყეები, მაგრამ გაუჩეხიათ და ქვეყნისათვის დაუკარგავთ  
დამამშვენებელი სამოსელი.

უტყეობის და უშეშობის მიზეზით აქაურები პურის  
გამოსაცხობად, საჭმლის მოსახარშად და სახლის გასათ-  
ბობად ხმარობენ წივას. როგორც ჯავახეთში, ისე აქ  
თვითოეულ სახლის წინ ამართულია წივის ზვინები, რო-  
მელნიც ისედაც ულაზათო მიწურ სახლებს უფრო მე-  
ტად აუშნოებენ და ლაზათს უკარგავენ.

ერუშეთ-კოლა-არტანის უფრო შესანიშნავი დაბა-  
სოფელნი და ქალაქნი ესენი არიან. ერუშეთისა: სამლე-  
რეთი, ნაქალაქევი, ერუშეთი \*), ველი, წყაროსთავი,  
ვაშლობი, კანარბელი, კართანაყევი და სხვა. ისტორიულ  
სამლერეთის სახელი აღარ შენახულა. ჩვენის ფიქრით  
სამლერეთის ადგილზე სოფელი ველი უნდა იყვეს. კარგა-

\*) ერუშეთი და სამლერეთი რუსულ ქარტებზე აღარა.

ხანია ამ სოფლიდგან გადმოსახლდნენ აქაური ქართველები ჯავახეთს და დასახლდნენ ოთხ ნასოფლარში: ბავრაში, კართიკამში, ხულგუმას და ტურცხეს. სარწმუნოებით კათოლიკენი არიან და უკირავთ სომხის ტიბიკონი. შინ თათრულად ლაპარაკობენ, მაგრამ ვაი ამ თათრულს, ნახევრად ქართული სიტყვებია, რასაკვირველია დამახინჯებული. ურევია აგრედვე სომხური სიტყვები. აქაური ახალგაზღობა ძრიელ ეტანება სომხურს. ს. კართიკამის მოძღვარი მამა იგითხანოვი კარგი ქართულის მცოდნეა.

ნაქალაქევი ძველად ქალაქი იყო. ბატონიშვილი ვახუშტის სიცოცხლის დროს, მეთვრამეტე საუკუნის შუაწელს, დაბად ქცეულა. დღეს უბრალო, უხეირო სოფელია, სულ რაღაც  $70 - 80$  კომლიანი. ქართულს სულ აღარავინ ლაპარაკობს. ნაქალაქევს ყოფილა ეკლესია მშენებირი, გუნდათიანი, აშენებული, საქართველოს მეფე მირიანთან ბიზანტიის მეფე კოსტანტინე დიდის გამრავზავნილ ელჩისაგან. ელჩს დაუსვენებია ეკლესიაში სამჭვალავი ქრისტესი (ლურსმანი). ნაქალაქევს იჯდა ეპისკოპოზი ერუშეთისა და არტანისა. ვახუშტის დროს ეკლესია მთელი და დაურიღვეული იყო, ხოლო ცარიელი. მაშასადამე მეთვრამეტე საუკუნის ნახევარს ოსმალებს ქრისტიანობა ამოუგდიათ და ლვთისმსახურნი გაუწყვეტიათ.

ს. წყაროსთავი ჯავახეთს ზედ აკრავს კარგად შენახული კოხტა ეკლესია ამშვენებს ლარიბსა და უსლუთაობით სავსუ თურქებით დასახლებულ წყაროსთავს. რუსულად აქაურებს თურქები ჰქვიან. შეიძლება ბევრი მათგანი ქართველის ჩამომავალი იყვეს.

არტანის ნაწილში უფრო საყურადღებოა თვით არტანი ზა შემდეგი დაბა-სოფლები: ჯინჭრობი, მაჭუეთი,

ნუნუსი, დუღუნა, ბალდალი, ახაშენი, ჯარის-ხევი, ორუ-შეთი (ალბად ეს ძველი ერუშეთის ნაშთია). სახელები ქართულია, მაგრამ შიგ ქართული აღარა ყრია-რა.

არტანი პატარა ქალაქია და არც ძევლად ყოფილა დიდი, აშენებულია მტკვრის დასავლით კიდეზედ და ჰქონ-და მაგარი ციხე. არტანს იჯდა ერისთავი არტანისა და კოლისა. აქვე იყო ეკლესია გუნბათიანი, დიდ-წენი, მშვენიერი და როგორც სხვა შრავალი ეკლესია მტკვრის სათავისა და ცარიელდა მეთვრამეტე საუკუნეს.

არტანის ახლოს რუსებმა გააშენეს ორი სოფელი: მიხაილოვკა და ნიკოლაევკა.

ძველებური კოლა გაჰქრა, ამ სახელით არც ერთი დაბა სოფელი არაა ღელის ნაწილში. ქართულ სახელიანი სოფლები აქაც მოიძებნება, მაგალითად: დადეცი, ოთხი საყდარი, ხევა, ოკამი (დუშეთისა და ახალ-ქალა-ქის მაზრებშიაც არის), პანკისი (თიანეთის მაზრაშიაც არის), დადაშენი.

როცა საქართველოს საკუთარი მეფენი განაგებდნენ და უვლიდნენ, კოლა მცირე ქალაქი ყოფილა. ამ ეამაღ ნასოფლარიც აღარ მოიძებნება კოლას აღვილას. ეს სა-ხელი მოიპოვება ოვეთში, ქეშელთის სამამასახლისოში, გორის მაზრაში.

ოსმალონი რომ გაბატოდნენ საქართველოს ამ ნა-წილში კოლაში დასვეს ფაშა და სახელად უწოდეს კო-ლას ფაშა. იგი ემორჩილებოდა ახალციხის ფაშას. კო-ლას ზევით, მტკვრის კიდეზედ ს. დადეშს იყო დიდ-მშვენიერი და გუმბათიანი ეკლესია. აქ იჯდა ეპისკოპო-ზი სრულიად კოლისა (დადაშნელი). ტახტი დადაშნე-ლისა გაუქმებულა ვახუშტის დროს. მოხსენებული აქვს ბატონიშვილ ვახუშტის სოფელი ქუმურლო, საღაც ყო-ფილა მაგარი და შეუვალი ციხე. ბატონიშვილის აზრით ქუმურლოს ციხე ბეჭის-ციხეა.

კოლელები იგივე ჯავახები არიან. მეთვრამეტე საუკუნის ნახევარს ნახევარზე მეტს რჯული გამოუცვლია. მას შემდეგ გაიარა 150 წელიწადმა და კოლაში სრულიად ამოვარდა როგორც ქართული, აგრედვე ქრისტიანობა.

არტანსა და ჯავახეთ შორის იყო პატარა კუთხე ჩუღურეთი, ვაკიანი და ტიტველი, როგორც არტანი და ჯავახეთი.

მაშ ასე, ზემოდ ნაამბობიდან სჩანს, რომ უცხოერის, თურქ-ოსმალოს შემოსევამ მოსწყვიტა საქართველოს ხუთი პატარა კანტონი (თემი, მაზრა, ხეობა): ფოცხოვი, ერუშეთი, არტანი, კოლა და ჩუღურეთი. ორას წელიწადზე მეტი ბატონიდა აქაურიბას ისმალო და თვისი ტლანქი ხელით ამტუტა ეს ხუთი პატარა კუთხე. ამოვარდა ენა, დაიღუპა რჯული, შეიცვალა ზნე, ჩვეულება, ჩატმა-დახურვა. მარტოოდენ სახელწოდება ზოგიერთა სოფელთა, ეკლესიანი და მათი ნანგრევებიდა მოავონებს ადამიანს, რომ ფოცხოვი, ერუშეთი, არტანი, კოლა და ჩუღურეთი ისეთივე საქართველო იყო, როგორიცაა ქართლი, კახეთი, იმერეთი, და სამეგრელო.

როგორც თავში მოვიხსენიეთ, ფოცხოვი, ერუშეთი, არტანი, კოლა და ჩუღურეთი შემოიერთა რუსეთმა 1878 წლის ომის შემდეგ, ერთ არდაგანის ოლქად შეაკოწია, მაგრამ ამ შემოერთებით ვერც არაფერი ხეირი რუსეთში ნახა, ვერც არაფერი ჩვენ ქართველებმა.

სულ სხვანაირად დატრიალდებოდა საქმე, ქართული ენა რომ გამხდარიყო საადმინისტრაციო ენად. ძველი ქართველი იდვილად შეითვისებდა ქართულს და ამ ენის შემწეობით ჩაერეოდა ევროპულ კულტურის ფერხულში.

# ს ა რ ჩ ე ვ ი:

I.

დიდებული მესხეთი გვ. . . . . 5  
ურნალი „მოამბეა“, 1912 წ., № III.

II.

ნახული და გავონილი.

- |   |    |
|---|----|
| 1. მიხეილ მეფის შვილის გარდაცვალება, გვ. . . . .    | 41 |
| „ივერია“, 1902 წ., № 15.                            |    |
| 2. მაჟმადიან ქართველების გადასახლება, გვ. . . . .   | 44 |
| „ივერია“, 1903 წ., № 97.                            |    |
| 3. მთავარ-დიაკონი ჯგარიძე, გვ. . . . .              | 52 |
| „ივერია“, 1903 წ., № 107.                           |    |
| 4. შოთა რუსთველი, გვ. . . . .                       | 59 |
| „ივერია“, 1903 წ., № 187.                           |    |
| 5. ვარძია, გვ. . . . .                              | 67 |
| „ივერია“, 1904 წ., №№ 134, 141, 146,<br>150 და 159. |    |

III.

ს ა მ შ თ ბ ლ თ ქ ვ ე ყ ა ნ ა.

- |  |     |
|--|-----|
| 1. სამცხე-საათაბაგო, გვ. . . . .                                 | 114 |
| ურნალი „ნაკადული“, 1908 წ., №№ 2, 3.<br>4 და 6.                  |     |
| 2. ჯავახეთი, გვ. . . . .   | 143 |
| ურნალი „ნაკადული“, 1908 წ., №№ 8, 10,<br>11, 12, და 1909 წ. № 1. |     |
| 3. ფოცხოვი, ერუშეთი, არტანი, ჩულურეთი, —<br>კოლა, გვ. . . . .    | 174 |
| ურნალი „ნაკადული“, 1909 წ., № 4, 5, 6.                           |     |



# ԱԼՎՃԵԱՆՇԽ ՑԽԾԵԱՀՈ.

1. Թողուլցետո. 1914 թ. օսტրոնովալո ամեազո	40	յ.
2. ամեռեցի քանչուսա, օսტրոնովալո ամեազո	70	"
3. Թուս ահբոցո Շամուլո, օսტրոն. ամեազո	26	"
4. Շուշեցու մեսեւոր, կրեպուլո . . .	45	"

Համեսպատճեա ճա լուսո ոպուդըմի Տավուազուլոնի պատճեանուն պատճեան:

№ 1. ակարու մւագարո ահբու-ցաթա եռմ- Շուշեցու, տեհ. ալեսեւոսա, ցանո . . .	5	յ.
№ 2. օսტրոնովալո եղուացեծո, շտեն. " 1)	75	"
քարտուլո ըցացուո, ցամուստո Տաճերն- նյուս ըցացեալուն ճա 2) քարտուլո քալցեծո, տեհ. լուն. ջանձաւուս ցանո		
№ 3. եղուացա, հուման ալ. յանձեցոսա որսո . . . . .	40	"
№ 4. զոն ոպո ըլուս վայցացացը? ամուց- ծուլո պուր. " անցաւուա ցանո . . .	5	"
№ 5. Շուշեցու մեսեւոր, ալ. լուրու- լուսա, ցանո . . . . .	45	"

Յիշաֆացա զամուսայց և ճ:

1. յարտուլո Յայրեցու և այտեսո լոյժետա քրե-  
      պուլո
2. սամո Քարուն Բիցնայր յարտուլո, մաքմագոնտառ-  
      ցուս: а) յարտուլո անհանո; б) յարտուլո-առածուլո անհանո,
3. լոյժեցո յարտուլո մաքմագոնցեցո Յոյրեցու.
4. պարու յարտուլոցեցո եյտո ճա նաորո, տեհ. և ման  
      վարունուսա.

5. ահեճուլոնո Քարտուլուս, Ցուտերունա նոյն լու-  
      թուլունուս պատճեա Տարու. Քարտուլունա.